

В. Хюго



ИНЭЭМТГИЙ

ХҮҮН

2

ВИКТОР ХЮГО

ИНЭЭМТГИЙ ХҮН

Дэд хэсэг

Орчуулагчийн эхээс **Цогт охин тэнгэр**
сангийн захиалгаар **Цагаан бамбарууш хэвлэлийн**
газарт 2020 онд газарт цахим хэлбэрт хөрвүүлэв.



ЦАХИМ НОМЫН САН: www.e-nom.mn



БОЛОР ДУРАН 2.0
АЛДАА ШАЛГУУР

"БОЛОР ДУРАН" ЗӨВ БИЧИГ ШАЛГАХ ПРОГРАМ

- ✓ 60 сая үгийн сантай.
- ✓ Алдаатай үгсийг илрүүлж, зөв үгсийг санал болгоно.
- ✓ Хэлзүйн тайлбар тольтой.
- ✓ Хувийн үгийн сан үүсгэх боломжтой.



ИНЭЭМТГИЙ ХҮН (Тэргүүн хэсэг)-гийг эндээс татаж
уншина уу.

2-Р ХЭСЭГ. ХААНЫ ТУШААЛААР

Нэгдүгээр дэвтэр. УРЬДЫН ЮМ УЛ БОЛДОГГҮЙ, ХҮМҮҮС ДУНДААС ХҮН ХАРАГДАНА

I. Лорд Кленчарли

1

Тэр үед хуучин бууны хугархай үлдсэн нь Кленчарли лорд байлаа.

Кромвелийн нэгэн үеийн, түшээ гүн Линней Кленчарли нь магтах нь ч биш, бүгд найрамдах улсыг хүлээн зөвшөөрсөн Английн цөөхөн тооны тайж нарын нэг байжээ. Ингэж хүлээн зөвшөөрсөн нь цаанаа учиртай. Үүнийг бүгд найрамдах улс хэсэгхэн хугацаанд тогтож байснаар тайлбарлаж болох юм. Бүгд найрамдах улс ялан дийлж байсан тэр үед Кленчарли лорд бүгд найрамдахчуудын намд хамаарагдаж байсанд гайхах юм үгүй билээ. Гэвч хувьсгал мөхөн, улсын хурлын дэглэм устсаны дараа ч мань эр хуучнаараа зүтгэсээр байлаа. Дээд төрөлт язгууртнуудад дахин сэргээгдсэн лордуудын танхимд элсэхэд алга урвуулахын адил хялбархан байжээ. Учир нь хаант төрийг сэргээн босгоход гэмээ наманчлагчдыг хэзээд дуртайяа хүлээн авдаг бөгөөд хоёрдугаар Карл ч өөрт нь эргэж байгаа хүмүүст энэрэнгүйгээр ханддаг хаантан байсан аж. Гэлээ ч Кленчарли лорд үйл явдал өөрөөс нь юу шаардаад байгааг ойлгосонгүй.

Улс орноо дахин эзэмшихээр гарч ирсэн хаанаа Англид баярын уухай хашхиран угтаж байсан тэр үед, шударга албат нар нь хаант засагтаа баяр хүргэн, түүнийг нэгэн дуугаар дэмжиж байсан тэр үед бүгд найрамдахчуудын үзлээс баяр ёслолын байдалтай няцан, улс гүрнээ сэргээн мандуулж, урьдын юм ирээдүйнх болж, ирээдүйнх нь урьдынх болж байсан тэр үед Кленчарли лорд бууж дагаар орохыг хүссэнгүй. Тэр нь сайх баяр хөөрөөс зайлсхийн сайн дураараа цөлөгджээ. Тайж болчих боломжтой байсан хэр нь цөлөгдмөл амьтан байхыг илүүд үзжээ. Ийнхүү он жилүүд урсан, өнгөрсөөр, Кленчарли ч хэдийнээ байхгүй болсон бүгд найрамдах улсад үнэнч хэвээрээ өглөх нь тэр. Ийнхүү «болчимгүй зангаасаа» болоод хүн зоны доог болсон этгээд болж хувирчээ.

Тэр нь Швейцарт дүрвэн гарч Женев нуурын эрэг дээрх хагас хэмхэрсэн нэгэн байшинд сууж авчээ. Эрэг хавийн хамгийн хүн амьтан үзэгддэггүй буйд газар Бониварын хоригдож байсан Шильон¹, Ледлог² оршуулсан Вевегийн³ хооронд өөртөө оромж олж авчээ. Түүний эргэн тойронд ширүүн салхи үлээж, үүлэн хучлагатай Альпийн уулс сүндэрлэнэ. Уулын гүн сүүдэрт, мартагдаж хаягдсан амьтан амьдарч байлаа. Явуулын хүнтэй л өдрийн од шиг дайралддаг байжээ. Энэ хүн эх нутгаасаа алс бараг өөрийнхөө үеэс гадна амьдарч байжээ. Тэр үед үйл явдлын учрыг мэдэн хужрыг тунгаадаг бүх хүнд, тогтож буй дэглэмийг ямар нэг талаар эсэргүүцэх нь огт утгагүй явдал байв. Англи аз жаргалтай байв. Хаан төр сэргэн мандсан нь нэг ёсны эхнэр нөхөр хоёр эвлэрсэн хэрэг болжээ. Хаан үндэстэн хоёр дахиа гэрлэжээ. Үүнээс илүү аятайхан, сэтгэл сэргээсэн юм юу байх вэ. Их Британи хөөрөн хөхөж байлаа. Хаантай байх гэдэг бол их юм. Тэр тусмаа ийм хаантай байх нь бүр ч их хувь заяа. Хоёрдугаар Карл бол найрсаг, сүр хүчээрээ XIV Людовик хааныг санагдуулам, өөрийн тааваар амьдарч чаддаг нэгэн байлаа. Тэр нь ёс бол ёс мэддэг, язгууртай бол язгууртай, харьяат албатдаа эрхэмлэн хайрлагдсан хүн байв. Ганновертай⁴ дайн явуулсан нь чухам юунд хэрэгтэй юм бэ гэдгийг сайн мэдэж байсан бөгөөд харин хэнд ч нууцаа задалсангүй. Дюнкеркийг⁵ Францад худалдсан нь улс төрийн их ач холбогдолтой зүйл байв. «Хараал хүрсэн бүгд найрамдах улс хорт амьсгаагаараа зарим язгууртнуудыг хүртэл хордуулсан юм» гэж өөрсдийнх нь тухай Чемберлен хэлсэн, ардчилсан санаа сэтгэлтэй тайж угj, хурдхан шиг л нөхцөл байдалд тохируулан цаг үеэсээ хоцролгүй лордуудын танхимд суудлаа эзлэх эрүүл ухаантай санааг уухайн тас шүүрэн авчээ. Үүний тулд хаанд тангараг өргөхөд л хангалттай байлаа.

Хүмүүс энэ бүх бодит явдлыг, энэхүү гайхамшигт хаанчлалыг, ард түмэнд тэнгэрлэг нигүүлслийг буцаан авчирсан өндөр төрөлт агь, жононгуудын тухай бодохдоо, Монк⁶ дараахан нь Жефрис зэрэг чухал хүмүүс хаан ширээг тойрон нэгдэж, өөрсдийн үнэнч шударга, чармайлт оролдлогынхоо төлөө Кленчарли лордын бэлхнээ мэдэж агсан хамгийн хүндэт албан тушаал, орлоготой ажил төрлөөр шударгаар шагнуулсныг бодохдоо, тэдний дунд өөрийнхөө байрыг баяр ёслолын байдалтайгаар эзлэн, дээр дээрээс нэмэн буух хүндэтгэлийг хуваалцах байсан нь ганц өөрөөс нь шалтгаалсныг санахдаа Англи улс хааныхаа гавьяагаар цэцэглэлтийнхээ оргилд

хүрч, Лондонд нэг баяр нөгөөгөөрөө солигдон, бүх хүн хөлжин, урам зоригтой болж, ордон шилтгээн хөгжилтэй, эелдэг, тансаг болсныг тунгаан бодож байх үедээ оройн гэгээ тасрахыг санагдуулам бүрэнхийд энэ бүх сайн сайхан зүйлээс хол хөндий амь зууж яваа борчуул шиг хувцасласан, хадан гэр нь ойртсон бололтой зэвхий царайтай алмайтан бөгцийсөн, хүйтнийг ч, тэнгэр аягүйдэхийг ч бараг хайхралгүй нуурын хөвөөн дээр зогсож байгаа ч юм уу эсвэл ямар ч зорилгогүй алхаж яваа, гөлийсөн харцтай, салхинд хийссэн буурал үстэй, үг дуу ч байхгүй бодолдоо дарагдсан гоонь цөлөгдмөлийг хэрэв санамсаргүй санадаг юм аа гэхэд инээдээ барьж чадахгүй байсан биз ээ.

Энэ хөгшин бол галзуу солиотойн амьд биелэл байлаа.

Кленчарли лорд ямаршуухан болчхоод яаж явахыг нь бодоод инээмсэглэнэ гэдэг бол тэр хүмүүсийн хүлцэнгүй байдлыг үзүүлнэ. Зарим нь эгдүүцэн зэвүүцнэ. Шууд улаан цайм шоолдог хүмүүс ч байв.

Ийм хүйтэн хөндий авир гаргасан нь тохитой томоотой хүмүүсийн зэвүүг хүргэсэн нь ойлгомжтой.

Кленчарли лордын бурууг хөнгөлсөн нэг юм нь тэр хэзээ ч ухаанаараа гийгүүлж байгаагүйг хүлээх хэрэгтэй юм. Бүх нийтийн шийтгэх тогтоол ч ийм байлаа.

Ямар нэг юманд дөргүй үхэр шиг зүтгэсээр байгаа хүнийг харахад эвгүй л байдаг. Регулийг дуурайгчид олны талархлыг хүлээдэггүй агаад хүн зон ерөнхийдөө тэдэнд доогтойгоор ханддаг. Ийм зөрүүд зан ойшоохгүй байгаатай адил бөгөөд, эрүүл ухаантай хүн үүнийг шоолох нь түмэн зөв.

Явж явж ийм нөр хичээнгүй, ийм нугаршгүй зан гэдэг маань буянт үйл биш гэж үү?

Аль нэгэн хүн өөрийн цэх шударга зан, амь биеэ огоорон зүтгэхийг хэмээс хэтрүүлэн онцлох явдалд нэрэлхүү зангийн чамлалтгүй хувь байдаггүй гэж үү? Энэ бол зүгээр л нэг маяг гаргаж байгаа хэрэг. Өөрийгөө сайн дураараа ганцаардуулан цөлөхдөө тултал юмыг хэтрүүлэх хэрэг юу байна? Мэргэн хүн, юуг ч дэгсдүүлэх хэрэггүй гэсэн зарчмыг эрхэмлэнэ. Хэрэгтэй гэж үзвэл татгалзаж, буруушааж болохгүй яах вэ, гэхдээ үүнийг хийхдээ тунг нь тааруулж, «Эзэн хаан мандтугай!» гэж зогсолтгүй өндөр дуугаар тунхаглан хийх хэрэгтэй. Жинхэнэ буянт үйл гэдэг бол бодлоготой хэрсүү байхыг хэлнэ. Унах ёстой байсан болоод л унадаг бөгөөд амжилт олох ёстой байсан болоод л амжилт олдог. Тэнгэрийн бошигт өөрийн зорилго бий, тэр нь тэнцэх хүнээ шагнаж байдаг. Та арай энэ хэрэгт өөрийгөө тэнгэрээс илүү гэж боддог юм биш биз дээ? Учир байдал маш тодорхой болсон үед, нэг дэглэм нөгөөгийнхөө оронд гарч ирсэн үед, хаана үнэн, хаана худал, хаана сүйрэл, хаана ялалт байна гэдгийг барин тавин амжилттайгаар олж тогтоочихсон байхад эргэлзэж тээнэгэлзэнэ гэж байж болохгүй юм. Ухаантай хүн бол өөрт нь ашигтай, садан төрөл шиг нь байлаа ч гэсэн тэр хүн мэдээж эл бодлын үүднээс бус ялагчийн мэдэлд өөрийгөө бүрэн өгч, олон түмний тусын төлөөнөө дийлж гарсан талд нь л нэгддэг.

Хэрэв хэн ч хүчин зүтгэхийг хүсэхгүй бол улс гэдэг маань юу болох билээ? Бүх юм л хөдөлгөөнгүй зогсож таарна. Шударга төвшин иргэн бүр байсан байр, суусан сууриндаа үлдэх ёстой. Нандин дур хүслээ, талтай байдгаа гаргуунд нь гаргаж чаддаг бай. Хэргэм тушаал бол түүнийг дүүргэхийн тул байдаг юм. Амь биеэ өргөх хэрэгтэй. Нийгмийн үүргээс буцаж няцахгүйд л жинхэнэ үнэнч шударга харагдана. Түшмэл хүн дур мэдэн ажлаа орхивол улсыг хөдөлгөөнгүй болгочиход хүрнэ. Та сайн дураараа цөллөгт явж байна уу? Тун ч тоогүй еэ. Та биеэрээ дуурайл үзүүлье гэж хүссэн бололтой ёо доо? Ямар их ихэрхүү зан бэ, та минь! Та өдөж

байна аа даа! Ямар ичгүүрээ алдсан явдал вэ! Та өөрийгөө ер нь хэн гэж бодоод байна аа? Бид танаас дутуугүй гэдгийг бодоорой. Гэвч бид албан тушаалаа хаяж явахгүй. Хүсдэг л юм бол, бид ч бас үг авахгүй зөрүүдлэн, хэний ч мэдэлд орохгүй байж, таныхаас ч илүү муу юм хийж чадах л улс шүү. Гэвч бид хэрсүү ухааныг илүүд үзэн эрхэмлэнэ. Яагаад гэвэл би Трималхион⁷ гэдэгт л байна. Катон⁸ байж чадахгүй хүн гэж та бодож байна уу? Ямар тэнэг явдал вэ?

Хэзээ ч, 1660 оных шиг юмны байр байдал ийм тодорхой ойлгомжтой байсангүй. Бас хэзээ ч, дуулгавартай хүний хувьд зан явдлынх нь чиг шугам ийнхүү аяндаа тов тодорхой болж байсан нь үгүй.

Англи улс Кромвелоос⁹ салж амарчээ. Бүгд найрамдах улсын үед олон олон хууль бус юм үйлдэгджээ. Их Британи Европт тэргүүн байр суурийг олж авсан байлаа. Гучин жилийн дайны¹⁰ дүнд Герман бууж өгч, Фрондын¹¹ ачаар Францын хүч суларч, Браганц вангийн тусламжаар Испанийн сүр хүчийг бууруулжээ. Кромвель, Мазараныг¹² эрхэндээ оруулан; бүх гэрээ бичигт Английг ивээгч маань гарын үсгээ францын хааны мутрын үсгээс дээр тавьдаг болж; Нэгдсэн муж улсад найман саяын дайны төлбөр ногдуулж; Алжир, Тунис хоёр дарлалд нэрвэгдэж; Ямайкыг эзлэн, Лиссабоныг номхотгон, Барселонд Испани, Франц хоёрын өрсөлдөөн ширүүсэн, Неополь хотод Мазаньелогийн бослого гарч, Португалийг Англид нэгтгэн, Гибралтарийн хоолойгоос Кандий хүртэлх далайн эргийг берберүүдээс цэвэрлэжээ. Далайн эзэмшлийг зэвсгийн хүч, худалдаа гэсэн хоёр аргаар тогтоож, 1653 оны найман сарын арванд, өөрийгөө «усан цэргүүдийн нагац» гэж нэрлэсэн, гучин гурван тулалдааныг ялж гарсан, испанийн флотыг сүйрүүлсэн, хөгшин адмирал Мартин Гапперц Тромп английн флотод ялагджээ. Англи улс Атлантын далайд испанчуудыг, Номхон дөлгөөн далайд голландчуудыг, Газрын дундад тэнгист италичуудын омгийг дарж, усан замын гэрээгээр¹³ бүх далай тэнгисийн эрэг хавийн газраар өөрийн ноёрхлыг тогтоож, далайд ноёрхол тогтоосноороо бүх дэлхийг гартаа атгажээ. Голландын туг далайд, английн тугт хүлцэнгүйгээр баяр хүргэн, Франц улс элчин Манцинигаараа дамжуулан Оливер Кромвелийн өмнө өвдөг сөгдөн Кромвель өөрөө Кале, Дюнкерк хоёроор бөмбөг мэт наадан, бүх тивийг чичрүүлэн айлгаж, дураа хүрвэл энх тайвныг албадан тогтоож, дургүйгээ хүрвэл дайн зарлан, газар сайгүй английн далбаа намиран дэрвэлзэж, английн ивээгчийн хуяг дуулга болсон ганц хороо, Европ тивд бүхэл бүтэн армиас илүү айдсыг төрүүлдэг байлаа. Кромвель: «Би английн бүгд найрамдах улсыг, ромын улсыг хүндэлж байсан шигээр хүндлээсэй хэмээн хүсэж байна» гэж хэлсэн байдаг. Ариун нандин юм юу ч үлдсэнгүй, үг хэлэх, хэвлэн нийтлэх чөлөөтэй болж, гудамж талбайд аманд орсноороо бурж, ямар ч

шалгалт хяналтгүйгээр бүгдийг хэвлэж, хаан ширээнүүд ганхан, Стюардууд нэг хэсэг нь болж асан Европын бүх эзэн хаант дэглэм замбараагаа алдан сандарч эхэлжээ. Гэтэл чинь, эцэст нь Англи эл үзэн яддаг дэглэмийг түлхэн унагааж, өөрөө уучлал үздэг байна.

Зөөлөн хоёрдугаар Карл, Бредийн¹⁴ тунхаглалыг соёрхлоо. Хааныхаа ачаар Англи улс гентингдоны шар айраг исгэгчийн хүү¹⁵ арван дөрөвдүгээр Людовикийн тэргүүн дээр гишгэчиж байсан үеэ мартжээ. Англи урьдын үйлдсэн их нүгэл хилэнцээ наманчлан, чөлөөтэй амьсгалах боллоо. Бидний дээр өгүүлсэнчлэн, хүн бүхний зүрх баяраар бялхан, хаан алаачид зориулан босгосон дүүжлүүр баяр хөөрийг улам нэмнэ. Хуучныг сэргээх бол инээмсэглэл агаад, ямар ч дүүжлүүр сэтгэгдлийг гутаахгүй. Олон нийтийн сэтгэл санааг засах хэрэгтэй биз дээ. Үг дуулахгүй байдал арилж, хаандаа үнэнч шударга байдал тогтжээ. Өнөөгөөс эхлэн дуулгавартай харьяат байна гэдэг, эрх тушаалд шунасан эрмэлзлэгээр хэмжээлэгдэх болов. Хүн бүр л улс төрийн солиорлоос сэхээ орж, хувьсгалыг элдвээр муучлан, бүгд найрамдах улсыг, хүн бүрийн амнаас Эрх, Эрх чөлөө, Дэвшил гэсэн том том үг салахгүй байсан үеийг шоолно. Эрүүл ухаанаа эгүүлэн олсон нь шагшин магтам үзэгдэл байлаа. Англи муу зүүд нойрноосоо сэргжээ. Энэ төөрөгдлөөс сална гэдэг ямар их аз вэ! Үүнээс илүү боломжгүй явдал гэж байж болох уу даа? Хэрэв хэн нэг тэнэмэл, аль нэг хөндлөнгийн хүн л дүрэм журам болгоныг гаргаад байвал юу гэгч болох байсан бэ гэдгийг та төсөөлөөд үзээч. Гэнэт цөмөөрөө л засгийн эрх баригчид болчих байсан болов уу? Улс орноо харьяат ард нь удирдана гэж байж болох уу даа, энэ чинь? Харьяат ард гэдэг маань хөллөсөн морьд юм. Гэвч хөллөсөн морьд бол дэлбэгч биш шүү дээ. Асуудлыг санал хураалтаар жолоодон шийднэ гэдэг салхины зоргоор хөвнө гэдэгтэй утга адил бус уу? Та төрийн байгууллагыг арай үүл шиг сэвсгэр тогтворгүй юм болгохыг хүсэхгүй биз дээ? Замбараагүй явдал журам дэглэмийг бий болгохгүй. Хэрэв уран барилгач нь эмх замбараагүй гуай байвал, барилга байшин нь Вавилоны цамхаг¹⁶ байж таарна. Үгүй, үгүй энэ улигт эрх чөлөө гэдэг үнэхээр сэтгэл зовоосон зүйл. Би хөгжиж цэнгэхийг хүсэж байгаа болохоос төр улсыг жолоодох гэсэн юм биш. Санал өгсөөр байгаад залхлаа, одоо бүжиглэмээр байна. Энэ бүгдийг эрхлэн хийдэг хаан байна гэдэг юутай азтай хэрэг вэ! Үнэндээ, энэ бүх хөдөлмөрийг өөртөө авч байдаг хаан ямар уужим сэтгэлтэй вэ. Түүнээс гадна хаан зохих ёсны хүмүүжилтэй бөгөөд энэ бүгдийг амжуулж дөнгөнө. Энэ бол түүний ажил! Энх тайван,

дайн, хууль тогтоомж, санхүү, ард түмэнд ямар хүртээл байна аа? Мэдээжээр ард түмэн албан татвар төлж, цэрэгт алба хаах нь гарцаагүй бөгөөд үүндээ сэтгэл ханах ёстой билээ. Ард түмэнд улс төрийн амьдралд оролцох боломж ч байна. Тэдний цөм дундаас улсын хоёр гол хүч арми, төсөв хоёр гардаг. Албан татвар, цэрэг байна гэдэг тийм бага юм гэж үү? Түүнд өөр юу хэрэгтэй байх вэ? Ард түмэн бол цэргийн түшиг тулгуур, сан хөмрөгийн ч түшиг тулгуур нь билээ. Гайхамшигтай үүрэг! Харин түүний өмнөөс хаан төр байдаг. Ийм ач тусыг тэр хариулах хэрэгтэй биз дээ. Алба, татвар, хааны санд өргөх гувчуур гэдэг бол ард түмнээс хаандаа өгч байгаа цалин юм. Ард түмэн цус, мөнгөө өөрсдийг нь захирахын тулд өгч байдаг. Өөрөө өөрсдийгөө удирдана гэдэг ямар дэмий санаа вэ? Ард түмэнд хөтөлж явдаг хүн зайлшгүй хэрэгтэй. Ард түмэн бол мунхаг харанхуй, тэр бүү хэл сохор байх ёстой. Сохор хүнд нохой байдаг. Харин ард түмэнд хаан хэмээх сохор ард түмний нохой нь байхыг зөвшөөрсөн арслан байдаг. Ямар ч сайхан сэтгэл вэ дээ! Гэхдээ ард түмэн яагаад мунхаг харанхуй байдаг вэ? Яагаад гэвэл ийм л байх хэрэгтэй. Харанхуй бүдүүлэг байна гэдэг буянт үйлийг хамгаалагч юм. Ирээдүй байхгүй хүн нэр алдрыг хүсдэггүй юм. Юм мэдэхгүй хүнд үзэж харах боломжийг нь хааж, тэгэхийн хамт зүсэн бүрийн шунал тачаалыг нь үгүй болгож байдаг аврагч харанхуйд байдаг. Эндээс л мэдэхгүйн зовлон гарна. Уншиж байгаа хүн сэтгэн бодно, сэтгэн бодож байгаа хүн тунгаан бодно. Тэгвэл ард түмэнд тунгаан хэлэлцэхийн хэрэг юу байна гэсэн асуулт гарна аа даа? Тунгаан хэлэлцэхгүй байх нь түүний үүрэг бөгөөд тэгэхийн чацуу аз жаргал нь юм. Энэ үнэн бол маргахын аргагүй зүйл. Нийгэм үүн дээр нь тулгуурлана.

Ийм маягаар Англид нийгмийн эрүүл сургаал дахин дийллээ. Тэгснээрээ ч улс үндэстэн алдсан нэр хүндээ эргүүлэн авчээ. Түүнтэй нэг зэрэг уран яруу зохиолд шимтэх болов. Шекспирийг тоохгүй жигшин, Драйденийг магтан шагшдаг болов. «Драйден¹⁷ бол Англи болон эрин зууныхаа гайхамшигт яруу найрагч» хэмээн «Ахитофелийг» орчуулсан Эттербери хэлжээ. Энэ бол Авраншийн хамба Гюэ «Алдагдсан диваажинг» зохиогчийн нэр хүндийг дайран, харааж зүхсэн Созелийг бичсэн үе байлаа. «Энэ Мильтон мэтийн шалихгүй амьтныг судална гэж байх уу даа, та минь!» гэжээ. Бүх юм сэргээгдэн мандаж, бүх юм байр байрандаа дахин тавигдаж байлаа. Драйден дээр нь гарч Шекспир доор нь орж, хоёрдугаар Карл хаан суудлаа эзлэн, Кромвель дүүжлүүрт очжээ. Англи өнгөрсөн хэдэн жилийнхээ гутамшиг, ичгүүр, ухаангүй явдлыг цагаатгах гэж хичээж

байлаа. Үндэстний хувьд, хаант засаг улс орны хэрэгт журам дэглэмийг тогтоож, утга зохиолын талаар мэдлэгтэй болгож өгнө гэдэг их аз юм.

Ийм сайн үйлийг үнэлэхгүй байж болно гэдэгт итгэхэд бэрхтэй. Хоёрдугаар Карлаас нүүр буруулж, дахин сэргэсэн хаан ширээндээ ариун сэтгэлээр заларсны ачийг хуншгүй зангаар хариулна гэдэг чинь жигшүүртэй явдал бус уу? Кленчарли лорд төвшин томоотой хүн бүрийн урмыг даанч дэндүү хугалжээ. Улс орныхоо аз жаргалд халаг хоохой болно гэдэг ямар зэвүү хүрмээр юм бэ?

1650 онд улсын хурлаас доорх үгтэй тангаргийн эхийг баталсан нь мэдээжийн юм. Үүнд: «Эзэн хаан, ван, ноёнгүй бүгд найрамдах улсад үнэнч явахаа тангараглая» гэжээ. Кленчарли лорд эл аймшигт муухай тангаргийг өргөсөн гэдгийн улмаас, хаант улсынхаа гадна амьдарч тэгэхийн хамт, хүн бүгд л хөөрөн баярлаж, сул чөлөөтэй аж төрж байхад өөрийгөө сэтгэл ханамжгүй байх эрхтэй хүн гэж бодож байлаа. Сүйрдгээ сүйрч булшлуулсан юмны хойноос гутран эмгэнэлт дурсгалыг нь санаандаа хадгалсаар л байв. Нэгэнт байхгүй юманд ингэтлээ дасна гэдэг гайхалтай!

Түүнийг зөвтгөх юм байсангүй. Түүнд овоо талтай ханддаг байсан хүмүүс хүртэл сайх зөрүүдээс нүүр буруулжээ. Анд нөхөд нь, түүний бүгд найрамдахчуудын эгнээнд орсныг зөвхөн бүгд найрамдахчуудын сул талыг л ойрхноос улам таньж мэдэхийн тулд юм, харин цагаа болохоор, хааныхаа ариун эрх ашгийг хамгаалан тэдэнд үхлийн цохилт өгөх нь лавтай хэмээн бодоод удаан хугацаагаар, түүнийг хүндэтгэдэг байжээ. Энэхүү дайсны ар талаас дайрах «таарамжтай цагийг» хүлцэн хүлээнэ гэдэг зүйг баримтлан төвийг сахиснаа үзүүлэхийн нэг хэлбэр. Бүх хүмүүс Кленчарли лордыг зөвхөн энэ санааг л удирдлага болгоно гэж үзэж байсан агаад зан авирынх нь аль олигтой талыг магтахад ч бэлэн байлаа. Гэвч түүний бүгд найрамдахчуудын талыг хачин гайхмаар дагасны улмаас энэ сайхан санаагаа арга буюу орхиход хүрэв. Үзтэл Кленчарли лорд тууштай бүгд найрамдахч буюу өөрөөр хэлбэл тэнэг амьтан байжээ.

Хүлцэнгүй хүмүүс түүний ингэж хачин загнасныг нь гэнэн хөнгөнөөр ч юм уу зөрүүдээр ч юм уу, эсвэл зөнөг залгасны чухам алинаар нь тайлбарлахаа мэдэхгүй тээнэгэлзэнэ.

Шударга төвшин улс явдгаараа л явав. Тэд тэрсүүд этгээдийг хараан зүхнэ. Хүнд мунхаг ухаан байж бололгүй яах вэ, гэхдээ хэмжээ хязгаар гэж байх хэрэгтэй. Молхи бүдүүлэг, ааш муутай

байж болно, харин үймээн дэгдээгч байж болохгүй. Ер нь явж явж энэ Кленчарли лорд гэдэг чинь хэн юм бэ? Урваач. Тэр нь язгууртан ноёдын талыг, нөгөө эсрэг талын ард түмний сүрэгт нийлэх гэхдээ орхижээ. Ингэхлээр энэ бүгд найрамдах үзэлтэн бол эх орноосоо урвагч мөн. Тэр нь чадалтайгаас нь нүүр буруулан урваж, сул доройд нь үнэнч үлдсэн нь үнэн. Түүний нүүр буруулан орхисон тал нь ялагч байж, нийлж сүлбэлдсэн тал нь ялагдагч байсан нь ч үнэн. Ийнхүү «урван тэрсэлснээрээ» орон гэрээ, тайж угсаагаа, эх нутгаа гээд бүх юмаа алдсан нь ч үнэн. Тэгээд тэр юу хожоо вэ? Хачин амьтан нэртэй болж, цөллөгт амьдрахаас өөр аргагүй болжээ. Энэ юуг харуулж, юуг нотолж байна вэ? Түүний мулгуу гэдгийг л! Ямар ч маргаангүй шүү.

Урвагч, үүний зэрэгцээ гэнэн байна гэдэг байдаг л зүйл.

Дураараа л мулгуут, харин бусдад өөдгүй дуурайл бүү үзүүл. Тэнэгүүдээс дуулгавартай байхаас өөр юуг ч шаардахгүй, тийм байсан цагт л тэд өөрсдийгөө хаант төрийн тулгуур гэж үзэж болно. Энэ Кленчарли ер бусын явцуу үзэлтэн хүн байжээ. Тэр нь хэзээ язааныхаараа л хувьсгалын гоё хоосон санаанд харалган болжээ. Тэгээд бүгд найрамдах улсад сэтгэл татагдсанаасаа болж, хөсөр хаягджээ. Тэр нь улс орныхоо нэр төрийг гутаажээ. Түүний баримталсан үзэл нь ёстой итгэлийг эвдсэн хэрэг байв. Тэр нь тарваган тахлаас зугтах мэт нутаг нэгтнүүдийнхээ аз жаргалаас зулбажээ. Сайн дураараа цөлөгдсөнд нь бүх нийтийн хангалуун байдлыг эсэргүүцсэн ямар нэг эсэргүүцэл байлаа. Хаант төрийг тахал шиг үзсэн бололтой. Хаант төрийн ялалтын баяр наадмын хөгжөөн цэнгэлийн дэвсгэр дээр, тарваган тахлын хөл хорьсон байрын орой дээрх хар туг шиг нэг л баргар зэвүүн харагдана. Яаж тэр вэ? гэвэл улс үндэстнийг сэргээн, шашныг мандуулсан журам дэглэмийг тогтоосон хүмүүсийн өмнө үхээнц дүнсгэр байдал гаргаснаараа! Энэхүү амгалан тэнэгэр байдлыг будилаантуулснаараа!

Аз жаргалтай Англи гүрнийг эгдүүцэн зэвүүцсэнээрээ! Тогтуун хөх тэнгэрт хар толбо болсноороо! Аюул заналыг санагдуулснаараа! Улс үндэстний хүсэл эрмэлзлийг сөрснөөрөө! Өчнөөн төчнөөн хүн «за» гэж хэлж байхад «үгүй» гэснээрээ! Энэ нь инээдтэй юм биш гэхэд булай явдал байж таарах байсан юм. Энэ Кленчарли, Кромвелтэй хамт эндүүрч, төөрч болох юм тэгэхдээ харин Монктой хамт буцах хэрэгтэй гэдгийг ойлгосонгүй. Монкийг хар л даа. Тэр бүгд найрамдах улсын армийг захирч байв. Хаан ширээнд далдуур үнэнч байдгийг нь мэдсэн хоёрдугаар Карл

цөллөгөөсөө түүнд захиа бичжээ. Эрэлхэг зоригийг овжин зальтай хосолж чаддаг Монк эхлээд санаа зорилгоо нууж байснаа дараа нь гэнэтэд цэрэг цуухаа толгойлон, үймээн гаргасан улсын хурал руу дайран орж, хааныг ширээнд нь залаад нийгмийг аварсныхаа төлөө Альбемарлийн ван хэргэмээр шагнуулжээ. Тэр нь хөрөнгө зөөртэй болж амьдарч асан цаг үеэ мөнхөд алдаршуулаад зогсоогүй, хүндэтгэлийн татуурган одонтойн хувьд Вестминстерийн сүмд оршуулна гэж найдаж болохоор болжээ. Шударга албат, англи хүний алдар гавьяа ийм ажээ. Кленчарли лорд үүргээ ийм нарийн ухамсарч чадсангүй. Тэр нь юу ч хийхгүй цөллөгийг л илүүд үзжээ. Хий хоосон үгээр л сэтгэлээ хангаж байв. Түүнийг бардам омог нь барин таглачихжээ. «Дотоод сэтгэл» «эрхэм зэрэг» гэх мэт үг бол эцсийн бүлэгт зөвхөн л үг шүү дээ. Юмыг алсуур нарийн харах хэрэгтэй.

Чухам энэ л алсын хараа Кленчарли лордод байсангүй. Харалган хүн байж. Ямар нэг хэрэг явдалд оролцохоосоо өмнө, дандаа л түүнд нүдээ дасган, ямар үнэртэйг нь мэдэж авахыг л хүсдэг байжээ. Эндээс л нөгөө бүх утгагүй атгаг санаа нь гарч ирнэ. Ийм авиргүй зантай хүн төрийн зүтгэлтэн байж болохгүй. Чанга шаардлагатай сэтгэл бол эмгэг өвчин болж хувирдаг. Ариун сэтгэлтэй хүн, өрөөсөн гартай хүн гэсэн үг бөгөөд төрийг барьж чадахгүй. Түүнд аз дайрах ч үгүй, тайган мөн. Атгаг санаанаас болгоомжил, таныг мөн ч хол аваачна даа. Тогтсон үзэлдээ ухаангүй үнэнч байх нь зоорины шат шиг л доош нь аваад орчихно. Нэг, хоёр, гурван гишгүүр алхтал та аль хэдийнээ харанхуйд умбачихсан байх вий. Цовоо сэргэлэн нь буцан өгсөж, эргүү донгио нь доороо үлдэнэ. Өөрийн дотоод сэтгэлийг халдашгүй болтол нь хөнгөн хуумгайгаар шийдэж болохгүй. Улс төрийн үзэл бодлоо ямагт гуйвалтгүй байлгана гэдэг хамгийн баргар өнгийг үзүүлж болно. Тэгэхэд хүрвэл та баларлаа гэсэн үг. Кленчарли лорд яг л ингэсэн хүн. Зарчим гэдэг эцэст сүүлдээ хүмүүсийг ёроолгүй ангалд аваачдаг ажээ.

Тэгээд одоо нуруугаа үүрчхээд л Женев нуурын эргээр алх л даа. Сайхан ажил байгаа биз!

Сайх цөлөгдмөл эрийн тухай хааяа Лондонд ярилцдаг байлаа. Сурвалжит нийгмийн өмнө тэр нь нэг ёсны хэрэгтэн болжээ. Зарим нэг нь нааштай байхад, нөгөө зарим нь түүнийг эсэргүүцнэ. Хэргийг шүүн хэлэлцэхдээ тэнэгэрсний нөхцөл байдлын буруу нь түүний тэнэгтэж мулгуудсанаас гэж үзэж байлаа.

Бүгд найрамдах талыг баримтлагч асан олон хүн Стюартын талд орсон нь зөвхөн магтаал л хүртжээ. Тэд лордыг ялимгүй муу хэлж байсан нь зүй ёсны хэрэг. Тахимдуу дагуу улс зөрүүдээ үзэж

чаддаггүй шүү дээ. Ордонд чамлалтгүй хэргэм зэрэгтэй болсон ухаалаг хүмүүс түүний сөрөх зан авирт нь залхаж гүйцээд «Түүнд дэндүү багыг амласан болохоор л бидэнтэй нийлээгүй юм. Тэр нь тэргүүн түшмэл больё гэсэн чинь хаан түүний нь Хайд лордод хайрлачихсан юм» гэж ярьцгаана. Түүний «унаган андуудын» нэг «Өөрөө надад ингэж хэлсэн шүү» гэж дажгүй батална. Хэдийгээр зожиг амьдралтай ч гэлээ, Линей Кленчарли, Лозаннд суудаг Эндрью Броутон мэтийн хуучин хааныг алагч оргодлуудтай хааяа нэг уулзахдаа зарим нэг цуу үгийг сонсдог байв. Кленчарли хариуд нь, бүрмөсөн дүйнгэтэн мэнэрсний шинж мөрөө л зөвхөн хавчдаг байв.

Нэг удаа, энэ хөдөлгөөнөө гүйцээж байгаа мэт зөөлхөн дуугаар «Үүнд итгэж явдаг хүмүүсийг өрөвдөх юм» гэсэн гэдэг.

Хоёрдугаар Карл зөөлөн хүн болохоор түүнийг хайхардаггүй байлаа. Хоёрдугаар Карлын хаанчлалын үеийн Английн амар тайван нь бүр хэтэрч, нэг ёсны үлгэрийн гайхамшиг байв. Цагийн эрхэнд харлаж бүдгэрсэн зургийг дахин чийдэж өнгө оруулах лугаа адил, хуучныг сэргээснээр бүх өнгөрч ул болсон юм ил гарах нь тэр. Хуучны сайн сайхан хэвшил дахин амь орж гоолиг хүүхнүүд залж захирдаг боллоо. Эвелин¹⁸ үүнийг дэвтэртээ юу гэж тэмдэглэснийг уншицгаая: «Садар самуун явдал, шүтээнийг доромжлох нь бурхан тэнгэрийг тоохгүй байгаа хэрэг. Би ням гарагийн орой хааныг Кливленд, Портсмут, Мазарини болон өөр хоёр гурван аальгүй хүүхнүүдтэй байхыг харлаа. Бүгдээрээ л хагас нүцгэн амьтад тоглохоор цуглаж байгаа нь тэр ажээ». Энэ тэмдэглэлд илэрхий дургүйцсэн өнгө цухалзаж байгаа биз. Гэвч Эвелин гэдэг уймраа пуритан маань бүгд найрамдахчуудын үзэл санаанд автагдсан хүн байв. Тэр нь хаад дүндээ элбэг тансгийн дэвшилд нэмэр болж байгаа өөрсдийн хөлтэй найр наадмаараа ямар үлгэр жишээ үзүүлж байгаагийн ач холбогдлыг үнэлсэнгүй. Шалиг самууны ашиг тусыг ойлгосонгүй. Хэрэв та үзэсгэлэн гоо хүүхэнтэй байя гэвэл шалиг самууныг бүү устга, эс бөгөөс эрвээхэйд үнэн голоосоо хайртай мөртөө авгалдайг нь хядаад байдаг тэнэгүүдтэй адил болчихно.

Хоёрдугаар Карл хаан, бид дээр өгүүлсэнчлэн Кленчарли хэмээх нэртэй үймээн гаргагч байдгийг бараг ажиглахгүй явж ирсэн бол харин хоёрдугаар Иаков илүү сэрэмжтэй хаан байв. Хоёрдугаар Карл зөөлөн захирдаг байсан нь түүний ааш маяг байлаа. Төрийн жолоог барихад энэ нь хор болоогүй гэдгийг хүлээх хэрэгтэй. Заримдаа салхийг ашиглахад зориулсан олс чангалж байгаа усан цэрэг, нэг гогцоог нь салхи өөрөө чангална биз гээд гар хүрэлгүй орхичихдог. Энд л хар салхи хүн хоёрын тэнэглэл гарч ирж байгаа юм.

Хоёрдугаар Карлын хаанчлалд ийм нэгэн сул гогцоо байсан авч түдэлгүй чангаас чанга татагдсан билээ.

Хоёрдугаар Иаковын үед хувьсгалаас үлдсэн бүх юмыг тууштайгаар боомилон устгах хавчлага эхлэв. Иаков хаанд жинхэнэ хаан шиг байя гэдэг бахдууштай хүсэл төржээ. Түүний бодлоор хоёрдугаар Карлын хаанчлал бол хуучныг сэргээхийн ноорог тойм төдийхөн байж. Хоёрдугаар Иаков хуучны дэг журмыг бүрэн бүтнээр нь эгүүлэн тогтоохыг хүсжээ. 1660 онд дөнгөж аравхан хаан алаачийг дүүжилсэндээ харамссан гэдэг. Тэр нь үнэндээ ч «хатуу

төрийг» тогтоож чадсан юм. Түүний үед хатуу зарчим ялан дийлжээ. Сэтгэл хөдлөм чалчихыг юунаас ч дээгүүр тавьж, юуны өмнө нийгмийн эрх ашгийг бодсон жинхэнэ хууль зүй ноёрхох боллоо.

Энэхүү хамгаалсан хатуу арга хэмжээ улс орны эцэг болсон хүнийг ил гаргажээ. Тэр нь хууль зүйг Жефрист, үнэн мөний шүүхийн илдийг Киркд итгэмжлэн өгчээ. Сайх шамдуу хурандаа айлган сүрдүүлсэн залхаалтыг олшруулж чаджээ. Нэг бүгд найрамдах үзэлтнийг дүүжлэхдээ дүүжлүүрээс гурав дахин гаргаж, гаргах тоолондоо «Бүгд найрамдах үзлээсээ татгалзаж байна уу?» гэдэг байж. Өөдгүй амьтан ч яах вэ, нөгөө «үгүй» гэдгээ хэлж боомилуулна. «Би түүнийг дөрвөн удаа дүүжилсэн» гэж Кирк сэтгэл ханамжтай ярьдаг байжээ. Цаазаар аваачихыг сэргээсэн нь төр хүчтэйн тэмдэг яриангүй мөн. Хүүгээ Монмутын эсрэг дайнд явуулсан боловч, гэртээ хоёр үймээн гаргагчийг орогнуулж байсан Лайль хатагтай цаазлуулжээ. Нэг шүтлэгтэй авгайг өөрийг нь орогнуулж байсныг шударгаар хүлээж зүрхэлсэн үймээн гаргагчийг өршөөж, авгайг түүдэгт шатаажээ. Нэг хотод Кирк, бүгд найрамдах талыг баримталсан нүгэл хилэнцийг нь мэдэж буйгаа үзүүлж арван хоёр иргэнийг нь дүүжилжээ. Хэрэв Кромвелийн үед гэгээн хутагтуудын чулуун баримлын хамар, чихийг хуга цохиж байсныг санахад хүрвэл энэ ч бас яриангүй хууль ёсны хариулал байлгүй яах вэ. Жефрис Киркийг шилэн сонгож чадсан хоёрдугаар Иаков хачин их шүтлэгтэй хаан байв. Муухай царайтай, эрэмдэг эмсийг нууц амрагаа болгон, тачаалаа дарж чадаад, Шемин ламтнаас зусарч зуйрганаараа бараг дутахааргүй боловч, гал цогоороо хол давж гарсан бурхны ном айлдагч Ла Коломбьер ламтныг сүсэглэдэг байлаа. Энэ ламтан амьдралынхаа эхэн хагаст хоёрдугаар Иаковын зөвлөгч, харин үлдсэн хагаст нь Марий Алакоkyг¹⁹ урамшуулан өдөөгч байснаараа алдаршжээ. Сайх сүсэг бишрэлийнхээ ачаар хоёрдугаар Иаков сүүлд нь цөллөгийг нэр төртэйгөөр туулан өнгөрүүлж, Сен-Жерменд ганцаар хоригдохдоо эзэн хааны сэтгэлийн чангын жишээг үзүүлж иезуит²⁰ нартай ярилцдаг байлаа.

Энэ хаан Линней Кленчарли лорд мэтийн үймээн дэгдээгчдэд ямар нэг талаар анхаарал тавих ёстой нь ойлгомжтой. Үе уламжилсан тайж угсаа нь өөртөө ямар их боломжийг агуулж байдгийг бодоод үзсэн ч, хоёрдугаар Иаков өчүүхэн ч эргэлзээгүйгээр сайх лордын эсрэг дуртай арга хэмжээг авахад бэлэн байсныг хэлэх юун.

II. Дэвид-Дерри-Моир Лорд

1

Линней Кленчарли лорд бүх насаараа хөгшин, цөлөгдмөл, ад үзэгдсэн амьтан байсан юм биш ээ. Тэр нь цагтаа залуу насыг дайран гарч, тачаан дурлаж явалгүй яах вэ.

Гаррисон, Прайд нарын хэлснээр бол Кромвель залуудаа хүүхэн шуухан, баяр цэнгэлд дуртай байсан нь мэдээж билээ. Зарим үед иймэрхүү юманд дур татагдах нь (эмэгтэйчүүдийн асуудлын нөгөө тал) залуу эрд ирээдүйн үймээн дэгдээгч нуугдаж байгааг нотолдог шүү дээ.

Ингэхлээр, Кленчарли лорд Кромвелийн адил алдаа гарган, төөрөлдөн будилж явжээ. Түүнийг хууль бус хүүтэй байсныг бүх хүн мэддэг байлаа. Бүгд найрамдах улсыг түлхэн унагаагдаж байсан өдрүүдэд орчлонд мэндэлсэн тэр хүү, эцгээ цөллөгт явж байхад Англид төржээ. Хүү эцгээ хэзээ ч хараагүйн учир нь энэ, Кленчарли лордын хууль бусаар төрсөн удам хоёрдугаар Карлын ордонд хиа болон өсжээ. Түүнийг Дэвид Дерри-Моир лорд хэмээн нэрлэсэн бөгөөд, эх нь ордонд нэртэй хатагтай байсны учир, лорд хэмээх хэргэмийг «хүндэтгэснээс» үлдээжээ. Кленчарли лорд Швейцарт дорвигүй зожиг амьтан амь зууж байхад, эл гоо сайхан хүүхэн эелдэг байхаар шийдэн, анхны нууц амраг-самуун дэгдээгчтэй байсны нь удаах амрагийг нь бодож түүнийг өршөөж хэлтрүүлэхээр болгож чаджээ. Удаах амраг нь хаан өөрийн биеэр байсан болохоор улам итгэмжтэй, тэр бүү хэл хаанаас нь харсан ч хааны талын хүн байлгүй яах вэ. Тэр нь хоёрдугаар Карлын нууц амраг удаан байгаагүй боловч, бүгд найрамдах улсын ийм гоо сайхан хүүхнийг эзэмдэн дагуулсандаа хийморь нь сэргэсэн хаан, сэтгэлийг нь татсан хүүхнийхээ хүү, бяцхан Дэвид лордыг өөрийн харуулд тохоон томилоход хангалттай хугацаа байжээ. Бутач хүү офицер цол хүртэн, ордонд хооллож ундлах эрхтэй болж, эцгийгээ сөргүүлэн Стюартын талыг халуунаар баримтлагч болжээ. Нэгэн үе эрхэм дээдсийн харуулын офицерын хувьд, зуун далан шидтэний нэг байснаа, дараа нь «тэтгэмжийнхэнд» шилжиж, алтан саран сүх зүүх эрхтэй дөчийн нэг болжээ. Түүнээс гадна, VIII Генрихийн байгуулсан, биеэ хамгаалагчдын сурвалжит багийн бүрэлдэхүүнд ороод, хааны ширээнд хоол тавьдаг онцгой эрхийг эдэлдэг болжээ.

Ийм маягаар, эцэг нь зовон зүдэж, цөллөгт хөгширч байхад Дэвид лорд хоёрдугаар Карлын ордонд жаргалаа эдэлж байв.

Хожим нь залуу лорд, хоёрдугаар Иаковын ордонд ч жаргалаа эдэлсээр л байлаа.

Хаан үхлээ, хаан мандтугай! Энэ бол non deficit alter aureus²¹ шүү дээ.

Иоркийн ванг²² хаан ширээнд залрахад, залуу эр эх нь нас барахдаа гэрээсэлсэн эдлэн газрын нэрээр, Дэвид-Дерри Моир лорд гэж нэрлүүлэх зөвшөөрлийг олж авчээ. Энэ эдлэн нь Шотландад, тоншуул шувуу царсны голд хошуугаараа үүр ухан засдаг өтгөн ойд байлаа.

Хоёрдугаар Иаков бол цэргийн жанжны алдрыг горьдсон хаан байсан болохоор залуу цэргийн дарга нараар хүрээлүүлэх дуртай байжээ. Ард түмэндээ, хуяг дуулга өмсөн, морь унаж, дуулганы нь дороос унжих хиймэл үс нь утга учиргүй, дайны морьтой хөшөө шиг хуяг дээр нь нөмөрч байгаагаар дуртайяа харуулдаг байв. Залуу Дэвид лордын хээнцэр маягийг хаан таалжээ. Тэр байтугай хаан бүгд найрамдах үзэлтний хүү байсанд нь энэхүү хааны талыг баримтлагчид нэг ёсны ачийг санадаг байлаа. Үймээн дэгдээгч эцгээ тоохгүй байна гэдэг хааны ордонд зэрэг дэв олж эхлээд ашигтай байлгүй яах вэ. Эзэн хаан Дэвид-Дерри-Моир лордыг мянган ливрийн²³ цалинтай хэвтүүлчин болгожээ.

Энэ бол албан тушаалын хувьд үсрэлт байлаа. Хэвтүүлчин гэдэг тушаалтан нь хаантай хамт нэг өрөөнд, өөрт нь зориулан хааны орны хажууд тавьсан орон дээр унтана. Бүгд арван хоёр хэвтүүлчин ээлж дугаараар хааныг хамгаална.

Энэ албан тушаалыг гүйцэтгэхийн хамт Дэвид лорд хааны ерөнхий агтчаар томилогдсон агаад хийх ажил нь хааны морьдод овьёос тавьж өгөхөд оршино. Үүний төлөө жилд хоёр зуун тавин ливрийн пүнлүү хүртэнэ. Түүний удирдлагад хааны таван дэлбэгч, таван хөтөч, таван агтчин, арван хоёр бараа бологч, дөрвөн зөөгч байна. Түүнээс гадна эзэн хаан жилд зургаан зуун ливр гарздан байж Хеймаркегэд тэжээж байдаг зургаан хурдны морийг харгалзаж байх үүрэгтэй ажээ. Мөн Хүндэтгэлийн зүүлт одонтуудын ёслолын хувцсыг хангаж байдаг хааны хувцасны шүүгээний бүрэн эрхт эзэн нь байлаа. Түүнд хааны хар очирт бэрээ баригч²⁴ түшмэл газар шүргэтэл мэхийн ёсолно. Хоёрдугаар Иаковын үед энэ албан тушаалыг ганган эр Дюппа гүйцэтгэж байжээ. Хааны бичиг хэрэг хөтлөгч ноён Бакер, улсын хурлын бичиг хэргийн эрхлэгч ноён Броун нар Дэвид лордод аль болох хүндэтгэл үзүүлэн малилзана.

Хурим найр, дайллага цайллагад арван хоёр ихсийн энд орж зохицуулан даргална.

Эзэн хаанаас сүмд алтан зоос byzantium-аар хойлго өргөдөг «өргөл барьцын өдрүүдэд», хаан одон тэмдгээ зүүдэг «одонгийн өдрүүдэд», хаан болон агь жононгуудаас өөр хэн ч рашаан хүртдэггүй «рашаан хүртдэг өдрүүдэд» хааны ар талд зогсон хүндэтгэл үзүүлнэ. Зовлонт пүрэв гарагт²⁵ хаанд арван хоёр ядуу хүнийг бараалхуулахад хаан тэдэнд нас сүүдрийнхээ тоогоор мөнгөн пенни, хаан ширээнд заларсан жилийнхээ тоогоор шеллинг хайрлана. Дэвидийн үүрэгт ажилд хааныг өвдөхөд түүнийг асрамжлах сүмийн хоёр дээдсийг дуудан, төрийн зөвлөлийн зөвшөөрөлгүйгээр отчийг түүнд ойртуулахгүй байх явдал багтана. Үүнээс гадна, шотланд марш тоглодог, хааны торгон цэргийн шотландын хорооны дэд хурандаа байв.

Энэ цолтойгоо хэд хэдэн аян дайнд оролцож, зоригтой дайчин гэгдэн алдаршжээ. Дэвид лорд нь бие хас сайтай, хүч чадалтай, өглөгч, нүдэнд дулаахан, хөдөлж аяглах нь гялалзуур сайхан эр байлаа. Түүний гадаад байдал нь дотоод чанартайгаа таацан нийлнэ. Өндөр ч биетэй, дээгүүр ч гаралтай хүн ажээ.

Дерри-Моир хаанд баринтгийг нь ойртуулж өгдөг эрх олгох байсан grum of the stole²⁶-д тохогдох хариугүй дөхөөд байлаа. Гэвч үүний тул агь, жонон эсвэл тайж угсаа залгамжилсан байх ёстой байв.

Хэн нэгнийг тайж болгох ноцтой хэрэг. Энэ нь тайжийг шинээр бий болгож тэгснээрээ атаач жөтөөч нарыг төрүүлнэ гэсэн үг байлаа. Энэ бол хишиг хүртэнэ гэсэн үг, хэн нэгэн хүнд хаан хишиг хүртээснээрээ нэг нөхөр, зуун дайсныг, нөгөө нөхөр нь дараа нь санаа буруулахыг тооцолгүйгээр шүү, бий болгож байгаа юм. Хоёрдугаар Иаков улс төрийн үүднээс тайжийн зэргийг туйлын дургүй хайрлаж, харин тайж угсааг амархаан шилжүүлчихдэг хүн байлаа. Угсаа залгамжилсан тайж бол ямар ч сэтгэл түгшүүлэх юм байхгүй. Энэ нь угсаа язгуурыг хадгалах зорилгоор хийгдэж байгаа учир лордуудыг бага догдлуулдаг байв.

Хэрэв тайж угсаа залгамжилсны үр дүнд л хийгдэж байх аваас, Дэвид-Дерри-Моир лордыг тайж нарын танхимд оруулахад хаанд татгалзах юу ч байсангүй. Өндөр төрөлт эзэнтэн Дэвид-Дерри-Мокрыг «хүндэтгэлийн» лордоос, эрхийн дагуу лорд болгох нааштай тохиолдлыг л хүлээж байжээ.

Ийм тохиолдол ч гараад ирэх нь тэр.

Нэгэн сайхан өдөр хөгшин цөлөгдмөл эртэй холбоотой янз бүрийн үйл явдал болсны дотроос хамгийн гол нь амьсгал хураажээ гэдэг нь илт болжээ. Үхэл гэдэг амьсгаа хураасан хүний тухай заавал яриулдгаараа сайн талтай. Ордныхон Линней лордын амьдралын сүүлчийн жилүүдийг мэдэж байсан (чухамдаа мэдэж байсан юм шиг бодоцгоожээ) гэж ярилцана. Үзтэл таавар, хий хоосон санаанаасаа зохиосон зүйл байсан бололтой. Хэрэв үнэнээс мэдээж дэндүү хол зөрөөтэй эл ярианд итгэвэл, Кленчарли лордын бүгд найрамдах үзэл амьдралынх нь сүүл үед нэгэн хааныг алаачийн охинтой гэрлэхэд хүртэл нь айхавтар гаарчээ. Цөлөгдмөл хүний хачин зөрүүд зан гэж! Хүүхний нэрийг Анна Брадшоу гэдэг байсныг барин тавин хэлнэ. Гэвч тэр эмэгтэй орчлонд нэг хүү төрүүлчхээд дараахан нь нас баржээ. Хэрэв амьтны ярьж байгаа нь үнэн л юм бол энэ хүүхэд нь Кленчарли лордын хууль ёсны хүү, өөрөөр хэлбэл угсаа залгамжлагч нь ажээ. Сайх сураг нь үнэн гэхээсээ илүү цуу гэмээр барин тавин бус, тодорхойгүй зүйл байв. Тэр үеийн Английн хувьд Швейцарт болж байгаа үйл явдал, одоогийн Английн хувьд Хятадад болж байгаа үйл явдал шиг даанч холын явдал байлаа. Кленчарли лорд гэрлэх үедээ тавин естэй байсан агаад, хүүгээ төрөхөд жартай байжээ. Удалгүй өөрөө нас эцэслэсэн тул хүү ганцаараа өнчин үлдэх нь тэр. Байж болох л юм, гэхдээ мэдээжээр үнэмшил багатай л зүйл. Сайх хүүг шидэт үлгэрт гардагчлан «нар сар шиг сайхан» хүүхэд байсан гэж нэмэр хачир оруулна. Иаков хаантан энэхүү эргэлзээ байхгүй, үндэсгүй цуу үгийг төгсгөл болгон, нэгэн сайхан өглөө, Линней Кленчарли нь «нэгэнт хууль ёсны үр хүүхэд болон, ямар нэг төрөл садан, ураг төрлийн хүн байхгүйн учир» Дэвид-Дерри-Моир хууль бус эцгийнхээ ямар ч эргэлзээгүй цор ганц үе залгамжлагч гэж лүндэн буулгажээ. Үүнийг тунхагласан жуухыг лордуудын танхимын цэсэд оруулжээ. Энэ жуух бичгээр Дэвид-Дерри-Моир лордыг, хаан ямар нэгэн үл мэдэгдэх шалтгаанаар өлгийд байхад нь гүнжин болгосон, тэр үед хэдхэн сартай охиныг насанд хүрэхэд нь гэрлэнэ гэдэг ганцхан болзолтойгоор нас эцэслэсэн Линней Кленнарли лордын зэрэг хэргэм, өв хөрөнгийг эзэмших эрхтэйг хүлээн зөвшөөрчээ. Энүүхэндээ гэхэд тэр шалтгаан гэдэг нь хэн бүхэнд илт байлаа.

Нялх сүйт бүсгүйг Жозиана гүнжин гэнэ. Тэр үед Англид испани нэр түгээмэл байж. Хоёрдугаар Карлын нэг хууль бус

хүүхдийг Плимутын гүн Карлос гэдэг байв. Жозиана гэдэг нэр Жозефа, Анна гэдэг хоёр нэрийг нийлүүлсэн ч байж болох шүү дээ. Жозия гэдэг нэр байж болсон шиг Жозиана гэж байж болох л шүү дээ. Хоёрдугаар Генрихийн, нэг дотно эмэгтэйг Жозия дю Пассаж гэдэг ч байлаа.

Ийнхүү нялх гүнжинд хаан, Кленчарлийн тайж угсааг хайрлах нь энэ. Тайжийг хүлээн байгаа ахайтан гэсэн үг. Түүний нөхөр нь тайж болох ёстой. Энэхүү тайж угсаа нь Кленчарлийн, Генкервилийн гэсэн хоёр гүнлэгээс тогтоно. Үүнээс гадна Кленчарлийн тайж угсаа нь ямар нэг дайнд гавьяа байгуулсны учир Сицилийн Корлеоны бэйс зэргээр шагнуулж явжээ. Ер нь англичад тайж нар харь орны хэргэм цол зүүдэг байжээ. Гэлээ гэхдээ онцгой тохиолдол гаралгүй яах вэ. Жишээ болгоход л, Эрандел-Вардурын түшээ гүн Генри-Эрандел, Клиффорд лордын адил Ромын Ариун эзэнт улсын гүн, лорд Коунер тэр улсын ноён зэрэгтэй байжээ. Гамильтон ван францын Шательро ван зэрэгтэй; Денбийн гүн Бизиль Фейльдинг Германд Лауфенбург, Рейнфельден, Габсбурвийн гүн зэрэгтэй; Мальборо ван Шведэд Миндельгеймын ноён, Веллингтон гүн Бельгид Ватерлоогийн ноён хэмээгдэж явлаа. Тэрхүү Веллингтон вантан маань испанийн Сиддад-Родриго ван, португалын Вимейрийн ван явсан юм.

Англичад бүр тэр үед л тайж язгууртны эзэмшил, язгууртны бус эзэмшил гэж байдаг байж. Кленчарли лордын эдлэн газар нь цөмөөрөө тайж язгууртных байв. Эл бүх эдлэн, шилтгээн, хотхон, түрээсний газар, эзэмшлийн тариалан, тал нуга зэрэг Кленчарли-Генкервелийн тайж угсааны өв залгамжилсан газар нутаг түр зуур Жозиана ахайтны мэдэлд байсан агаад, Дэвид-Дерри-Моир Жозианатай гэрлэнгүүтээ л түшээ гүн Кленчарли болно гэж хаан зарлиг буулгажээ.

Кленчарлийн өвөөс гадна Жозиана ахайтанд өөрийн гэсэн өв хөрөнгө байлаа. Түүний асар том эзэмшлийн нэг хэсгийг *Madame sans queue*²⁷ Иоркийн ванд дээр үед бэлэг болгон өгчээ. *Madame sans queue* гэдэг маань зүгээр л *Madame* гэсэн үг. Францад хатан хааны дараа ордог, Английн Генриета гүнжийг ингэж нэрлэдэг байжээ.

Карл болон Иаковын үед амжилт олон дэвжиж амжсан Дэвид лорд Ораны Вильгельмийн²⁸ үед ч зэрэг дэв ахисаар байлаа. Тэр нь хааныг даган цөллөгт явахаар Иаковын талыг баримталж байсангүй. Хууль ёсны эзэн хаандаа хайртай хэвээр ч гэлээ, засгийн эрхийг хууль бусаар булаагчид үйлчлэх хэрсүү ухаан гаргажээ. Ер нь Дэвид лорд хэдийгээр төдийлөн сахилга баттай биш гэлээ ч гялалзуур офицер байв. Хуурай замын албыг далайнхаар солиод далайн цэргийн дотроос шовойж чаджээ. Дэвид лорд тэр үеийн нэрлэдэг байснаар «цэргийн хөнгөн далбаат онгоцны ахмад» болжээ. Явж явж, тэр үеийн хүмүүсийн адил ялимгүй яруу найргийн дөртэй, эзэн хаан, төрийн мятаршгүй зарц, элдэв баяр наадам, найр цэнгэл, хурим той, «хааны багахан гүнцэг» тэргүүтэнд заавал ч үгүй оролцдог, чивэлт явдлаа ганган хээнцэр маяг байдлаараа далдалж дөнгөдөг язгууртны хүрээний хүн болжээ. Гэвч тулалдаанаас хулчийж хойш суудаггүй, зэгсэн зусарч хааны шадар, хажуугаар нь нөхцөл байдалд тохируулан харалган ч, гярхай ч байж чаддаг нэлээд ихэрхэг дээдэс байлаа. Төрөхөөсөө шударга шулуун, зарим нэг хүнд хүндэтгэлтэй, нөгөө заримд нь их зантай ханддаг, анх санаснаараа илэн далангүй, цагаан сэтгэлээр хандавч дорхноо л хувьсхийн хуурамч царай гарахаасаа ч сийхгүй, хааны сайхан, муухай ааштай байгааг сайтар бодолцон түүн рүү чиглэсэн сэлмийн хурц үзүүрийг биеэрээ ажиггүй хаан зогсох, өндөр төрөлтийн ганц дохиогоор өөрийн биеийг баатарлагаар утгагүй гаргуунд нь хаячихад ч бэлхэн, яаж ч төрхгүй аашлахаасаа сийхгүй боловч ямагт эелдэг байдаг, ёс журам эелдэг хүндэтгэлийн боол, эзэн дээдсийн өмнө баяр ёслолын тохиолдолд өвдөг сөгдөх боломждоо эрддэг, гадаад төрхөөрөө хаанаас нь ч харсан үнэнхүү ордны шадар, дотоод сэтгэлээрээ чин зоригт баатар энэ хүн дөчин тав хүрсэн ч гэлээ залуугаараа байлаа.

Дэвид лорд франц дуу дуулах дуртай байсан бөгөөд сайх зугаатай наргианч байдал нь хоёрдугаар Карлд таалагддаг байжээ.

Тэр нь ус цас шиг урсгах уран цэцэн үгэнд дуртай, нарийн найруулгыг үнэлж, алдар цуутай ч гэлээ тэсэхийн аргагүй уйтгар хүрэм, ширээт хамба Боссюгийн «Оршуулахад хэлсэн үгийн» нуршаа чалчааг шагшин магтдаг байв. Эхээс нь түүнд арван мянган фунт стерлинг буюу хоёр зуун тавин мянган франкийн жилийн орлоготой хэр тааруухан өв үлджээ. Энэ нь амь зуулгад чуутай айтай хүрэлцэнэ. Өр зээл тавин яаж ийгээд аргацаадаг байлаа. Ганган хээнцэр, жигтэй янзын шинэ зүйл өмсөж хэрэглэхийнх нь

хувьд түүнтэй мөр зэрэгцэх хүн байсангүй. Түүнийг дуурайгаад эхлэв үү, үгүй юу л өөр нэг шинэ юм бодоод олчихно. Морь унахдаа давхар булигаараар хийсэн, давируултай банхгар гутал өмсөнө. Түүнийх шиг тийм бүрх, тийм ховор сүлжээсэн хөвөө зах хэнд ч байсангүй.

III. Жозиана гүнжин

Хэдийгээр 1705 онд Жозиана ахайтан аль хэдийнээ хорин гурав хүрч, Дэвид лорд дөчин тавыг шүргэж яваа ч гэлээ тун ноцтой учир шалтгаанаас болж тэр хоёр хараахан гэрлэсэнгүй. Тэд бие биеэ үзэж чаддаггүй байсан байж болно оо доо? Огт үгүй. Гэвч ямар ч байсан нэгэнт хаашаа ч зайлахгүй юманд, та өчүүхэн ч яарч агдах хүсэлгүй байдаг шүү дээ. Жозиана сул чөлөөтэй байх аа, Дэвид лорд чавхны чулуу шиг залуу зандан явахаа бодолцжээ. Лордод, гэрлэлтийн дөнгөнд аль болох л хожим орох тусмаа залуу байдлаа уртасгаж болох юм шиг санагджээ. Янаг амрагийн явдлаар баян тэр үед эрчүүд гэр бүл болоход яарч байсангүй. Үс бууралтах хүүхэн эргүүлэхэд саад болж байгаагүй юм. Түүнийг хиймэл үс углаад далдалчих юм уу, сүүлхэндээ оо энгэсэг гэгч гарч ирж тус болжээ. Бромлейн Жерардуудын нэг, түшээ гүн, Чарльз Жерард лорд тавин настайдаа Лондонд авгай хүүхнүүдийн дунд их амжилт олж байсан гэдэг. Конвентрийн гүнжин орь залуу, гоо үзэсгэлэнт Букингель ахайтан Фалькомбергийн бэйл, жаран долоон настай сайхан эр Томас Беласайзад унаж үхэж байжээ. Далан настай Корнелийн хорьхон настай авхайтанд зориулан бичсэн алдарт шүлгээс, «Бүсгүй минь, миний царай хамаа алга» хэмээн эш татдаг байлаа. Хүүхнүүд ч насан зүг болох үедээ бас зүрх сэтгэлийг эзэмдэж байсан нь бий. Нинон, Марион хоёрыг л ядахдаа саначихад болно. Дуурайх юм ингээд гараад ирнэ.

Жозиана, Дэвид хоёрын харьцаа нь уран эелдэг сээтэгнэл, янаг амрагийн тоглоом төдийхөн байв. Тэд хайр сэтгэлтэй байсангүй, зөвхөн хэн хэндээ аятайхан санагджээ. Энгүүхэн дотно байдаг нь аль алинд нь бүрэн хангамжтай ажгуу. Юундаа ч яарах юм билээ дээ? Тэр үеийн янаг амрагийн явдлууд нь, сэтгэлт хүмүүст иймэрхүү маягийн сорилт шалгалт нь сайн зан байдлын илрэл хэмээн итгүүлдэг байжээ. Түүн дээр хэдийгээр хууль бус ч гэлээ дээд гаралтайдаа эрддэг Жозиана өөрийгөө гүнж хэмээн тооцож зэгсэн омог бардам загнана. Дэвид лорд өөрт нь таалагдана. Дэвид сайхан эр байсан боловч авхайтан гол нь түүнийг цэмцгэр гоолиг гэж үзнэ. Гунхалзсан гоолиг байна гэдэг бүхнийг илтгэнэ. Дэвид лорд сайхан эр байсан нь улам л сайн биз. Сайхан эрчүүд нялуун болчихдог нэг аюул байдаг. Харин Дэвид лорд огт тийм биш байлаа. Тэр нь нударган зодоон, мөрий тавихад дуртай агаад, үснээсээ илүү өртэй явдаг ажээ.

Жозиана л түүний морьд, ноход, хожигдсон мөнгө, нууц амрагуудыг нь янзалж өгнө. Дэвид лорд бас өө сэвгүй зан байдалтай, атгаг сэжиг гэдгийг мэддэггүй, ихэрхэг, халж ойртоход бэрх, шазруун Жозиана авхайданд дур булаагдан, сэтгэл татагдана. Жозиана заримыг нь уншиж гийгүүлдэг арван дөрвөн мөрт шүлгийг түүнд зориулан бичдэг байв. Эл шүлгүүддээ Жозианыг эзэмших нь тэнгэрийн умдаг атгасантай адил агаад, гэлээ ч жилээс жилд үүнийгээ хойш тавиуштай байх юм гэж батална. Лорд, нэгэнт Жозианы зүрхийг эзэмшихэд бэлэн болоод байсан бөгөөд энэ нь хоёуланд нь нэн тааламжтай байлаа. Сайх хоёрын харилцааны цамаан нарийныг ордныхон шагшин гайхна. Жозиана авхай өөрөө,

— Дэвид лордтой заавал гэрлэнэ гэдэг ямар харамсалтай гэж бодно оо. Зөвхөн нууц амраг нь л байдаг болоосой! гэж ярина.

Жозиана бол тачаангуй гоо үзэсгэлэн биеэрээ байлаа. Түүнээс илүү гойд сайхан бие байна гэдэг санаанд багтамгүй. Өндөр биетэй, түүгээр ч үл барам дэндүү өндөр нуруутай юм уу даа ч гэмээр. Алтан шаргал үс гэзэг нь хундан улаан туяа татуулна. Эл бүрэн төгс, эрүүл саруул, улаа бутарсан хацартай цэвэрхэн бүсгүй зоригтой ч, хурц ухаантай ч нэгэн байлаа. Нүд, харц нь бодол санаагаа илтгэнэ. Түүнд нууц амраг байхгүй боловч ариун ёс суртахуунаас хол хүн байлаа. Бардам омог нь түүнийг хамгаална. Эрэгтэй хүний? Юу гэсэн үг вэ, юу гэсэн үг вэ? Тэр нь зөвхөн бурхан ч юм уу чөтгөрийг л болгоох хүн. Хэрэв буянт үйл халдашгүй байдаг юм бол, Жозиана буянт үйлсийн туйл байлаа. Гэхдээ бас гэнэн хонгор зангийн эрхэм жишээ огтхон ч биш. Омог бардам зан нь түүнийг нууц амрагт ойртуулдаггүй байсан ч гэлээ хэрэв түүнд өөр шиг нь этгээд өвөрмөц, тэнцэхээр нууц амрагийг заагаад өгвөл уурлахгүй л байх байлаа. Нэрээ нэг их юманд боддоггүй ч, алдар цуугаа машид эрхэмлэнэ. Хөнгөн юм шиг харагдах боловч, хүршгүй байж чадна гэдэг ур чадварын охь бус уу. Жозиана өөрийн цог заль, сэтгэл татах чадвараа мэддэг байв. Түүний гоо үзэсгэлэн нь сүрээр даран, дур булаахаасаа илүүгээр сонирхол татна. Тэр нь санаандаа нийцсэнээрээ л явна. Хаанаас нь харсан ч тоост орчлонгийн л бүсгүй. Хэрэв цээжинд нь зүрх сэтгэл байдгийг мэдэрвэл, нуруундаа даль ургасныг хараад гайхахаасаа дутуугүй л гайхах байсан биз. Тэр нь Локкег²⁹ шүүмжилнэ. Ер нь хүмүүжил сайтай бүсгүй байв. Араб хэл мэддэг гэж ч харддаг хүмүүс байв. Амьд махбод байх, эм хүн байх гэдэг бол хоёр өөр хэрэг. Дурлалд байнга тохиолддог өрөвдөх сэтгэл гээч эмэгтэй хүний эмзэг тал Жозианад даанч мэдэхгүй зүйл байлаа. Өрөвдөх сэтгэлгүйн учраас ч тэгсэн хэрэг бус. Бие махбодыг

гантигтай харьцуулдаг хуучны харьцуулалт дэндүү худал хуурмаг зүйл. Сайхан бие, гантигтай ерөөсөө адил байх ёсгүй. Бие гэдэг заавал ч үгүй хөдөлж чичгэнэж, чичирч улаа бутарч, цус гүйж, туялзан байна уу гэхээс хатуу гөлийсөн цагаан, хүйтэн байдаг юм биш. Жаргал цэнгэл, өвдөхийг мэдэрч, амьдарч байх ёстой. Гантиг бол үхмэл юм. Сайхан бие бол бараг нүцгэн байх эрхтэй. Харж ханашгүй сайхан нь хувцас хунарыг орлоно. Жозианыг шалдан байхад нь харлаа гэхэд түүний биеэс цацрах туяан завсраар л харах байлаа. Тэр нь огтхон ичиж зоволгүйгээр чөтгөрийн ч өмнө, тайганы нь өмнө нүцгэн зогсохоосоо сийхгүй эмэгтэй байлаа. Түүнд охин тэнгэрийн биедээ эзэмшсэн зориг байжээ. Тэр нь өөрийн гоо үзэмжээр шинэ Танталд³⁰ зориулсан шийтгэлийг дуртайяа бий болгож чадах л байлаа. Хаан түүнийг гүнжин, Юпитер түүнийг лусын дагина болгов. Давхар алдар түүнийг хүрээлжээ. Түүнийг бахдан харсан хэнбугай нь ч бурхан шашнаа умартан боол нь болж байгаагаа мэдэрнэ. Тэр нь дурлалын нялх охин, далайн дагина байлаа. Далайн хөөснөөс гараа юу гэлтэй харагдана. Хувь тавилан нь түүнийг хамгийн түрүүн, сүр жавхлантай орчин дунд, урсгал даван хөвж байхаар заяажээ. Түүнд ямар нэг тодорхойлохын аргагүй захирсан, хувирамтгай хөөрүү зан байдаг байлаа. Боловсролтой бол боловсролтой, ухаантай бол ухаантай бүсгүй байлаа. Нэгээхэн ч шунал, тачаал түүнд хүрээгүй боловч, бодол санаагаараа цөмийг нь амсчихсан байлаа. Өөрийн шалиг мөрөөдлийг биелүүлж болох боломж нь түүний дургүйг хүргэхийн хамт бас дурыг нь татна. Хэрэв тэр Лукреция шиг өөрийгөө чинжаалаар дүрдэг юм аа гэхэд, ямар ч байсан бүүр унаж сүйрсэн хойноо хийх байлаа. Эл хөндөгдөөгүй хүүхэнд завхай хоосон бодол байдаг байв. Сайх Дианад³¹, Астарта³² нуугдан байлаа. Өөрийн өндөр дээд удмыг ашиглан тэр нь халдашгүй сөргөх авир гаргасан хүн байлаа. Гэлээ ч өөрийн уналтыг өөрөө бэлдэх нь түүнд зугаатай санагдах л байв. Алдар нэр нь түүнийг тэнгэрт тултал өргөжээ. Гэвч тэндээсээ буумаар хорхой нь гозолзон, сониуч зандаа хөтлөгдөн доошоо үсрэн ойчихыг ч тоохгүй байсан байж магадгүй. Үүлэнд арай хүнддэх болохоор уналт нь түүнд дур булаам санагджээ. Ихэс дээдсийн шинж болсон их шазруун зан нь тэд нарт дуртай туршлагаа хийх эрх олгоно. Борчуулаас гаралтай эмэгтэйг хөнөөхөөр зүйл нь гүнжинд тоглоом зугаа төдийхөн. Сурвалжит угсаа, егөөтэй ухаан, туяа татам гоо үзэсгэлэн нь Жозианыг бараг хатан хаан болгожээ. Нэг үе өрөөсөн гараараа тах хуга дардаг Луи де Буфлерийг бахдан шагшина. Геркулесийг аль хэзээний үхсэнд харамсан, ямар нэг

өндөр дээд, тэгсэн мөртөө тачаангуй дурлалыг хүсэж өдөр хоногийг өнгөрөөдөг байлаа.

Түүний зан суртахууны төлөв нь Пизонд хандсан захиа³³
Desint in piscem «эмэгтэй хүний гоо үзэсгэлэнт цээж бие аварга
могойн сүүлээр дуусна» гэсэн шүлгийг өөрийн эрхгүй санагдуулна.

Сурвалжит цээж бие, сүр жавхлантай сүрхий жигд цохилтоор
түнхэлзэх босоо хөх, сэргэлэн хурц харц, цэвэр ариун, бардамхаг
төрхийн цаана, усан доор, булингартай давлагаан дунд ид шидтэй
уян налархай, булай жигшмээр, лууны аймшигт сүүл байж байхыг
яаж мэдэх билээ? Шалиг мөрөөдлийг уусган замхруулсан
хүртэшгүй буянт үйл.

Хажуугаар нь Жозиана цэмцгэнүүр хүүхэн байлаа. Ингэхийг тэр үеийн маяг шаардаж байв. Елизаветийг³⁴ саная л даа. Елизавета бол Англид арван зургаа, арван долоо, арван найм гэсэн гурван зуунд зонхилж байсан эмэгтэйчүүдийн нийтлэг хэв шинж юм. Елизавета зөвхөн англи эмэгтэй байсан төдийгүй англикан³⁵ шашинтан байв. Протестан шашны сүм хийд сайх хатан хаанд гүнээ хүндэтгэлтэй байдгийн учир энэ ажгуу. Энэ хүндэтгэлийг католик шажны сүм хийд ч хуваалцаж байлаа. Елизаветыг тэрслүү гэж байсан хутагт хамба тавдугаар Сикстын аманд хараал нь ерөөл болон сонстож: «Их ухаантай хатан» гэж хэлсэн байдаг.

Шашны асуудалд багахан санаа тавьж, эмэгтэйчүүдийн сэтгэл догдлолд ихээхэн анхаардаг Мария Стюарт³⁶ эгч Елизаветаа тэгтлээ хүндэлдэггүй байсан бөгөөд хатан хаан, хатан хаандаа, сээтэгнүүр эмэгтэй, маягтайдаа бичдэг шигээр: «Таны гэрлэхийг хүсэхгүй байгаа тань, янаг амрагийн явдалд чөлөөтэй ташуурч байх боломжоосоо хагацахгүй юм сан гэдгээс л гарч байна» гэж бичиж байжээ. Мария Стюарт дэвүүрээр тоглож байсан бол Елизавета хатан сүхээр тоглож байлаа. Даанч тэнцүүгүй зэвсэг. Хоёулаа л уран зохиол оролддог байв. Мария Стюарт францаар шүлэг бичиж, Елизавета, Горацийг орчуулна. Царай муутай Елизавета өөрийгөө гоо сайханд тооцож кватрен, акростикт³⁷ ухаан тавьдаг байлаа. Түүний тааллаар хотын түлхүүрийг сайхан эрчүүд өргөн барьдаг байлаа. Итали хүүхэн шиг уруулаа тас жимийн, испани хүүхэн шиг нүдээ цагаанаар эргэлдүүлнэ. Түүнд гурван мянган палааж байсан бөгөөд хэд хэдэн Минерва болон Амфитритагийн³⁸ өмсгөл ч байжээ.

Өргөн цээжтэй болохоор нь ирландчуудыг үнэлэн, гялалзуур хатгамалласан фижем³⁹ өмсөж, сарнай цэцэгт ухаанаа тавин, хараал урсган билэндэж, хөл дэвслэн, ордны шадар хүүхнүүдээ жанчин, Дедлейг хөөж явуулан, дээд түшмэлээ уйлтал нь нүдэж, Мэтьюгийн нүүр лүү нь нулимж, Хэттоныг заамдан, Эссексийг алгадан, Бассомпьерт хөлийнхөө улыг харуулдаг байсан ч гэлээ хөндөгдөөгүй хүүхэн хэвээрээ л байжээ.

Тэр нь Бассомпьерийн төлөө, Савийн хатан хаан Соломон хаанд зориулан хийснийг хийжээ. Ариун номд л ийм тохиолдлыг дурдсанаас хойш үүнийг зохимжгүй зүйл гэж үздэггүй байлаа. Хөлгөн сударт орох эрх олгогдсон зүйл, протестан шашинд

зөвшөөрөгдөж л таарна. Хөлгөн сударт хүүрнэсэн явдал Эвнеаким буюу Мелилекет, «ухаантны хүү» гэсэн утгатай нэртэй хүүхэд төрснөөр дуусдаг.

Садар самуун ёс заншил уу? Тийм ээ. Гэвч бялангач зан гэдэг увайгүй явдлаас дээрдэх юмгүй.

Өөрийн Лойолыг Веслейгээр орлуулсан орчин үеийн Англи энэхүү урьдын явдлаасаа баахан нүүр халдаг. Халаг хоохой болон харамсахын хажуугаар түүгээрээ ид хав болгоно.

Тэр үед бузар булай нь, эмэгтэйчүүд ялангуяа сайхан хүүхнүүдэд тааламжтай байдаг байж. Хэрэв чамд эрэмдэг булай амьтан байхгүй бол гоо үзэсгэлэнтэй байхын хэрэг байна уу? Хэрэв өөрийг чинь «чи» гэж дуудах ямар нэг инээдэмтэй мануухай байхгүй бол хатан хаан байхын хэрэг юу билээ. Мария Стюарт бөгтөр Риччод⁴⁰ «ээлтэй байсан» гэдэг. Испанийн Мария-Терезия нэг маврт⁴¹ «жаахан өөриймсөг загнадаг» байжээ. Ийм «өөриймсөг байсны» нь үр дүнд «хар ширээт гэлэнмаа» гарч ирэх нь тэр. «Агуу их үеийн» янаг амрагийн явдалд нуруу муутай байх нь саад болж байсангүй. Жишээ нь гэхэд л маршал Люксембург байна. Люксембургээс бүр өмнө нөгөө «жигжигхэн сайхан эр» Конде байлаа..

Сайхан хүүхнүүд ч хүртэл дутуу дулимаг юмтай байж болно. Энэ бол зөвшөөрөгдсөн зүйл. Анна Болейний⁴² нэг хөх нь нөгөөгөөсөө том, гар нь зургаан хуруутай, давхар ургасан соёотой байв. Лавальер⁴³ майга хөлтэй байсан. Энэ нь VIII Генрих, Анна Болейнд унаж тусан, XIV Людовик, Лавальерд хөл алдан дурлахад саад болсонгүй. Ингэж тогтоосон хэмжээнээс хадуурах нь ёс суртахууны салбарт ч үзэгдэж байлаа. Дээдсийн хүрээнд хамаарагддаг бараг бүх хүүхэн сэтгэл санаа, ёс суртахууны зэрэмдгүүд байсныг нуух юун. Аснасад Мелюзин нуугдаж байгаа нь энэ. Өдөр нь хүүхнүүд болж харагдаад, шөнө нь босоо ороолон болчихно. Тэд цаазаар аваачих газар очиж, дөнгөж сая цавчаад төмөр гадсанд өлгөсөн толгойнуудыг үнсэнэ. Бүх цэмцгэнүүр маягтай хүүхнүүдийн эхийг тавигч Маргарита Валуа⁴⁴ нас барсан янагуудынхаа зүрхийг хадгалдаг, цоожтой нимгэн төмөр жижиг хайрцгийг цээживчиндээ залган оёж бүсэндээ хавчуулж явдаг байжээ. Түүний дэрвэгэр өргөн фижемийн доор IV Генрих хоргодож байсан ажээ.

Арван наймдугаар зуунд, францын хаант улсын засаг төр баригчийн охин Берри авхайтан дүр төлөвөөр энэ хүүхнүүдийн

нийтлэг хэв шинжийн бүх зүйлийг өөртөө шингээж чаджээ.

Энэ бүгдийн зэрэгцээгээр сайхан хүүхнүүд латин хэл мэддэг байлаа. Арван долоодугаар зуунаас латин хэл оролдох нь эмэгтэй хүний сайхан зүйлийн нэг хэмээн тооцож байв, Жен Грей хатагтай бүр хуучны еврей хэл судалж байсныг нь яана.

Жозиана авхайтан латин хэл мэддэг байжээ. Түүнээс гадна өөр нэг давуу чанар байсан нь, эцэг хоёрдугаар Иаковоосоо илүүгээр нагац хоёрдугаар Карл шигээ нууцгайхан католик шашинтан байлаа. Иаков хаан католик шашинд сүсэглэдэг байснаасаа болоод хаан ширээгээ алдсан Жозиана бол өөрийн тайж эзэмшлийг алдахыг огтхон ч хүссэнгүй. Ийм учраас түүний сэтгэлийн хүрээнд багтдаг цөөн хэдэн хүн католик шашинд хамаарагддагийг нь мэдэх агаад бусад бүх хүн, хар борчуулд бол тэр нь протестан шашинтан байлаа. Шашныг шүтэх энэ арга их тохиромжтой. Та албан ёсны протестан шашны сүм хийдээс үзүүлэх бүх илүү эрхийг эдлэх бөгөөд харин үхэхдээ Гроциус шиг католик шашиндаа үнэнхүү сүсэглэн, нүглээ наманчилж, Пето санваартан хойдохыг чинь үйлдэнэ.

Ид насан дээрээ боловч Жозиана хаанаас нь харсан ч цэмцгэнүүр маягтай хүүхэн байсныг давтан хэлье.

Заримдаа түүний, өгүүлбэрийн төгсгөлийг сунжруулан уртасгадаг тачаангуй маяг нь ширэнгэд мярааж гэтэн яваа охин барын хөнгөн хөдөлгөөнийг санагдуулна.

Цэмцгэнүүр эмэгтэйчүүдийн ашигтай нь өөрийн биеийг бусдаас дээгүүр хэмээн өөрсдийгөө хүн төрөлхтнөөс салангид байлгадагт оршино.

Хамгийн гол нь хүн төрөлхтнөөс тодорхой зайнд л өөрийгөө авч явах хэрэгтэй. Олимп⁴⁵ үгүйн тул, Рамбульегийн буудлаар⁴⁶ л сэтгэл ханаад явж болно. Юнона, Ариминт болж хувирах нь энэ. Бурхан тэнгэр гэгдэхийн төлөө бүтэшгүй чармайх л цэмцгэнүүр хүүхнийг бий болгож байгаа юм. Тэнгэрийн аянгыг шазруун зангаар сольж, хэмжээг нь багасгасан сүм бол гоёлынх нь өрөө болж өгнө. Эх дагина байх боломжгүй хойно, үүргээ онгоноороо л хязгаарлана. Цэмцгэнүүр занд, эмэгтэй хүнд тааламжтай байдаг тодорхой хэмжээний ёсорхуу байдал бий. Сээтэгнүүр, ёсорхуу хоёр бол ойрын хөршүүд. Төрөл нэгтэй гэдэг нь хээнцэр дэгжин хүний байдалд илт нэвчин харагдана. Эрх танхи байдал тачаангуйтай язгуур нэгтэй. Ховдоглох нь шилж сонгохыг халхална. Шунаг хомхойг царайдаа жигшүүр төрүүлэн ярвалзахаар хааж болно.

Түүнээс гадна эмэгтэй хүний шинж болох зөөлөн сэтгэл нь илэн далангүй хатуу ширүүнийг орлосон наалинхай, арга бачтай

байхад юунаас ч айлтгүй сайтар хамгаалагдсан байдаг. Энэ нь элдэв аюулаас цэмцгэнүүр эмэгтэйг хамгаалж байдаг. Цагаа болохоор аажимдаа тэд бууж өгөх боловч, тэр болтол байдгаараа зэвүүцэн тоомжиргүй царайлж явна.

Жозиана сэтгэлийнхээ гүнд тайван бус байдаг байлаа. Тэр нь өөрийгөө ужид самуунд хэтэрхий дурладгаа ойлгон, биеэ сүсэгтний дүрээр авч явдаг байлаа. Бидний садар самуун явдлыг тогтоож байдаг бардам зан маань манийгаа өөр муухай явдал руу түлхэж байдаг. Ариун явдалтай байх хэмээн хэрээс хэтэрсэн хүч гаргасан нь л Жозианыг эмзэг маягтай хүн болгожээ. Байнга болгоомжилно гэдэг дайралтад өртөх гэсэн нууцгай хүслийг гэрчлээд өгнө. Нэгэнт халж ойртохын аргагүй хүнд бол ширүүн догшин зангаар зэвсэглэхийн хэрэгцээ байхгүй.

Тэр нь өөрийгөө онцгой эрх ямба, дээгүүр угсаа язгуураараа бардмаар хүрээлүүлэн, бидний дээр дурдсанчлан, гэнэт л сэт татан дайрна гэдгээ цаг ямагт бодсоор л байв.

Арван наймдугаар зууны үүр хаяарч эхэллээ. Англид, Францын хааны ордонд засаг барих үеийг хуулж эхлэв. Уолпол⁴⁷, Дюбуагаас⁴⁸ гоц ялгарах юм байсангүй. Мальборо⁴⁹ дүү охин Черчилээ худалдчихсан юм гэж ярилцдаг эзэн хаан нь асан хоёрдугаар Иаковын эсрэг үзэлцэх болов. Болинброк⁵⁰, Ришельегийн⁵¹ од нь гялалзаж байв. Язгуур угсаа зарим талаар хольж хутгалдсан нь янаг амрагийн нууцгай явууллагад тохиромжтой шалтаг болж, садар самуун явдал янз бүрийн язгуур угсаанд хамаарагддаг хүмүүсийг чи, би гэх юмгүй болгов. Хожим нь энэ хэрэгт үзэл санаа оролцож эхэллээ. Язгууртан, сурвалжтанууд хар, борчуудтай сүлбэлдсэнээрээ яваандаа хувьсгал ялахын эхийг тавьжээ. Желиот, гэгээн цагаан өдрөөр д'Эпине, бэйс ахайтны орон дээр хээвнэг заларч суух цаг аль хэдийнээ хаяанд ирсэн үе байлаа. Ер нь нэгэн зууны ёс заншил нөгөөгийнхөө ёс суртахуунтай төсөөтэй байх нь ховор бус үзэгдэл. Арван зургаадугаар зуун гэхэд л Сметоны унтлагын шовгор малгай Анна Болейны жинтүү дээр хэвтэж байсны гэрч байлаа шүү дээ.

Хэрэв ямар нэг ариун мяндагтны хуралтайгаар баталсан шигээр эм хүн, нүгэл хилэнц хоёр адилхан гэсэн үг гэвэл эм хүн тэр үеийнх шиг тийм айхавтар эмэгтэй хүнийхээ нэрийг хадгалж хэзээ ч байсангүй.

Олон аашаа дур булаам байдлаар, зөөлөн сэтгэлээ хамгийг чадагч хүчээр далдалчхаад, хэзээ ч ингэж өөрийгөө ийм эрх

мэдэлтэйгээр хэлтрүүлэн уучлуулж байгаагүй юм. Ева хориотой зүйлийг зөвшөөрсөн зүйл болгосон нь түүний уналт байсан ч гэлээ, төгс ялалт нь зөвшөөрсөн зүйлийг харин хориотой зүйл болгон хувиргахад л сая гарч иржээ. Арван наймдугаар зуунд эм хүн унтлагынхаа өрөөний хаалгыг нөхөртөө тайлж өгдөггүй байв. Ева чөтгөртэй нөхөцчихөөд Эдемээ дотроос нь түгжчихдэг байж. Хөөрхий Адам диваажингийн хаалганы гадна үлдэх нь тэр⁵².

Жозианы төрөлх авьяас нь түүнийг хууль ёсны гэрлэлтээс илүүгээр чөлөөтэй янаг амрагийн явдал руу түлхэнэ. Сүүлчийнх нь уран зохиолтой танилцахыг санал болгон, Меналка, Амаралисийн түүхийг санагдуулж, бараг эрдэм мэдлэг гэмээр юмыг нотолно. Хэрэв эрэмдэг нь эрэмдэгтээ дур татагддагийг үгүйсгэх юм бол, Мадемуазель Скюдери Пелиссонд найр тавих өөр ямар ч үндэс байгаагүй юм.

Бүсгүй гэрлэх хүнээ захирч байдаг, харин эхнэр хүн бол нөхөртөө захирагдаж байдаг гэсэн английн хуучин заншил бий. Жозиана боол болох цагаа аль болохоор л хойшлуулахыг хичээнэ. Мэдээжээр хааны тааллыг даган, Дэвид лордтой сууж таарах нь гарцаагүй. Гэвч энэ нь ямар эвгүй юм болох вэ! Жозиана, Дэвид лордыг өөрөөсөө түлхээгүй ч гэлээ, үүний хажуугаар, өөрөөсөө нэлээд хөндийдүүхэн байлгадаг байлаа. Тэдний хооронд, гэрлэхгүй, тэгэхдээ салж хагацахгүй гэдэг дуугай, тохирсон хэлцэл байдаг ажээ. Тэд бие биеэсээ дөлнө. Энэхүү нэг алхам урагш хоёр алхам хойш амраглах арга нь тэр үеийн менуст ба гавот бүжигт тусгалаа олжээ. Гэрлэх нь хэнд нь ч зохимжгүй, түүнээс болоод палаажийг чимэглэн байдаг тууз бүдгэрэн, эрэгтэй нь хөгширнө. Гэрлэлт бол асуудлыг хортойгоор тов тодорхой шийдэж байгаа хэрэг. Эмэгтэй хүн нотариатаар зуучлуулан өөрийгөө эрэгтэй хүнд өгч байгаа нь балиар заваан бус уу! Гэрлэлтийн бүдүүлэг байдал нь засахын аргагүй байдалд хүргэж, эрх чөлөөг устган, шилж сонгохыг үгүйсгэн, хэлний зүй шигээр, харилцааны өөрийн гэсэн өгүүлбэр зүйг бий болгож, зориг урамшлыг үсгийн дүрмээр сольж, янаг сэтгэлийг цээж бичиг болгон хувиргаж, түүний аливаа нууцыг алга болгон, эмэгтэйчүүдийн дүрийг үүлнээс буулган, түүнд унтлагын цамц углан, өөрийн эрхээ дурдсаныг нь ч, үйлээ даган захирагдсаныг нь ч басна. Жингийн тавгийн нэгийг хэтэрхий хэлтийлгэн, хүчтэй хүйс болон сүр хүчин төгс хүйс буюу хүч, гоо сайхан хоёрын хооронд байдаг гайхамшигт тэнцүүрийг алга болгож нөхрийг нь ноён, эхнэрийг нь зардас болгоно. Тэгвэл гэрлээгүй байхад зөвхөн боол, хатан хаан л гэж байдаг. Ор дэрээ бүр нэг жирийн, бүрэн аятай зохистой болтол нь хувиргах гэдгээс бүдүүлэг юм хүний толгойд орно гэж байх уу? Ийм сонирхолгүй янаг сэтгэл рүү тэмүүлэх нь тэнэг хэрэг биш үү?

Дэвид лорд эрийн цээнд хэдийнээ хүрсэн хүн байлаа. Дөчин нас гэдэг тоглоом биш. Тэр үүнийгээ анзаарахгүй явна. Үнэндээ ч

гучаас давсан гэж хэлмээргүй харагдана. Тэр нь Жозианыг өөрийн болгосноос хүсээд явж байхыг илүүд үзнэ. Бусад хүүхнийг эзэмдэн, нууц амрагаар дутдаггүй байлаа. Харин Жозиана бол мөрөөдөлд автан явна. Энэ бол бүүр ч муу.

Жозиана авхайд төсөөлөхөөс илүүгээр, тохиолдох нь элбэг байдаг нэгэн онцлог байсан нь, нэр нүд нь цэнхэр, нөгөө нь хар өнгөтэй байлаа. Энэ хоёр нүд нь хайр сэтгэл, үзэн ядалт, аз жаргал, зовлон гунигийг агуулжээ. Түүний харцанд өдөр, шөнө холилджээ.

Нэр алдар хүсэх нь туйлдаа хүрч, байж болохгүй юм хийх юмсан гэж хүснэ.

Нэгэн удаа тэр Свифтээс⁵³,

— Таны үзэн ядах чинь хэрэгтэй гэж та боддог уу? гэж асуусан юм гэдэг.

Энэхүү «та» гэдгээ бүх хүн төрөлхтөн гэсэн утгаар хэлжээ.

Тэр нь католик шашинтан байсан ч дэндүү өнгөцхөн байлаа. Гангалж дэгжирхэхийн шаардлагаар тогтоогдсон хэмжээ хязгаарыг давж байсангүй. Манай үед үүнийг пюизеизм л гэж нэрлэх байх. Зарим нь долоо найман алд алт мөнгөн угалз тавьсан пүүсүү, хилэн юм уу зузаан торгоор хийсэн хүнд палааж өмсөж, сувдан болон үнэт чулуун утсаар олон давхар гөрж хийсэн бүс бүсэлнэ. Заримдаа сургуулийн хүүхэд шиг хиаз оёсон цэмбэн хантааз ч өмсөнө. Тэр нь тууз хиазыг хэтэртэл хэрэглэдэг байв. Хэдийгээр Англид, хоёрдугаар Ричардын хатан Анна бүүр арван дөрөвдүгээр зуунд эмэгтэй хүний эмээл хэрэглэж байхыг⁵⁴ зарлигдсан боловч Жозиана мориор явахдаа эрэгтэй хүн шиг мордоно. Кастилийн заншлыг даган нүүр, гар, чээжээ өндөгний цагаанд хольсон мөсөн чихрийн уусмалаар угаана. Цэцэн ухаалаг санамжийг сонсонгоо хэрсүү ер бусын сайхан инээдээр хариу барина.

Жозиана муухай ааштай биш, харин ч сайхан ааштай гэмээр хүн байлаа.

1

Жозиана мэдээжээр уйдаж байлаа.

Дэвид-Дерри-Моир лорд Лондоны хөл хөгжөөнтэй хүмүүсийн дунд гарамгай байр эзэлдэг байв. Язгууртан тайж нар түүнийг ихэд хүндэтгэнэ.

Дэвид лордын алдартай гавьяаны нэгийг хүүрнэхэд л ийм байна. Тэр нь өөрийнхөө үсээр байхыг зүрхэлжээ. Хиймэл үсний эсрэг хэдийнээ босоод байсан үе л дээ. 1824 онд Эжен Деверна анх удаа сахлаа ургуулж зүрхэлсний адилаар 1702 онд Прайс Девере анх удаа сайхан буржийлган засуулсан жинхэнэ үсээрээ олны дунд гарч иржээ. Үс гэжгээрээ азаа үзнэ гэдэг амь насаараа азаа туршихтай адил хэрэг байлаа. Хэдийгээр Прайс Девере нь Герфордын бэйл, Английн тайж байсан ч зон олноороо дургүйцжээ. Түүнийг доромжилж байсан нь үнэндээ цаанаа учиртай байлаа. Олон нийтийн дургүйцэл ид дундаа өрнөж байсан үед Дэвид лорд гэнэтхэн бас өөрийнхөө үсээр гараад ирэх нь энэ. Иймэрхүү явдал нь нийгмийн тодорхой хэвшлийн сүйрэхийн эхлэлтийг тавьж өгдөг тал бий. Дэвид лорд, Герфорд бэйлээс илүү доромжлогдох болов. Гэлээ ч тэр огтхон ч зовж бачимдсангүй. Прайс Девере анхных нь байсан бол Дэвид Дерри-Моир хоёр дахь нь байлаа. Заримдаа хоёр дахь нь анхных байхаасаа илүү хүнд байдаг. Үүний тул бага ухаан билэг, их зүрх зориг хэрэгтэй. Шинэ сонин юманд татагдан бахадсандаа, анхных нь ойртож буй аюулын хэм хэмжээг мэдэхгүй байж болох юм, удаах нь тэр аюулын ёроолгүй хавцлыг харж байгаа мөртөө түүн рүү дөхнө. Чухам тэр хар нүх рүү, Дэвид Дерри-Моир хиймэл үсгүйгээр хоёр дахь нь болж гарч зүрхэлснээрээ ухасхийн оржээ. Дараа нь сайх хоёр сөс ихтэйг дуурайгч нар гарч жинхэнэ үсээрээ аз турших болжээ. Үүнийг хөнгөлж өгсөн юм нь оо энгэсэг байв.

Ийм чухал түүхт явдлыг үнэн зөвөөр тайлбарлахын тулд, бид энэхүү хиймэл үсний эсрэг дайны жинхэнэ тэргүүн байрыг эр хүний хувцас өмсөж оо энгэсэгдэн, эмх замбараагүй задгай тавьсан элгэн хүрэн үсээ 1680 оноос эхлэн жинхэнээр нь харуулдаг болсон Шведийн хатан хаан Христинад өгөх ёстой. Миссонын үгээр бол ердөө л эрүүндээ «ямар нэг сахал үсний юмтай» байсан гэж байгаа.

Ромын хутагт хамба ч бас 1694 оны гуравдугаар сард ширээт хамба болоод, санваартнуудыг хиймэл үс хэрэглэхийг хориглосон

лүндэн буулгаж, сүм хийдийн бүх барлагуудыг үсээ ургуулахыг зарлигдсанаараа хиймэл үсэнд сүслэх явдлыг зарим талаар бууруулжээ.

Ийнхүү Дэвид лорд хиймэл үсийг тоож хэрэгсэхгүй байснаар тогтохгүй булигаар гутал өмсдөг байлаа.

Энэхүү гавьяа нь хотол олны дурыг булаажээ. Дэвид лорд хүндэт гишүүн нь болоогүй дээдсийн хүрээлэн нэг ч үгүйгээс гадна, бүхний хүсэл болсон referee⁵⁶ хийхгүй нударган зодооны тэмцээн нэгээхэн ч болдоггүй байлаа.

Лондоны язгууртны хүрээний хэд хэдэн клубийн дүрмийг зохиоход оролцож, нэлээд хэдэн гайхамшигт байгууллагыг үндэслэснээс, нэг нь тухайлбал «Гинейн хатагтай нар» гэдэг нь бүр 1772 он хүртэл Pall mall-д байсаар байсныг хэн хүнгүй мэднэ.

Тэнд залуу лордууд цуглаж, алтаар л тоглодог байв. Хамгийн бага бооцоо тавин гинейгээс⁵⁷ доошгүй бөгөөд, банканд гэхэд л хорин мянган гинейгээс бага мөнгө хэзээ ч байж үзсэнгүй. Тоглоомч бүрийн хажууд, цай болон гиней хийхэд зориулсан алтадсан модон аяга тавьдаг жижиг ширээ байдаг байв. Тоглогчид сүлжмэл ханцуй болон захаа муухай болгохоос хамгаалан зарц нар хутга арчихдаа хэрэглэдэг арьсан ханцуйвч, энгэрэвч зүүдэг байлаа. Цэцгээр чимсэн өргөн хүрээтэй сийрсэн малгай нь хурц гэрлээс хамгаалан, буржгар үсийг нь хэвийн байлгана. Бүгд л сэтгэл хөдлөлөө, ялангуяа «арван таваар» тоглох үед, нуухын тул баг өмсөнө. Аз авчирдаг гэж ярилцдаг учир хантаазаа эргүүлж өмсөнө.

Дэвид лорд «Бифштекс-клуб», «Шерли-клуб», «Сплит-Фартинг-клуб», «Уймраачуудын клуб», «Харамчуудын клуб», «Битүүмжилсэн зангилааны клуб» («Силед-нот»), «Хааны талынхны клуб», Мильтоны үндэслэсэн «Ротын клуб»-ын оронд Свифтийн байгуулсан «Мартин Скриблерийн клуб»-ын гишүүн байлаа.

Царай зүс сайхантай мөртөө, «Муухай царайтуудын клуб»-ын гишүүн байсны нь яана. Энэ клуб нь эрэмдэг зэрэмдэгт зориулагдсан байлаа. Тэнд сайхан хүүхнээс бус, муухай харчуулаас болж нүдэлдэнэ гэдэг тангараг өргөдөг байж. Клубийн танхимд: «Терсит»⁵⁸, Трибул⁵⁹, Дунс⁶⁰, Гудибрас⁶¹, Скаррон⁶² гэсэн зэрэмдэг улсын хөрөг зураг өлгөөтэй байх агаад, задгай зуухан дээр Коклес⁶³, Камознс⁶⁴ хэмээх хоёр өрөөсөн нүдтийн дунд Эзопийн⁶⁵ хөрөг дуурайна. Коклес нь зүүн нүдгүй, Камознс нь баруунгүй аж. Аль аль нь үзэгчид рүү муу нүдээрээ харж, тэдний сохор тал нүүр нь бие

биеэ харж байна. Сайхан хүүхэн Визорыг өвдсөн өдөр «Муухай царайтуудын клубт» түүний эрүүл мэндийн төлөө ууцгааж байжээ. Энэ клуб арван есдүгээр зууны эхээр ч хөгжин, хүчээ авч байв. Мирабод⁶⁶ хүндэт гишүүний жуух явуулж байсан гэдэг.

Хоёрдугаар Карлыг ширээнд суунгуут, бүгд найрамдахчуудын клубүүд устах нь тэр. Мурфилдэд тулж очдог гудамжинд «Тугалын толгой клубийнхэн» цугладаг байсан жижиг гуанзыг нураажээ. Яагаад ийм нэр авав аа гэвэл 1649 оны нэг сарын гучинд, нэгдүгээр Карлын цусаар цаазын индэр нялагдах үед, Кромвелийн эрүүл мэндийн төлөө тугалын гавалаар дарс ууцгааж байсан юм санжээ.

Бүгд найрамдахчуудын клубийн оронд хаант засгийн үзэлтний клубүүд гарч ирэв. Жишээ нь «Дүрсгүйчүүдийн клуб» гэж бий болжээ. Тэнд зэгсэн аятайхан уйтгараа сэргээн наадчихдаг байв. Хажуугаараа гарч яваа болж өгвөл хөгшин биш, муухай ч биш борчуудаас гаралтай эмэгтэйг барьж аваад хүчээр клубтээ авчран, гар дээр нь хөлийг нь гозойлгон явуулахад, банзал нь толгой руу нь бууж нүүрийг нь халхална. Хэрэв зөрүүдлэх юм бол хувцас нь далдалж чадахааргүй биеийн хэсэгт нь ташуураар зөөлхөн шавхуурдаад өгнө. Үгэнд орж болгоохгүйгээс хойш өөрийн нь л буруу. Энэхүү өвөрмөц сургуулилтад оролцогсдыг «харайгч» гэж нэрлэнэ.

«Халуун аянгын клуб» буюу «Хөгжилтэй бүжгийн клуб» ч гэж бас нэрлэдэг клуб байлаа. Тэнд негр эрэгтэй болон цагаан арьстан хүүхнүүдийг перугийн пикант болон тинтиримбасыг тухайлбал «мозамал» (өөдгүй бүсгүй) хэмээх, эмэгтэй нь хивэг дээр суугаад босохдоо нэрлэхэд эвгүй биеийн хэсгийн мөрийг үлдээснээр дуусдаг товшуур бүжгийг албаар хийлгэнэ.

Тэнд Лукрецийн шүлэгт: *Tunc Venus in sylvis junge bat corpora a mantum!*⁶⁷ гэж гардаг зургийг тавьсан байна.

Бурхан шүтээнээ доромжилж байдаг «Тамын галын клуб» гэж байв. Гишүүд нь шүтээнийг доромжлоход хэн нь илүүгээ үзүүлэх гэж өрсөлдөнө. Энэ талаар бусдыгаа давсан тэр хүнд шагнал болгон там ногдох нь тэр.

«Толгойгоороо дэлсдэгчүүлийн клуб» гэж байлаа. Учир нь тэнд хүмүүсийг толгойгоороо мөргөдөг байжээ. Ямар нэг тэнэгдүү царайтай, булиа биетэй ачаа зөөгчийг эрж олно. Тэгээд дөрвөн удаа чээж рүү нь толгойгоороо мөргөхийн өмнө нэг аяга хатуу хар пиво уухыг санал бодгох ч юм уу, заримдаа хүчээр зөвшөөрүүлнэ. Дараа нь мөрий тавьж эхэлнэ. Гоганжерд гэдэг валли нутгийн булиа эр гурав мөргүүлснийхээ дараа амь тавьжээ. Зэгсэн ноцтой хэрэг

үүдэлгүй яах вэ. Тодруулан шалгах ажил эхэлж, мөрдлөгийн комиссоос: «Спиртийн ундаа хэтрүүлэн хэрэглэснээс, зүрх нь хагаран үхжээ» гэж тогтоосон байна. Үнэндээ ч Гоганжерд нэг аяга хар пиво уучихсан байсан байна.

«Fun-Club» гэж бас байдаг байлаа. «Fun» гэдэг cant ч юм уу humour гэдэгтэй адил бараг орчуулагдахгүй үг л дээ. Fun-ыг тоглоом шоглоомтой харьцуулах нь поваарийг давстай харьцуулж байгаатай л адил үг. Хэн нэгнийд сэмхэн яваад орох, үнэтэй толь хагалах, үе дамжсан хөрөг зургийг зүсэх, нохойд хор өгөх, шувуутай торонд муур оруулж тавих энэ цөмөөрөө л Fun. Гемптон-корт дахь Гольбейний зурагт дөрвөлжин том нүх гарган зүссэн хүн бол бас л fun хийсэн хэрэг.

Милогийн⁶⁸ Венерагийн гарыг хуга цохисон бол хамгийн сайхан болох байлаа. Хоёрдугаар Иаковын үед нэг тэрбумтан залуу лорд, Лондоныг тэр аяар нь инээлгэсэн юм гэдэг. Зугаа болгон, шөнөөр нэгэн муу байшинг шатаажээ. Түүнийг Fun-ы хаан гэж зарласан хэдэг. Өв цөвхөн байдаг хогшлоосоо салсан хөөрхий байшингийнхан зөвхөн дотуур хувцастайгаа амь дүйн гарцгаажээ. Эгэл борчуудыг шөнө унтаж байхад, цөмөөрөө л дээдсийн хүрээлэнгийн төлөөлөгч болох «Fun-клуб»-ын гишүүд Лондоноор тэнэн цонхны самбарыг нугаснаас нь мулт татаж, гал унтраах усны хоолойг таслан огтчиж, устай гангын ёроолыг цоолон, өлгөөс хаягийг хуулан ногооны газрыг гишгэчин, гудамжны дэнлүүг унтрааж, ялангуяа ядуучуудын хорооллын өгөрсөн ханын тулгуур болж буй шонг хөрөөдөн, цонхны шилийг нь яйруулна. Баян нь ядуустаа ингэж л ханддаг байсан үе. Тэдний эсрэг гомдол гаргах аргагүй.

Энэ бүгдийг тоглоом гэж тооцож байсныг нь яана. Иймэрхүү заншил одоо ч гэсэн хараахан бүрмөсөн арилаагүйг хэлэх юун. Английн ч юм уу эзэмшлийнх нь хаа нэгтээ, жишээ нь Гернс арал дээр, байсхийгээд л шөнийн цагаар байшин руу чинь багахан довтолгоо хийж, хашаа хороог эвдэх, дааман хаалганы цохиур төмрийг хуулаад хаячих жишээтэй. Хэрэв үүнийг ядуус хийсэн бол цөллөгт л явуулж таарах байлаа. Гэтэл үүнийг алт шиг залуус үйлддэг ажээ.

Хамгийн том язгууртны клубийн толгойд, духан дээрээ тал саран тэмдэг зүүж явдаг «Агуу их могок» гэж нэрлэгддэг дарга байна. Могок нь бүр Fun-ыг давж гарчээ.

Түүний хөтөлбөр нь хорын төлөө хорт муу үйл хийх гэдэг байлаа. «Могок-клуб» нь хорлон сүйтгэх гэдэг агуу зорилгыг

тавьжээ. Энэ зорилгоо биелүүлэхэд бүх арга хэрэгслийг сайн гэж үзнэ. Могок болсон хүн, бүгдийг хорлож сүйтгэнэ гэдэг андгай тавина. Юу ч болж байсан, хэзээ ч, хэнийг ч яаж ч хорлосон хамаагүй гэдэг тэдний үүрэгт орж байв. «Могок-клубийн» гишүүн бүр заавал ямар нэг авьяастай байх ёстой байв. Нэг нь «бүжгийн багш» байна аа гэхэд, тэр нь тариачныг хөлийн булчин руу нь илдээр хатгачин дэвхцүүлж цовхчуулна. Нөгөөдөх нь «хөлс, баасыг нь гоожуулж» чаддаг байна. Үүний тул дөрвөн талт сэлмээр зэвсэглэсэн зургаа долоон жентльмен⁶⁹ ямар нэгэн тэнүүлчийг бүчин авч зогсооно. Тал талаасаа бүчүүлсэн ядуу эр заавал ч үгүй аль нэг рүү нь нуруугаа харуулан зогсохоос өөр аргагүй болоход сайх жентльмен түүнийг сэлмээр хатгахад хөөрхий амьтан өөрийн эрхгүй эргэнэ. Гэтэл зоо руу нь дахин хатгах нь түүний ард өөр нэг жентльмен байна гэдгийг мэдэгдэнэ. Ийм маягаар ээлж дараалан хатгачхаад, зугаагаа гаргагчдад сайх сийчүүлсэн эр хангалттай эргэлдэн үсчлээ гэж санагдаад ирвэл зарц нартаа түүний толгойн эргээг гаргахын тул сайтар нүдээд өг гэж тушаана. Зарим нь «арсланг дэлсэнэ». Өөрөөр хэлбэл, замаар явж байгаа аль нэг хүнийг инээд алдан байж зогсоогоод, нударгалан хамрыг нь цааш нь чихэж, эрхий хуруугаар нүд рүү нь чичнэ. Хэрэв үүрд хараагүй болчихлоо гэхэд сохорсонд нь гэж бага хэмжээний мөнгөөр шагнаад л дуусна.

Арван наймдугаар зууны эхэнд, Лондоны баян тарган наргианы эрчүүд зугаагаа ямар аятайхан гаргаж байсан нь энэ. Парисын онхиогүйчүүд, өөр маягаар зугаагаа гарган, цэнгэлддэг байжээ. Де Шарол гүн байшингийнхаа үүдэнд зогсчихоод, гудамжаар явж байгаа улсыг буудаж байсан гэдэг шүү. Залуу нас гэдэг хэзээ ч зугаацан хөгжих дуртай байдгаас хойш яая гэхэв.

Дэвид-Дерри-Моир лорд, өөрийн чанар болсон өгөөмөр сэтгэлээр энэ бүх цэнгээ зугааны байгууллагуудад гар татдаггүй байлаа. Бусдын адилаар, сүрлэн дээвэртэй модон оромжийг хөгжилтэйгөөр шатааж, суугчдыг нь ялимгүй хайрсан ч гэлээ, оронд нь чулуун байшин бариулж өгчээ. Нэгэн удаа «Дүрсгүйчүүдийн клубт» хоёр хүүхнийг гар дээр нь бүжиглүүлчхээд, дараа нь нэгэнд нь чамлалтгүй сүй өгч, нөгөөдөх нь нөхөртэй эмэгтэй байсан учир, хар хүний нь хөөцөлдөж байж хувийн сүмийн лам болгуулжээ.

Тахианы зодооныг боловсронгуй болгосон, ёстой аль байдгаар нь магтвал зохих зүйлийг гаргаж иржээ. Азарган тахиаг зодоонд бэлдэж байгааг нь сонирхохгүй байхын аргагүй. Хүнийг үс гээгнээс нь шүүрч болдгийн адилаар тахиаг өднөөс нь зулгааж болно.

Учир иймээс Дэвид лорд тахиагаа аль болохоор нүцгэн болгоно. Тахианыхаа өд сөдийг, сүүлийг нь ч «толгойноос нь далыг нь хүртэл» өөрөө хайчилж хаяна. «Өрсөлдөгчийн хошуунд аль болох бага юм үлдээж байгаа нь энэ» гэж ярина. Дараа нь далавчийг нь дэлгэж байгаад өдийг нь нэг нэгээр нь, өд бүр нь нэг ёсны жад байхаар шовхолж өгөөд «Энэ бол өрсөлдөгчийн нүдэнд зориулж байгаа нь энэ» гэж тайлбарлана. Тэгээд саврыг нь хурц хутгаар хурцалж байгаад, шовх төмөр үзүүртэй даравч углана. Толгой хүзүү рүү нь нулимж байгаад, тамирчныг тосоор тосолдог шиг шүлсээрээ гялалзтал нь шүлсэдчихээд, нөгөө аймаар сүртэй амьтнаа тавингаа,

— За, тахиаг бүргэд болгон, тахианы хонуурын амьтан уулын жигүүртэн болж хувирч байгаа нь энэ дээ гэж өндөр дуугаар зарлана.

Дэвид лорд нударган зодоонд байлцах нь энэхүү спортын бүх дүрэм л биеэрээ байна гэсэн үг байлаа. Ноцтой тэмцээний үеэр, түүний хяналт дор гадас зоож хооронд нь олсоор холбож, лорд тэмцээн болох талбайн хэмжээг тодорхойлж өгнө. Зуучлан туслагч байх үедээ нэг гартаа лонх, нөгөөдөө далайн хөвөн барьчхаад өөрийнхөө хүний хөдлөх бүрийг ажиглан «чанга дэлс» хэмээн орилж, элдэв арга мэх, зөвлөгөө хэлж, цусыг нь арчиж, унахад нь босгон өвдөг дээрээ толгойг нь тавьж юм уулгана. Өөрөө амандаа ус балган, нүүр лүү нь тургиж, нүд чихийг нь усаар арчина. Ийм маягаар үхэж байгаа хүнийг хүртэл сэргээгээд ирнэ. Шүүгч хийх үедээ, зөв цохиж байгаа эсэхийг ямагт анхааран, зуучлан туслагчаас бусад өөр хэнийг ч зодолдож байгаа улсад туслахыг хориглон, буруу байрлал эзлэн зогссон аваргыг ялагдсан гэж зарлаж, тулалдаанд бэлдэх хугацааг хагас хувиас илүүгүй байлгахыг хянаж, хөлөөр ташиж унагахыг үл зөвшөөрөн, толгой руу ч юм уу унасан хойно нь цохихыг хориглоно. Энэ бүх төгс билэг нь түүнийг ёсорхог цэмцгэнүүр ч болгосонгүй, язгууртны нэр төрд нь ч хор болсонгүй.

Түүнийг нударган зодооны шүүгч хийж байх үед нь аль аль зодоочийн нар салхинд борлосон, батганд баригдсан, нүүртэй, үс гээг нь сагсайсан дэмжигчид хашлаганы дээгүүр давж, тавцан дээрээ үсэрч гараад, олс тасар татан, гадсыг нь сугалж, сульдсан зодоончид нь туслан, түүнийг ялуулах гэж зодоонд оролдож даанч зүрхэлдэггүй байлаа. Дэвид лорд нүдээд хаячхаж даанч сачий нь хүрдэггүй цөөхөн хэдэн шүүгчийн тоонд багтана.

Хэн ч түүн шиг дасгалжуулж чаддаггүй байв. Дэвид лордыг дасгалжуулагч болгохоор ам ангайлгасан нударган зодоонч, урьдаас ялалтдаа итгэлтэй байдаг байв. Дэвид лорд хад шиг булиа, цамхаг

шиг өндөр аварга биетнийг шилэн авч, түүнийгээ хүүхэд шигээ хүмүүжүүлнэ. Тэгээд сайх хүн дүрстэй бул чулуугаа хамгаалсан байдлаас дайрч давшилсан байдалд оруулан сургахыг гол зорилгоо болгон, түүнийгээ ч гялалзтал шийдвэрлэдэг байлаа. Аварга эрийг шилж аваад л түүнээсээ сална гэж огт байхгүй. Түүний асрагч нь л болчихно гэсэн үг. Дарсыг нь хэмжээтэй болгож, идэх махыг нь жигнэж өгөн, унтах хугацааг нь тогтооно. Хожим нь Морлей дахин сэргээсэн тэрхүү гайхамшигтай хоолны дэглэмийг гаргажээ. Өглөө нь түүхий өндөг, аяга цагаан дарс, үдэд шүүстэй хайрсан үхрийн мах цайтай, дөрвөн цагт хайрсан талх цайтай, орой нь хатуу тунгалаг шар айраг ч юм уу, хайрсан талх өгнө. Үүний дараа халамжлан хүмүүжүүлэгчийнхээ хувцсыг тайлан, иллэг хийж, оронд нь оруулна. Гудамжинд ч барааг нь андахгүй даган элдэв аюулаас, сул давхисан мориноос, сүйхний дугуйнаас ч юм уу согтуу цэрэг, сайхан хүүхнээс хамгаалж явна. Түүний ёс суртахууны талыг нь ч бас хараанаасаа гаргахгүй. (Халамжилсан хүчтэнийхээ хүмүүжлийг дээшлүүлэхэд хэрэг болохуйц шинэ шинэ зүйлийг эхийн хайраар гаргаж ирдэг байлаа. Түүндээ шүдийг яаж хуга цохих, эрхий хуруугаар нүдийг яаж хатгахыг зааж өгнө. Үүнээс илүү сэтгэл уяруулам зүйл байдаг гэдэгт итгэхэд даанч хэцүү биз ээ.

Ийм маягаар тэр нь өөрийгөө, хожим нь оролдож таарах улс төрийн үйл ажиллагаанд бэлдэж байлаа. Жинхэнэ жентльмен болно гэдэг тийм ч амархан хэрэг биш ээ.

Дэвид-Дерри-Моир лорд гудамжны тоглолт, театрын тайз, элдэв сонин амьтантай цирк, задгай ший, алиалагч, марзганагч, алиа салбадай, яармагийн илбэчинд тэсгэлгүй дуртай хүн байв. Жинхэнэ язгууртан гэдэг энгийн хүн зоны баяр цэнгэлийг жигшин дур гутна гэж байдаггүй. Ийм учраас ч Дэвид лорд Лондон болон Таван боомтын⁷⁰ архины мухлаг, гуанз задгай шийний газраар орж үзнэ. Далайн цэргийн офицер нэрээ хугалчихгүйгээр, хэрэв шаардлага гарлаа гэмээж нь ямар нэг усан цэрэг ч юм уу, онгоцны чигжээч нартай нүдэлдэх бололцоотой байхын тул зүсээ хувиргаж, ядуу зүдүү амьтдын дунд ямагт далайчны богино хүрэмтэй явдаг байлаа. Ийм хувцастай явж байхад хиймэл үс углахын зовлонгүй аятайхан бөгөөд учир нь бүр XIV Людовикийн үед ч энгийн хүмүүс, арслан зогдортойгоо байдаг шиг үс гээгтэйгээ байдаг байлаа. Ийм байдалтай үедээ Дэвид лорд юунд ч боогдохгүй чөлөөтэй байгаагаа мэдэрнэ. Түүнтэй холбоо харилцаатай байдаг, энэхүү дуу шуу болсон хар борчууд нь түүнийг лорд гэж мэдэхгүй хүндэтгэлтэйгээр харьцана. Түүнийг Том-Жим-Жек гэдэг байлаа. Энэ нууц нэрээрээ

хүн зоны дотор, тэр бүү хэл гуйлгачдын дунд алдаршжээ. Тэр энгийн хүний дүрийг чадамгайгаар гарган хэрэг тохиолдоход нударга зөрүүлж ч чадна.

Түүний тансаг амьдралын энэ талыг Жозиана ахайтан мэдэх бөгөөд ихэд үнэлэн үзнэ.

V. Хатан хаан Анна

1

Хувь заяаны эрхээр Анна⁷¹ Английн хатан хаан болжээ. Хатан хаан Анна нь жирийн нэг эмэгтэй байлаа. Тэр нь хөгжилтэй, ивээлтэй, жавхлантай шахуу хүүхэн байв. Түүний нааштай сайн талын ганц нь ч буянт үйл байгаагүй шиг, алдаа дутагдлынх нь ганцыг ч нүгэл хилэнц гэж нэрлэж болохгүй юм. Түүний мариа нь зүгээр нэг сэлхгэр, хөгжилтэй байдал гэдэг нь жир нэг бүдүүлэг явдал, сайхан сэтгэл нь тэнэг мангуугаас нь гарч байлаа. Тэр нь зөрүүд, залхуу бөгөөд, нөхөртөө үнэнч ч юм шиг, үнэнч бус ч юм шиг, дуртай хүндээ зүрх сэтгэлээ өгөх боловч, ор дэрээ нөхөртөө л хадгална. Христос шашинтны хувьд буруу номтон, хуурмаг сүсэгтэн байлаа. Ниобейн хүзүү шиг чилгэр хүзүү нь чимэг болно. Бусад бүх юм нь даанч үзэмжгүй байлаа. Дэндүү ур муутай бүдэх байдлаар сээтгэнэнэ. Зөөлөн цагаан арьстайгаа мэддэг болохоор задгай палааж өмсөхдөө дуртай. Тэр нь том том сувдтай сондроор хүзүүгээ бариу ороох маягийг анх гаргажээ. Хавчиг духтай, тачаангуй уруултай, махлаг хацартай, хараа муутай бүлтгэр нүдтэй хүн байв. Ойрын хараа муу нь түүний ухаанд ч бас нөлөөлжээ. Ойр орчных нь улсад түүний ууртай байхтай нь адилхан хэцүү санагддаг хааяа нэг гэнэтхэн хөхиүн, хөгжилтэй болдгоосоо бусад үед, сэтгэл ханаагүй дүнсгэр, уйман үймэрсэн байдалтай байдаг байлаа. Чухам ямар утгатайг нь тааварлахаас өөр аргагүй үгнүүдийг үе үе хэлнэ. Сайн сэтгэлтэй эмэгтэй, хорлонт шуламс хоёрын хольц л гэсэн үг. Цэвэр эмэгтэй хүний шинж болох гэнэтийн юманд дуртай байлаа. Энэ нь цагийн урсгалд жаахан хөндөгдсөн Евагийн анхны хэв шинжийн төлөөлөгч байв. Тэгээд энэ гэнэт маанаг амьтанд учралаар хаан ширээ заяагдах тавилантай байж. Түүнийгээ ч хүртэх нь тэр. Нөхөр нь чийрэг дани хүн байлаа.

Төрийн⁷² талд элэгтэй мөртөө, вигийн⁷³ тусламжтайгаар төр барьж байлаа. Эмэгтэй хүн болохоор ямар ч бодлогогүйгээр төрийг жолоодно. Заримдаа ухаангүй уурлан, багтрах шахна. Бүх юманд урам нь хугаран дургүй нь хүрнэ. Төрийн жолоо барихад түүнээс илүү таарахгүй хүн байдаг гэж бодоход ч хэцүү. Ажил үйлээ гаргуунд нь хаяжээ. Түүний улс төрийн бодлого гэгч нь тэр аяараа ан цав гарсан байлаа. Түүний ялих шалихгүй хэрэг явдлаас болж сүйрлийн ирмэгт очоод байв. Заримдаа яагаад ч юм эрх мэдлээ

үзүүлбэ гэж бодохоороо, энэ ёргио явдлаа «шилээврээр дэлсээд авах» гэж нэрлэнэ.

Ихэд юм бодсон царай гарган,

— Кинселийн түшээ гүн, Ирландын тайж Курсээс бусад ганц ч тайж хааны өмнө малгайтай зогсож болохгүй ч гэх юм уу.

— Эцэг маань лорд-адмирал байсан байхад, нөхөр маань энэ цолыг яагаад авч явж болохгүй байх вэ. Эс тэгвэл шударга бус юм болно гэх жишээтэй өгүүлбэрийг хэлнэ.

Тэгээд ч Данийн Георгийг Англи болон өндөр төрөлтийн бүх колонийн лорд-адмирал болгожээ. Ямагт муухай ааштай уцаарлаж байна. Өөрийн санаа бодлыг энгүүн ярьдаггүй харин айлддаг байв. Түүнд ховдостой ямар нэг талаар ойролцоо юм байлаа.

Анна хорон муу тоглоом Fun-ыг эсэргүүцэгч биш байв. Тэр нь Аполлоныг баяртайгаар бөгтгөр болгочих байсан бөгөөд, тэгэхдээ бурхан хэвээр нь орхих л байлаа. Сайхан зантай үедээ хэнийг ч гомдоохгүй юм сан гэж мөрөөдөх боловч бүх хүнийг нэгэнт залхаачихсан байлаа. Байнга л бүдүүлэг үг цухалзана, жаахан удсан бол Елизавета шиг хараалыг урсгах байлаа.

Байсхийгээд л банзалдаа зориуд хийлгэсэн халааснаас «Q», «A»⁷⁴ үсгийн хооронд өөрийнх нь хажуугаас харсан дүрийг цохисон жижиг мөнгөн дугариг хайрцаг гаргаж ирээд тэндээсээ чигчий хурууныхаа үзүүрээр жаахан уруулын будаг авснаа, уруулаа будаж гарна. Уруул амаа янзалж авчхаад инээж гарна даа. Дуртай амттан нь зеландийн хавтгай хэвт боорцог байв. Бас мариатай бадируунаараа бахархдаг байлаа.

Пуритан шашинд лавтай сүсэглэдэг ч гэсэн Анна ший, жүжигт яггүй дуртай хүй байлаа. Францынх шиг хөгжмийн академи байгуулах юм сан гэж туйлгүй хүснэ. 1770 онд Форжерош гэгч франц хүн «Парист дөрвөн зуун мянган франкийн үнэтэй «хааны цирк» гэгчийг байгуулахаар санаа шулуудаад байтал, д'Аржансон сайд эсэргүүцээд, хавьтуулсангүй. Форжерош, Англид ирж хатан хаан Аннад төлөвлөгөөгөө танилцуулахад нь, ганц минутын дотор л элдэв оньсон хөдөлгүүрээр тоноглосон, дөрөв үелсэн доод давхартай, францын хааны театрын тансаг байдлыг сүрээрээ дарахуйц театрыг Лондонд байгуулах санаа түүний хорхойг хөдөлгөжээ. XIV Людовикийн адилаар хурдан давхихад дуртай байв. Заримдаа сүйхээр Виндзорын ордноос Лондонд ирэхдээ, зам зуур түр зогссоныг нь оруулаад цаг илүүхэн болно.

Аннын хаанчлалын үед, зохицуулах хоёр шүүгчийн зөвшөөрөлгүйгээр бүлэг бүлгээрээ цугларахыг хорьдог байв. Хэдийгээр хясаа идэж, хар пиво уух гэж цугларсан арван хоёр хүн байлаа гэхэд л хуйвалдаанч гэж тооцогдоно.

Сайх харьцангуй тайван хаанчлалын үед хөлөг онгоцнуудад усан цэргийг албадан элсүүлж авахдаа гойд хэрцгий байлаа. Англи хүн ихдэхдээ л иргэн гэхээсээ илүү харьяат байсныг харуулж буй гунигтай баримт энэ ажгуу. Зуун жилийн турш английн хаад энэ талаар хэрцгий эзэн мэт эртний бүх зоргоороо байх хартийг⁷⁵ зөрчин аашилсан нь Францад гойд дургүйцлийг төрүүлэн эгдүүцэж байлаа. Тийнхүү дургүйцдэгийн зарим талыг Англид хэрэглэж буй усан цэргүүдийг албадан элсүүлэх аргатай адилаар Францад цэрэг албадан элсүүлдэг болсон нь зөөллөж байлаа. Францын бүх томоохон хотуудад, мөрөө хөөж яваа ямар ч эрүүл чийрэг эрийг элсэлтийнхэн, гудамжинд барьж аваад л «пийшин» гэж нэрлэгдсэн байшингуудын нэгэнд явуулна. Тэнд түүнийг бусад золиосонд гарагсадтай хамт хорьж байснаа, цэргийн албанд тэнцэхийг нь элсүүлэгчид ялгаж аваад офицеруудад зарчих нь тэр. 1695 онд Парист гэхэд л гучин ийм «пийшин» байв.

Ирландын эсрэг хатан хаан Аннын гаргасан хууль гэж аймаар юм байсан юм.

Анна, Лондонд гал гарахаас хоёр жилийн өмнө буюу 1664 онд төржээ. Түүний үндсэн дээр ч астрологиуд⁷⁶ (энэ од тоолоочингууд тэр үед ч байсан юм. XIV Людовикийг төрөх үед мөн астролог байлцан, түүний гороскопыг⁷⁷ гаргаж байжээ) «Галын том эгч» болох тул хатан хаан болно гэж төлөг буулгасан юм гэдэг. Тэгээд ч тэр астролог болон 1688 оны хувьсгалын ачаар хатан хаан боллоо. Анна хатан, Кентербергийн ёнзон хамба Жильбертээр загалмай зүүлгэснээ, өөрийгөө доромж дорд үзэгдүүлсэн хэрэг гэж боддог байв.

Англид их хамбаар загалмай зүүлгэсэн эцэг болгодог хөг аль хэдийнээ өнгөрөөд байжээ. Хамба дотроо тэргүүн нь ч байлаа гэсэн, хаан төрөлтэй хүнд хүсмээргүй загалмай зүүлгэсэн эцэг болж байсан үе. Анна түүгээрээ сэтгэл ханахаас өөр арга байсангүй. Түүний өөрийн буруугаас л ийм болж. Яагаад өөрөө протестан шашинтан болсон юм?

Хуучин хартид *virginitas empta*⁷⁸ хэмээн тэмдэглэсэнчлэн, ариун явдалтайнх нь хувьд Дани улс түүнд насан туршид нь жилд зургаан мянга хоёр зуун тавин фунт стерлингийн шагналыг, Вардинбург болон Фемарнын арлын хамт тогтоожээ.

Анна бат үзлээсээ бус, сурсан зангаараа Ораны Вильгельмийн заншлыг дагадаг байлаа. Хувьсгалаар төрсөн энэ хаанчлалын үед англичууд, уран илтгэгчдийг хорьдог байсан Тоуэр⁷⁹, зохиолчдыг жигшээдэг байсан гутамшгийн багана хоёрын хоорондох зайнд эрх чөлөөгөө эдэлдэг байжээ. Анна нөхөртэйгөө хоёулхнаа байхдаа жаахан даниар ярина. Францаар бол Болинбрюктой⁸⁰ хоёулхнаа байх үед ярина. Франц хэлийг хайр найргүй буруу хазгай дуу ах боловч, Англид ялангуяа ордонд францаар ярих нь маяг байлаа. Өөр хэлээр бол ямар ч хошин хурц үг амжилт олохгүй байсантай холбоотой. Анна хатан зоосонд, ялангуяа гүйлгээ ихтэй жижиг зэс зоосонд маш их анхаарал тавьж, түүн дээр өөрийгөө дүрслүүлэхийг хүснэ. Түүний хаанчлалын үед зургаан янзын хүрэл зоос цутгаж гаргажээ.

Гурав дээр нь хаан ширээг дүрслэхийг тушааж, дөрөв дэх дээр нь ялалтын их тэргийг; зургаа дахь дээр нь нэг гартаа юлд, нөгөөдхөдөө «*Bello et Pace*⁸¹» гэсэн бичээстэй лаврын мөчир барьсан охин тэнгэрийг дүрслүүлжээ. Гэнэн мөртөө харгис хоёрдугаар Иаковын охин бүдүүг хүн байлаа.

Тэгэхийн хамт цаанаа номхон даруу хүн байлаа. Энэ бол санагдах төдий зөрөлдөөн юм. Түүнийг уур хилэн өөр болгоно. Элсэн чихрийг халаахлаар буцалдаг бус уу.

Анна нэрд гаран алдаршиж байлаа. Англи маань төрийн жолоог барьдаг эмэгтэй хүнд дуртай. Яагаад? Яагаад гэвэл Франц тэдэнд төрийн жолоог атгуулдаггүй юм. Энэ бол нэгэнт зэгсэн чамбай шалтгаан шүү. Харин өөр шалтгаан гэвэл, ер, нь байхгүй дэг ээ. Хэрэв Английн түүхчдэд итгэвэл Елизавета сүр жавхлан биеэрээ байсан бол, Анна тэр чигээрээ л буянт сэтгэлтэн байжээ. Яах вэ, ийм байсан гэж бодъё. Гэвч энэ хоёрын хаанчлалын үед тансаг нарийны үнэр ч байсангүй. Бүх бодлого нь болхи бааз. Бүдүүлэг сүр жавхлан, бүдүүлэг сайхан сэтгэл л байж. Англи улс тэгтлээ зүтгээд байгаа сайх хатан хаадын хир хүргэшгүй буянт үйлийн тухайд бол бид маргаж арцахаа больё. Елизаветын хөндөгдөөгүй ариун явдал нь Эссексийн сүүдэрт баахан үнээ алдсан байсан бол, Аннагийн нөхөртөө үнэнч нь Болинбрюктой ойртохыг нь ярвигтай болгож байлаа.

Ард түмэнд, өөрийн алдар гавьяаг хаадынх гэдэг тэнэг зуршил байдаг. Тэд өөрсдөө байлдаж тулалдана. Алдар гавьяа нь хэнд оногдох вэ гэвэл хаанд ногдоно. Тэд мөнгө төлж байдаг. Хэн энэ мөнгөөр нь туйлж хээнцэрлэх вэ гэвэл хаан туйлна. Хаан нь тийм баян байгаад ард түмэн баярлаж байдаг. Хаан ядуугаас экиүг⁸² нь авчхаад лиар⁸³ буцааж өгнө. Ямар их өглөгч байна вэ! Үлэмж том хөшөө суурь болон зүтгэж, дээр нь зогссон өөдсөн хүнийг бахдан харна. Ямар мундаг мөндөл вэ! Тэр миний нуруун дээр гараад ирлээ! Тарваган хүнд аварга хүнээс өндөрт гарах гайхалтай боломж бий. Мөрөн дээр нь л авираад гарчихад гүйцээ. Аварга эр ингэхийг нь зөвшөөрч байдаг нь гайхалтай. Тэгээд бас дээрээс нь одой хүний сүр хүчийг гайхан шагшиж байдаг нь ердөө л тэнэг явдал. Хүн төрөлхтөн дэндүү гэнэн юм даа.

Хаанд зориулан босгосон морьтой хөшөө бол, хаант засгийн гайхалтай сүлд тэмдэг. Морь нь бол ард түмэн. Зөвхөн энэ морь л цаг ямагт өөрчлөгдөж байдаг. Эхлээд илжиг байснаа, явсаар байгаад эцэстээ арслан болно. Тэр үедээ л нуруун дээрхээ сэгсэрнэ дээ. Англи 1642 онд, Франц 1789 онд үүнийг амсаж байна. Арслан маань нуруун дээрх хүнээ бүр залгих нь ч бий. Энэ үед л, Англид 1649 оны, Францад 1793 оны үйл явдал болсон юм⁸⁴.

Заримдаа нөгөө арслан маань дахин илжиг болж хувирна. Хэчнээн гайхалтай ч гэлээ байдаг л даа. Англид яг ингэжээ. Хаант засгийн онгодыг тахиснаараа, ард түмэн дахиад л ачааны мал болжээ. Бид дээр тэмдэглэсэнчлэн, хатан хаан Аннагийн алдар нэр дуурьсжээ. Гэвч тэр үүний тулд юу хийгээ вэ? Юу ч хийсэнгүй. Английн хаанаас шаардагдаж байгаа юм нь л юу ч хийхгүй байх явдал. Үүний төлөө хаан жилд гучин саяыг авна. Елизаветагийн үед дөнгөж гучхан байлдааны хөлөг онгоцтой байсан Англи улс, хоёрдугаар Карлын үед гучин зургаа, 1705 онд зуун тавь шахмаар тоологдох болжээ. Англичуудад гурван арми байлаа. Каталонид таван мянга, Португалид арван мянга, Фландрид тавин мянган цэрэгтэй байв. Түүнээс гадна, ард түмний мөнгөөр дандаа тэтгэж байдаг дууч эм мэт, хаант засагт зальжин Европт англичууд жилд дөчин саяыг төлнө. Улсын хурлаас, насан туршийн түрээс болох гучин дөрвөн саяын эх оронч зээллэгээ гаргах санал хураахад түүнийг сайн дураар захиалах хүмүүс улсын мөнгөн санг бүчин хаажээ. Адмирал Шоуэлийн удирдлагад байсан дөрвөн зуун далбаат

хөлөгтэй нөөц онгоцнуудыг тооцолгүйгээр Англи нь далайн цэргийн нэг ангийг Дорнод Энэтхэг рүү, нөгөөг нь адмирал Ликоор удирдуулан Испанийн эрэг рүү илгээжээ. Англи нь Шотландыг өөртөө дөнгөж нэгтгээд байв. Анхны ялалт нь дараагийн ялалтаа урьдчилан харах боломж олгосон Гохштет, Рамиль хоёрын хоорондох үе байв. Гохштетийн дэргэд Англи нь дайсны долоон суман, дөрвөн морин хороог бүслэн олзолж, Дунайгаас Рейн хүртэл сандран ухарсан францчуудаас зуун хоёр бээр газар нутгийг нь булаан авчээ. Англи нь Сардини болон Балеарын арлууд руу гараа сунгаж байлаа. Гайхамшигт ялалтын ид хавыг үзүүлэн, боомтууддаа испанийн арван жагсаалын онгоц болон алт ачсан олон арван галионыг⁸⁵ оруулж байв. Гудсоны булан, хоолойг XIV Людовик бараг анхаарахаа байж, Акадий ба ариун Христофорын арал, Шинэ Газраас⁸⁶ ч гэсэн тийм амархан хагацаж мэдэх болсон нь мэдэгдэж, хэрэв Англи Францад найр тавин, Бреганы хошуунд сагамхай загас агнахыг зөвшөөрвөл баярлахаар болчихсон байлаа. Англи нь францын хаанаар, өөрөөр нь Дюнкеркийн бэхлэлтийг эвдүүлэх гутамшигтай явдлыг албадан хийлгэсээр бэлдээд байлаа.

Тэрхэн үед Гибралтарыг эзэлчхээд байсан бөгөөд Барселоныг эзэмшихийг санаархаж байв. Ямар ч олон их үйлс вэ. Ийм үед амьдрахыг хайрласан хатан хаан Аннагаар бахдахгүй байхын аргагүй яа даа.

Зарим талаар Аннагийн хаанчлал, XIV Людовикийн хаанчлалын хуулбар юм шиг харагдана. Түүх хэмээгч тохиолдол энэ хааны нэг үеийн хүн болгочихсон Анна хатан түүнтэй ямар нэг, муухан адил, өнгөцхөн төсөөтэй байлаа.

XIV Людовиктай адилаар «агуу их хаанчлалаар» наадаж байв. Түүнд өөрийн хөшөө дурсгал, өөрийн урлаг, өөрийн ялалт, өөрийн жанжин, зохиолч нар, нэрт хүмүүст тэтгэвэр олгож байдаг өөрийн хувийн хөрөнгө бэл, урлагийн бүтээлүүдийг дэлгэсэн өөрийн гудамлаг ч байлаа. Түүнд бас гял цал, болсон бараа бологчид өөрийн ёс журам, өөрийн марштай тансаг ордон байв. Энэ ордон нь Версалийн⁸⁷ бүх «агуу их хүмүүсийн» жижиг хэмжээний хуулбар байлаа. Тэр хүмүүс маань уг эх дээрээ бол тийм ч их агуу биш л дээ. Бага сага эндүүрэл, түүн дээр Люлливээс⁸⁸ хөгжмийг нь дуурайж авсан «Бурхан минь, хатан хааныг нигүүлс» сүлд дууллыг нэмээд, энэ бүгд адил төсөөтэйн хуурмаг үзэгдлийг буй болгоно. Бүх чухал хүмүүс биеэрээ заларна: Христофор Рен⁸⁹, Мансартай⁹⁰ бүрэн тохирно, Сомерс⁹¹ ч Ламуаньоноос⁹² дутахгүй. Аннад өөрийн Расин

болох Драйден, өөрийн Буало⁹³ болох Поп⁹⁴, өөрийн Кольбер⁹⁵ болох Годальфин⁹⁶, өөрийн Лувуа болох Пелброк болон өөрийн Тюрекн болох Мальборо байлаа. Зөвхөн хиймэл үсийг нь томруулаад л духыг нь багасгачих. Ерөнхийдөө бүх юм баяр ёслолын байдалтай гял цал буусан баян тансаг. Тэр үед Виндзор⁹⁷ Марлигаас⁹⁸ бараг хоцрохооргүй байлаа. Гэхдээ юм бүгд дээр цаанаа л нэг эм хүний мөр үлдээж, Аннагийн дэргэдэх Телье ламтан хүртэл Сара Женнигс гэдэг нэр авч байлаа. Гэлээ гэхдээ энэ үеийн утга зохиолд, тавин жилийн дараа гүн ухаанд ч нэвтэрч орсон егөөдөл аль хэдийнээ үзэгдэж эхлэв. Мольер католик Тартюфыг илрүүлэн гаргаж ирсэн шиг Свифт протестан Тартюфыг илчилж байлаа. Хэдийгээр энэ үед Англи нь Францтай шөргөлцөн түүнийг дийлж байсан ч гэлээ, түүнийг сайшаан жишээ авч, соёл гэгээрлийг нь дуурайдаг байлаа. Английн өнгөн талд гял цал бууж байгаа юм бүхэн Францын гэрлээр гийгүүлэгдэж байв. Аннагийн хаанчлал зөвхөн арван хоёр жил үргэлжилсэн нь харамсалтай, тэгээгүй сэн бол францчууд «XIV Людовикийн зуун» гэж ярьдаг шиг, англичууд «Аннагийн зуун» гэж түвдэх ч үгүй ярьж гарах байсан биз. 1702 онд XIV Людовикийн нар хэдийнээ тонгойж байх үед Анна гарч иржээ. Бүдэг цайвар туяатай од, гал улаан туяат одны жаргаж байх үед мандаж таарчээ. Францад «Наран хаан» эзэрхэж байхад, Англид «Саран хатан хаан» төр жолоодож байлаа.

Өөртэй нь дайтаж байсан мөртөө Англид XIV Людовикийг ихэд хүндэтгэдэг байсан нь түүхийн тун сонин баримт билээ. «Чухам ийм л хаан Францад хэрэгтэй» гэж англичууд ярьдаг байв. Англичуудын эрх чөлөөндөө хайртай байдаг нь бусад ард түмний боолын байдалтай эвлэрэн хүлцэхэд нь саад болсонгүй. Хөршийг нь баринтагласан гинжинд ивээлтэй хандах нь англичуудыг дангаараа ноёрхогчийг хүндлэн бишрэхэд хүргэжээ.

Ерөнхийдөө, Анна нь францын уран зохиолын орчуулагч Бивереллагээс номынхоо зургаа, ёс болон өмнөх үгийн гурав дахь хуудсанд нийтдээ гурвантаа цөхрөлтгүйгээр дурдсанчлан ард түмнээ жаргуулан гийгүүлж байлаа.

Хатан хаан Анна, Жозианыг хоёр шалтгаанаас болж тэгтлээ таалдаггүй байлаа.

Нэгдүгээрт, Жозиана гүнжинг сайхан гэж үздэг байв.

Хоёрдугаарт, Жозианы сүйт хархүүг бас сайхан эр хэмээн тооцдог байжээ.

Эмэгтэй хүний атааг хүргэхэд дор хаяж хоёр шалтаг зайлшгүй хэрэгтэй. Тэгвэл хатан хаанд ганц нь л байхад хангалттай ажээ.

Тэр нь Жозианыг өөрийнхөө дүү байсанд нь бас бухимдан дургүйцдэг байв.

Анна сайхан хүүхнүүдийг үзэж чаддаггүй байлаа.

Энэ нь ёс суртахууныг садар болгож байгаа хэрэг гэж үзнэ.

Өөрийнх нь хувьд гэвэл тэр нь царай муутай байсан ч мэдээжээр түүний хүслээс нь болсон юм биш.

Түүний үзэмж муутай царай зүс нь зарим талаараа шашин шүтлэгээр нь тайлбарлагдана.

Ухаантай сайхан хүүхэн Жозиана, хатан хааны уурыг хүргэнэ.

Хөөрхөн гүнжин царай муутай их эзэгтэйн хувьд тийм ч хүсмээр дүү биш байжээ.

Сэтгэл тавгүйтэх өөр нэг шалтгаан байсан нь Жозианы гарал билээ.

Анна бол хоёрдугаар Иаковын, Иоркийн ван гэгдэж байх үедээ урагшгүй ч гэлээ хууль ёсоор гэрлэсэн энгийн л нэг хатагтай Анна Хайдын охин байлаа. Судсаар нь хатан хааны бус цус гүйж буйг мэддэг болохоороо Анна өөрийгөө хагас хатан хаан гэдгээ мэдэрнэ. Огт хууль бусаар ертөнцөд мэндэлсэн Жозиана, хатан хааны өө сэвтэй гарлыг нь онцлохоос хэтэрсэнгүй. Тэнцвэргүй гэрлэлтээс төрсөн охин өөрийнхөө хажууд гэр бүлээс гадуур төрсөн охиныг харж суух нь халагламаар байлгүй яах вэ. Тийм ч аятайхан бус харшуулал ч гарч мэдэхээр Жозиана Аннад: «Миний ээж юугаараа ч таныхаас дутахгүй» гэж хэлэх эрхтэй ажээ. Ордонд энэ тухай ил ярилцахгүй боловч, бодож байгаа нь мэдээж. Энэ нь өндөр дээд хатан хааныг цухалдуулна. Энэ Жозиана юугаа хийж энд байна вэ? Ер нь яах гэж төрсөн хүн бэ? Энэ Жозианна гэдэг юм хэнд хэрэгтэй юм бэ?

Зарим хамаатан садны холбоо бидэнд доромж явдал шиг байдаг шүү дээ.

Гэлээ ч Анна гадна өнгөн дээрээ Жозианад ивээлтэй хандана.

Хэрэв дүү нь гүнжин байгаагүй бол бүр хайрлаж халамжлах ч байсан байж болох л юм.

VI. Баркильфедро

Бусад хүний юу хийж байгааг мэдэх нь үлэмж ашигтай. Хэрсүү ухаан, ойр орчныхоо хүмүүсийг байнга ажиглаж байхыг шаарддаг.

Жозиана, Дэвид лордыг тагнаж байхыг өөрийн итгэдэг үнэнч, Баркильфедро гэдэг хүнд даалгажээ.

Дэвид Лорд, Жозианыг болгоомжтой мөшгөн ажиглаж байхыг үнэнч шударгад нь огт эргэлздэггүй Баркильфедро нэртэй хүнд даалгасан байна.

Хатан хаан Анна болохоор өөрийн нууцгай дүү Жозиана ба хүргэн болох Дэвид лордын хөдөлж аашлах бүхнийг өөртөө мэдэгдэж байхыг бүрэн итгэж найддаг Баркильфедро нэртэй итгэлтэй хүнд даалгажээ.

Ийнхүү Баркильфедрогийн хар дор Жозиана, Дэвид лорд, хатан хаан гэсэн гурван даралт байлаа. Нэг эрэгтэй, хоёр эмэгтэй! Нэг хөгөөс нөгөөд шилжих бөөн боломж гарах нь тэр! Хамгийн өөр өөр сэтгэлийн өнгийг зохицуулан тохируулна гээч!

Баркильфедрод гурвын гурван өндөр төрөлт хүний чихэнд шивгэнэх ийм гайхамшигт боломж үргэлж дайралдаж байсан нь үгүй.

Тэр нь йоркийн вангийн хуучин зарц нь байжээ. Цагтаа бас ч үгүй санваартан болох гээд үзсэн боловч бүтсэнгүй. Англи болон ромын хунтайж йоркийн ван, пап ламд сүслэхийг, протестан шашинд албан ёсоор хамаарагддагтайгаа хослуулангаа Баркильфедрог сайх хоёр шашны алинд нь ч эрх тушаал олж өгч чадах байсан авч түүнийг санваартан болчихоор католик шашинд хангалттай сүсэггүй, лам болгочихоор протестан шашинд хангалттай бишрэлгүй гэж үзжээ. Ийм маягаар Баркильфедро хоёрын дунд хоосон хоцорч сүнс нь тэнгэрээс газарт буух нь тэр ээ.

Мөлхөж яваа хүнд бол энэ тийм ч муу юм биш.

Зөвхөн мөлхөж байж гэмээ нь л урагшилж болдог зам байдаг шүү дээ.

Хэдийгээр хэр тааруу ч гэлээ гэдэс цатгалан зарцын мяндаг урт удаан хугацааны турш түүний амиа зогоодог ганц юм нь байлаа. Ийм алба түүнд бас бус зүйлийг өгдөг ч гэлээ Баркильфедро улам давран эрх тушаалд тэмүүлэн авай. Хэрэв хоёрдугаар Иаков уначхаагүй сэн бол тэр нь санаандаа хүрэх ч байсан байж болох. Бүгдийг шинээр эхлэхээс өөр арга байсангүй. Гуравдугаар

Вильгельмийн, үнэнч шударга гэж үзэж байсан ширүүн догшин хаанчлалын үед ямар нэг юманд хүрнэ гэж горьдохын аргагүй байв. Баркильфедро өөрийн ивээгч хоёрдугаар Иаковыг унасны дараа л шуудхан өлөн зэлмэн байдалтай учирсан нь бус. Ширээнээсээ шилжсэн хаадын ямар нэг үлдэж хоцорсон юм бас ч гэж нэг хэсэгтээ бусдын хүчээр амьдрагчдыг тэжээн дэмжиж байдаг билээ. Модноос огтолж хаясан мөчир дээрх ногоон навч хоёр гурван өдөртөө шим шүүснийхээ үлдэгдлээр өнгө алддаггүй. Дараа нь гэнэт шарлан хорчийно. Ордны шадар хүмүүст ч ийм юм тохиолдоно.

Хаан ширээнд суух үе залгамжилсан эрх хэмээгдэгч занданшууллын ачаар, хаан түлхэгдэн унаж эх нутгаасаа хөөгдсөн байлаа ч гэсэн амьдран аж төрсөн хэвээр байдаг. Ордны шадарчууд бол шал өөр, тэд хаанаас илүүгээр сүнс сүүдэр нь зайлсан байдаг билээ. Харьд байгаа хаан бол занданшуулсан хүүр бөгөөд, нутагтаа байгаа ордны шадар бол хий сүүтгэнэл юм. Тэгээд сүүдрийн өөрийнх нь сүүдэр байна гэдэг голоо тасартал турж эцнэ гэсэн үг. Баркильфедро тураалдаа хүрч, харангаджээ. Тэгэхэд нь бас жаахан зохиол оролдоод үзжээ.

Гэвч түүнийг тогооны газраас хүртэл хөөнө. Заримдаа тэр нь хаана толгой хоргодохоо ч мэдэхээ байчихдаг байв. «Хэн намайг орогнуулах бол?» гэж сураглан лавлаж тэмцэнэ. Аз нь дутсан хүний шинж болсон цөхрөн галзуурахад ганц хуруу дутуу хүн лүгээ адил үхэн хатан тэмцэж байлаа. Түүнээс гадна тэр нь модны голыг хөндлөн гулдгүй нүхлэн өрөмдөгч морин шоргоолжны онцгой чадварыг эзэмшсэн нэгэн байв. Хоёрдугаар Иаковын нэрийг барин, дурсан санаж уяран хайрлаж байгаагаа, үнэнч шударга хэвээр үлдсэнээ гайхан байж Жозиана ахайтанд наалдаад авчээ.

Ихэнх тохиолдолд бидний өрөвч сэтгэлийг хөдөлгөн байдаг ядуу бөгөөд ухаалаг сайх хүнд Жозиана өршөөнгүй ханджээ. Түүнийг лорд Дерри-Моирт танилцуулж, зарц нарынхаа байранд суулгаад, барлагуудынхаа тоонд оруулан, түүнд хүн шиг хандаж, заримдаа бүр ярьж хөөрөн гийгүүлдэг байлаа. Ийнхүү Баркильфедро даарч хөрөх, өлсөж цангахын зовлонг хойшид үзэхээ больжээ. Жозиана түүнтэй «чи» гэж ярина. Тэр үед дээд зиндааны авхай нар бичгийн хүмүүст «чи» хэмээн хандах бөгөөд цаадуул нь ч дургүйцэж үл чадна. Бэйс ахайтан Мальи орондоо хэвтсэн хэвээр, урьд нь нэг ч удаа дайралдаж байгаагүй Руаг хүлээж аваад:

— «Дээдсийн амьдралын жилүүдийг» чи бичсэн үү? Сайн байна уу гэсэн юм гэдэг.

Хожим нь зохиолчид мөн энэ маягаар өөрсдөөс нь хариугаа авчээ. Фабр д'Эглатин ван ахайтан де Роганаас,

— Чи чинь хадамд гарахынхаа өмнө Шабо овогтой байсан уу? гэж асуух өдөр ирэх нь тэр.

Жозиана Баркильфедротой «чи» гэж ярьж байгаа нь түүний хувьд том амжилт бөгөөд сэтгэл нь хөөрнө. Авхайн ихэрхэг эрээ цээргүй байдалд бах нь ханажээ.

«Жозиана авхай намайг «чи» гэж ярьдаг шүү» хэмээн бодохоос баярласандаа гуяа алгадна.

Тэр нь үүнийг байдлаа бэхжүүлэхэд ашиглаж байлаа. Жозианы дотоод өрөөнүүдэд нь, хэн ч хүн байна гэж тоож харж, зовж зэвүүрхдэггүй өөрийн хүн болж авчээ. Авхай түүний дэргэд цамцаа солилоо гэхэд эвгүйрхэж сүйд болох ч үгүй байлаа. Гэвч энэ бүгд тийм найдвартай бус зүйл байв. Баркильфедро улам ч бэх бат байдлыг олж авчээ. Хэрэв оготнын нүхээр орох дөхөж байж хатан хаанд ойртож аваагүй сэн бол тэр нь ингэж үйлээ үзэж, үсээ цайснаа шал хэрэггүй зүйл гэж үзэхээс ч тоохгүй байв.

Нэгэн удаа Баркильфедро Жозианад хандан,

— Эрхэмсэг авхайтан минь, наддаа хишиг хайрлаач гэв.

— Чи юу хүсээ вэ? гэж Жозиана асуулаа.

— Албан тушаалтай болох гэсэн юм.

— Албан тушаал ий? Чи юу даа?

— Тийм ээ, авхайтан минь.

— Тушаал горьдоно гэж толгойд чинь яаж багтав аа? Чи чинь юунд ч авьяасгүй хүн шүү дээ.

— Тийм болоод л танаас гуйсан юм.

Жозиана инээснээ,

— Алинд нь ч сачий чинь хүрэхгүй тэр бүх албан тушаалаас ямрыг нь чи хүсээ вэ?

— Далайн лонхны бөглөө авагчийн ажил.

Жозиана улам ч хөхрөөд,

— Энэ чинь юу вэ? Чи тоглож байна уу? гэвэл,

— Үгүй шүү, эрхэм ээ гэв.

— За яах вэ. Зугаа болгон би чамд тоглоом шоглоом болголгүй хариулъя. Чи юу болохыг хүсэж байгаагаа дахиад хэлээдэх,

— Далайн лонхны бөглөө авагч.

— Хааны ордонд болохгүй юм гэж байхгүй. Тийм тушаал байдаг гэж үү?

— Тийм ээ, эрхэм авхай.

— Би урьд нь дуулаагүй юм байна. Цааш нь ярь.

— Тийм тушаал байдаг юм.
 — Чамд байхгүй сүнсээ барин тангарагла даа.
 — Тангараглая.
 — Үгүй, чамд итгэж болохгүй хүн.
 — Танд баярлалаа, эрхэм авхай.
 — За тэгэхээр чи чинь нөгөө... Аль вэ, дахиад нэг хэлээдэх.
 — Далайн лонхны битүүмжийг задлах.
 — Ийм алба тийм ч залхуу хүрмээр юм биш байж таарна. Энэ чинь хөшөөний морины дэлийг самнахтай л бараг адилхан байх.
 — Бараг тийм шүү.
 — Юу ч хийхгүй тэгээд... Ийм ажил үнэндээ чамд таарна л даа. Үүнд чи яг тохирно.
 — Аль вэ тэр хараач, надад бас авьяастай юм байгаа биз дээ.
 — Тоглоом хийхээ боль! Үнэн хэрэгтээ тийм албан тушаал байгаа юм уу?
 Баркильфедро хүндэтгэлтэйгээр биеэ данайлгаснаа,
 — Цааш нь ярихыг соёрхож хайрла. Таны дээд төрөлт эцэг бол хоёрдугаар Иаков, таны хүргэн ах бол Кумберлендийн ван алдарт Данийн Георг билээ. Эцэг тань Английн лорд-адмирал байсан. Хүргэн ах тань одоо хүртэл лорд-адмирал хэвээр байна.
 — Надад ямар шинэ юм сонсгож байгаагаа бодооч. Чамтай чамгүй би наадахыг чинь сайн мэднэ.
 — Гэвч таны мэдэхгүй юм ч байна, эрхэмсэг авхай. Далайд, ёроолын гүнд нь байдаг, гадаргуу дээгүүр нь хөвдөг, далайгаас эрэг дээр шидэгддэг гэсэн гурван төрлийн олдвор байдаг юм.
 — За тэгээд яачихаа вэ?
 — Легон, флоутсон, жетсон хэмээх эдгээр бүх эд юмс тэргүүн адмирал-лордын өмч байдаг юм даа.
 — Тэгээд?
 — Эрхэмсэг авхай минь, одоо ойлгож байна уу?
 — Юу ч ойлгохгүй байна.
 — Далайд байгаа бүх юм ёроолд нь живсэн, гадаргуу дээр нь хөвж яваа, эрэгт гарсан бүгдээрээ тэргүүн адмиралын өмч байдаг.
 — Тийм гэж бодъё. Тэглээ гээд юу болох юм?
 — Хааны өмч болох хилмээс бусад нь цөмөөрөө шүү.
 — Би харин энэ бүгдийг чинь Нептуны⁹⁹ өмч гэж бодож явдаг байлаа гэж Жозиана хэлэв.
 — Нептун бол тэнэг. Тэр нь бүгдийг зөнд нь орхиж, тэр бүгд нь англичуудын эзэмшихэд саад болдоггүй юм.
 — Хэлэх юмаа бушуухан хэлээдэх.

— Энэ олдворуудыг далайн олз гэж нэрлэдэг.

— Их сайн байна.

— Энэ бол шавхагдашгүй ундарч байдаг зүйл. Далайн гадаргуу дээр ямагт ямар нэг юм хөвж, долгион ямагт ямар нэг зүйлийг эрэг рүү гаргаж байдаг. Энэ бол далайн төлж байгаа алба гувчуур юм. Англичууд ийм маягаар далайгаас татвар авдаг юм даа.

— За их сайн байна. Тэгээд цааш нь?

— Эрхэмсэг авхайтан минь, далай ийм маягаар бүхэл бүтэн хэлтсийг бий болгожээ.

— Хаана?

— Далайн цэргийн захиргаанд.

— Ямар хэлтэс байдаг болж байна?

— Далайн олдворын хэлтэс.

— Тэгээд?

— Энэ хэлтэс Легон, Флоутсон, Жетсон гэдэг гурван тасагтай, тасаг бүрд нэг нэг түшмэл байдаг.

— Тэгээд?

— Задгай далайд хөвж яваа ямар нэг онгоц явж буй өргөргөө ч юм уу, далайн аварга амьтантай дайралдсанаа ч юм уу, ямар нэг хуурай газар ажигласнаа ч юм уу эсвэл живж, сөнөж, муу юм тохиолдсоноо, эсвэл бас бус юм мэдэгдэх хэрэгтэй боллоо гэж бодъё л доо. Тэгвэл хөлгийн эзэн лонх аваад дотор нь энэ тухай бичсэн цаасны өөдсийг хийж битүүмжилж лацдаад далайд шидчих нь тэр. Хэрэв лонх далайн ёроол руу живбэл Легон тасгийн даргын мэдлийнх болно, хөвж явбал Флоутсон тасгийн даргад хамаарагдах бөгөөд давалгаанд хуурай газар шидэгдвэл, энэ хэргийг Жетсон тасгийн дарга хариуцах ёстой.

— Тэгээд чи Жетсон тасагт ажиллах гэсэн юм уу?

— Яг тийм.

— Чиний нөгөө далайн лонхны бөглөө авагч гэдэг чинь энэ үү?

— Тийм албан тушаал байгаа юм.

— Яагаад чамд энэ нь, нөгөө хоёроос илүү санагдав?

— Яагаад гэвэл одоохондоо энэ албан тушаалд хүнгүй байгаа юм.

— Албан үүрэг нь чухам юу юм бэ?

— Эрхэмсэг эзэгтэй минь, 1598 онд могой загас барьж амьдардаг нэгэн загасчин элсэрхэг харгиагаас, давирхайдсан лонхны шил Epidium promortorium олсноо хатан Елизаветад хүргүүлжээ.

Лонх дотор байсан тослог цаас, Голланд улс хэнд ч юу ч хэлэлгүй, 1596 оны зургаадугаар сард Шинэ Газар хэмээх, үл мэдэгдэх орныг эзлэн авсан тухайг Англид мэдэгдсэн байна. Тэр оронд баавгай нь хүмүүсийг иддэг бөгөөд, энэ «Газар»-ын өвлийн тухай тодорхойлон бичсэн зүйлийг амь үрэгдсэн голландчуудын амьдадаа босгосон модон байшингийн янданд өлгөөтэй байгаа бялтат бууны хайрцагт хийж нуусныг мэдэгджээ. Энэ янданг ёроол нь цөмөрсөн торхоор хийсэн гэжээ.

— Энэ балай юмнаас чинь ойлгох юм алга.

— Голланд нэг улсаар илүү байна гэдэг Англи нэг улсаар дутуу болно гэсэн үг гэдгийг харин Елизавета ойлгосон юм. Сайх мэдээг агуулсан лонх их ач холбогдолтой зүйл байжээ. Үүнээс хойш далайн эргээс олдсон битүүмжилж лацадсан лонх савыг Английн тэргүүн адмиралд аваачиж өгч байх тогтоол гарах нь тэр. Эс дагаваас дүүжлэгдэх ял эдэлнэ. Адмирал тусгай томилогдсон түшмэлд лонхыг нээхийг даалган, хэрэв «доторх зүйл нь Сонирхолтой байх аваас» өндөр дээд төрөлт эзэн хаанд мэдэгдэж байхыг үүрэг болгоно.

— Далайн цэргийн захиргаанд шил лонх байнга ирэх үү?

— Их ховор доо. Гэвч энэ ямар ч хамаагүй. Албан тушаал нь байгаад л байна. Далайн цэргийн захиргаанд, сайх түшмэлд зориулан тусгай албан өргөө гаргаж, сангийн сууцаар хангадаг юм.

— Тэгээд тэр юу ч хийдэггүй амьтанд хэдийг өгдөг вэ?

— Жилд зуун гиней.

— Чи тэгээд ийм ялихгүй юмны төлөө надад яршиг болж байгаа юм биз дээ?

— Энэ мөнгөөр амьдарч болно.

— Өлөн зэлмэн гуйранч шиг үү.

— Над мэтийнхэд нь таарснаар л амьдарна.

— Зуун гиней гэдэг чинь юу ч биш.

— Таны амьдралын хоромд зориулагддаг мөнгө, бидэн шиг өчүүхэн амьтдад жилдээ хангалттай. Ядуусын давуу чанар үүнд л байгаа юм.

— Тэр ажилд чи орох болно.

Долоо хоногийн дараа гэхэд Жозианы хүссэн, лорд Дэвид-Дерри-Моирын танил талтайн ачаар, Баркильфедро гэдэг хүн түр зуурын бэрхшээлээсээ гарч, үнэгүй байр, жилд зуун гинейн цалинтай, орогноё орон бэлэн, идье хоол бэлэн аж төрж эхэлжээ.

VII. Баркильфедро замаа цэвэрлэсэн нь

Хүмүүс юунаас өмнө, ачийг бачаар гэдгээ үзүүлэхийг хичээх нь гэм биш зан буюу.

Баркильфедро ч ийм маягаар хөдлөхөө огоорсонгүй.

Жозианыг хишиг хайрласных нь хариуд яаж өшөөгөө авдаг юм билээ гэж өдрийн бодол, шөнийн зүүд болов.

Жозиана бол гоо үзэсгэлэнтэй, бие хас сайтай, залуу, баян нөлөө ихтэй, нэрд гарсан байхад, Баркильфедро бол царай муутай, намхан тагдгар, хөгшин, ядуу, хараат байдалтай, хэн ч мэдэхгүй хүн гэдгийг саная л даа. Мэдээжийн хэрэг энэ бүхний төлөө өшөөгөө авах хэрэгтэй.

Харанхуйгаас бүтсэн амьтан бусдын гялалзахыг уучилж чаддаггүй юм.

Баркильфедро бол Ирланд гэдгээ мартчихсан ирланд, хамгийн өөдгүй хүн байв.

Түүнд цорын ганц нааштай юм байдаг нь том гүзээ байлаа. Ер нь том гэдсийг зөөлөн сэтгэлийн шинж тэмдэг гэж үздэг билээ. Гэтэл Баркильфедрогийн хэвлий тэр чигээрээ бялангач, гоёдог зангийн илрэл, угийн хар санаатай хүн байлаа.

Баркильфедро чухам хэдэн настайг хэлэхэд бэрх. Ахуй байдлаас л болно. Нүүрийн үрчлээ, үсний буурал нь хөгшин юм шиг харагдуулах боловч, сэргэлэн ухаан нь залуу гэдгийг нь харуулна. Тэр нь сармагчин, армаана хоёрын хоорондох, нэг тийм, шаламгай мөртөө хөшүүн ажээ. Хааны талыг баримтлагч уу? Тэгэлгүй яах вэ. Бүгд найрамдах талынх уу? Хэн мэдэх вэ? Католик уу? Байж болох л юм. Протестан уу? Эргэлзээ байхгүй. Стюартын төлөө юу? Магадгүй. Браншвейгийн угсааныхны төлөө юу? Лав тийм байх. «Тийм» гэж хэлэх нь, яг тэр үедээ бас «үгүй» гэж байвал л сая ашигтай байдаг. Баркильфедро энэ ухаалаг дүрмийг мөрдлөг болгоно.

«Далайн лонхны бөглөө авагч» нь үнэн хэрэг дээрээ Баркильфедрогийн хэлсэн шир тийм дэмий зүйл ч бас биш байлаа. Гарсиа Феррендес «далайн лавлах бичигтээ» далайд сүйрсэн хөлгийг дээрэмдэн тонох, далайд хаягдсан зүйлийг эргийн оршин суугчид шамших явдлыг эсэргүүцсэн байдаг. Манай үед бол хоосон дэмийрэл гэж үзмээр эл эсэргүүцэл нь Англид шуугиан дэгдээж, тэр үеэс эхлэн хөлөг сүйдсэнээс болон хохирогчдын эд хөрөнгийг

тариачид авдаг байснаа больж, тэргүүн адмирал хураан авдаг ашиг гарчээ.

Английн эрэгт далайн гаргаж хаясан бараа таваар, хөлгийн араг бие, баглаа боодол, хайрцаг сав болон бас бус бүх зүйл лорд-адмиралд ногдох бөгөөд (Баркильфедрогийн шимтээд байсан тушаалын гол учир нь энд л байсан ажээ) далайн цэргийн газрын анхаарлыг дотроо ямар нэг мэдээ, мэдэгдэл агуулсан далайд хөвж яваа сав, суулга л онцгой татдаг байжээ. Хөлөг онгоц сүйрэх гэдэг Английн хувьд маш том асуудал байлаа. Английн амьдрал нь далайн аялалд байх учир онгоц сүйдэх нь үүрд сэтгэл зовоож санаа тавьсан зүйл байлаа. Далай түүнд байнгын түгшүүрийг авчирна. Сүйрч байгаа онгоцноос хаясан жижигхэн шилэн саванд хаанаас нь ч үзсэн чухал мэдээ, хөлөг онгоц түүний баг, сүйтгэлийн шалтгаан, хэдийд тохиолдсон болох, онгоцыг живүүлсэн салхи, эрэгт авчирсан урсгалын тухай мэдээ байж болно. Баркильфедрогийн ажиллаж байсан албан тушаал зуугаад жилийн өмнө байхгүй болсон ч гэлээ, цагтаа тэр нь үнэхээр ашигтай алба байлаа. Сүүлчийн «далайн лонхны бөглөө авагч» нь Линкольн дахь Доддингтоны Вильям Хасас байлаа. Энэ албан тушаалд байгаа хүн нь нэг ёсондоо далайд болж байгаа бүхнийг мэдээлэгч байлаа. Далайн дэлсгээгээр, английн эрэгт шидэгдсэн бүх л битүүмжилж, тийзэгдсэн сав суулга, лонх, цавир, дашмаг, лааз зэргийг авчирч өгдөг байв. Ганц тэр л үүнийг онгойлгох эрхтэй бөгөөд, хамгийн түрүүн тэдгээрийн нууцыг мэдэн, цэгцлэн ялгаж, шошго хөтөлж, дансанд нэг бүрчлэн бүртгэнэ. Ламаншийн арлуудад өнөө болтол хэрэглэгддэг «гөрмөл савыг бичиг хэрэгт оруулах» гэдэг үг эндээс тарсан ажээ. Үнэндээ болгоомжлох талын нэг арга хэмжээ авчээ. Эдгээр бүх сав суулгын нууцыг задруулахгүй гэж тангараг өргөсөн далайн цэргийн захиргааны хоёр төлөөний хүний хажууд битүүмжийг нь авч задлах бөгөөд Жетсон хэлтсийн эрхлэгч болох түшмэлийн хамт задалсан тухай тогтоолд гарын үсгээ зурна. Тангарагтай хоёр өөрсдийн андгай өгсөн үүрэгтээ баригдах учир, Баркильфедрогийн хувьд чөлөөтэйхөн шиг хөдөлж болох боломжтой ажээ. Наад зах нь гэхэд л ямар нэг баримт мэдээг дарагдуулах ч юм уу олонд сонсгох нь ганц түүнээс шалтгаалах байлаа.

Энэхүү хэврэгхэн олдвор нь Баркильфедрогийн Жозианад ярьсан шиг тийм ховорхон, чухал бус юм даанч биш байжээ. Заримдаа тэдгээр нь хуурай газарт яах ийхийн зуургүй ирж, заримдаа хэд хэдэн жил, сараар далайгаар тэнэнэ. Бүх юм салхины чиг, урсгал хоёроос хамаарна. Одоо далайд лонх чулууддаг заншил,

гэгээнтэн хувилгаадын хөргийн өмнө ex voto¹⁰⁰ өлгөдөг заншил лугаа бараг адил болжээ. Гэвч тэр үед үхлийн аюултай тулгарсан хүмүүс ийм аргаар бурхан болон хүмүүст сүүлчийнхээ бодлыг, үгийг дамжуулах дуртай байсан бөгөөд заримдаа далайн цэргийн захиргаанд иймэрхүү илгээлт овоорчихдог байв.

Орлеаны шилтгээнд хадгалагдаж байгаа, нэгдүгээр Иаковын дэргэд Английн их сангийн лорд-нярав байсан Суффалк гүнгийн гарын үсэгтэй илгэн цаас, зөвхөн 1615 оны ганц жилийн хугацаанд сүйрсэн хөлгүүдийн тухай мэдээг агуулсан тавин хоёр ширхэг битүүмжилж лацадсан шил сав, лааз, лонх, дашмаг далайн хүчний захиргаанд хүмүүс авчран, лорд-адмиралын бичиг хэрэгт бүртгэгдсэнийг гэрчилж байна.

Ордны албан тушаал бол хайлангаа аажмаар ойр орчиндоо тархаж эхэлдэг шар тосны дусалтай адилхан юм. Ийм замаар хэн нэгэн хаалгач дээд түшмэл болж, агтач эр цэргийн жанжин болно. Баркильфедрогийн гуйж байж олж авсан тушаалд энгүүндээ итгэл хүлээсэн хүнийг тавина. Их эзэгтэй Елизавета үүнийг хүсэж байж. Хааны ордонд итгэл гэдэг маань нууц явууллага гэсэн утгаар ойлгогдоно. Тэр нууц явууллага нь зэрэг дэв ахихад хүргэнэ. Ингээд эцэс сүүлдээ сайх түшмэл маань зарим талаараа чухал хүн болж ирэх нь бий. Тэр нь албан хаагч бөгөөд ордны шатлан захирах ёсоор, хоёр өглөг түгээгчийн дараа орно.

Тэр нь ордонд орох эрхтэй бөгөөд энэ нь үнэндээ даруухан эрх (humilis introitus) ч гэлээ түүний өмнө эзэн хатны унтлагын өрөөний хаалгыг ч нээж өгнө. Заншлын дагуу зарим тохиолдолд, ихэнхдээ зэгсэн сонирхолтой байдаг олдворынхоо тухай эзэн дээдэст биеэр мэдэгдэх шаардлага гарна. Түүнд нь амьд үлдэх ямар ч найдлагагүй болсон хүмүүсийн гэрээс, ойр төрлийнхөндөө зориулсан хагацлын захиа, далайд ачаа бараа хулгайлсан болон бас бус гэмт хэргийн мэдээ сураг, хааны титэмд ашигтай соёрхлын бичиг гэх мэт байна? «Далайн лонхны бөглөө авагч» хааны ордонтой шууд харилцаатай байж, байсхийгээд л их эзэнтэнд задлан илрүүлсэн олдворынхоо тухай тайланг тавина. Энэ нь нэг ёсны далайн хэрэг эрхэлсэн «бусдын бичиг захидлыг задлан мөрддөг газар» байлаа.

Елизавета хатны дэргэд энэ тушаалд байсан Беркишрийн Колейн Темфилд, далайн авчирсан иймэрхүү илгээлтийг өөрт нь гардуулахад латинаар ярих дуртай их эзэгтэй.

— Quid mihi seribit Neptunus (Нептун надад юу бичээ вэ дээ?) гэж асуудаг байжээ.

Нэвтрэх газар бэлэн болжээ. Морин шоргоолж санасандаа хүрэв. Баркильфедро хатан хаанд хүрч очжээ.

Тэр нь улайран тэмүүлсэн зүйлээ биелүүлж чадлаа. Элбэг дэлбэг байх гэсэндээ тэр үү?

Үгүй.

Бусдын аз жаргалыг бусниулах гэсэндээ юу?

Энэ нь илүү аятайхан байлгүй яах вэ.

Ойрх хүмүүсээ хорлоно гэдэг бахаа хангана гэсэн үг.

Бусдад хор хүргэх гэсэн бүүр түүр боловч цаглашгүй их хүслэнд автан түүнийгээ ганц хувь ч болов мартахгүй байна гэдэг хүн болгонд заяагддаг зүйл биш. Баркильфедро бол гайхалтай шаргуу нэгэн байв. Өөрийн санаснаа биелүүлэхдээ, нэг л зуувал зууснаа тавьдаггүй бух нохой лугаа адил улайрна.

Өөрийнхөө хатуу чангыг ухамсарлахдаа өөртөө битүүхэн баярлан сэтгэл ханана. Олзыг гартаа орууллаа гэдгээ мэдрэх ч юм уу эсвэл муу юм хийх нь зайлшгүй гэдгийг мэдэнгүүтээ л түүнд өөр юу ч хэрэггүй болоод явчихна.

Зөвхөн хүйтэн нь бусдыг хөлдөөж л байвал, өөрөө хүйтэнд бээрэхээс ч буцахгүй хүн байв.

Хорон муу санаатай байна гэдэг элбэг дэлбэг байна гэсэн үг. Хүмүүсийн ядуу гэж тооцдог, үнэндээ ч тачир татуу, хорон санаатай хүний муу санаанд нь бүхэл бүтэн баялаг байдаг бөгөөд түүнээ хорвоогийн юм бүгдээс илүүгээр чухалчилна. Муу үйлдээ бахаа хангаж байдагт нь л хамаг учир байх ажээ. Хэн нэгэн хүнд өөдгүй юм хийчхээд сэтгэлээ хангаж байх нь түүнд ямар ч хөрөнгө мөнгөнөөс илүү ажээ. Хохирогчийн хувьд гомдмоор зүйл нь, энэ бүгдийг зохион байгуулсан хүний хувьд бахыг нь хангана.

Католикуудын дарийн хуйвалдааны¹⁰¹, Гал Фоксын хамсаатан Кетсби «Сая фунт стерлинг өгсөн ч би улсын хурлыг тэр чигээр нь агаарт дэгдээхийг харан бахаа хангах хүслээсээ татгалзахгүй байсан сан» гэж хэлсэн байдаг.

Баркильфедро гэж чухам хэн байв аа? Хамгийн өөдгүй, хамгийн аймаар, жөтөөч амьтан байлаа.

Ордонд атаа жөтөө ямагт хэрэг болж таарна. Тэнд ичгүүрээ алдсан этгээд, унхиагүй амьтад, дэмий сэлгүүцэгч баячуул, ховдог шунахайнууд, хүнээс өө сэв эрэгчид, хорон санаатан, шогч шооч, тэнэг амьтад өдий төдийгөөр байх агаад тэдэнд атаач жөтөөчийн хэрэг зайлшгүй гарна.

Ойр дотнын хүнээ муучлахыг сонсож сууна гэдэг ямар аятайхан байх вэ!

Төрөлхийн тачаадал, атаа жөтөө ба нийгэмд онцгой ажил үйл болон хөгжсөн тагнуул хоёрын хооронд маш их төсөө байдаг. Тагнуул бол нохой шиг бусдын төлөөнөөс олз шиншилнэ. Атаа жөтөөч бас муур шиг өөртөө олз хайна.

Атаачийн гол чанар нь араатан шинжийн хар амиа хөөхөд л байдаг.

Баркильфедро гаднаас нь харахад ноомой, битүү зантай хүн боловч ямагт тодорхой зорилгыг өөртөө тавина. Тэр бүхнийг дотроо хадгалан, өшөө хорслоо сэтгэлдээ дарна.

Агуу их жигшүүртэй явдал бол асар их ихэрхэг зантай салшгүй хамт явдаг. Баркильфедрогийн зугаацуулж байдаг хүмүүс нь түүнийг соёрхож, бусад нь түүнийг үзэн ядах бөгөөд тэр бээр үзэн ядагчид нь түүнийг басамжлан, элэгсэг байдгууд нь түүнийг жигшин харьцдагийг нь мэдэрдэг байлаа.

Тэр дандаа биеэ барьж явдаг байлаа. Хуурамч дуулгавартай царай гаргангаа, дотор нь доромжлогдон басамжлагдсандаа байж ядан арзганана. Өөдгүй амьтад тэгэх эрхтэй байдаг юм шиг эгдүүцэн зэвүүцнэ. Ганц минутад ч амар заяа үзүүлдэггүй уур хилэнгээ хэзээ ч гадагш нь гаргадаггүй байв. Тэр нь ямар ч басамжлалыг тэсэж чадна. Өшөө хорсол нь зад тавих дөхөн зовоож, дотор нь арзганан шатавч, хэнбугай нь ч энэ тухай ядахдаа тааварладаг ч үгүй байв. Тэр нь цаанаа шаралхуу эр боловч, гаднаа ямагт инээмсэглэж явна. Бас эелдэг тахимдуу, зусарч нэгэн байлаа. Хөгшин залуу хүн болгонд мэхийн тонголзоно. Ялимгүй салхи сэрчигнэхэд л газартай наалдтал бөхийнө. Нурууныхаа оронд налархай хулстай хүн аз жаргалыг амархан олдог ажээ.

Ийм битүү зантай, хорлонт хүмүүс бидний боддогоос илүү олон байдаг. Тэд энд тэндгүй муу ёрлон өлөлзөн гүйлдэнэ. Яагаад энэ хорвоод шороо хөдөлгөж явна вэ? Ямар зовлонтой асуулт вэ! Бодол бологч энэ асуултыг өөртөө дандаа тавих агаад, сэтгэгч үүнийг хэзээ ч хариулж үл чадна. Ийм учраас гүн ухаантнуудын уйтгартай харц, хувь тавилан хэмээгч тэрхүү бүдэг бадаг оргил руу ширтэх агаад тэр өндрөөс хорон муу явдлын аварга сүүтгэнэл газар дэлхийд атга атгаар хорт могойг шидэлнэ.

Баркильфедро бүдүүн биетэй, туранхай царайтай хүн. Тарган их бие дээр ясархаг толгой байна гээд бодчих. Хавтгай богинохон зузаан хумстай мойног хуруутай, ширүүн үстэй агаад хол зайтай нүдтэй, гэмт хэрэгтний өргөн намхан духтай ажээ. Цаанаасаа өөдгүй харцтай сөлөр нүд нь унжсан хөмсөгний нь цаана ёлтолзоно. Монхор унжгар хамар нь бараг амандаа хүрэн алдана. Хэрэв

Баркильфедро ромын эзэн хааны хувцсыг өмсдөг юм гэхэд, Доминициантай¹⁰² л адилхан болох байлаа. Түүний шар царай нь наалданги шавраар, унжсан хацар нь цагаан лаваар барьсан юм шиг, хөндлөн гулд үрчлээснүүд нь элдэв муухай шалиг явдлынх нь гэрч болно. Загзайсан эрүү, дэлдгэр том чихтэй ажээ. Дуугүй байх үед нь дээшээ цорвойсон уруулынх нь цаанаас хажуугаас нь харахад хоёр үүдэн шүд ёрдойж харагдана. Энэ хоёр шүд өөрийг чинь ширтэж байна уу даа гэмээр санагдана. Нүд хазаж чаддаг шиг, шүд ч бас харж чаддаг буюу.

Тэсвэр, төлөв намуун авир, болгоомж сэрэмж, найрсаг чих зөөлөнтэй, уян зөөлөн ааш, бодлоготой ариун ёс суртахуун гэх мэтийн бүхий л буянт үйл Баркильфедрогийн дүр төлөвийг улам нарийн гүйцээн дүүргэх ажгуу. Энэ бүгдийг гүжирдэн муйхарлах замаар л эзэмшжээ.

Маш богинохон хугацаанд Баркильфедро ордонд бат бэх суурьшиж авчээ.

VIII. INFERI¹⁰³

Ордонд хоёр маягаар суурьшина. Нэг бол тээр дээр үүлэн дунд байна, энэ нөхцөлд сүр жавхлан, өргөмжлөл таныг хүлээж байна, нэг бол тээр доор балчиг намагт байна, энэ нөхцөлд таны гарт сүр хүч байх нь тэр.

Эхнийхэд нь та Олимпт байна гэсэн үг бөгөөд дараагийнхад нь хувцаслах өрөөнд л байна гэсэн үг.

Олимпт оршин суугчийн мэдэлд зөвхөн тэнгэрийн аянга л байдаг бол, хувцаслах өрөөний хажууд амьдрагсад цагдаагийн газрын үйлчилгээг ашиглана.

Энд та эзэн төрийн бүх гол шинжийг олж үзэх агаад заримдаа энэ нь найдваргүй толгой хоргодох газар болох учраас ял шийтгэлийн хэрэглэлийг ч үзэх нь бий. Гелиогабал¹⁰⁴ тэнд үхэлтэйгээ тулгарна. Ийм тохиолдолд сайх байрыг жорлон гэж нэрлэнэ.

Гэвч энгүүндээ энэ нь тийм ч аймшигтай газар биш билээ. Альберони¹⁰⁵ тэнд Вендомын ванг шагшин гайхаж, хаан ширээг эзэлсэн ихэс тэнд дуртайяа бараалхан соёрхдог ажээ. Тэр нь нэг ёсны хаан ширээт танхим байв. XIV Людовик тэнд Бургундын ван ахайг хүлээн авч байв. V Филипп тэнд их эзэгтэйн дэргэд морилон сууж байлаа. Хааны хувцас солих өрөөнд, санваартан хүртэл ордог байлаа. Заримдаа тэр нь нүглээ наманчлах газар болох нь ч бий.

Ордонд, хүний анхааралд хамгийн өртөгдөмгүй байр эзэлчхээд тушаал дэвшиж болдгийн учир энэ дээ. Тэгэхдээ чамлалтгүй тушаалд дэвшихийг нь яана.

Хэрэв та XI Людовикийн үед агуу их хүн байя гэж хүсвэл, Францын маршал Пьер Роган байж үз, нөлөөтэй хүн байя гэж хүсвэл үсчин Марал-Оливье шиг л бай. Мари Медичийн дэргэд алдаршъя гэж хүсвэл дээд түшмэл Силлер болж үз. Хэрэв их нөлөөтэй байя гэж хүсвэл гэрийн зарц Ганнон бай. Хэрэв та XV Людовикийн үед алдаршъя гэж хүсвэл түүний сайд Шуазел бай, хэрэв догшин байя гэж хүсвэл түүний зарц Лебел байж үз. XIV Людовикт орыг нь засдаг Бонтан, энэ хаанд армийг хөл дээр нь босгож өгсөн Лувуа, учир тоймгүй олон ялалт байгуулж өгсөн Тюрек нараас илүү сүр хүчтэй байжээ. Ришельегээс Жозеф ламтныг авчих юм бол их хамбаас бараг юу ч үлдэхгүй сэн билээ. Тэр бүх битүүлэг явдлууд ч алга болчих нь тэр. Улаан их хамба сүр жавхлантай, саарал их хамба аймшигтай. Өчүүхэн өтөнд ямар их хүч байдаг гэж бодно оо! Бүх

Нарвас бүх О'Доннелтой нийлээд ч, ямар нэг гэлэнмаа
Патрочиньогийн хийх дайтайг хийж дөнгөхгүй биз ээ.

Иймэрхүү сүр хүчний чухал нөхцөл нь ер шалиагүйд л байдаг
юм. Хэрэв та хүчтэй байхыг хүсвэл хэний ч нүдэнд бүү өрт.
Шалиагүй амьтан л бай. Цагариглаад унтаж байгаа могой бол эцэс
хязгааргүйн болон түүний зэрэгцээ юу ч үгүйн бэлэг тэмдэг мөн.

Ийм могойн зол завшаан Баркильфедрогийн хувьд дайрчээ.

Тэр нь зорьсон зүг рүүгээ гэтсээр байлаа.

Бусдын хүчээр амьдрагч мөлхөөнүүд газар сайгүй нэвтэрч
байдаг.

XIV Людовикийн ор дэрэнд бясaa үүрлэж, улс төрийн
бодлогод нь иезуит¹⁰⁶ нар их үүрэг гүйцэтгэдэг байлаа.

Орчлонд нийцэхгүй юм гэж юу ч байхгүй билээ.

Амьдрал гэдэг маань цагийн дүүжмэгийг санагдуулна. Ямар
нэг юманд тэмүүлж татагдана гэдэг нэг зүгээс нөгөө зүг рүү савлана
гэсэн үг. Нэг туйл нөгөө рүүгээ тэмүүлнэ. Нэгдүгээр Францискад
Трибуле, XIV Людовикт Лебель зайлшгүй хэрэгтэй байжээ.
«Дээдийн дээд төрөлтөн» хамгийн шалиагүй амьтан хоёрын хооронд
маш их төстэй юм байдаг.

Шалиагүй хүн нь удирдана. Энэ бол хаанаас нь харсан ч
ойлгомжтой. Доод талд нь байгаа хүний гарт л холбож байгаа
зүйлийнх нь учир байна.

Тэр нь хамгийн аятайхан байрлалыг эзлэн байдаг.

Тэр нь цөмийг үзэж харан, цөмийг дуулж сонсоно.

Тэр нь засаг төрийн мэлмий, их эзэнтний чих билээ.

Хэрэв хаан үгийг чинь анхааран сонсдог бол та өөрийн бодсон
бүгдээ түүний ухаан бодолд хавчуулж, үзэмжээрээ л захиран
тушааж болно. Хааны ухаан бол таны шүүгээ гэсэн үг. Хэрэв та
хуучин даавуу худалдан авагч бол тэр таны сагс болон хувирах нь
тэр. Хааны чих түүнийх биш болно. Ер нь ч тэд үйлдсэн хэргийнхээ
хариуцлагыг тэр чигээр нь хүлээхгүй л дээ. Өөрийн бодол санааг
эзэмдэж чаддаггүй хүн, хийсэн үйл явдлынхаа эзэн болж чаддаггүй.
Хаан ямагт хараат байдаг.

Хэнд?

Түүний чихэнд байнга дүнгэнэж байдаг ямар нэг өөдгүй
амьтанд, муу муухай явдлын үүр болсон хар ялаанд захирагдана.

Эл дүнгэнээнд нь тушаал байна. Ямар ч хаан төр гэсэн, чээж
бичгээс өөр юу ч биш.

Эзэн хаан чанга ярьдаг бол жинхэнэ эзэн шивгэнэнэ.

Энэхүү шивгэнээг төсөөлж ялган хаанд юу ярьж байгааг
чагнаж, түүнд хэлсэн үгийг олонд дуулдахаар давтаж чаддаг тэр хүн
бол ёстой түүхч юм.

IX. Үзэн ядах бол дурлал лугаа адил хүчтэй буюу

Их эзэгтэй Анна цөөн бус чихэнд сэм шивгэнэгчтэй байлаа. Тэдний тоонд Баркильфедро орно.

Хатан хаанаас гадна тэр, Жозиана авхай, лорд Дэвид нарыг долигонон, мэдэгдэлгүйгээр нөлөөндөө оруулахыг хичээнэ. Бидний дээр хэлсэнчлэн гурвын гурван хүний чихэнд шивгэнэх ажээ. Данжогоос нэг чихээр илүү байв. Данжо зөвхөн хоёр хүнд, хүр дүү охин Генриетадаа сэтгэлтэй болсон XIV Людовик, болон XIV Людовикт хайртай болсон Генриета хоёрын хооронд толгойгоо шаргуулчхаад, Генриетын зөвшөөрөлгүйгээр Людовикийн нарийн бичгийн дарга болж, Людовикийн зөвшөөрөлгүй Генриетын чухалч болж аваад, сайх хоёр хүүхэлдэйн хайр сэтгэлийн нууцгай явдлын гүнд орж авангаа, өөрөө асуулт тавьж, түүндээ өөрөө хариулдаг байжээ.

Тийм хөгжилтэй, чалчаа, хэн ч бай өмгөөлөн хаацайлах чадалгүй, ясыг нь яривал хэнд ч үнэнч, муухай царайтай, бас тэгээд муу санаатай Баркильфедро явж явж их эзэгтэйд зайлшгүй чухал болсонд хачирхаад байх юм юу ч алга. Анна, Баркильфедрог мэддэг болсноосоо хойш бусад бялдууч нарыг тоож сонсохоо больжээ. Тэр нь их эзэгтэйг, XIV Людовикийг яаж бялангачилж байсан шиг бялдуучилна. Хорон хэлээ бусдын эсрэг хандуулан ашиглана. «Эзэн хаан мунхаг, иймийн тул эрдэмтдийг шоолох хэрэгтэй» гэж Де Моншевийн хатагтай хэлсэн байдаг.

Хаа нэг сэм сэмхэн хатгуураа хороор хордуулах нь дээд зэргийн урлаг мөн. Нерон Локустын ажлыг харах дуртай байсан юм.

Хааны ордонд нэвтрэх амархаан. Сайх шүр сувд болсон барилгад дотуур нууц хаалга гэж бий. Хааны шадар хэмээгдэгч мэрэгч оготно түүнийг тэр дорхон нь таамаглан олж аваад, ухан малтаж, хэрэгцээтэй үедээ шинийг гаргачихна. Тийшээ орохын тул ямар нэг шалтаг байхад л хангалттай.

Өөрийн ажлыг шалтаг болгон ашигласан Баркильфедро яах ийхийн зуургүй хатан хаанд, Жозиана авхайтанд байдаг шигээ, нүдэнд дассан инээдэмтэй гэрийн амьтан болж чаджээ. Нэгэн удаа амнаас нь гарсан хурц үг, их эзэгтэйг таньж авахад нь тус болжээ. Ингээд өндөр дээдсийн өршөөл, хишгийг чухам юугаар хүртэж чадахаа мэдээд авах нь тэр. Их эзэгтэй, ордны захирагч, Деворширийн ван, лорд Вильгельм Кавендиш хэмээх даанч тэнэг хүнд их хайртай байжээ. Оксфордын их сургуулийн эрдмийн

зэрэгтэй мөртөө алдаагүй бичиж чаддаггүй сайх лорд нэгэн сайхан өглөө үхээд өгөх нь тэр. Ордны шадар сайх эр үхэнгээ тун болгоомжгүй явдал хийжээ. Яагаад гэвэл хэн ч түүнийг муу хэлэхээсээ сийхгүй болов. Хатан хаан, Баркильфедрог байхад түүний хойноос гашуудан, эцэст нь санаа алдан байж,

— Ийм их буянтай хүн мөртөө, тийм ч ухаантай биш байсан нь ямар харамсалтай вэ! хэмээн дуугарчээ.

Баркильфедро намуухан дуугаар,

— Эзэн тэнгэр минь, илжигнийхээ сүнсийг авч хайрла гэж францаар бөвтнөв.

Их эзэгтэй жуумалзан инээмсэглэв. Баркильфедро сайх мишээлийг хараад, хорон үг хэлэхэд дуртай гэдгийг бат нут ойлгожээ.

Түүнд хорон амлаж байхыг соёрхжээ.

Энэ үеэс эхлээд Баркильфедро хэрэгт дурлах, хорслоо гаргах хоёроо зоргод нь тавих нь тэр. Хэн ч түүний хэрийг нь мэдүүлэн зогсоож зүрхлэхгүй, цөм түүнээс айна.

Хааныг инээлгэдэг хүн бол бусад бүх хүний аянга нь байдаг.

Баркильфедро бүхнийг чадагч төгс хүчтэй салбадай боллоо.

Тэр нь өдөр бүр өөрийн газар доогуурх хонгилоор сэмхэн урагш ахина. Баркильфедро бүхэнд хэрэгтэй хүн болжээ. Ордны зарим нэг ихэс язгууртан, хэрэгцээ тохиолдсон үедээ түүнд ямар нэг жигшүүртэй хэрэг даалгах хүртлээ итгэдэг байжээ.

Ордон бол араа шүдтэй дугуйны бүхэл бүтэн тогтолцоо юм. Энэ тогтолцоонд орсноороо Баркильфедро түүний хөдөлгүүр нь боллоо. Зарим оньсон хөдөлгүүрт, хөдөлгөх дугуй маш цөөн байдгийг та анзаарсан уу?

Бидний дээр өгүүлсэнчлэн Жозиана, Баркильфедрогийн тагнах авьяасыг ашиглан, бодох санах ч юмгүйгээр, түүнд өрөөнийхөө түлхүүрийг өгтлөө итгэл хүлээлгэжээ. Ийнхүү Баркильфедро дуртай цагтаа түүн дээр орж гарах болжээ. Гаднын хүнд амьдралынхаа дотно нууц талыг дэлгэн нээсэн иймэрхүү хэтэрхий итгэл, арван долоодугаар зуунд зэгсэн тархсан үзэгдэл байлаа. Үүнийг «түлхүүр бэлэглэх» хэмээн нэрлэнэ. Жозиана авхай хоёр нууц түлхүүрийг, лорд Дэвидэд нэгийг нь, Баркильфедрод нөгөөг нь бэлэглэжээ.

Ер нь хуучин цагт, хэрэв хэн нэгэн хүн гэнэт унтлагын өрөөнд орох зөвшөөрөл авлаа гэхэд үүнд хэн ч гайхах нь үгүй. Заримдаа энэ нь нэлээд санамсаргүй хөгийн юманд хүргэдэг байв. Жишээ нь Ла Фарте, мадемуазель Лафоны орны хөшгийг гэнэт ярчихсан чинь хар шадар цэрэг Сенсонтой мөргөлдчихсөн гэдэг.

Баркильфедро, дээд зиндааныхныг хараат болгон тэднийг жижиг хүмүүсийн гарт өгчихдөг нууцыг уудлан илрүүлэхдээ даанч гарамгай нэгэн байлаа. Мурийж тахиралдсан далд замын харанхуй дундуур чимээ гаргалгүй мяраан гэтнэ. Аливаа нэгэн сайн тандуулын адилаар тэр нь алуурчны харгис хэрцгийг, бичил биетний тэсвэртэй хослуулсан хүн байлаа. Баркильфедро төрөлхийн ордны хүн байсан агаад ордны бүх шадрууд зүүдэн өвчтэй хүмүүс байдаг. Тэд, бүхнийг чадагч хэмээн нэрлэгддэг шөнийн цагаар хэсүүчилнэ. Тэдний гарт нууц дэнлүү байна. Дэнлүүнийхээ гэрлээр харах гэж хүссэнээ л гэрэлтүүлэн, өөрсдөө сүүдэрт үлдэнэ. Энэ дэнлүүгээрээ ордны шадар нь хүнийг биш амьтныг, эрэх бөгөөд тэгээд хаантай тулчихна.

Орчин тойрны хүмүүс нь ихэрхэн, сүр жавхланд санаархах нь эзэн хаадад үл таалагдана. Тэд өөрсдөөсөө бусад бүх хүнийг элэг доог болгоход дуртай байдаг. Баркильфедрогийн авьяас нь өндөр дээдсийн сүр жавхланг дээшлүүлж байдаг лорд, хан хөвүүдийн сайн талыг ямагт басан, үнийг нь алдуулж чаддагт байлаа.

Баркильфедрод бэлэглэсэн түлхүүр хоёр талдаа шүдтэй учир түүгээр нь Жозианы Лондон дахь Генкервиль-хаус, Виндзорын Корлеон-лож дахь хоёр өргөөний унтлагын тасалгаанд дуртай үедээ орж чадах ажээ. Энэ хоёр ордон хоёулаа лорд Кленчарлийн өв байлаа. Генкервиль-хаус нь Олдгейттэй зах нийлнэ. Олдгейт нь Харвикаас Лондонд орж ирдэг их хаалга юм. Тэнд толгой дээрээ өнгөөр будсан сахиулсан тэнгэрийн барималтай, сууриндаа арслан болон хирсийн баримал бүхий хоёрдугаар Карлын хөшөө байна. Дорнодын салхи, Сент-Мерилбоноос мөргөл эхлэх хонхны дууг Генкервиль-хауст аваачна. Виндзорын, тулгуур дээр босгосон Корлеон-лож ордон нь гантиг баганатай, тоосго чулуугаар флоренц маягаар баригджээ. Түүнд модон гүүрээр очно. Ёслолын хаалга нь Англидаа л толгой цохидог гоё хаалганы нэгэнд тооцогдоно.

Виндзорын шилтгээнээс холгүй орших энэ өргөөндөө байхдаа Жозиана, хатан хааны нүдэн дээр л байна. Гэлээ ч авхай энэ ордондоо байхыг илүү таална.

Их эзэгтэйд Баркильфедрогийн нөлөө, хажуугаас нь харахад мэдэгдэхгүй авч, ихээхэн газар аван гүнзгий үндэслэсэн ажээ. Ордны ийм хорт ургамлыг түүж хаяна гэхэд их бэрхшээлтэй. Тэд бараг соёолж нахиалах нь үгүйн учир гаднаас нь суга татах ямар ч боломжгүй ажээ. Роклор, Трибул, эсвэл Бремелийг үндсээр нь зулгааж хаяна гэдэг бараг санааны гарз.

Өдөр ирэх тусам, их эзэгтэй Анна, Баркильфедрод улам ч элэгсэг хандах болов.

Сара Женнигс алдар цуутай бол, Баркильфедро юугаар ч нэрд гараагүй хүн. Хатан хаан түүн лүгээ энэрэнгүй ханддагийг мэдэх хүн нэгээхэн ч үгүй. Түүний нэр түүхэнд үлдсэнгүй. Сохор номин болгон анчны гарт орно гэж байдаггүй.

Санваартан болох гээд аз нь дутсан Баркильфедро бүх юмнаас жаахан суралцсан боловч, иймэрхүү тохиолдолд ихэвчлэн байдаг шиг, юу ч мэддэггүй хүн байв. Хуурамчаар бүхнийг мэдэхийн золиос байж болно. Орчлон хорвоод тийм, ямар ч ашиггүй, мөрөн дээрх бөндгөрийнхөө оронд Данайдын торхтой¹⁰⁷ эрдэмтэд аль олон байдгийг хэлж барах вэ. Баркильфедро тархиа юугаар ч цэнэглэлээ гэсэн, бүгд талаар өнгөрч, хов хоосон үлдэнэ.

Хүний ухаан гэгч байгаль дэлхийн адилаар хөндий хоосныг тэвчдэггүй юм. Шим ертөнцөд хоосон хөндийг дурлалаар дүүргэж байдаг, харин оюун ухаан үүний тулд үзэн ядах гэгчид хандах нь цөөн бус. Үзэн ядах түүнд тэжээл болдог буюу.

Урлагийн төлөө урлаг бол байгальд бодож байдгаас илүүгээр байдаг шиг үзэн ядахын тулд үзэн ядах байдаг билээ.

Хүмүүс бие биеэ үзэн ядна. Ямар нэг юм хийх хэрэгтэй биз дээ, энэ чинь.

Шалтгаангүй үзэн ядах гэдэг аймшигтай. Энэ үзэн ядалт өөрөө өөртөө бах нь ханаж байдаг.

Баавгай, савраа хөхдөгтөө л амьд явж байдаг.

Гэвч ийм маягаар хязгааргүй үргэлжлүүлж болохгүй. Савраа тэжээх хэрэгтэй. Баавгайд ямар нэг тэжээл зайлшгүй хэрэгтэй болно.

Үзэн ядах гэдэг өөрөө өөртөө амттай байдаг учир нэг хэсэгтээ хүрэлцээтэй байснаа эцэс сүүлдээ ямар нэг тодорхой юм руу тэмүүлж ирэх ёстой.

Бүх амьд амьтанд түгээмэл байдаг өшөө хорсол нь ганцаардах лугаа адил хүч тамирыг барагдуулдаг билээ. Зорилгогүй хоосон үзэн ядалт бол хоосон сумаар буу тавихтай утга адил буюу. Энэ тоглоом нь зөвхөн хэрэв хэн нэгний зүрхийг нэвт буудаж болохоор тохиолдолд л сонирхлыг татна.

Зөвхөн үзэн ядагч гэдэг нэртэй болохын тулд нь үзэн ядаж болохгүй. Эрэгтэй ч бай, эмэгтэй ч бай хамаагүй хэн нэг хүнийг хөнөөхийн тул зорилго зайлшгүй байх хэрэгтэй.

Жозиана санаандгүйгээр Баркильфедрод сайх гайхмаар аймшигтай тусыг хүргэчихжээ. Тэр нь үзэн ядахыг улам

дүрэлзүүлэн, хурцалж, амьд олз харуулан анчны хорхойг хүргэж, мөдхөн бүлээн уур савссан цусаар бялдах нь хэмээн нуугдаж асан суманд найдвар төрүүлж, хурдан жигүүрт болжморыг гэнэн хэмээн хуурамчаар шувуу баригчийг баярлуулан эл тоглоомыг улам сонирхолтой болгон, зорилгыг нь зааж өгөөд, анчны араатан шинжийг өдөөж өгчээ. Учир нь тэр нь өөрөө ч мэдэлгүй алахын тулд төрсөн ажээ.

Бодол санаа бол сум юм. Баркильфедро анх уулзсан цусаар бялдах нь хэмээн нуугдаж асан суманд бүх хар санаархлынхаа бай болгон сонгож авчээ.

Санаа зорилго, үхэр буу хоёрын хооронд зарим адил тал бий. Баркильфедро бүтэн нуугдаж байгаад, бүхий л далд хорслоо Жозиана авхай руу чиглүүлнэ. Үүнд та хачирхан гайхаж байна уу? Тэгвэл танд ямар ч муу юм хийгээгүй шувууг яагаад та бууддаг юм бэ? Түүнийг идэхийн тулд л гэж та хариулна аа даа. Баркильфедро ч бас тийм юм хүсэж байв.

Таавар нуугдсан газрыг олж бүлэх нь хэцүү учир, Жозианын зүрхийг шархлуулж, болохгүй байсан ч гэлээ түүний ихэрхэг зан, бардам омгийг дайран, толгой руу нь тоншоод байж болох байлаа.

Жозиана чухамхүү бардам омгоо өөрийн хүч гэж үздэг боловч, хэрэг дээрээ энэ нь түүний сул, хүч багатай тал нь байв.

Баркильфедро үүнийг ойлгож байв.

Хэрэв Жозиана, Баркильфедрогийн хар санааг ойлгон, түүний инээмсэглэлийн цаана юу нуугдаж буйг мэдсэн сэн бол эл бардам ихэрхэг өндөр төрөлт авхай салганан чичрэх байсан биз ээ.

Авхай энэ хүнд юу нуугдаж буйг ядахдаа сэжиг ч аваагүй учир тайван тавтай нойрсдог байлаа.

Ирнэ гэж бодоогүй зүйл хаанаасыг бүү мэд, гэнэт нөмрөн ирдэг билээ. Амьдралын гүн дотор аймаар юм их бий. Бага үзэн ядалт гэж байдаггүй. Үзэн ядалт ямагт асар том байдаг.

Хамгийн өчүүхэн өт хорхойд хүртэл тэр нь хэмжээгээ хадгалж, асар том хэвээр үлдэнэ. Ямар ч үзэн ядалт нэгэнт л үзэн ядалт болохынхоо учир хүчтэй байдаг. Шоргоолжинд үзэн ядагдсан заанд аюул заналхийлж байдгийг хэлэх юун.

Цохилтоо хараахан хийгээгүй байж, Баркильфедро хийхээр завдан буй муу үйлээ угтан баярлаж хөөрнө. Жозианын эсрэг чухам юу хийхийгээ хараахан товлоогүй байв. Гэвч санаа зорилго нь буцалтгүй ажээ. Тэгээд ч нэгэнт иймэрхүүгээр шийдэж авна гэдэг бага юм биш ээ.

Жозианыг үгүй хийнэ гэдэг дэндүү том амжилт болох сон билээ. Баркильфедро үүнд горьдож найдсангүй. Гэвч түүнийг доромжлон басаж, уй гунигт автуулан, яаж ч чадахгүй ганиран хилэгнэхдээ уйлснаас болоод нөгөө сайхан нүд нь яаж улайхыг харахыг л Баркильфедро зол завшаан хэмээн тооцож байжээ. Тэгээд ч түүндээ найдан горьдож байлаа. Байгаль түүнд ийм шаргуу зан, бусдад хор хүргэх гэсэн тийм шуналтай хүслийг заяасан нь талаар биш хэрэг юм. Тэр нь Жозианын алтан хуяг дуулганаас ямар нэг өө цав олж эл Олимпт оршин амьдрагчийн цусыг урсгана гэдэгт итгэлтэй байлаа. Үүний төлөө түүнийг ямар шан харамж хүлээж байв аа? Буянт үйлийг хорслоор хариулан төлөхийн баяр бахдал гэдэг асар том шагнал байлаа.

Жөтөөч гэж хэн бэ? Ач хариулахыг мэддэггүй амьтныг хэлнэ. Өөрийг нь гэрэлтүүлж, бүлээцүүлж байдаг нарыг үзэн ядна.

Баркильфедро Жозианыг, одоо бол *vivus sectio*¹⁰⁸ гэж нэрлэх байсан юманд эрсдүүлэн, хагалгааны ширээн дээр яаж татваганан үрчилээхийг, түүнийг амьдаар нь яаралгүй хэсэг хэсэг болгон хэрчихийг харах юм сан хэмээн өдрийн бодол шөнийн зүүд болно.

Түүндээ хүрэхийн тул, өөрөө ч гэсэн жаахан зовлон үзэж хохирохоос сийхгүй байлаа. Өөрийн тавьсан занганд орж болно шүү дээ. Хутга эвхэхдээ хуруугаа огтолж болно. Тэглээ гээд тэр юу базаах вэ! Хэрэв Жозианыг зовоонгоо, өөртөө зовлон авчирлаа ч гэхнэ Баркильфедро үүнийг тоохгүй байх сан. Улайсгасан төмрөөр хайрангаа зандалчин өөрөө түлэгддэг ч үүнийгээ анзаардаггүй. Бусад хүн өөрөөс чинь илүү зовж байвал та юуг ч ажрахгүй. Тамлуулж байгаа хүний яаж зовж байгааг харахаараа та өөрийнхөө өвдөж зовж байгааг мэдрэхээ байна.

Аль болохоор их хор хүргэ, бусад нь яавал яаг.

Ойр дотнын хүндээ хор хүргэснээрээ та өөртөө хариуцлага хүлээнэ. Бусдыг аюулд эрсдүүлэхдээ та азаа туршиж байгаа хэрэг. Учир нь янз бүрийн учир явдал тааралдан, таны хувь заяаг гэнэтийн санамсаргүй сүйрэлд авааччихаж мэднэ.

Үнэхээр хар санаатай хүн ийм юмтай тулгарсан ч зогсдоггүй юм. Золиослогдож байгаа хүний зовлон түүнийг баярлуулна. Энэ зовлон зүдүүр түүний гижгийг аятайхан хүргэнэ.

Хорон санаатын хөхиүн зугаа толгойтой үс босмоор аймшигтай. Эрүү шүүлтийг харж байхдаа бах нь ханан сэргэнэ. Альба ван¹⁰⁹, хүмүүсийг шарж байсан түүдгийн галд гараа ээж байсан гэдэг. Гал бол нажид, туяа нь баяр баясгалан юм. Ийм маягаар сөргүү харьцууллаас ямар дүгнэлт гарч болох вэ гэдгийг

бодохоос л өөрийн эрхгүй зарсхийнэ. Сэтгэлийн бараан талыг ойлгохын аргагүй ажгуу. Бодений зохиолд дайралддаг «соргог нарийн цааз» гэсэн хэллэг, нарийн аргаар эрүүдэх, эрүү шүүлтдээ наждаа эдлэх, тамлагчийн бах ханах гэсэн айдас хүрмээр утгатай байж болох л юм.

«Хомхойрон шунах», «Нэр алдар хүсэх» энэ бол хэн нэгэн хүн, өөр нэгэн хүний хомхой занг хангахын тулд золиосонд гарна гэсэн утгатай үг юм. «Итгэл найдвар» гэдэг ойлголтыг хүртэл мушгиж гуйвуулна гэдэг ямар тоогүй хэрэг вэ! Хэн нэгний эсрэг өшөө хонзон өвөрлөнө гэдэг түүнд мууг хүснэ гэсэн үг. Яагаад сайн юм байж болдоггүй билээ?

Яагаад гэвэл бидний дур зориг голдуу муу тал руугаа болохоор тэгдэг ч юм уу?

Хамгийн хүнд зорилго бол, дарья гэх нь ээ дардайгаад байдаг муу санааг барьж байх явдал юм. Бидний бараг бүх хүслэнг сайтар тунгаагаад үзвэл, үнэнээр нь хүлээж болохгүйгээр нэг юм байдаг. Гэхдээ хаанаас нь харсан ч хорон муу санаатай амьтанд, ийм өөдгүй амьтан байдаг шүү дээ, бусдад аль болохоор муу байх тусмаа надад илүү сайн гэдэг дүрмийг мөрдлөг болгодог ажээ. Тийм хүний дотоод сэтгэл муу муухайн үүр гэсэн үг.

Торгоор ороолгож, тосонд бөмбөрсөн Жозиана, тоомсоргүй бардам омог, бүх юманд хайхрамжгүй дээрэлхүүгээр хандаж байдаг ажиггүй алмай зантай нэгэн байв. Эмэгтэй хүний хямсгалан тоохгүй байх авьяас гэгч гайхалтай эд. Жозиана бол хаана л бол хаана тааралддаг биеэ би гэсэн их зангийн үүр байлаа. Түүний нүдэнд Баркильфедро амьд хүн бус, бараг эд бараа юм шиг харагдана. Түүнд ч бас сэтгэл бий гэж хажуугаас нь хүн хэлбэл хачин их гайхах байлаа.

Тэр нь битүүхэн өөрийг нь ажиглаад байгаа энэ хүнийг хүн байна гэж! тоох ч үгүй, өрөөндөө нааш цааш холхин инээж хөхөрнө.

Бодолд дарагдсан Баркильфедро боломжтой цаг гарахыг хүлээнэ.

Тэр хүлээсээр л, энэ эмэгтэйн амьдралыг ямар нэг юмаар харлуулна хэмээн араандаа зуусаар явлаа.

Хайр өршөөлгүй отолт.

Тэр нь өөрийнхөө зан авирыг тайлбарлан, зэгсэн үнэмшилтэй учир гаргаж ирнэ. Өөдгүй амьтад өөрийгөө хүндэлдэггүй юм гэж бүү бодоорой. Тэд дэндүү гоёор өөрөө өөртэйгөө ярьж, үйл ажлаа зөвтгөн, орчныхыгоо дээрэнгүй харна. Юу гэсэн үг вэ? Энэ Жозиана түүнд өглөг хайрлалаа гэнэ ээ!

Хэмжээлшгүй их баялгаасаа хэдхэн зоосыг гуйлгачинд өгч байгаа юм шиг шидэж байна гэнэ ээ! Энэ өөдгүй тушаалыг олж өгснийг нь харчих!

Хэрэв тэр Баркильфедро, бараг санваартан шахуу, олон янзын ихээхэн билэг авьяастай, аграмбын зэрэг хүртчихээр бүрэн үндэстэй эрдэмтэн хүн, Иов шархныхаа идээ бээрийг арилгаж байсан шиг хагархай ваар сав данслах хэрэгтэй болсон бол, хэрэв амьдралаа булай албан тасалгаанд өнгөрөөж, лаг лай, далайн явуу бүрхсэн балай лонхны бөглөөг их зантайгаар онгойлгон, хөгцөрсөн илгэн цаас, ямар ч хэрэггүй өгөршсөн захидлыг, гэрээс санаатай юмны муухай тасархайг, ямар нэг, гаргахын аргагүй дэмий балай юмыг уншиж суух ёстой болсон бол, энэ бүгдэд Жозиана л буруутай.

Тэгээд энэ муу мал өөртэй нь «чи» гэж ярихыг хана!

Энэ бүгдийн төлөө өшөөгөө авч, энэ өчүүхэн амьтныг сургаад өгөхгүй юм гэж үү дээ?

Үгүй шүү, үзүүлээд өгөмз! Орчлон хорвоод шударга ёс байдаг юм шүү!

Х. Хүн нэвт харагддаг сан бол харж болмоор гал

Яалаа гэнэ ээ! Энэ аальгүй хүүхэн, энэ тачаангуй мөрөөдөгч, учрыг ойлгоогүйгээсээ хөндөгдөөгүй, хэрэглэгч нь хараахан гарч ирээгүй байгаа хүний хэсэгхэн мах, энэ ичгүүрээ алдсан вангийн титэмтэй адайр амьтан, дэндүү ихэрхгээсээ ч юм уу эсвэл цэвэр тохиолдлоор ч байж мэдэх учраас анх дайралдсан хүндээ хараахан өвөр дэлгээгүй яваа энэ Диана, ширээнээсээ шилжихгүй байх ухаан нь дутсан хувхай хааны дагавар охин, зөвхөн нэр хүндийнхээ ачаар өөрийгөө бурхан гэх нь дутуугүй дүр үзүүлдэг, харин ядуу явсан бол банзал байж таарах хаанаасыг бүү мэд, гэнэт тодроод ирсэн вангийн угсаа энэ хуурамч хатагтай, цөлөгдсөн хүний хөрөнгийг хулгуулсан энэ хулгайч хүүхэн, энэ хамраа сөхсөн өөдгүй новш, Баркильфедро түүний биеийг толгой хоргодох газаргүй, гол зогоох зүсэм талх ч үгүй байхад хоолныхоо үлдэгдлээр тэжээж, зэвүү хүрэм ордныхоо нэгээхэн буланд толгой хоргодуулах хүртлээ увайгүйтэн савсганадаг байна шүү. Дээврийн хонгил ч бай, зоорь ч бай адилхан юм биш үү? Жир зарцыг бодвол арай танагтай, жүчээндээ байгаа морийг бодвол арай дор амьдарч байгаа нь энэ. Түүний цөхөрсөн байдлыг ашиглан, энгүүндээ баячууд ядуусыг улам басан, уяаныхаа дорго нохой шиг өөртөө дасгахын тулд хийж байдаг тэр хуурамчхан тусыг үзүүлэх гэж яарсныг нь яана! Энэ тус нь Жозианаас юуг нь гаргаа вэ? Тус хүргэсний үнэ цэнэ гэдэг хэр зэрэг золиос гаргаснаараа үнэлэгдэнэ. Зөвхөн ордных нь өрөө тасалгаа гэхэд л тоолшгүй олон. Тэгээд Баркильфедрод тусалсан гээд байгаа шүү! Тэгээд түүнд үүнийг хийхэд ямаршуухан хүнд байсныг бод л доо! Үүнээс болоод тэр ахайтан яст мэлхийнхээ шөлнөөс ганцхан оочихыг дутуу уулаа гэж үү? Нөгөө хараал хүрсэн баялаг өвөөсөө чимхийг ч гэсэн алдлаа гэж үү? Үгүй шүү, тэр авхай өөрийн элбэг дэлбэг амьдралд ихэрхэг дээрэнгүй зангийн нэгэн учгийг, хээнцэр тансгийн нэгэн зүйлийг нэмж, гарын хурууг бөлзөг чимдэг лүгээ адилаар түүндээ чимэг болгон ухаантай хүнд тусалсан болж, санваартныг өөрийнхөө ивээлд авах нь тэр! Тэгээд одоо омойтон, «Би буянт үйл хийж байна, зохиолчийг тэжээж байна» гэж бүрнээ хэлж болох аж. «Энэ хөөрхий амьтан надтай дарайлдсан нь онож! Би чинь урлагийн түнш шүү дээ!» хэмээн их ивээгчийн дүр эсгэж болохоор болжээ. Тэгээд тэр их өглөг нь яг дээврийн доорх нэг өөдгүй пинд тавьсан ор шуу юм шүү дээ. Далайн цэргийн захиргааны албан тушаалыг Жозианы ачаар олж авсан нь мэдээж л дээ. Гайхамшигтай тушаал, чөтгөр ав гэж!

Жозиана Баркильфедрод илүү тус хүргэчихсэн юм алга. Түүнд байх ёстой, болохуйц л юмыг хийж. Ялихгүй юм шүү дээ. Ялихгүйгээс ч ялихгүй юмыг бүтээж энэ инээд хүрэм тушаалд, тэр гар хөлөө хүлүүлчихсэн юм шиг хөдөлж ч чадахгүй, саа дайрчихсан юм шиг, өөрийн төлөв дүрийг алдчихсан амьтан болжээ. Жозианад ямар элэнцгийнхээ ачийг санаж явах юм бэ? Өөрийг нь зэрэмдэг болгон төрүүлсэн эхдээ бөгтөр хүний санаж явдаг ачийг уу? Энэхүү онцгой эрх ямбатай, юм болгон нь гар дор нь бэлэн, хойд эх шиг хахир хатуу хувь заяаны танхилхан үрс болох амьтдыг хар! Тэгтэл билэг танхай Баркильфедро тэдний өмнө шатан дээр гозойтлоо номхон зогсож, зарцад нь мэхийн ёсолж, үдшийн цагаар цамхаг руу авиран, үргэлж эелдэг уриалгахан ялдам загнаж, нүүртээ хүндэтгэлийн инээмсэглэлийг байнга хадгалж явах хэрэгтэй болох нь тэр! Ийм байхад чинь ганирсан ууртаа шүдээ тачигнатал зуухгүй байж болох уу даа. Ингэж явахад нөгөө Жозиана хүзүүндээ сувдан сондор гархилуулж, өөрийн тэнэг лорд Дэвид-Дерри-Моир гэдэг юмтай хайр сэтгэлийн жүжиг тоглон маяглана. Ёстой өөдгүй эм!

Хэзээ ч, хэнээс ч тусламж бүү ав. Таныг гарцаагүй урхиндаа оруулах болно. Тамир тэнхээ чинь барагдаж хөсөр ойчих тэр үедээ ч ивээгчийн гарт орж болохгүй. Танд тусалчихна. Баркильфедрод гэдсээ зогоох талхны хэлтэрхий ч байхгүй байхад нь, тэр хүүхэн түүнийг нь хооллож ундлах шалтаг болгочихжээ. Түүнээс хойш Баркильфедро зарц нь болох нь тэр. Гэдэс хонхолзох түр зуурын сэтгэхүйгээс болоод л бүх насаараа гавлагдах нь энэ! Хэн нэгэн хүнд ач санана гэдэг, боолын хараат байдалд орно гэсэн үг. Эрх дархтай азтай хүмүүс танд хэдэн зоос атгуулчихын тул гараа сунгах агшныг чинь ашиглана, тэд таныг боол боолдоо бүр хамгийн адгийн, өглөг горьдож байдаг, хариуг нь бодон хайрлах үүрэгтэй боол болгохын тул, доройтон тамирдсан хормыг ашиглан далимдуулна! Яасан жигшүүртэй явдал вэ! Ямар хуншгүй зан бэ! Бидний бардам омгийг ямар муухайгаар урхилна вэ! Ингээд л бүх юм дуусаа, та амьдралынхаа турш энэ хүний сайн санааг дөвийлгөн магтаж, энэ хүүхнийг үзэсгэлэн төгөлдөр гэдгийг нь хүлээн зөвшөөрч, хамгийн ард үлдэж, зөв ч бай буруу ч бай бүхэнтэй эвлэрэн явахаар шийтгэгдэх нь энэ дээ. Уур чинь хүрч, уушги чинь сагсайж байвч, галзуурахад ганц хуруу дутан ууртаа огиход ч бэлэн байвч, ухаангүй хор шардаа цээж чинь дэлбэчих дөхөн, гашуун хөөс далайнхаас ч илүү хүчтэйгээр цээжинд чинь хүрчигнэн байвч, бүх юманд алга ташин шагшин гайхаж, зусардан магтаж, өвдгөө холготол сөгдөж бөхөлзөн байхаар яллагдах нь энэ.

Баячуул ядуу хүнийг ингэж л хоригдлоо болгодог ажгуу.

Бүх л амьдралын чинь турш таныг гутаахаар, өөрт чинь үзүүлсэн буянт үйлийн давирхайн наалдангид та насан туршдаа шигдэх нь энэ.

Өглөг бол гэтэлшгүй юм. Ачийг санах гэдэг бол сүүдэр өвчнөөс ялгаа юун. Тус үзүүлэх гэгч танд наалдаж аваад, таныг хааш нь ч хөдөлгөхгүй болгочихно. Түүний энэ чанарыг таныг хөөрхийлөн өрөвдөх гэгчээр булагч өөдгүй баячуул сайн мэднэ. Хийх ёстой юм хийгджээ. Та одоо нэг эд агуурс л болсон. Тэд таныг худалдаад авчихсан. Юугаар? Танд хаяж өгөхийн тул нохойноосоо булаан авсан ясаар л. Тэд энэ ясаа шидэж өгөхдөө толгой руу чинь буулгахыг яана. Энэ яс танд тус болох бус харин гэмтээхийг нь яана. Та түүнийг мөлжинө үү, үгүй юу гэдэг нь хамаагүй. Танд нохойн хонуурт зай гаргаж өгсөн. Талархаач, энэ чинь! Насан туршаа баярлаж яв. Эзэн ноёноо бишир. Хөлд нь сөгдөөч. Буянт үйл бол, буян хийж байгаа хүний мэдэлд сайн дураараа орохыг шаардана. Буян хийгчид танаас өөрийгөө шалиагүй амьтан гэж, өөрсдийг нь бурхан гэж зөвшөөрөхийг шаардана. Та улам дорд үзэгдэх тусмаа тэднийг улам өргөмжилж өгнө. Таны бөгтөр биеийг хараад тэд нуруугаа улам цэх болгон гэдийнэ. Хэлж ярьж байгаад нь ихэрхэг өнгө цухалзана. Хурим найр, загалмай зүүлгэх ёслол, жирэмсэн болох, үр хүүхэд төрүүлэх зэрэг гэр бүлийн үйл явдал цөмөөрөө танд хамаатай болж ирнэ. Тэднийд чонын бэлтрэг төрлөө гэхэд маш сайн гээд л түүнд зориулан шүлэг бичих хэрэгтэй болно. Та нэгэнт яруу найрагч болохоор элдэв заваан балиар юм сараачиж л таарна. Ийм байхад чинь галзуурахгүй яах юм бэ! Дахиад жаахан байтал чинь, тэд танд хуучин шаахайгаа элэгдтэл өмсүүлдэг болно вий.

«Хонгор минь, танайх чинь ямар гэгч амьтантай болоо вэ? Ёстой эрэмдэг дүрээрээ мөн. Хаанаас гараад ирэв?»

«Би өөрөө ч мэдэхгүй юм, миний тэжээж байдаг нэг бичигчээ болдог амьтан».

Энэ эм цацагт хяруулууд хоорондоо ярьж байгаа царай нь энэ. Бүүр дуугаа намсгахгүй ярихыг нь яана. Та үүнийг дуулсан мөртөө улам л илүү эелдэг аашилна шүү дээ. Тэгээд таныг өвдлөө гэхэд, эзэд чинь эмч явуулна. Мэдээжээр өөрийнхөө эмчийг биш л дээ. Цагийг нь болохоор таны тухай мэдээд л авна. Танаас өөр үүлдрийнх болохын хувьд таны хүрч чадахгүй өндөрт байдагтаа тэд өөрт чинь сайхан ааш гаргана. Өндөр дээд байдал нь тэднийг юунд ч орж болохоор болгоно. Тэд таныг өөрсдийнхөө зиндаанд хүрч чадахгүйг мэдэж байдаг. Таныг жигшин басамжлангаа, эелдгээр

харьцана. Ширээн дээр суухдаа, тан руу үл мэдэг толгой дохино. Заримдаа бүүр нэрийг чинь яаж бичдэгийг мэднэ гээч. Хэрэв тэд таныг ивээдэг гэдгээ мэдрүүлбэл, тэр нь зүгээр л таны аль хэврэг эмзэг зүйлийг чинь гишгэчин дэвсэллээ л гэсэн үг. Тэд танд хэчнээн сайн байна вэ!

Бузар булай явдлын дээд энэ биш гэж үү?

Ингэхээр Жозианыг аль болох түргэн гэсгээх ёстой нь мэдээж. Хэнтэй учирсныг нь ойлгуулаад өгөх хэрэгтэй! Ноёд баячуулаа, та нар өөртөө байгаа бүгдийг залгиж чадаагүй учраас л, илүү залгисныг ходоод чинь шингээхгүй учраас л (юу гэвэл та нарын ходоод биднийхээс том биш шүү дээ) эцэст нь хоолны шавхрууг хий хаяснаас хүнд өгсөн нь дээр учраас л, та нар ядууст, тэдний бантанг ихэд додигор хаяж өгдөг билээ. Үгүй ер, та нар бидэнд талх, толгой хоргодох газар, хувцас, ажил өгч байна гэнэ ээ. Та нарын хэрцгий авир, мангуу тэнэг явдал, биднийг та нарт ач санах ёстой хэмээн та нарыг итгүүлэхэд хүрдэг! Бидний талх гэдэг бол боолын талх, бидэнд өгсөн толгой хоргодох газар, хувцас чинь зарц шивэгчнийх, алба ажил маань элэг доог, доромжлолын бай болдог. Үнэндээ тэр албанд бидэнд хөлс төлдөг ч гэсэн, тэр алба чинь биднийг малын зэрэгт бууруулдаг! Үгүй ер, та нар бидэнд толгой хоргодох газар, гэдэс зогоох юм өгснийхөө хариуд биднийг гутаан, доромжилж байдгаа зөв гэж үзэж байдаг вий! Бид та нарт өртэй улс хэмээн санаандаа дүрслэн, биднийг ач санан талархана хэмээн найдаж байдаг вий! Маш сайн хэрэг! Гоо хүүхэн минь, би гэдэс дотрыг чинь гаргаад, амьдаар чинь залгиж, зүрхийг чинь хуу мэрээд өгөх юм хуна.

Энэ муу Жозиана уу! Амилсан шуламс! Түүний гавьяа гэж юу байна аа? Гайгүй байна аа ёстой. Эцгийнхээ тэнэгийг, эхийнхээ ичих нүүргүйг гэрчлэн орчлонд мэндлээд, бидэнд амь зуухын хишиг хайрлаж, бүхний хэрүүл оруул байхыг ялдамхнаар соёрхсоных нь төлөө түүнд сая саяыг төлж, газар нутаг, орд, шилтгээн, ой мод, нуур мөрөн, дархан цаазат ангийн газар гээд хайрласан бүгдийг нь тоолохын аргагүй! Тийм байтлаа бас маяглан шилбэлзэхийг нь ээ. Түүнд зориулж шүлэг бичихийг яана!

Гэтэл өчнөөн сурч боловсрон, ажиллаж, бүх насаараа өчнөөн төчнөөнийг бүтээсэн, зузаан зузаан судрыг уншина гэж идчихээд түүгээр тархи толгойгоо дүүргэхихсэн Баркильфедро эрдэм шинжилгээний намтар дунд хөгцөрч байх ч гэж! Сод ухаантай энэ хүн, армийг гайхалтайгаар командалж чадах, хэрэв зөвхөн хүсэх л юм бол Отвей Драйден нарынх шиг эмгэнэлт зохиол биччихээр энэ

хүн, эзэн хаан байхаар заяатай төрсөн энэ хүн, мөнөөх банзал өмссөн шалиагүй амьтанд өлсөж үхэхээс нь аврахыг зөвшөөрөхөөс өөр аргагүй болдог юм байна! Азаар нэг юм баян болсон эдгээр өөдгүй амьтдын хууль бус үйл ажиллагааг цааш нь үргэлжлүүлж болох уу даа! Ариун сэтгэлтэй дүр үзүүлэн, цусыг нь сороод уруулаа долоохоос ч буцахгүй бидэн рүү инээмсэглэн, ивээж явна шүү! Ямар нэг өөдгүй ордны авхай, өөрийгөө таны ивээгч хэмээн нэрлэх эрхтэй байхад, түүнээс аль ч талаараа давуу тэр хүн маань түүний гараар үйрүүлсэн талхны хогийг цуглуулан хамж байх тавилантай байна гэдэг айхавтар муухай шударга бус явдал биш үү? Ингэж байхад чинь, ширээний бүтээлгийг нь дөрвөн өнцгөөс нь шүүрч аваад, тэр бүх найр наадам, тэр бүх садар, наргиан, идэмхий ховдог зан, архи дарстай нь хамт, бүх зочин гийчин, ширээ түшээд дунхайгчид, доогуур нь дөрвөн хөллөөд мөлхөөчингүүдтэй нь, гуйлгачинд өглөг шиддэг өөдгүй амьтад, тэр өглөгийг нь гар тосон авдаг тэнэгүүдтэй нь хамт хамж аваад тааз өөд шидэхгүй байж яаж болох билээ. Энэ бүх бурхны улаан нүүрт нулимахгүй, газар тэнгэрийг, эргүүлэхгүй байж яахан болох билээ! За яах вэ, одоохондоо Жозианад л хумсаа шигтгэцгээж байя.

Баркильфедро ингэж тунгаан бодож байлаа. Догшин архираан, сэтгэл зүрхэнд нь булгилна. Атаач жөтөөч хүн өөрийгөө зөвтгөнгөө, гомдлоо олон түмний хорсолтой хутгаж, самуурах нь бий. Цусанд шунагчийн зүрхэнд бүх төрлийн хорлонтой тачаадал бургилан буцалж байдаг.

Арван тавдугаар зууны газарзүйн зургийн булан дээр нь *Hic sunt leones*¹¹⁰ гэсэн гурван үг бичсэн, нэргүй их уудам газрыг дүрсэлсэн байдаг. Иймэрхүү судлагдаагүй нутаг хүний сэтгэлийн нэгээхэнд бас байдаг.

Бидний дотор хаа нэгтээ, шунал тачаадал бургилан, сэтгэлийг түгшүүлж байдаг агаад энэхүү бидний сэтгэлийн харанхуй буданг бас *Hic sunt leones* гэж хэлж болно.

Гэвч энэ догшин бодлын эмх замбараагүй холион бантан үнэндээ огт утгагүй юм байлаа гэж үү? Ямар ч учир зүйгүй юм байлаа гэж үү? Үгүй шүү гэдгийг хүлээх хэрэгтэй.

Бидний ухаан бодол үнэн мөний дуу хоолой байж чаддаггүйг бодохоос ч аймаар. Ухаан бодол бол харьцангуй юм. Үнэн шударга бол ямар ч эргэлзээгүй юм. Шүүгч, хууль зүй хоёрын ялгаа ямар байдгийг сайн бодож үз дээ.

Муу шинжийн хүн дотоод сэтгэлээ ёстой нэг дураараа эдэлнэ. Худал хуурмагийн янз бүрийн биеийн дасгал байдаг. Хуурамч

баримт үндэслэгч бол гуйвуулагч юм. Хэрэгцээ тохиолдсон үед эрүүл ухаан бодлыг хүртэл хүчирдэн албадахаас буцахгүй. Хачин уян хатан, урин дүйтэй, хайр найргүй, тодорхой учир зүй хорон санаанд туслахад ямагт бэлэн байна. Тэр нь тун соргог нарийнаар далд байгаа үнэнийг нам цохиж чадна. Шуламс бурханд аймшигт нударганы амт үзүүлэх нь энэ.

Тэнэгүүдийн дурыг булаасан зарим нэг хуурамч баримт үндэслэгч, хүний сэтгэлийг хөх эрээн болгосноороо л зөвхөн алдартай байдаг.

Санасан хэрэг бүтэхгүй байгаад л Баркильфедрогийн сэтгэл юунаас ч илүү зовно. Тэр асар их хөдөлмөр гаргачхаад, начир дээрээ очихоор дэндүү өчүүхэн хор хүргэх вий хэмээн болгоомжлон айж байв. Зүрх сэтгэлдээ бүхнийг хөнөөх, доржпалам лугаа адил хатуу үзэн ядах хорсол агуулчхаад, мятаршгүй зоригийг эзэмшин, үхэл сүйрлийг үнэн голоосоо хүсэл тэмүүлчхээд, эцэст нь юу ч түймэрдэж шатаасан юмгүй, хэний ч толгойг авсан юмгүй, хэнийг ч хөнөөсөн юмгүй үлдэх гэж! Устган хөнөөх их хүчтэй, бүхнийг дайсагнан, бусдын жаргалыг хөнөөгч болж чадчихаад, зөвхөн түүнд, Баркильфедрод л тохирсон тун хэмжээгээр бүтээгдчихээд (учир нь ямагт бурхан эсвэл чөтгөр гэсэн бүтээгч байдаг), энэ бүх эрчим хүчээ нэг муухан няслах төдийд зарцуулна гэдэг та минь, толгойд багтах зүйл үү дээ! Баркильфедро алдаж буудна гэж үү? Хадыг агаарт цацчихмаар дэлбэрэх их хүчийг өөртөө мэдэрсэн хэр нь, ердөө л нэг муу цэмцгэнүүр эмийн магнайг булдруу болгох юм гэнэ! Чулуу шидэгч оньсон хөдөлгүүр байж, хий хоосон агаарт хөдлөх юм биз дээ! Сизифийн хөдөлмөрийг¹¹¹ хийчихэд тэр нь шоргоолж хөдөлсний дайтай болох нь. Үзэн ядахын бүх нөөцөө бараг ямар ч уршиг балаггүйгээр гаргах гэж үү! Бүх орчлонг үнсэн товрог болгон хувиргачихаар асар их хорсол заналын хүч өөрт чинь ид амтагдаж байгаа үед, энэ бүхэн бол доромжилж бассан хэрэг бус уу! Араа шүдтэй дугуйнуудын нарийн төвөгтэй тогтолцоог хөдөлгөөнд оруулж, ягаахан хурууны үзүүрийг л хавчуулахын тул Марлийн машин шиг, харанхуйд түржигнүүлэх болох нь ээ! Ордны эрээн мяраан амьдралыг намгийн дээр гаргахын тулд бул чулуунуудыг өнхрүүлэн зайлуулах болох нь ээ! Заримдаа уулыг эргүүлчихлээ гэхэд сохор номин нүхээ өөр газар солиод л гүйцээ. Энэ бол зөвхөн бурханд л таармаар хүчийг хий дэмий үрэх явдал юм.

Үүнээс гадна ордон хэмээгч өвөрмөц тулалдааны талбарт дайснаа онилчхоод алдаж буудах шиг аюултай юм юу ч байдаггүй. Нэгдүгээрт, та өрсөлдөгчдөө үнэн царайгаа мэдүүлж, уурыг нь

хүргэнэ, хоёрдугаарт (энэ л хамгийн гол нь юм шүү) алдаж буудсанаараа та, эзнийхээ дургүйг хүргэнэ. Хаад дүйгүй, будилуу хүнийг тэгтлээ их таалдаггүй юм. Ямар ч булдруу, ямар ч шалбархай байлгахгүйг хичээнэ шүү! Бүгдийг нь төхөөр, тэгэхдээ хамраас нь цус гоожуулж болохгүй! Алж байгаа хүн сайн эр, зөвхөн шархлуулж байгаа хүн бол алмай амьтан. Эзэн хаад зарцыг нь бэртээхэд дургүй. Тэдний задгай зуухан дээр байгаа шаазан эдлэлийг хагалах ч юм уу, бараа бологчдын аль нэгийг тахир дутуу болгоход уурладаг. Ордонд бол ариг, цэвэр цэмцгэр байх ёстой. Хагалж хэмхэлж болно. Харин шинээр соль, ингэвэл бүх юм учраа олж номоороо болох нь тэр.

Дээрээс нь нэмэхэд, энэ нь хов живийн талаарх ихэс дээдсийн саналтай гайхалтай нийлж байдаг юм. Муу хэлж хов жив зөө, гэхдээ нударганы амт үзүүлэх хэрэггүй, хэрэв гар чинь загатнаад байвал үхтэл нь нүд.

Чинжаалаа шаа, гэхдээ бүү дутуу бүл. Хэрэв хордуулсан зүү биш л бол. Энэ бол нөхцөл байдлын бурууг хөнгөвчилнө. Яг ийм байдалд л Баркильфедро ороод байв.

Хор шар нь буцалсан аливаа өөдсөн хүн бол, үлгэрийн лууг хорьсон сав л гэсэн үг. Жижигхэн саванд, аварга луу. Хэмжээ хязгааргүй болтлоо томрох хормоо хүлээж буй аймаар нягтарсан бөөм. Уйтгарлангаа, айсуй дэлбэрэлтийг бодон сэтгэлээ тайвшруулна. Доторх нь агуулж байгаа саваасаа том ажээ. Нуугдан анаж байгаа аварга биетэн, энэ хачин биш гэж үү? Аварга могойг гэдсэндээ агуулсан чийгийн өт. Өөртөө Левиафаныг¹¹² замхруулан хадгалсан аймшигт бяцхан хайрцаг байна гэдэг одой хүний хувьд тамлал, хажуугаар нь бас жаргал байдаг.

Тэгэхлээр, Баркильфедрог санаа зорилгоос нь юу ч ухруулж чадахгүй ажээ. Тэр цагаа болохыг хүлээсээр л. Тэр цаг нь ирэх болов уу? Хэлээд яах вэ! Түүнийгээ хүлээж л байв. Булай хорон амьтан, юм бүгд дээр биеэ тоохыг хольж хутгаж байдаг. Нүх ухаж, өөрөөсөө дээр байгаа ордны шадар хүний албан тушаал доогуур малтаад, өөрсдөө газар доор хоргодоогүй юм шиг амиа өрсөн байж сайх албан тушаалыг дэлбэлнэ гэдэг сонирхолтой хэрэг гэдгийг дахин давтан хэлчихье. Ийм тоглоомыг сонирхож болно. Үлгэр туульсын зохиол шиг амтархан дур татагдах ч бий. Өчүүхэн амьтан байж, өөрөөсөө мянга дахин хүчтэй амьтан руу дайрна гэдэг гайхамшигт ялалт мөн. Арслангийн биед бөөс байна гэдэг тааламжтай хэрэг.

Бардам омогтой араатны хаан хазахыг мэдрээд, сайх бичил хумхи руу дайран хамаг уураа барна. Бартай учирлаа гэхэд үүнээс

гайгүй хор хүргэх байсан биз ээ. Ингээд үүрэг нь солигдох нь тэр. Доромжлогдсон арслан нэг муу шавжийн хатгуурыг биедээ шигдэхийг мэдрэн, харин бөөс нь «Миний судсаар арслангийн цус гүйж байна» хэмээн ам бардам хэлэх эрхтэй болох нь тэр.

Гэлээ ч Баркильфедрогийн бардам сэтгэл үүгээр хагас дутуу ханажээ. Энэ бол нэг муухай тайвшрал байв. Гоочлох аятайхан л даа. Гэхдээ тамлаж байвал бүр илүү байх сан. Улиг болсон бодол нь Баркильфедроогоос салж өгөхгүй зовооно. Тэр Жозианад дөнгөж хүрэх шахуу болж өнгөцхөн маажаад л өнгөрөх болов уу гэж айна. Энэхүү гял цал хийсэн хүүхэнтэй харьцуулахад шальгүй амьтан болох тэр, үүнээс илүү том юманд горьдож найдах уу даа? Арьсыг нь амьдаар нь хуулж, цус дааварлан татваганах махыг нь нүцгэлэх гэж хүсэж байхад, зөвхөн шалдан биш харин эцсийнхээ нөмрөг болох арьсаа хуулуулсан эмэгтэй хүний аймаар зэрлэг чарлааныг сонсох юм сан гэж хүсэж байхад маажиж шалбалах төдий орхивол ямаршуу өчүүхэн санагдах вэ дээ! Сэтгэлдээ ийм хүслийг агуулж буй мөртөө яаж ч чадахгүйгээ ойлгоно гэдэг ямар аймшигтай вэ! Ээ чааваас, орчлонд төгс, төгөлдөр юм гэж нэгээхэн ч алга.

Яадаг ч атугай тэр өөрийнхөө хувь заяанд захирагджээ. Санаснаа амьдралд хэрэгжүүлэх боломжгүй болохоороо, тэр ядахдаа хагасыг нь ч билээ биелүүлчих юм сан гэж мөрөөдөх болжээ. Хорлонтойгоор хүнийг дамшиглана гэдэг ямар ч байсан зорилго шүү дээ.

Өөртөө тус хүргэлээ гэж өс санадаг хүн бол лут хүн байж таарахгүй. Баркильфедро энд өөрийнхөө аварга томыг үзүүлжээ. Энгүүндээ, тусч бус зан өмнөхөө мартаж орхидгоор илэрдэг. Энэхүү хорон санааны сонгодог үүр болсон хүнд тэр нь догшин ганирлаар илрэх ажээ. Ачийг мэддэггүй хүний зүрхэнд ганц үнс л байдаг. Тэгвэл Баркильфедрогийн зүрх юугаар дүүрэн байв аа гэвэл, дүрэлзэн ноцох нүүрсээр дүүрэн байлаа. Үзэн ядах, уурлан хилэгнэх, таг чимээгүй гомдлын дөл, Жозианы зовлон, наждын түлш болохоор хүлээн авай. Ер хэзээ ч эр хүн, эм хүнийг иймэрхүү шалтгаангүйгээр үзэн ядаж байсан нь үгүй. Ямар аймшиг вэ! Жозиана түүний нойр хүрэхгүйн учир, сэтгэлээс уяатай цор ганц зовлон, уйтгар гуниг нь болж, галзуурахад ганц хуруу дутуу болгожээ.

Тэр нь Жозианад ялимгүй сэтгэлтэй байсан ч байж болох л юм.

XI. Баркильфедро отсон нь

Жозианы эмзэг газрыг олж, нам цохих нь, учир шалтгааныг нь бид дээр өгүүлсэн, Баркильфедрогийн гуйвалтгүйгээр шийдсэн хүслэн байлаа.

Хүсэх бол хангалттай биш, чаддаг байх хэрэгтэй.

Үүнд яаж эхлэн орох вэ?

Энд л хамаг асуудал байгаа юм даа.

Бага гарын муу шинжийн хүмүүс хийх гэж хүсэж байгаа булай хэргийнхээ тодорхой төлөвлөгөөг боловсруулдаг. Тэд анх дайралдсан боломжийг нисүүт дунд нь шүүрч аваад, түүнийг аргаар ч юм уу эсвэл хүчээр эзэмдэж аваад өөрийн зорилгод захируулчихаар хангалттай хүч байна гэдэгт итгэдэггүй аж. Жинхэнэ хорлогчдын эс тоомсорлодог, урьдчилсан арга сүв гэгчийг ийм болоод л хийдэг аж. Их гарын хорлогчдын бол гол төлөв хорон зандаа л найддаг. Тэд болох бүхнээр зэвсэглэж, хэрэг болох цагт хэмээн янз бүрийн зэвсгийг зэхнэ. Баркильфедро шиг нь, зүгээр л аятайхан хормыг хүлээж суудаг. Тэд, урьдаас боловсруулсан төлөвлөгөө нь тухайн нөхцөл байдалд таарахгүй байж болохыг мэднэ. Үйл явдлын тодорхой төлөвлөгөөндөө баригдаад, хорлогч будилан төөрч, тавьсан зорилгодоо хүрэхгүй өнгөрнө. Хувь заяатай урьдчилсан хэлэлцээ хийдэггүй юм. Маргаашийн өдөр бидэнд захирагддаггүй. Далим тохиолдол бол, нэг их сахилга батаар ялгарах юм биш. Тийм ч учраас гэмт хэрэгтнүүд тохиолдлыг отож байгаад, далим гарангуут л ухасхийн зуурч авангаа олон таван юм ярилгүй шууд л өөрсөдтэйгөө хамтран ажиллуулна. Хэмжээ аваагүй оёсон шаахай лугаа адил санамсаргүй тохиолдолд, хэрэг болохооргүй урьдаас бодсон ямар ч зураг төсөл, ямар ч үлгэр загвар байхгүй шүү. Тэд юмны наана цааныг бодолгүйгээр харанхуй ёроолгүй ангалд үсрэн ордог улс. Ямар ч нөхцөл байдлаас цаг алдалгүй хоромхон зуур өөртөө ашиг гаргаж чадна гэдэг, чөтгөрийн биед амилсан луйварчин болж хувирсан жинхэнэ хорлогчны урлаг мөнөөс мөн.

Жинхэнэ хорлогч бол биднийг, гарт дайралдсан чулуугаар л дүүгүүрдсэн дүүгүүр шиг нам цохино. Ёстой хорлоочид ямагт элдэв гэмт хэргийн хэлгүй дүлий туслагч болох гэнэтийн, тохиолдолд найдаж байдаг.

Тохиолдол далимыг барьж аваад, нуруун дээр нь үсрэн гарах гэдэг бол энэ төрлийн авьяастнуудын цор ганц «яруу найргийн урлаг» даа.

Харин цагаа тултал, тэд хэнтэй учрах гэж байгаагаа лавлах хэрэгтэй байдаг. Байдлыг нь урьдчилан мэдэж авах хэрэгтэй.

Баркильфедрогийн хувьд тэр түшиг тулгуур нь их эзэгтэй Анна байлаа.

Баркильфедро хатан хаанд ойртох зөвшөөрөлтэй болж авчээ.

Хааяа тэр бээр, өндөр төрөлтийн бодол санааг сонсож байна уу даа гэж санагдахаар тийм ойрхон очдог байжээ.

Заримдаа, байгаа хүний тоонд оролгүйгээр эгч дүү хоёрын ярианд байлцдаг байв. Ярианд бас үг хавчуулахыг хорьдоггүй байжээ. Тэр бээр үүнийг нь элэг барихдаа л ашиглаж байсан нь мэдээж. Итгэлээ улам зузаатгах арга байлаа.

Нэгэн удаа Гемтон-кортийн цэцэрлэгт их эзэгтэйн ард Жозиана авхай, түүний хойхон нь Баркильфедро зогсож байтал, үеийн сургаал айлддаг маягийг чанга баримталдаг Анна,

— Адгуус амьтан жаргалтай юм даа. Тэдэнд тамд орно гэж айх юм алга гэж дуугарахыг сонсов.

— Түүнтэй түүнгүй тэд тамд байгаа юм гэж Жозиана сөргүүлэн хэлжээ.

Шашныг гүн ухаанаар гэнэт сольсон сайх хариулт их эзэгтэйн санаанд таарсангүй. Хариу нь бүүр гүнзгий утгатай байлаа ч гэсэн, Аннагийн яс адилхан л хавтайж байжээ.

— Хонгор минь, бид хоёр тэнэг амьтад шиг тамын тухай ярьж байх юм. Баркильфедрогоос тамын тухай юу гэж боддогийг нь асууя. Тэр энэ бүхний учрыг сайн ойлгож байх ёстой гэж их эзэгтэй авхайд хэлэв.

— Чөтгөрийн хувиар уу? гэж Жозиана асуухад,

— Адгуусны хувиар гэж Баркильфедро хариу бариад мэхэсхийв.

— Хатагтай минь, энэ хүн бид хоёроос ухаантай шүү гэж Анна, Жозианад хандан хэлжээ.

Баркильфедро шиг хүний хувьд, хатан хаанд ойрхон байна гэдэг түүнийг гартаа атгана гэсэн үг. «Их эзэгтэй миний эрхэнд» хэмээн тэр бээр хэлж чадах байв. Одоо түүнд зөвхөн их эзэгтэйг өөрийнхөө зорилгод үйлчлүүлэх аргыг л олох хэрэгтэй болжээ.

Тэр нь ордонд тодорхой байр эзэлж байв. Ордонд бэхжиж авахаас илүү юм юу байх вэ. Зөвхөн аятайхан шиг тохиолдол л дайралдаасай билээ. Тэгвэл гараас алдана гэж санахгүй. Нэг бус удаа тэр бээр их эзэгтэйн уруулд хорон инээд гаргуулж чаджээ. Энэ бол гөрөөлөхийг түүнд зөвшөөрлөө гэсэн үг байв.

Гэвч ордонд ямар нэг хориотой ан байсан юм биш биз? Энэ зөвшөөрөл түүнд, жишээ нь их эзэгтэйн төрсөн дүүгийн даль ч юм уу, гарыг нь хуга цохих эрх олгож байгаа хэрэг биш биз?

Үүнийг л хамгийн түрүүнд мэдэх хэрэгтэй. Хатан хаантан дүүдээ хайртай болов уу?

Нэг эндүү алхахад л бүх хэргийг баллаад хаячихна. Баркильфедро ажиглан тандаж эхэллээ.

Хөзрөө гаргахынхаа өмнө, тоглож байгаа хүн ямаршуухан мод ирж вэ гэдгээ хардаг. Баркильфедро хамгийн эхлээд хоёр хүүхний насыг зэрэгцүүлэн үзлээ. Жозиана хорин гуравтай, Анна дөчин нэгтэй ажээ. Их сайн байна. Муу мод биш шүү.

Эмэгтэй хүн жилийн хоногийг хавраар хөтлөхөө болиод, өвлөөр хөтлөх болсон тэр өдөр түүний уур уцаарыг хүргэн цочирдуулдаг. Өөртөө мэдрэн буй цаг хугацааны хайр гамгүй эвдэн сүйтгэх хүчний эсрэг битүүлгээр хонзон санаж эхэлнэ. Дөнгөж сая цэцэглэн үзэсгэлэн нь бүрдсэн, бусдад сайхан үнэр анхилуулж байдаг залуу бүсгүйчүүл, зөвхөн өргөсөө л хандуулан, энэ сарнай түүнийг хатгахаас өөр юмгүй санагдана. Энэ залуу эмэгтэйчүүд өөрийнх нь шинэ соргог бүхнийг булаан авч, гоо сайхнаараа бусдыг цэцэглүүлж байгаа учраас л өөрөө гутаж гандаж байгаа юм шиг түүнд санагдана.

Баркильфедро битүүлэг гомдлыг нь ашиглаж, дөчин настай хүүхний, их эзэгтэйн нүүрийн үрчлээг улам гүнзгийрүүлэх хэрэгтэй болжээ.

Атаархал бол хар жөтөөг өдөөн сэргээхэд сайн арга болдог. Харх, матрыг үүрээс нь яаж хөөдөг лүгээ адил тэр нь хар жөтөөг гадагш нь гаргана.

Баркильфедро хамаг анхаарлаа их эзэгтэйд чиглүүлэх болов. Тогтмол усны ёроолыг ажигладаг шиг л хатан хааныг ажигласаар байлаа. Заримдаа намаг балчиг зэгсэн тунгалаг байх нь бий. Бохир усанд чивэл явдал үзэгдэнэ, булингартайд нь тэнэг явдал харагддаг. Анна хатан булингартай ус байсан ажгуу.

Түүний мангуу тархинд мэдрэхүйн үр хөврөл, бодол сэтгэлийн авгалдай залхуутайяа хөдөлнө.

Бөндгөрт нь бүх юм нь тодорхой: бус, дөнгөж дангаж багцаалагдах төдий ажээ. Хэдийгээр энэ нь тэр гэх тэмдэггүй ч гэлээ бас ч гэж бодитой юм байв. Их эзэгтэй энэ тэр юм бодолгүй яах вэ. Хатан хаантан үүнийг, түүнийг таалалгүй яах вэ. Чухам юуг бодож, юуг таалсан бэ гэдгийг яг таг тогтооход бэрхтэй. Тогтмол усан дотор

болж байгаа үл мэдэг хувирлыг тийм ч амархан учрыг нь олж хужрыг нь тунгаачихгүй шүү дээ.

Энгүүндээ үлбэгэр номой байдаг хатан хаан, хааяа нэг тэнэг бүдүүлэг ааш гаргахаас ч сийхгүй ажгуу. Энэ дүрсхийх үеийг нь л ашиглалтай. Ийм үе дээр нь л зуураад авах хэрэгтэй.

Зүрх сэтгэлийн угт Анна, Жозианад юуг хүсдэг бол? Сайныг уу, эсвэл мууг уу?

Онъсого таавар л гэсэн үг. Баркильфедро түүний нь таах зорилгыг өөртөө тавив.

Хариугаа олоод авчихвал цааш нь ахиулж болно.

Хэдэн санамсаргүй тохиолд түүнд тус болжээ. Гэхдээ гол нь байнгын сонор соргог нь тусалсан байна.

Анна, нөхрийн талаас Пруссийн шинэ хатан хааны холын хамаатан болж байв. Тэр хатан хааны нөхөр нь зуун зарцтай агаад Аннад Тюрне де Майернын аргаар пааландаж зурсан хөрөг нь байдаг байв. Пруссийн хатан хаанд бас нэг хууль бусаар төрсөн дүү охин гүнжин Дрика гээч байдаг байжээ.

Нэгэн удаа Баркильфедрогийн байхад Анна пруссийн элчээс, сайх Дрикын тухай шалгааж гарчээ.

— Түүнийг баян гэж ярилцдаг байх аа?

— Жигтэйхэн баян гэж элч хариу барив.

— Түүнд шилтгээн бий юу?

— Бүүр хатан хаан эгчийнхээс илүү тансгийг нь яана.

— Ямар хүн нөхөр нь болох юм бол доо?

— Гормо гэдэг нэг язгууртан бий.

— Сайхан хүн үү?

— Гайхам сайхан хүн.

— Тэр гүнжин чинь залуу хүн үү?

— Цэл залуухан.

— Хатан хаантан шиг л цэвэрхэн сайхан уу? гэхэд нь элч дуугаа намсгаж ирээд л,

— Илүү цэвэрхэн гэж хариуллаа.

— Арай дэндүү юм! гэж Баркильфедро шивгэнэв. Хатан хаан дуугарахгүй байзнаснаа дараа нь,

— Ээ чааваас, энэ хууль бусаар төрөгсдийг яана даа! гэж дуу алдав.

Энэ олны тоо Баркильфедрогийн чихний хажуугаар өнгөрсөнгүй.

Өөр нэгэн удаа Баркильфедро хоёр өглөг түгээгчийн ард хатан хаанд зэгсэн ойрхон зогсож байсан сүмээс, их эзэгтэйн бараа

бологчдын дундуур гарч явсан Дэвид-Дерри-Моир гарахдаа ордны хатагтай нарт гялав цалав гэсэн байдлаараа, царай зүсээрээ жигтэйхэн хүчтэй сэтгэгдэл төрүүлжээ. Түүний араас эмэгтэйчүүд дуу дуугаа авалцан шагширцгааж,

— Ямар цэвэрхэн гоолиг юм бэ?

— Ямар ч эелдэг юм!

— Ямар ч сүр жавхлантай юм!

— Ямар цэвэрхэн хүн бэ? гэлцэн бахдахад,

— Ямар эвгүй юм бэ? гэж их эзэгтэй бөвгөнөлөө.

Баркильфедро үүнийг сонсжээ.

Одоо тэр юу хийхээ мэдээд авах нь энэ.

Хатан хааны дургүйг хүргэчихнэ гэж айлгүйгээр Жозианыг хорлож болох нь байна.

Анхны зорилго нь биелжээ. Одоо авхайд ямар аргаар хор хүргэх вэ? гэдэг дараачийн зорилго гарч ирэв.

Түүний шальгүй албан тушаал нь ийм хэцүү зорилтыг биелүүлэхэд ямар тус нэмэр болох билээ?

Үзтэл ямар ч нэмэр болохгүй бололтой.

ХII. Шотланд, Ирланд, Англи

Нэгэн зүйлийг онцлон тэмдэглэхэд, Жозианад «зээрэнх» байв.

Түүнийг, хэдийгээр нуудгай ч гэх нь ээ, эзэн хатны дүү, хааны цусан төрлийн хүн гэдгийг нь л санахад энэ зүйл ойлгомжтой юм.

«Зээрэнхтэй байх» гэдэг юу гэсэн үг вэ гэдгийг тайлбарлая.

Сент Жон бэйл (өөрөөр Боленброк) Суссексын ван Томас Леннарт, «Хүмүүсийн өндөр дээд төрлийг мэдэгдэх хоёр зүйл байдаг. Англид tour, Францад pour юм» гэжээ. Pour — гэдэг нь Францад доорх зүйлийг илтгэнэ. Хааныг аялал хийж явах үеэр, байр хариуцсан даамал, үдшийн зогсолт хийж буудаллахад, өндөр дээдсийн бараа бологсдод байр гаргаж өгнө. Сайх язгууртан ихсийн зарим нэг нь бусдаасаа илүү онцгой эрхийг эдэлдэг байжээ.

«Тэдэнд pour байдаг» хэмээн «Түүхийн сэтгүүлийн» 1694 оны зургаадугаар хуудсанд бид бэлхнээ уншиж болох юм. Өөрөөр хэлбэл байр хуваарилагч эдгээр, дээдсийн нэрийн өмнө «pour» (зориулсан) гэдэг үг тавьдаг байжээ.

Жишээ нь: «хан хүү Субизэд зориулсан» гэж бичнэ.

Үүний хажуугаар, хааны цусан төрлийн биш хүний байр гэдгийг тэмдэглэн, нөгөө «зориулсан» гэдэг үгээ орхиод л зүгээр: «Жеврийн ван, Мазарини ван гэх мэтээр» бичдэг ажээ.

Хаалган дээр нь «pour» гэсэн үг дурайж байвал энд цусан төрлийн хан хүү ч юм уу эсвэл хаанд ивээгдсэн шадар хүн сууж байна гэсэн үг ажээ. Хааны шадар гэдэг хан хүүгээс ч илүү дор, Их эзэн «pour»-тэй байх эрхийг одон ч юм уу тайж хэргэмийн адилаар хайрлан хүртээнэ.

Англид «зээрэнх» (tour)-тэй байх нь арай бага хүндэтгэлтэй гэлээ ч унах ашиг нь их байлаа.

Энэ нь эзэн хаантай жинхэнэ ойр дөт байдгийн тэмдэг байв. Удам угсаагаараа ч юм уу, явцын дунд эзэн хаанд талтай болж чадсан тэр хүн их эзнээс шууд мэдээ хүлээн авч чадах бөгөөд үүний тул унтлагынхаа өрөөний хананд, хонх дуугардгаар хийсэн зээрэнхтэй байдаг байжээ. Хонх дуугарахад, зээрэнх түлхэгдэн хаалга маягаар онгойж, алтан таваг юм уу, хилэн жинтүү дээр Эзэн хааны илгээлт байж байна. Үүний дараа зээрэнх буцан байрандаа орно. Энэ нь их дотно бөгөөд баяр ёслолын байдалтай ажээ. Битүүлэг зүйл өдөр тутмын хэвшил болох нь энэ. Зээрэнхэд өөр ямар ч үүрэг байсангүй. Хонх нь зөвхөн хааны илгээлтийг л мэдэгдэж байгаа нь тэр. Илгээмж авчирсан хүн нь харагдалгүй

үлдэнэ. Гэхдээ энэ нь энгүүндээ эзэн хаан ч юм уу хатан хааны гарын хиа байдаг ажээ. Елизаветийн хаанчлалын үед Лейстер, анхдугаар Иаковын үед Букингем зээрэнхтэй байжээ. Хэдийгээр их эзэгтэй өөрт нь тэгтлээ эзнэг байдаггүй ч гэлээ Аннагийн үед Жозиана «зээрэнхтэй» байх эрх олж авчээ. Энэхүү онцгой эрхийг хүртсэн хүн тэнгэртэй шууд харилцаа тогтоосон юм шиг, байсхийгээд л шуудангаар нь дамжуулан бурхнаас захиа авна. Энэхүү онцгой эрхийн тэмдгээс илүүгээр амьтны атаархлыг хөдөлгөдөг юм гэж байхгүй ажээ. Гэлээ ч сайх онцгой эрх бялдуучлалыг улам ихэсгэнэ. Түүнийг эзэмшсэн хүн бусдаас илүү долигонуур болдог аж. Ордонд ямар ч дээгүүр зэрэг доромж байдалд оруулдаг хойно доо.

«Зээрэнхтэй байх эрхийг эдлэх» гэдэг нь францын нэр томьёогоор «avoir le toug» гэсэн үг бөгөөд энэхүү английн ёс журмын онцлог нь, хаанаас нь харсан ч, дээр цагийн францын заншлаас л гарсан бололтой.

Елизавета хөндөгдөөгүй хүүхэн хатан хаан байсан шиг хөндөгдөөгүй хүүхнээрээ, тайж угсаат Жозиана авхай улирлын байдлаар нэг бол хотод, нэг бол хөдөөд сууж, хаанаас дутуугүй баян чинээлэг загнадаг байлаа. Авхай хувийн ордонтой агаад лорд Дэвид болон бас бус хүмүүс ордны шадрын үүрэг гүйцэтгэнэ. Хэдийгээр хараахан эхнэр нөхөр гэгдээгүй ч гэлээ лорд Дэвид, Жозиана авхай хоёр, ямар ч хов живд оролгүйгээр хамтдаа олны дунд дуртайяа үзэгдэнэ. Театр юм уу уралдаан үзэхээр нэг сүйхээр явж, нэг лоожид цуг суух нь ердийн үзэгдэл болжээ. Тэдэнд зөвшөөрөх нь бүү хэл, эр эм болохыг нь тушаачхаад байгаа, гэр бүл болох тухай бодол тэдний урмыг хугалдаг ч гэлээ, хоёр биетэйгээ уулзах нь бас ч гэж аятайхан байдаг аж. Сүйлсэн хүмүүст соёрхогдсон чөлөөтэйгөөр авирлах явдалд тун амархан даваад орчихоор хил гэж байдаг. Гэвч хэмээс хэтэрсэн чөлөөтэй байдал муу зуршлын тэмдэг учир тэд биеэ барин үүнийг цээрлэнэ.

Тэр үед хамгийн алдартай нударган зодооны тэмцээн, хэдийгээр ойр орчмын агаар нь хүний эрүүл мэндэд хортой ч Кентерберийн ёнзон хамбын ордон байдаг, Ламбетийн сүмийн харьяа нутагт болдог байлаа. Тэнд бас тодорхой цагт, сайн сэтгэлт төлөв төвшин бүх хүнд зориулан хаалгаа дэлгэдэг ёнзон хамбын олон ном судартай номын сан ч байдаг байв. Нэгэн өвөл хайсаар хашсан ойн цагаалжид нударган зодооны тэмцээн болж Жозиана очжээ. Дэвид түүнийг энд авчирсан хэрэг. Жозиана нэг удаа

Дэвидээс «Эмэгтэйчүүдийг нударган зодоон үзэхийг зөвшөөрдөг гэж үү?» хэмээн асуусанж.

Дэвид хариуд нь «Sunt faeminae magnates» гэжээ. Энэ нь чөлөөтэй орчуулгаар бол «Борчуулаас гаралтай эмэгтэй л биш бол» гэсэн үг бөгөөд үгчилсэн орчуулгаар бол «Сурвалжтай хатагтай нар» гэсэн үг. Тайж угсаат авхай дуртай газраа ордог. Ийм ч учраас сайх тоглолтыг Жозиана үзсэн хэрэг.

Ёс зүйгээс гажсан ганц л юм, эрэгтэй хүний хувцас өмсөх хэрэгтэй болжээ. Гэвч энэ нь тэр үед гэм биш зан болсон зүйл байв. Эмэгтэйчүүд аялахдаа үүнээс өөрөөр байсангүй. Зургаан хүн суусан виндзорын бүхээгт сүйхэнд, бараг байнга л эрэгтэй хүний хувцас өмссөн нэг юм уу хоёр эхнэр явна. Энэ бол сурвалжтан язгууртнуудад хамаарагддаг шинжийн нэг.

Дэвид лорд, эмэгтэй хүн дагуулж яваа болохоор өөрөө шууд тэмцээнд оролцож чадсангүй, зүгээр үзэгчээр байхаас өөр арга байсангүй.

Жозиана хатагтай дээд зиндааны хүн болохоо зөвхөн лорнет¹¹³ барьснаараа л мэдэгдэж байв. Зөвхөн алдар нэртэй улс л түүнийг барих эрхтэй байсан үе.

«Шударга халз тулалдааныг», нөгөө XVIII зууны сүүлчээр хурандаа байж байгаад, тулалдааны талбараас зугтан, ямар ч хорт сумнаас илүү аймшигтай Шериданы¹¹⁴ энгүүхэн үгийн зохиол болохын тулд дайсны сумнаас хэлтэрч, дараа нь цэргийн яамны сайд болсон лорд Жермений нагац элэнц эцэг болох Жермен лорд даргалсан ажээ. Олон дээдэс мөрий тавьжээ. Белла-Анвын уг үндэс нь тасарч яваа тайж угсааны төлөө өрсөлдөгч Карлтоны Барри, Белью, Денхайведээс сонгогдсон улсын хурлын гишүүн ноён Томас Колнспортой; Лотианы хошууны лорд Лемирбо, Пенрайн Семюэл Трефузиетай; Сент-Ивайн ноён Бартолом Грейгд, Роберстын лорд бөгөөд Корнуэлийн ванлагийн эвлэрүүлэх шүүгч эрхэм хүндэт Чарльз Бодвилтэй тус тус мөрий тавьжээ. Бусад олон хүн мөн бооцоо тавин мөрийцсөн нь мэдээж.

Нэг зодооч нь төрсөн уулынхаа нэрээр Филе-ге Медон гэдэг хочтой Тирпперерийн ирланд, нөгөө нь Хелмсгейл гэдэг шотланд байв. Ийнхүү хоёр үндэстний, нэрээ ихэд хичээх явдал мөргөлдөх нь энэ. Өөрөөр хэлбэл Ирланд, Шотланд хоёрын хооронд тулалдаан боллоо гэсэн үг. Эрин Гайотельд нударганы амт үзүүлэхээр зэхлээ гэсэн үг. Ийм ч учраас мөрийн бүгд дүн, зарлаагүй далд мөрийг оролцуулалгүйгээр дөчин мянган алтан зоосноос хол давлаа.

Цээж нь нүцгэн хоёр байлдагчийн байгаа хувцас нь гэвэл ташаан дээр нь товчилсон богино өмд, уланд нь хадаас хадаж, шагайгаар нь үдсэн шаахай төдийхөн ажээ.

Шотланд Хелмсгейл нь арван есөөс хэтрээгүй, атигар биетэй боловч, духандаа хэдийнээ сорвитой болсон эр байв. Иймээс ч түүнийг хожно гэж мөрийн гурваны хоёрыг тавьжээ. Өнгөрсөн сард тэр бээр, Синсмайлуотер гэгч нударган зодоончийн хавиргыг хугалан, хоёр нүдийг нь бүлт цохижээ. Түүнийг дэмжигчдийн урам зоригтой байгаагийн учир энэ. Тэгэхэд түүний төлөө бооцоолсон улс арван хоёр мянган фунт стерлинг хожжээ. Духан дээрх сорвиноос нь гадна эрүү нь бас гэмтсэн ажээ. Тэр нь хөнгөн шаламгай, эмэгтэй хүнээс ч өндөргүй нуруутай, загзгар чанга, пагдайсан биетэй нэгэн ажээ. Түүнд ямар нэг айж сүрдэм юм байлаа. Байгаль түүнийг тусгай юмаар шавж бүтээхдээ юуг ч дутуу орхисонгүй, булчин бүрийг нь нударган зодоонд зориулжээ. Хүрэл мэт гялалзсан хүрэн бор чээж нь нэг л бяр амтагдсан шинжтэй. Инээхэд нь үүдэн гурван шүд нь онгорхой харагдана.

Түүний өрсөлдөгч нь том биетэй, өргөн цээжтэй, өөрөөр хэлбэл үлбэгэр тийшээ хүн байв. Дөч эргэм насны, зургаан тохой өндөр армааны хэнхдэгэрхүү урт цээжтэй, гаднаас нь харваас номхон эр байлаа. Хөлөг онгоцны тавцанг ч нударгаараа цөм дэлсэж чадах авч, түүнийгээ хэрэглэж чаддаггүй байжээ. Жилем-ге Медон ирланд, өрсөлдөгчөө голдуу аятайхан бай болж өгдөг бөгөөд харваас тэмцээнд цохихтойгоо адилхан цохиулах гэж оролцдог бололтой. Гэлээ ч цохилтыг их даадаг нь мэдэгдэнэ. Зажлахад хатуу, залгичих гэхээр болж өгдөггүй дутуу шарсан махыг санагдуулна.

Нударган зодоончдын хэлээр ийм мангар эрийг *rau flesh* буюу үхрийн түүхий мах гэнэ. Бас долир ажээ. Хаанаас нь ч харсан, хувь тавилангийн эрхийг дагасан нэгэн ажгуу.

Энэ хоёр хүн урьд шөнө нэгэн орон дээр бөөр бөөрөө нийлүүлэн унтжээ. Хоёул нэг аяганаас портвейн дарс хувааж уужээ. Аль алинд нь, ширүүн царай зүстэй, хэрэгцээ тохиолдвол шүүгчийг айлгачхаж дөнгөхөөр сүслэн дэмжигчид байлаа. Хейлмсгейлийн талд бүхэл бүтэн бухыг үүрч явснаараа алдаршсан Жон Гремен, мөн нэгэн удаа тус бүр нь гурван пүү илүү арван шуудай гурил, нэмэр дээр нь тээрэмчнийг нь нуруун дээрээ тавьчихаад хоёр зуу илүү алхам газрыг туулсан Жон Брей нар нүдэнд тусна. Филем-ге Медоныг сүслэгчдийн тоонд Лаунсестоны лорд Хайдын авчирсан, Ногоон шилтгээнд суудаг, хагас пүү орчим жинтэй чулууг сайх шилтгээний хамгийн өндөр цамхгийг давуулан мөрөн дээгүүрээ

шидэж чаддаг Кильтер гэгч орж байв. Кильтер, Брей, Гремен гурвуул Корнуэлс нутгийн улс агаад үүгээрээ сайх ванлагийн алдрыг өргөжээ.

Сайх хоёрын бусад дэмжигчид ч гэсэн ханхар цээжтэй майга хөллөсөн, булчин шөрмөс нь овойж товойсон гартай, бараг цөмөөрөө л шүүхээр дамжиж явсан, орчлон дээр айдаг юм нэгээхэн ч үгүй уранхай цоорхой хувцастай мангардуу царайлсан булиа залуучууд цуглажээ.

Тэдний дундаас олон хүн цагдаа нарыг согттол нь уулгахдаа гаргууд байлаа. Ямар ч мэргэжилд авьяас байх хэрэгтэй биз дээ.

Тэмцээн хийхээр шилж авсан ойн цоорхой нь дээр үед баавгай, бух, нохойн зодоон болдог байсан, баавгайн цэцэрлэгийн цаад талд бөгөөд түүний цаагуур нь XIII Генрихийн эвдэж хаясан Гэгээн Марии Овер-Рейний хийдийн балгастай зэрэгцэн, хараахан барьж дуусаагүй байшин сав үргэлжилнэ. Умардын хүйтэн салхи үлээж, бороо шиврэн халтиргаатай байв. Цугласан ихсийн дунд, дэлгэсэн шүхрийн дороос өрхийн тэргүүнүүдийг амархан таньж болохоор ажээ.

Филем-ге-Медоны талд хурандаа Монкрейф зарга таслагчаар, Кильтер өвдгөө тавьж өгөх хүн нь болжээ.

Хелмсгейлийн талаас зарга таслагч нь эрхэм хүндэт Пьюг Бюмери, Калькарын лорд, Дизерт өвдөг тавьж өгөх хүн нь байв.

Цагаа тулган тааруулж байх хэдэн хувийн хооронд хоёр өрсөлдөгч хашлага дотор хөдлөлгүй зогсож байлаа. Дараа нь хоёр талаасаа хашлаганы голд уулзан гар барьцгаав.

Филем-гем Медон, Хелмсгейлдээ,

— Ай хө, гэртээ харьчихдаг бол сайхан аа! гэж хэлжээ.

Хелмсгейл нь төвшин шударга хүний хувьд,

— Энэ буянтай шударга улсыг хий дэмий цуглуулж болохгүй шүү дээ гэлээ.

Тэд нүцгэн учир ихэд даарчээ. Филем-ге-Медон нь үг сүтгүй чичрэн шүд нь дагжина.

Иоркын ёнзон хамбын ач, доктор Эленор Шарп тэдэнд хандан,

— Малууд минь, хэд сайн нударгалалцаадхаач! Дорхноо дулаацаад ирнэ гэж орилов.

Энэ ялдам үг ч тэднийг хатгаад өгөв бололтой. Бие бие рүүгээ ухасхийн дайрав.

Гэвч тэд хараахан улайраагүй хэвээр л байв. Гурван ч удаа тулсан боловч олигтой юм болсонгүй. «Бүх сүнсний коллегийн» дөчин гишүүний нэг гэгээн хутагт Гемтред,

— Тэдэнд архи өгөөдхөөч! гэж орилов.

Гэвч хоёр «шүүгч», хоёр «хүлээн авагч» нийлээд бүгд дөрвөн шүүгч хэдийгээр их хүйтэн байсан ч гэсэн дүрмээ баримтална гээд хөдөлсөнгүй.

«First blood» гэж ам амандаа хашхиралдах нь «түрүүчийн цусыг» шаардсан хэрэг байлаа. Өрсөлдөгчдийг нүүр нүүрээр нь тулган зогсоов.

Тэд тулан ирснээ гараа сунган бие биеийнхээ нударгыг тэмтрээд дараа нь хэн хэн нь ухрав. Гэнэт тагдгар Хелмсгейл ухасхийн дайрлаа. Жинхэнэ тулалдаан эхлэх нь энэ.

Филем-ге-Медон яг гурвынхаа дунд цохиулж, цус нь урсан хамаг нүүрийг нь бялдав. Үзэгчид,

— Хелмсгейл улаан дарс цацчихлаа гэж тэнхээ мэдэн орилолдонгоо нижигнэтэл алга ташив.

Филем-ге-Медон гараа тээрмийн сэнс лүгээ адилаар эргэлдүүлэн, нударгаа хаана ч хамаагүй буулгана. Эрхэм хүндэт Перегрин берти,

— Харахгүй л байна даа. Гэхдээ хараахан сохроогүй байна гэж хэлэх нь дуулдав.

Харин Хелмсгейл, тал талаас нь,

— Нүдийг нь бүлт цохь! гэж хөхүүлэн шивгэнэхийг чих дэлсэж байлаа.

Ерөнхийдөө хоёр нударган зодоочийг хоёулыг нь зэгсэн завшаантай шилж авчээ. Хэдийгээр тэнгэр муухай байсан ч гэсэн тулалдаан амжилттай болох нь гэдэг хэн бүхэнд тодорхой болж ирлээ. Сүр бараа ихтэй Филем-ге-Медон өөрийн давуу талын золиос болоод байлаа. Том бие, хүнд жин нь түүний хөдөлгөөнд саад болно. Гар нь жинхэнэ бороохойноос ялгаагүй ч, бие нь хөдөлгөөнгүй бөөн мах гэсэн үг. Пагдгар шотланд эр үсчин харайж, гялсхийн цохисноо, шүдээ хавиран, түргэн хөдөлгөөнөөрөө хүчээ хоёр дахин нэмэгдүүлж, элдэв арга мэх гаргана. Нэг талаас бүдүүлэг, мунхаг харанхуй, соёлгүй их хүч, нөгөө талаас учир мэдэж соёлжсон цохилт ирж байлаа. Хелмсгейл булчингийнхаа хүчнээс дутахгүйгээр ухаанаараа тоглон, илүү хүч гаргалгүй, хэрэгтэй үед нь хорлонтойгоор дэлсэнэ. Филем-ге Медон нь эхний цохилтод ялимгүй дөжирчихсөн, залхуу махны худалдагчтай төстэй амьтан харагдана. Ур чадвар энд мөн чанартай харшилджээ. Ганирч догширсон хүн бүдүүлэг амьтны эсрэг гэсэн үг.

Бүдүүлэг нь ялагдах тодорхой болов. Гэвч тийм ч амархан санаагаар болох зүйл биш ажээ. Энэ нь л их сонирхол төрүүлэн,

дотор гижигдэнэ. Пагдгар эр, аварга эрийн өөдөөс гар далайжээ.
Илүү тал нь эхнийхэд нь байна. Муур бух нохойг дийлжээ.

Голиафууд¹¹⁵ ямагт Давидуудад ялагдаж байдаг шүү дээ.

Тулалдагч хоёрыг хөөргөн зоригжуулж,

— Сайн байна, Хелмсгейл! Сайн байна! Маш сайн, эр хүн!

Одоо чиний ээлж Филем! гэж орилолдоно.

Хейлмсгелийн нөхөд нь түүнд сайныг хүсэхдээ,

— Нүдийг нь тэс цохь! гэж зөвлөнө.

Хелмсгейл ч үүнээс илүү яах вэ гэмээр хөдөлж байв. Гэнэт байдгаараа бөхийснөө биеэ займчин огцом эгцрээд, өрсөлдөгчийнхөө аюулхай доор хүчтэй цохилоо. Аварга эр гуйваад явчхав.

— Буруу цохилт! гэж Барнард бэйл дуу алдав.

Филем-ге-Медон, Кильтерийн өвдөг дээр суунгаа,

— Одоо л нэг бие халж байна гэлээ.

Лорд Дизертем шүүгч нартай зөвлөснөө,

— Таван минутын түр завсарлага гэж мэдэгдлээ.

Филем-ге-Медон муужирч унахад ойртжээ. Кильтер үслэг бөс даавуугаар нүд рүү нь урсах цусыг нь, хөлсийг нь арчаад, дараа нь дашмагтай юмнаас уулгав. Энэ нь арван нэг дэх үе байв. Филем-ге-Медоны духан доорх шархнаас гадна, цээж бие нь хөх няц болж, гэдэс нь хөөн, зулай нь гэмтжээ. Хелмсгейл яасан ч үгүй, юугаар ч хохирсонгүй. Цуглагсдын дунд үймж, сандрах байдал ажиглагдаж эхэллээ.

Барнард лорд нөгөөдөх л,

— Буруу цохилт! гэдгээ хашхирав.

— Тэнцсэнээр мөрийцье! гэж лорд Лемирбо хэлэхэд,

— Бооцооныхоо мөнгийг буцааж авах минь! гэж ноён Тамас Колпенер уухайн тас хэлэв.

Сент-Ивсээс сонгогдсон улсын хурлын гишүүн хүндэт ноён Бартоломью Грейсд шулуухан,

— Миний таван зуун алтан зоосыг өгөөдөх, явах минь гэж орилов.

— Тэмцээнийг зогсоо! гэж зарга таслагч нар орилов.

Гэтэл Филем-ге-Медон согтуу хүн шиг гуйвлан босож ирснээ,

— Халз тулааныг үргэлжлүүлье, тэгэхдээ ганц болзолтойгоор шүү. Би ч гэсэн бас буруу цохилт хийх эрхтэйгээр үргэлжлүүлье гэв.

Тал бүрээс л,

— Зөвшөөрч байна гэж орилцгоолоо.

Хелмсгейл яавал аая гэсэн янзтай мөрөө хавчина.

Таван минутын завсарлагын дараа дахин нанчилдаж эхлэв. Филем-ге-Медоны хувьд зовлон болж байгаа тэр зодоон, Хелмсгейлийн хувьд тоглоом зугаа болж байлаа.

Шинжлэх ухаан гэдэг чинь энэ дээ. Хүний өөдөс, аварга эрийг in chance-д байлгачих аргаа олжээ. Хелмсгейл гэнэтхэн Филем-ге-Медоны данхар толгойг зүүн гараараа уургалж аваад, шилийг нь доош харуулан сугандаа бахь шиг хавчиж, баруунаараа өрсөлдөгчөө хадаас алхаар шааж байгаа юм шиг хажуугаас нь, доороос нь дээш нь нүүр нүдгүй нударгалав. Филем-ге-Медон арайхийн толгойгоо суганаас нь мулталж аваад өндийвөл, нүүр гэх юмгүй, нэлийсэн хавтгай юм болсон байлаа. Хамар ам, нүд байсан газар нь, одоо цусанд дүрээд авсан хар хөх далайн хөөсөрхүү юм харагдана. Тэгээд нулимаход нь дөрвөн шүд газар унав. Тэгснээ гуйвганан унахад нь Кильтер түүнийг өвдөг дээрээ тосон авлаа. Хелмсгейл бараг хохирсонгүй. Эгэм хавьцаа нь л хөх няц болон шалбарснаас хэтэрсэнгүй. Одоо хэн ч хүйтнийг ажрахаа больжээ. Хелмсгейлийн төлөө Филем-ге-Медоны эсрэг арван зургаа, дөрвийн харьцаатай мөрий тавих боллоо.

Карлтонийн Гарри,

— Филем-ге-Медон гэж байхгүй болсон! Хелмсгейлд өөрийн Белла-Анвагийн тайж эдлэнгээ тавья. Белла лорд гэдэг хэргэмээ, Кентерберийн ёнзон хамбын хуучин хиймэл үсэнд тавилаа гэж орилох нь чих дэлсэнэ.

Кильтер, Филем-ге-Медонд,

— Наад хоншоороо гэснээ цус болсон бөсийг дашмагтайгаас норгоод, нүүрийг нь архиар арчив. Ам гэж мэдэгдэхээр болж ирлээ. Филем-ге-Медон нэг зовхио нээв. Чамархайнаас нь цус тогтохгүй гоожно.

— Дахиад нэг тулалдаадах, хонгор минь. Доод хотын өмнөөс нэг үзээдэх гэж Кильтер хэллээ.

Валличууд, ирландчууд уг нь бие биеэ ойлголцдог улс, гагцхүү Филем-ге-Медон ойлгож байгаа шинж даанч алга байв. Кильтерийн тусламжаар Филем-ге-Медон босож ирлээ. Энэ нь хорин тав дахь удаагийн барьцалдаан байлаа. Духандаа ганц нүдтэй сайх аваргын (учир нь нэг нүднээсээ эрт хагацсан хүн байв) зогсолтыг хараад, энэ бол төгсгөл боллоо гэдгийг бүгдээрээ ойлгов. Түүний зайлшгүй мөхөлд хэн ч нэгэнт эргэлзэхээ больжээ.

Хамгаалангаа гараа дээш нь өргөсөн нь амьсгаа хурааж байгаа эрийн том алдаа болжээ. Ялимгүй хөлрөх аядсан Хелмсгейл,

— Өөртөө бооцоо тавилаа. Мянгын эсрэг нэг шүү гэж хашхирангаа, гараа далайж өрсөлдөгчдөө хүнд нударга буулгалаа. Гэвч хачин юм болох нь тэр. Хоёулаа түсхийн ойчив. Сэтгэл ханан мөөрөх дуулдана. Энэ бол Филем-ге-Медон бах ханаснаа илэрхийлэн дуугарч байгаа нь энэ.

Тэр Хелмсгейлийн толгой руугаа буулгасан аймшигт цохилтыг нь ашиглан, дүрмээс гадуур түүний гэдэс рүү сүүлчийнхээ хүчээр дэлсчихсэн юм санжээ. Хелмсгейл ухаангүй гулдайн хүрчигнэж байв.

Хелмсгейлийн тэрийн хэвтэхийг харсан зарга таслагч нар,
— Хариу цохилтыг бүрнээ авлаа гэж санал нэгтэй айлдлаа.
Үзэгчид бүгд, хожигдсон нь хүртэл алга ташив.

Филем-ге-Медон буруу цохилтын хариуг буруу цохилтоор хариулжээ. Гэвч үүнийг түүнд зөвшөөрсөн байснаас хойш яая гэхэв.

Хелмсгейлийг дамнуурга дээр аваад явав. Түүнийг сэхээ орохгүй гэдэгт бүгд итгэлтэй байлаа.

Лорд Робертс,

— Би мянга хоёр зуун алтан зоос хожлоо! гэж хашхирах нь холгүй хэлж дуулдана.

Филем-ге-Медон насаараа эрэмдэг зэрэмдэг хүн үлдэж таарав бололтой.

Сүйлсэн хүмүүст байдаг ёсоор Жозиана, Дэвид лордын гараас түшин тэндээс хөдлөнгөө,

— Гайхалтай үзвэр. Гэхдээ... хэмээн дуугарахад нь Дэвид лорд,

— Гэхдээ юу гэж? гэв.

— Миний уйтгарыг сэргээх юм бодсон юм л даа. Тэгсэн чинь үгүй юм шиг байна.

Дэвид лорд дороо зогсоод, Жозианыг харснаа, уруулаа хазлан хацраа төмбийлгөснөө, толгой сэгсрэх нь «Анхааралдаа авлаа» гэсэн үг байжээ. Тэгснээ авхайд,

— Уйтгарын эсрэг цор ганцхан эм байдаг юм гэлээ.

— Ямар?

— Гуинплен.

— Гуинилен гэдэг чинь юу юм бэ? гэж Жозиана асуулаа.

Хоёрдугаар дэвтэр. ГУИНПЛЕН, ДЕЯ ХОЁР

I. Энэ бүлэгт эдүгээ болтол зөвхөн үйл явдлаар нь мэддэг байсан хүний царайг харуулна

Байгаль Гуинпленд бэлгээ өгөхдөө гар татсангүй.

Амыг нь чихэнд нь тултал дарвайлган чихийг нь бараг нүдэнд нь тулган хулмайгаж, марзганагчийн саравч ойж бууж байхаар хамрыг нь хавтайлган, царайг нь харсан хүн инээдээ барихын аргагүйгээр нүүрийг нь бүтээжээ.

Бид байгаль өөрийн хишгээр Гуинпленийг хайр найргүй дарчихсан юм гэж ярилаа. Гэхдээ энэ нь ганц байгалийн ачаар ингэлээ гэж үү?

Түүнд хэн нэгэн хүн тус дэм болчихсон юм биш биз?

Нүд нь гэж хоёр нарийхан зураас, амных нь оронд онгойн харагдах нүх, хамрынх нь оронд хоёр жижиг нүхтэй хавтгай булдруу, нүүр нь гэж элдсэн гурил шиг ерөнхийдөө инээд хүргэхээс цаашгүй. Байгаль, гаднын дэмжлэггүйгээр урлагийн ийм төгс бүтээлийг бүтээж чадахгүй гэдэг нь тодорхой байлаа.

Гэвч инээд гэдэг ямагт хөгжилтэй байгааг илэрхийлдэг гэж үү?

Энэхүү алиа марзан амьтантай (учир нь Гуинплен марзганагч байжээ) учраад түүний гадна төрхөөс үүдсэн хөгжилтэй сэтгэгдэл сарнисны дараагаар, түүнийг сайтар ажиглах аваас түүний царайнд чадамгайгаар хийсэн ажлын шинж тэмдгийг олж харна. Энэ нүүр царай бол байгалийн санамсаргүй тоглоом бус ямар нэг хүний санаатайгаар гаргасан хүч чармайлтын үр байлаа. Ийм бүрэн гүйцэд заслыг байгаль эх урлаж чадахгүй. Хүн өөрийгөө гоо үзэсгэлэнтэй болгож чадахгүй ч гэлээ, үзэмжгүй муухай болгож элбэгхээн чадна. Готтентон маягийн дүрийг та ром маягийн болгож чадахгүй, гэлээ ч герг хамраар зүдрэх юмгүй халимаг хамар хийчихнэ дээ. Үүний тул хамрын нахиуг нь цааш нь чихэж өгөөд л, хамрын нүхийг нь хавтгайлахад л гүйцээ.

Дундад зууны бүдүүлэг латин хэл *denasave*¹¹⁶ гэдэг үйл үг бий болгосон нь жир хэрэг биш юм шүү. Гуинплен маань багадаа хэн нэгэн хүн нүүр царайг нь өөрчилчихөөр анхаарал татсан хүүхэд байсан юм биш байгаа? Болох л юм. Дор хаяж л түүнийг хүн амьтанд харуулж, мөнгө олох зорилгоор тэгсэн байж болно. Ерөнхийд нь аваад үзэхэд сайх царайг зэрэмдэглэхдээ уран дүйтэй үйлдвэрлэгчид хичээн ажилласан нь илт. Ямар нэг нууц, бодвоос

алхими¹¹⁷, хувилахуйн ухаанд хамаарагддаг шиг мэс засалтай холбоотой нууц шинжлэх ухаан эргэлзээгүй нялх байхад нь түүний төрөлхийн царайг гутаан ийм нүүртэй болгосон бололтой. Огтолж тайрах, шархны эд эсийг эдгээх, оёдол тавихад мэргэжсэн энэхүү шинжлэх ухааны үндсэн дээр амыг нь дарвайлган, уруулыг нь сэтлээд буйлыг нь ярзайлгаж, чихийг нь дэлдийлгэн, төвөнхийг нь гүрдийлгээд, хөмсөг хамрыг нь байраас нь шилжүүлж, шанааны нь булчинг сунгаж сорви оёдлыг нь толийлгосныхоо дараа нүцгэн булчин дээр нүүртээ инээд тодруулсан маягаар арьсыг нь дахин нөмөргөөд өгөхөөр, энэхүү уран дүйтэй сийлбэрчийн онцгой чадварлаг ажлын үр дүнд сайх амьд баг Гуинплен гарч иржээ.

Хүмүүс ийм нүүр царайтай төрдөггүй юм.

Ямар ч байлаа гэсэн, Гуинплений баг маш сайн болсныг хэлэх юун. Гуинплен уйтгарлаж гуньсан хүн бүгдийн хувьд бурхны хишиг байв. Ямар хишиг вэ?

Бурхны хишгийн хажуугаар чөтгөрийн хишиг гэж байдаг юм биш биз? Бид энэ асуудлыг шийдэлгүйгээр энэ чигээр нь орхиё.

Гуинплен хэрмэл марзганагч байлаа. Тэр нь олны цугласан газар тоглоно. Түүний үзэгчдэд үзүүлэх сэтгэгдлийг юутай ч зүйрлэшгүй. Зөвхөн гаднах байдлаараа л санаагаар өвдсөн хүнийг эдгэрүүлчихнэ. Гашуудал тохиолдсон хүмүүс Гуинпленээс дөлөхөд хүрнэ. Учир нь харангуутаа л өөрийн эрхгүй инээж эвгүй байдал гаргана. Нэгэн удаа зандалчин иржээ. Гуинплен ч түүнийг гуйлгалгүй инээлгээд өгсөн гэнэ. Гуинпленийг харангаа хүмүүс тачигнатал хөхөрч, уруулаа хөдөлгөх төдийд нь элгээ хөштөл инээжээ. Тэр нь уй гашуу, гунигийн эсрэг туйл байлаа. Spleen¹¹⁸ нэг үзүүрт нь, Гуинплен нөгөө үзүүрт нь байлаа.

Ийм учраас ч очсон яармаг, талбай бүрд нь санаанд оромгүй эрэмдэг амьтан гэсэн алдар нь түрүүлээд хүрчихсэн байдаг ажээ.

Гуинплен инээдээрээ бусдын инээдийг хүргэнэ. Гэхдээ тэр өөрөө инээдэггүй байлаа. Тэр юуны нь хөгжихтэй манатай; харин царай нь инээдэг байж. Зайлж боломгүй тавилангаас ч юм уу эсвэл онцгой урлагаар бүтээгдсэн айхавтар нүүр нь л инээнэ. Үүнд Гуинплен хамаагүй. Түүний гадаад төрх нь дотоод байдлаас нь шалтгаалахгүй. Тэр нь дух, хацар, хөмсөг, уруулаасаа энэхүү хар аяндаа гарч ирэх инээдийг үлдэн хөөж чадахгүй ажээ. Сайх инээд бол онцгой халдвартай гэмээр өөрийн мэдэлгүй инээд юм. Учир нь насан туршид нь арилахгүйгээр хадагджээ. Энэхүү бүйлээ гарган ярзайсан амыг хараад инээхгүй тэсэх хүн нэг ч үгүй ажээ. Инээх, эвшээх гэсэн амны хоёр хөдөлгөөнийг харсан хэн ч даган инээж,

эвшээхээс өөр аргагүй. Хаанаас нь ч бодсон, Гуинпленийг нялхад нь хийсэн нууцлаг мэс заслын үр дүнд, түүний бүхий л нүүр царайн хэлбэр нь хүний инээдийг хүргэхээр, бүхий л төрх нь дугуйны бүх хигээс булдаа төвлөрдөг лугаа адилаар зөвхөн хүний инээд хүргэхэд л чиглэгджээ. Гуинплений сэтгэл ямар ч байдлаар хөдөллөө гэсэн тэр нь сайх инээд хүрэм төрхийг нь улам ч ихэсгэж, чухамдаа бүр хэтрүүлнэ. Гайхаж гомдох ч юм уу уурлаж өрөвдөх нь, инээж байгаа юм шиг таталдсан булчингуудыг нь улам онцгой тодруулна. Уйллаа гэхэд л түүний нүүр царай нь инээсээр байх байсан биз ээ. Гуинпен юу ч хийж, юуг ч хүсэж, юуг ч бодож байлаа гэсэн, толгойгоо өргөхөд л хажууд нь хүн байдаг л юм бол тачигнатал хөхрөх нь тэр.

Хөгжилтэй Медузийн¹¹⁹ толгой байна гээд бод л доо.

Гэнэтийн ер бус үзэгдэл, дассан бодлын ерийн урсгалыг эвдэж, хүсээгүй байхад нь хүмүүсийг инээхэд хүргэдэг.

Урьдын цагт эртний грекийн театруудын гол хаалганы дээд талд инээсэн хүрэл баг байдаг байсан агаад түүнийгээ Комедия гэж нэрлэдэг байжээ. Хүрэл царай инээж байгаа ч юм шиг боловч хажуугаар нь бодолд орсон юм шиг байдлыг хадгална. Ухаангүй шахам элэглэл, мэргэн шахам болсон егөөдөл энэхүү царайнд нийлэн сүлэгджээ. Санаа зовон урам хугарахын бүх л цогц, амьдралд итгэл алдан, уйтгарлаж гуних бүгд л сайх магнайд илрэх атлаа эцсийн эцэст зугаатай байдлыг гаргах нь уйтгарламаар ажээ. Хүн төрөлхтөнд хандсан нэг завж нь доог тохууг илтгэн байхад, бурханд хандсан нөгөө завж нь шүтээнийг доромжилсон шинжтэй. Энэхүү хорон егөөдлийн туйлын дүртэй, бид бүгд биедээ агуулж явдаг егөөдлийн нөөцөө харьцуулан жишиж, сайх хөдөлгөөнгүй инээдийн өмнүүр зогсолтгүй өнгөрөх хүмүүс, элэглэн жуумалзсан царцанги хөдөлгөөнгүй багийг хараад гайхан шагшрахдаа амаа ангайн зогсох бөлгөө. Хэрэв энэхүү уйтгартай багийг амьд хүний нүүрэнд углачихлаа гэж бодвол, Гуинплений гадаад төрхтэй ойролцоо төсөөллийг гаргаж болох юм. Түүний мөрөн дээрх толгой нь шулмын хүйтэн инээд гаргасан багийг санагдуулам ажээ.

Үүрдийн инээд. Үүнийгээ тодорхой болгоё. Хэрэв манихенд¹²⁰ итгэх юм бол сайн эхлэл нь түүнд дайсагнал байдаг хорон муу эхлэлд байраа тавьж өгдөг, бурханд ч хүртэл хийж байгаагаа үе үе тасалдуулах нь байдаг гэдэг. Дур зориг гэж юу болох тухай бас тохиролцоцгооё. Тэр маань цаг ямагт хүчгүй байдаг гэж бид боддоггүй шүү дээ. Ямар ч амьдрал байлаа гэсэн «жич» гэдгээр утга нь өөрчлөгдөж байдаг захиа лугаа адил билээ. Гуинплений хувьд тэр захианы сүүлд нэмэлт болгон бичдэг «жич» нь ийм ажгуу: Дур

зоригоо байдгаар нь чангалан, хамаг хүч анхаарлаа төвлөрүүлэн байж ямар ч сэтгэл хөдлөх юмгүй, саад болох юм хажуугаас нь гарч ирэхгүй үед, заримдаа тэр нь сайх байнгын инээдийг нүүрээсээ зайлуулж, цаанаа л нэг эмгэнэлтэй царайг гаргаж чадна. Энэ үес түүний царайн төрх нь ойр хавийн хүмүүсийн инээдийг бус харин бие арзасхийм айдсыг төрүүлдэг байв.

Энэ нь түүний хамаг чадлыг баран, сөхөрч ойчтол нь тамирдуулдаг учраас Гуинплений ингэж хүчлэх нь өдрийн од шиг байдгийг тэмдэглэе. Үүний хажуугаар өчүүхэн төдий сэтгэл эвгүйрхэх ч юм уу догдлоход л нөгөө далайн түрлэг лүгээ адил хором зуур тогтож байгаа инээд дахин нүүрэн дээр нь ил гарч аль хэр хүчтэй сэтгэл догдолсноос нь шалтгаалан улам ч тодорно.

Үүнээс бусад үед Гуинплен үүрд инээсээр явах тавилантай төржээ.

Гуинпленийг хараад хүмүүс хөхрөлдөнө. Гэвч хөхрөнгөө нүүр буруулна. Ялангуяа эмэгтэйчүүдэд илүү жигшүүр төрүүлнэ. Үнэндээ ч аймаар хүн байсан юм. Үзэгчдийн татаж унатлаа хөхрөх нь нэг ёсны өглөг байсан бөгөөд түүнийгээ бараг санамсаргүй хөгжилтэйгөөр төлдөг байлаа. Үхтлээ инээснийхээ дараа Гуинпленийг харна гэдэг эмэгтэйчүүдэд тэсэхүйеэ бэрх болж, түүнийг харахгүйг хичээн харцаа буулгана.

Чухамдаа яривал Гуинплен, царайг нь л тооцохгүй юм бол нуруу туруу сайтай, мах шөл нь таарсан хөнгөн хөдөлгөөнтэй, өчүүхэн ч зэрэмдэг биш хүн байлаа. Энэ бол Гуинплений царай нь байгалийн бүтээлээсээ илүү хүний гар оролцсон гэдэг тааврыг батлах бас нэг шинж тэмдэг байв. Яаж ч бодсон Гуинплений бие бялдрын гоо сайхан нь царайн нь гоо сайхантай зохицсон, нийцсэн байж таарна Төрөхдөө энэ хүн, бусад л хүүхдийн адил байсан нь эргэлзээгүй. Түүний биед гар хүрэлгүй орхиж, нүүрийг нь огтчин зэрэмдэглэжээ. Гуинпленийг санаатайгаар эрэмдэг амьтан болгожээ.

Доор хаяхад л энэ бол үнэнд хамгийн ойртсон зүйл.

Шүдийг нь сугалсангүй. Шүд бол инээхэд зайлшгүй шаардлагатай. Үхсэн хүний гавалд ч хэвээрээ үлддэг.

Түүнд хийсэн хагалгаа аймшигтай зүйл байсан байж таарна. Тэр үүнийг санахгүй байгаа нь, ийм хагалгаанд өртөөгүй гэсэн үг огт биш юм. Дүр сийлэгч-мэс засалчийн ийм ажил, түүний золиос нь, өөртөө юу болж байгааг ойлгож чадахгүй, шархаа өвчин хэмээн бодохоор нялх хүүхэд байсан тохиолдолд л амжилттай болж чадна. Түүнээс гадна тэр үед нойрсуулдаг, өвчин намдаадаг арга нэгэнт мэдэгдчихээд байсан юм. Зөвхөн энэхүү дурдагдан буй үед л үүнийг

илбэ, жилбэ гэж нэрлэдэг байсан аж. Манай үед үүнийг мэдээ алдуулалт гэдэг.

Ийм баг углаж авсныхаа дараа, түүнийг өсгөн бойжуулсан хүмүүс, ирээдүйн тамирчин болох авьяасыг нь хөгжүүлж эхэлжээ. Сайтар шилж сонгож авсан уран нугаралтын дасгалын замаар мөчийг нь ямар ч маягаар нугардаг нугастай юм шиг болгон, бие махбод нь үегүй шиг уян хатан болжээ. Гуинпленийг нялхаас нь эхэлж амьтан хүн инээлгэдэг марзганагч болгон хүмүүжүүлэхийн тулд юуг ч дутуу орхисонгүй.

Үсийг нь насан туршид нь шар зос шиг өнгөтэй болгосны нууц, бидний үед шинээр тайлагдаад байгаа билээ. Одоо түүнийг хөөрхөн хүүхнүүд хэрэглэх болжээ. Урьдын цагт муухайд тооцогдож байсан зүйл одоо гоо сайхны шинжид тоологддог болсон нь энэ. Гуинплений үс нь улаан шар байсан бололтой, гэтэл сүүлд будсан хахуун будаг үсийг нь ширүүн арзайсан юм болгочихжээ. Чухамдаа үс гэхээсээ сойзыг санагдуулам шар дэлийн дор, ёстой л ухаан бодлын сав байгууштай гайхалтай хөгжсөн гавал нуугдаж байх ажээ. Нүүр царайн нь зохицлыг үгүй болгон, булчин шөрмөсийг нь зэрэмдэглэсэн мэс засал ямар ч байсан байлаа гэх нь ээ гавлынх нь хэлбэрийг өөрчилж даанч чадаагүй ажээ. Гуинплений царайн хүч чадал нь хачирхмаар. Энэхүү инээдэг багийн цаана хүн бүгдийн адилаар, мөрөөдөл болоход бэлэн сэтгэл нуугдаж байлаа.

Инээд гэдэг Гуинплений жинхэнэ авьяас байв. Тэр түүнээсээ ангижирч чаддаггүйн учир нь түүгээрээ орлого олдогт байлаа. Инээдээрээ л гэдсээ тэжээнэ.

Гуинплен гэдэг маань тэр нэгэн өвлийн үдэш Портлендийн эрэгт хаягдан, Веймутэд, ядуухан мухлаг тэргэнд толгой хоргодох газар олж авсан нөгөө хүү мөн гэдгийг уншигчид минь аль хэдийнээ гадарлаа биз дээ.

II. Дея

Арван таван жил өнгөрчээ. Жаал хүү нас бие гүйцсэн эр болов. Мянга долоон зуун таван он гарлаа. Гуиннлен хорин тав хүрчээ.

Үүрс хоёр хүүхдийг хоёулыг нь үрчилжээ. Ийнхүү нүүж явдаг багахан айл бий болох нь энэ.

Үүрс, Гомо хоёр өтөлжээ. Үүрс нэг ч үсгүй хав халзарч, чоно нь був бууралтжээ. Чонын амьдрах хугацааг, нохойн настай адилхан тийм нарийнаар тогтоосон нь үгүй. Молены гаргасан мэдээгээр бол зарим чоно, түүний дотор цөөврийн төрөл *caviae vorus* Саэлийн тодорхойлсон өмхий үнэртэй *canis nubilis* наян жил болдог гэнэ.

Амьсгаа хураасан эмэгтэйн өврөөс олдсон охин одоо хар үсээр эмжигдсэн цас шиг цагаан царайтай, зэгсэн өндөр голшиг тэгш биетэй, ялимгүй шүргэчихэд хугарчихмаар санагдам нарийхан, арван зургаатай охин болжээ. Атаархмаар, гоолиг хөөрхөн ч гэлээ үзэсгэлэнтэйгээр гялалзах нүд нь хараагүй нь харамсмаар.

Ядуу бүсгүйг нялх охинтой нь цасанд дарсан үйлийн үргүй өвлийн тэр шөнө нэгэн зэрэг хоёр гайг даллан ээжийг нь үхүүлж, охиныг нь сохолсон ажээ.

Хар гай охины харааг эгнэгт хөдөлгөөнгүй болгожээ. Нялх охин одоо том болжээ. Орчлонгийн гэгээ гэрэл нэвтэрдэггүй түүний царайд, энэхүү амьдралын гашуунаар урам хугарсан байдал нь гунигтайяа буусан зовхинд нь илэрнэ. Түүний том алаг нүдэнд хачирхмаар нэгэн шинж чанар байлаа. Түүний хувьд унтарсан ч, ойр хавьд нь байгаа хүмүүсийн хувьд туяаран гэрэлтсэн өнгөө хадгалсаар байх ажээ. Зөвхөн гадаад ертөнцийг гийгүүлсэн нууцлаг хоёр зул! Үгүй хийгдсэн гэрэл, туяа цацрааж байгаа нь энэ. Унтарч бөхсөн мэлмий туяаран гэрэлтэж байгаа нь энэ. Энэхүү харанхуйн олзлогдогч болсон туяа Деягийн амьдран агч пад харанхуйг гэрэлтүүлэн авай. Тас харанхуйн гүнээс, сохрох гэж нэрлэгддэг хар хананы цаанаас хурц туяагаа орчинд тархаан байлаа. Дея бидний нарыг үзээгүй ч гэлээ, түүнд нарны тусгал гэрэлтэн ойж байлаа. Түүний үхмэл харцанд огторгуйн оддын мөн чанар болсон хөдөлгөөнгүй очрон гялалзах нэгэн увдис байх ажээ.

Тэр нь өөрөө харанхуй шөнө байв. Гэвч ижил дасал болсон хав харанхуйн дэвсгэр дээр нь од лугаа адил гялалзан байв.

Латин нэрийн дон шүглэсэн Үүрс түүнд Дея гэдэг нэр өгчээ. Тэр урьдаар чонотойгоо зөвлөсөн байна. «Чи хүний ертөнцийг төлөөлдөг, би амьтны ертөнцийг төлөөлдөг, чи бид хоёр бол газар

дэлхийн төлөөлөгч шүү дээ. Тэгэхээр энэ нялх охин тэнгэрийн эрхсийг төлөөлөг. Түүний сул дорой нь хэрэг дээрээ хамгийг чадагч хүч юм. Ингээд манай овоохойд, хүн төрөлхтөн, амьтны аймаг болон бурхны ертөнц гээд бүх орчлонт ертөнц багтах нь энэ» гэжээ.

Чоно зөвшөөрчээ.

Энэ зөвлөгөөнөөс хойш охиныг Дея гэж дуудах боллоо.

Гуинплений хувьд, Үүрс түүнд нэр олж өгөх гэж толгой зовоох хэрэг гарсангүй. Тэр нэгэн өглөө л жаал хүү зэрэмдэглэгдсэн, нялх охин хараагүй болохыг ажиглангаа л,

— Хүүгийн нэр хэн билээ? гэж асуужээ.

— Намайг Гуинплен гэдэг хэмээн хүү хариулав.

— За яах вэ. Гуинплен бол Гуинплен л байг гэж Үүрс дуугарчээ.

Дея, Гуинплений тоглолтод тусалдаг байлаа.

Хэрэв хүн төрөлхтний хувьгүй, аз жаргалгүй байхын нийт дүнг гаргаж болдог бол түүний амьд биелэл нь Гуинплен, Дея хоёр болох байсан биз. Хоёулаа л харанхуй сүүдрийн ертөнцөөс газарт хөл тавьсан юм шиг санагдана. Гуинплен нь айдас гээч юм ноёрхож байдаг газраас нь, Дея пад харанхуй ноёлон байдаг газраас нь ирж үү дээ гэмээр. Мөнх шөнийн аймшигт туйлуудаас зээлж авсан ондоо ондоо харанхуйгаар тэднийг нэхэн бий болгожээ. Дея энэхүү харанхуйг дотроо, Гуинплен нь нүүрэн дээрээ авч явлаа. Деяд ямар нэг сүг сүүдгэнэлийн юм байдаг бол Гуинплен буг ороолон лугаа адил ажгуу. Дея харанхуй хар ангалаар бүслэгдсэн байдаг бол Гуинпленийг түүнээс ч дор юм хүлээж байна. Хараатай Гуинпленд, сохор Дея ангижирч гэтэлсэн нэгэн аймаар хувь байсан нь өөрийгөө бусад хүнтэй харьцуулах боломж байжээ. Гэвч Гуинплен шиг байдалтай хүний хувьд, хэрэв тэр талаар сайтар ухаж мэдье хэмээн хичээлээ гэж бодвол, бусадтай зүйрлэнэ гэдэг өөрийгөө ойлгохоо болино гэсэн үг байлаа. Орчлонгийн юмс хараанд нь тусдаггүй Дея шиг нүдтэй байна гэдэг асар том гай мөнөөс мөн гэхдээ ертөнцөд өөрөө байх ёстой тэр зүйлийг байхгүйг мэдэрч, орчлон хорвоог харж байгаа мөртөө түүнд, өөрийгөө харахгүй байна гэдэг, өөрөө өөртөө таавар болж байхаас бага гай юм. Деягийн нүдэнд харанхуйн нөмрөг нөмөргөж, Гуинплений нүүрт баг углажээ. Үүнийг үгээр яаж илэрхийлдэг юм билээ дээ? Гуинплений нүүрт амьд махбодоор нь эсгэн оёсон баг байлаа. Тэр нүүрийнхээ жинхэнэ төрхийг мэддэггүй байв. Тэр нь алга болжээ. Түүний нь өөр төрхөөр сольжээ. Төрөлхийн дүр нь хэдийнээ байхаа больсон юм. Толгой нь амьд байсан ч, нүүр нь үхжээ. Урьд нь царайгаа харсан үгүйгээ ч санаж

үл чадна. Деягийн хувьд хүн төрөлхтөн, Гуинплений хувьд байдгийн адилаар нэг л хүйтэн хөндий, тэд нараас тээр алс холын үзэгдэл байлаа. Тэр гоонь ганцаархнаа, Гуинпен ч гэсэн бас адилхан. Деягийн ганцаардал нь юуг ч харахгүй тул хав харанхуйтай адил. Гуинплений ганцаардал нь бүхнийг харах учир муу ёрлосон шинжтэй ажээ. Деягийн хувьд бүх хорвоо ертөнц түүний сонсох, мэдрэхүйн зааг хүрээнээс үл халина. Бүх л юмс түүнд хязгаарлагдмал, бараг зай хэмжээ гэж байхгүй, түүнээс хоёр алхмын л зайд бол байхгүйтэй адил болно. Зөвхөн харанхуй л эцэс төгсгөлгүй юм шиг санагдана. Гуинплений хувьд амьдрах гэдэг нь хэзээ ч дотор нь хутгалдан нийлэх тавилангүй олон хүн бужигнахыг цаг ямагт харж байна гэсэн үг байлаа. Дея гэрлийн аймгаас хөөгдсөн бол Гуинпен амьд хүмүүсийн дунд шоовдорлогдохоор заяагджээ. Хоёуланд нь цөхрөнгөө барах бүхий л үндэс байгаа ажээ. Эрэгтэй нь ч, эмэгтэй нь ч адилхан, хүн төрөлхтний сорилтын байж болох шугамыг алхан оржээ. Эрүүл ухаантай хүн л бол тэднийг хараад хязгааргүй өрөвдөн халаглах нь зүйн хэрэг. Тэд яасан их зовлон үзэн шаналах ёстой байв аа! Тэдний дээрээс хувь тавилангийн илт хорлонтой шийтгэл нөмрөн даржээ. Үйлийн үр гэгч хорхойд хоргүй хоёрын амьдралыг ийнхүү чадамгайгаар үргэлжийн зүдүүр, тамын зовлон болгож хувиргасан нь ер үгүй.

Гэхдээ үүний хажуугаар тэр хоёр диваажинд амьдарч байлаа.

Тэд бие биеэ хайрладаг байжээ.

Гуинпен Деяг эрхэмлэн хайрлах бөгөөд Дея Гуинпленийг бишрэн шүтнэ.

— Чи ямар сайн сайхан хүн бэ! гэж Гуинпендээ хэлнэ.

III. Oculos non habet et videt¹²¹

Орчлон дээр цорын ганц эмэгтэй хүн Гуинпленийг харж ойлгосон нь хараагүй бүсгүй байв.

Ямар өртэй, ачийг нь яаж санаж явахыгаа Дея Үүрсээс олж мэджээ. Гуинплен өргөсөн эцэгтээ Портлендээс Веймут хүртэл замыг яаж зовж зүдрэн туулснаа, түүний эрэг дээр ганцаарыг нь орхисноос хойш тааралдсан бүх л айдсыг ярьсан байжээ. Амьсгаа хураасан эхийнхээ цээжинд, амьгүй хөхийг нь хөхөн амь алдахад холгүй байсан өөдсөн чинээхэн амьтныг өөрөөс нь тийм ч олон насаар ах бус өөр нэг хүүхэд олж авсныг, хотол олны хайхрамжгүйн харанхуй гүнд булшлагдсан юм шиг хэн ч хэрэгсэхгүй голж хаясныг, гуйлтыг нь цөмөөрөө хайхрахгүй байсан ч гэлээ жаал хүү охиныг хайхралгүй орхилгүй орилохыг нь сонссоныг, энэхүү орчлонд тулж түших юмгүй болж, цор ганцаар ядарснаасаа болоод тамирдан сульдсан хаягдмал хүү өөрөө ээрэм талд хөлөө арай ядан зөөж ядаж байж харанхуй шөнийн дотроос сайх хүнд ачаа болох өөр хүүхдийг шүүрэн тэвэрснийг, хувь заяа хэмээгдэх амьдралын буяныг таамгаар хураахад хувьгүй хоцорсон сайх өрөвдөлтэй амьтан хэтдээ үгээгүй байдал, эмгэнэл цөхрөлийн биелэл болон өөр нэг нялх амьтны хувь заяаг өөртөө даатган хээрээс олсон охиныхоо хувьд тэнгэрийн бошгийг үзүүлснийг Дея мэддэг байлаа. Түүний хувьд тэнгэр гэдэг байхгүй болоход жаал хүү түүнд зүрхээ нээн өгч, өөрөө сүйрэх гэж байсан мөртөө охиныг авран, толгой хоргодон нөмөрлөх газаргүй байж биеэрээ толгой хоргодох газар нь болсныг, түүний эхийг, өрлөг эхийг нь орлон хорвоод ганцаардуулан орхисон тэнгэрт хариу болгон охиныг үрчилж авснаараа шөнийн таг харанхуй дунд ийм жишээг үзүүлснийг, өөрийн зовлонг дааж давшгүй биш хэмээн, өөр нэгэн зовсон амьтны лайг өөртөө үүрч, энэ хорвоод өөрийнх нь хувьд юу ч горьдох хэрэггүй мэт байтал, үүрэг гэгч юмыг нээн олж, хэн ч тээнэгэлзэн зүрхлэхгүй байсан тэр газар зоригтойгоор урагшлан, хэнбугай нь ч зүрх алдан ухрах байсан мөчид хойш суусангүй, хүүрийн онгойн харлах нүх рүү гараа хийж, Деяг тэндээс татан гаргасныг, өөрөө шалдан шахуу байж даараад байгаа болохоор нь навсархай хүрмээ түүнд өгч, өөрөө өлсгөлөн байж охиныг хооллож ундлахыг урьтал болгон хичээж, нялх охины төлөө л цасан шамарга, ганцаардал, айдас, хүйтэн, өлсгөлөн ангаж цангах болон шуурга гээд л үхлийн бүх л төрлийн хэлбэртэй тэмцэн, түүний төлөө л аравхан настай мундаг эр хязгааргүй шөнийн харанхуйтай

ач тач үзэлцсэнийг Дея мэдэж байлаа. Гуинплен хүүхэд байхдаа энэ бүхнийг түүний төлөө хийж, одоо нас бие гүйцсэн эр хүн болсон хойноо сулхан түүний түшиг, ядуухан баялаг нь, өвчтэй түүний эдгээх эм дом нь, хараагүй нүд нь болж явдгийг мэдэж байлаа. Өөрт нь үл танигдах учраас холхон байдаг тэрхүү зузаан хөшигний завсраар, тэр нь амь биеэ үл хайрлах үнэнч шударга сэтгэлийг, эр зоригийг тов тодорхой ялгадаг байлаа. Сэтгэл зүрхэнд баатарлаг явдал гэдэг тодорхой дүрслэлтэй байдаг. Түүний буянтай дүрийг нь Дея ойлгон төсөөлж чаджээ. Бодол санаа амьдран байдаг тэрхүү нар гэрэлтүүлдэггүй, илэрхийлэхийн аргагүй хийсвэр орчинд тэр нь ийм сайн үйлтний нууцлаг ойлго тусгалыг нь ойлгон мэдэж авчээ.

Хаашаа ч юм үргэлж хөдлөн байдаг, учир нь үл ухагдах зүйлээр тал бүрээсээ хүрээлүүлэн (бодит зүйл өөрт нь зөвхөн ийм л сэтгэгдэл төрүүлнэ) юу ч хийж хөдөлдөггүй амьтны шинж тэмдэг болсон байнгын айдсын дунд, байж болох аюулыг ямагт сэрэмжлэн хүлээж, хараагүй хүн бүрд байдагчлан орчлонд ямар ч хамгаалж өмгөөлөх юм байхгүй гэдгээ үргэлж мэдрэн байдаг ч гэсэн үүний хажуугаар хэзээ ч ядрахыг мэддэггүй, ямагт ойр дотно, үргэлж халамж анхааралтай байдаг Гуинпленийг, эелдэг зөөлөн сэтгэлтэй, хэрэгтэй цагт тусалж өмгөөлөхөд ямагт бэлхэн байдаг, Гуинпленийг өөрийнхөө хажууд хаа нэгтээ байгааг тодорхой мэдэрдэг байлаа. Тэр хүндээ хоёргүй сэтгэлээр итгэн, чин сэтгэлээсээ талархан баярласнаасаа Деягийн хамаг бие нь салганан чичирч, айдас нь намдан, аажмаар бахдан хөөрөхөөр солигдон, хав харанхуйгаар дүүрсэн нүдээрээ, хүрээлэн буй ёроолгүй харанхуйн оройд энэхүү халуун сэтгэлийн унтаршгүй цацралыг бахдан хардаг байжээ.

Хүний дотоод ертөнцөд буянтай сэтгэл гэдэг бол нар л гэсэн үг. Ийн Гуинплен Деяг гийгүүлдэг байв.

Юм бодохын тул учиргүй олон толгойтой, юм харж байхын тул тоймгүй олон нүдтэй байдаг бөөгнөрсөн хүмүүсийн хувьд, өөрсдөө ч гэсэн хуумгай өнгөцхөн учир, юмс үзэгдлийн өнгөн дээр л зогсчихдог бөөн хүмүүсийн хувьд, Гуинплен бол ерөөсөө л хаанаас нь ч харсан алиа салбадай, хүнийг инээлгэн, марзганан, мал адгууснаас бараг ялгагдах юмгүй бүдүүлэг амьтан байлаа. Хүмүүс зөвхөн түүний баг болсон царайг л мэднэ.

Деягийн хувьд Гуинплен бол, булшнаас өөрийг нь суга татан газарт гаргасан аврагч, түүнд амьдрах боломжийг хайрласан тайтгаруулагч, гарах газаргүй харанхуйн дунд тэмтчин төөрч явахад нь өөрийнх нь гарт гар нь хүрч мэдрэгдсэн чөлөөлөгч нь байлаа. Гуинплен бол ах нь, анд нь, зүг чигийг заагч нь, өмөг түшиг нь,

тэнгэр нь, гэрэл цацарсан далавчтай хань нь байлаа. Тэгээд хүмүүс мангас хэмээн харж байхад Дея сахиулсан тэнгэр хэмээн харж байв. Хараагүй Дея түүний сэтгэлийг өнгийн харж байжээ.

IV. Нийлсэн хоёр сэтгэл

Гүн ухаантан Үүрс үүнийг ойлгож байлаа. Деягийн бахдан гайхахыг сайшаан зөвшөөрч,

— Сохор хүн үл үзэгдэх зүйлийг хардаг. Ухаж ойлгоно гэдэг харна гэсэн үг гэж хэлдэг байв.

Гуинпленийг харангаа,

— Хагас мангас, тэгсэн мөртөө хагас бурхан гэж бувтнана.

Гуинплений хувьд гэвэл тэр Деяд бүр унаж дуусаад байв.

Хардаггүй нүд ухаан, хардаг нүд хүүхэн хараа гэж байдаг. Гуинплен Деяг хардаг нүдээрээ ширтэж байлаа. Дея туйлын хүслэнгээр гялбаж байдаг бол, Гуинплен бодит байдлаар гялбажээ. Гуинплен зүгээр муухай төдийгүй, хүн аймаар амьтан ажээ. Деяг харахдаа өөрийн эсрэг тэсрэг дүрийг харна. Түүний аймшигтайн хэрээр Дея сайхан байлаа. Гуинплен эрэмдэг зэрэмдгийн биелэл бол, Дея үзэсгэлэн гоогийн биелэл билээ. Дея бол зүүд нойрны биелэл, биеийн төрхийг олсон мөрөөдөл байлаа. Түүний бүх л юманд, хөнгөн бие галбирт нь хулс мэт гунхалзсан гоолиг уян биед нь, нүдэнд харагддаггүй жигүүртэй ч байж магадгүй дал мөрөнд нь, мэдрэхүйгээс илүү сэтгэлийг нь бэлхнээ хэлээд өгөх хүйсийг нь харуулсан биеийн ерөнхий галбирт нь, бараг тунгалаг гэмээр арьсных нь цасан цагаан өнгөнд, бурхны бошгийг үзүүлэхээр орчлонг орхисон, хараагүй мэлмийнх нь ариунд, түүнийг сахиулсан тэнгэртэй төрөл гэхээр ямар нэг юм байх авч тэр нь хаанаас нь харсан ч мах цусанд төрсөн эмэгтэй хүн байлаа.

Бид дээр өгүүлсэнчлэн Гуинплен өөрийгөө бусадтай харьцуулангаа Деяг ч бас харьцуулдаг байв.

Түүний байж байгаа нь бүхэлдээ, урьд өмнө дуулдаагүй эсрэг тэсрэг хоёр туйлын хослолын үр дүн байлаа. Нэг нь доороос, нөгөө нь дээрээс харвасан, хар цагаан хоёр цацрагийн огтлолцож гарсан цэг байв. Хүний нүдэнд харагдамгүй өвдөл цөвдлийг муу юмны, сайн юмны, гэсэн хоёр хошуу нэгэн зэрэг нэг нь тамлан зовоож, нөгөө нь үнсэн таалж товшиж болно. Гуинплен бол энэхүү цөвдөл, нэг талаас тамлан үйлийг нь үзэвч, нөгөө талаас элбэн энхрийлж байгаа атом, тэнгэрийн бошго үзүүлснээр улам ээдрээтэй болсон үйлийн үргүй тохиолдлын үр байв. Гай тотгор түүнд хуруугаараа хүрсэн ч гэсэн, аз хийморь ч бас адилхан шүргээд авчээ. Эсрэг тэсрэг хоёр тавилан нийлэн байж түүний ер бусын хувь заяаг бий болгожээ. Түүнд хараал, ерөөл хоёулаа байна. Тэр бол хараал идсэн

сонгомол хүн ажгуу. Тэр хэн байв аа? Үүнийг өөрөө ч мэдэхгүй ажээ. Толинд өөрийгөө харлаа гэхэд танихгүй хүн л харагдана. Тэр танихгүй хүн нь мангас л гэсэн үг. Өөрийн гэж даанч бодож чадамгүй царайтайгаасаа болоод Гуинплен толгойгоо цавчуулчихсан хүн гэлтэй явж байлаа. Энэхүү царай нь муухай муухайдаа бүр хүний зугаа болсон муухай юм байжээ. Хүнийг инээлгэхийнхээ хэрээр айлгадаг байв. Тэсэшгүй инээд хүргэхийг нь яана. Хүний нүүр гэгч юм алга болж, адгуус амьтны хоншоор гэмээр юм л үлджээ. Хэн ч, хэзээ ч хүний нүүр царайн дээрх, хүн гэгддэг дүрс нь ийнхүү ор сураггүй алга болохыг үзсэнгүй, хэзээ ч хүний инээдийг дүрслэн дуурайсан нь ийм төгс болж байсангүй, хэзээ ч, тэр байтугай хар дарсан зүүдэнд хүртэл ийм ёрын ярзайсан хошуу ам үзэгдэж байсангүй, хэзээ ч эмэгтэй хүнийг түлхэж холдуулж чадах бүх юмс эр хүний царай төрхөд ийм хорлонтойгоор хуримтлагдаж байсангүй. Сайх багийн цаана халхлагдан, сөрдөгдсөн хөөрхий зүрх үүрд гоонь ганцаар байх тавилантай юм шиг санагдана. Ийм царай авсны тагаас ялгаа юун байх билээ. Тэгтэл ч бас үгүй шүү, үгүй! Үл мэдэгдэх хорлол хамаг муугаа шавхаад барчихсан тэр газар, нүдэнд үл өртөгдөх буянт үйл хариу хишиг хайрлах нь бий. Чандраасаа гэнэт өндийн босож ирсэн энэхүү хөөрхий амьтны зэвүү хүргэх, түлхдэг юм бүгдийн нь хажуугаар сэтгэл татах зүйлийг хийж өгчээ. Усан доорх хаданд соронзон тавьж, энэхүү хаягдмал амьтан руу өөр нэгэн сэтгэл жигүүр ургасан мэт тэмүүлэхээр болгож, аянгад цохиулсан хөөрхийг тайвшруулахаар тагтаа явуулж, гоо үзэсгэлэн нь үзэлгүй муухайг эрхэмлэн хайрлахаар болгожээ.

Үүний тул үзэсгэлэнт бүсгүй зэрэмдэг эрийг харахгүй байх ёстой байлаа. Нэгэн аз жаргалын төлөө, нэгэн гай тотгор хэрэгтэй болжээ. Тэнгэрийн бошгоор Дея сохорсон нь энэ.

Гуинплен өөрийгөө солигт гарсан хүн гэж бүүр түүрхэн ойлгодог байлаа. Гэвч түүнийг чухам юунаас болж ингээ вэ? Үүнийг мэддэггүй байв. Яагаад тэр ийм цээрлэлийг үзэх болов? Энэ ч бас түүнд таавар хэвээр үлджээ. Бүх насаараа тамгалагдсан түүний дээрээс гэнэт туяа татсан гэрэл буусан гэдэг л ганц мэдэж байгаа юм нь байлаа.

Гуинпленийг юм ойлгодог насанд хүрэх үед Үүрс түүнд доктор Конкестийн «De Denasatis¹²²»-ийн хэсгээс, мөн Гуго Плагоны нүсэр нэгэн судрын «nares habens mutilas¹²³» гэж эхэлдэг хэсгийг уншиж тайлбарладаг байжээ. Тэгэхдээ Үүрс ямар ч таамаглал гаргахаас болгоомжтойгоор зайлсхийж, аливаа нэгэн дүгнэлт хийнэ. Гуинплений хүүхэд ахуйтай холбоотой ямар нэг үйл

явдлыг тогтоочихоор магадлалыг аль нэг талаар гаргачихмаар эсэн бусын таамаглал байж болох л байлаа. Гэвч Гуинплений хувьд ганцхан юм маргаангүй илт байсан нь үр дүн нь байлаа. Бүх л насаараа нүүртээ гутамшгийн тамгатайгаар амьдрахаар заяагджээ. Түүнийг яагаад тамгалан гутаах болов? Үүнд хариу болчихоор юм байсангүй. Гуинплений эргэн тойронд анир чимээгүй, ганцаардал л ноёрхоно. Эмгэнэлт үнэнтэй холбогдон гарч ирсэн бүх л таавар итгэлгүй холбилзсон байсан бол, тэр аймшигт хэрэг л яалт ч үгүй лавтай гэдэг нь илт ажээ. Энэхүү гаслантай хүнд үед, Гуинпен ба түүний цөхрөл хоёрын хоорондох тэнгэрийн зууч мэт Дея гарч иржээ. Зэрэмдэг амьтан түүнд хандсан сайх дур булаам бүсгүйн эелдэг зөөлөн ааш, түүнийг дулаацуулах мэт төөнөн бахардуулж, лууны царайд нь аз жаргалтай гайхширал тодрох нь тэр. Айдас хүргэхийн тулд хийгдсэн тэр ямар нэгэн гайхамшгаар, гял цал болсон хүний хайр энхрийллийг өөртөө татаж, энэ мангас нэгэн од хараад хараад ханашгүйгээр ширтэхийг мэдрэн байлаа.

Гуинпен, Дея хоёр тохирсон хос байлаа. Энэхүү сэтгэл уярам хоёр зүрх бие биеэ бишрэн хайрлажээ. Тэр хоёрын түүх гэвэл үүр, үүрэн доторх хос шувуу юм. Бие биедээ таалагдан, бие биеэ хайж, бие биеэ олох гэсэн орчлонгийн хуульд нэгэнт захирагдан оржээ.

Ийнхүү үзэн ядах гэгч юм томоор алдах нь тэр. Гуинпленийг хөнөөгчид хэн ч байлаа гэсэн, түүнд бүр цаанаасаа нэг өширхсөн нь, хаанаас ч гарч ирсэн байлаа гэсэн зорилгоо биелүүлж чадсангүй. Түүнийг хаашаа ч гарахын аргагүй цөхрөлд оруулчих гэсэн чинь, аз жаргалтай хүн болгочихжээ. Шархыг нь эдгээгч гүгэл лүгээ адил сайн санааны биелэлтэй урьдаас сүй тавьчихжээ. Уй гашууг тайтгаруулагчийг түүнд заяажээ. Зандалчны хавчуур мэдэгдэмгүй аажимхнаар эмэгтэй хүний зөөлөн гар болж хувирах нь тэр. Гуинпен аймшигтай муухай ч гэлээ төрөхөөсөө тийм бус зориуд хүний гараар зэрэмдэглэгдсэн нэгэн байлаа. Тэр хүмүүс юуны өмнө түүнд гэр орон гэж байсан бол түүнээс нь эгнэгт холдуулаад дараа нь бүх хүн төрөлхтнөөс салгана гэж найджээ. Бүр хүүхэд байхад нь түүнийг үлгэн салган болгосон боловч байгаль ийм амьтныг, бусад бүх л үлгэн салган үгээгүйчүүдийг сэргээн амь оруулдгийнхаа адилаар амь оруулж ганцаардаж байхад нь ганцаардсан амьтныг тайвшруулдаг шигээ тайтгаруулжээ. Байгаль ганцаардаж орхигдогсдод ямагт тусламжийн гараа сунгадаг агаад бүх юмаар дутагдан хавчигддаг газар байгаа бүхнээ зориулан, сөнөж мөхсөн газрыг цэцэг ногоогоор дүүргэнэ. Түүнд чулуунд зориулсан ороонго, хөвд, хүнд зориулсан дурлал гэгч юм байдаг ажээ.

Энэ бол байгалийн далд хүчний өршөөнгүй уудам сэтгэл юм
аа.

V. Харанхуй дундах номин цэнхэр өнгө

Ийнхүү сайх өрөвдөлтэй хоёр амьтан бие биеийн. Хээ сэтгэлийг түшин амьдарч байв аа. Дея нь түших тулах юмтай болж, Гуинплен нь нөгөөгийнхөө дэмжлэгийг дуртайяа хүлээн авчээ.

Өнчирч хоцорсон Деяд өнчин Гуинплен нь байлаа. Эрэмдэг зэрэмдэг нь эрхтэн дутуугаа асрамжилжээ.

Хэн хэнээсээ ялгагдах юмгүй хос нийлэн нөхөрлөжээ.

Хувьгүй хоёр тайлбарлахын аргагүйгээр ачийг санан, баярлан талархаж байлаа.

Юунд тэр вэ?

Далдын нууцлаг хязгааргүйд.

Талархаж байгаагаа мэдэрнэ гэдэг бүрэн хангалттай. Ачийг санаж талархах гэдэг өөрийн жигүүртэй агаад хаашаа явах ёстойгоо мэдэж байдаг. Таны залбирал түүнийг хааш нь чиглүүлэхээ танаас илүүгээр мэднэ.

Хэчнээн олон хүн Юпитерт¹²⁴ залбирч байсан гэж бодонгоо Иеговт¹²⁵ залбирчихдаг гээч! Сахиус зүүсэн хэчнээн олон шүтлэгтэн эцэс төгсгөлгүйг анхаардаг гээч. Хэчнээн олон сүсэггүй хүн, өөрсдийнх нь сайн сэтгэл, уйтгар гуниг нь бурханд хандсан залбирал болчихдог гэдгийг гадарлах ч үгүй явдаг гээч!

Гуинплен, Дея хоёр хувь заяандаа баярлаж явдаг байлаа.

Эрэмдэг бол цөллөг, хараагүй байна гэдэг ёроолгүй хавцал гэсэн үг. Ингээд цөлөгдмөл амьтан нөмөр олж авч, ёроолгүй хавцал хүнтэй болжээ.

Гуинплен өөр лүү нь үйлийн үрээр, сэрүүндээ зүүдэлж байгаатай адилаар, эмэгтэй хүний дүрийг олсон, гэрэл гэгээ цацруулсан гоёмсог цагаан үүл, зүрх цохилуулан туяаран гэрэлтсэн хий үзэгдэл бууж ирж, сайх бараг үүл гэмээр мөртөө эмэгтэй хүн шиг сүүдгэнэл түүнийг тэврэн авч, тэр хий үзэгдэл түүнийг үнсэн таалж, сайх зүрх өөр лүү нь тэмүүлэхийг харж байлаа. Гуинплен өөрийгөө сэтгэлтэй болсон хүн гэдгээ мэдрэн сэглэгдсэнээ ч мартжээ. Сарнай цэцэг төөлүүр хорхойг хоёрхон эрвээхэй болгож, гэрлэхийг хүсжээ. Хэнд ч тоогддоггүй Гуинплен сонгосон хүн болж явчих нь энэ.

Хэрэгтэй юмтайгаа байна гэдэгт бүх юм багтана. Гуинплэнд хэрэгтэй юм нь байлаа. Дея ч өөрт хэрэгтэй юмтайгаа байв.

Өөрийн зэрэмдгийг мэдэн доромж санагдаж, дарамт болдог байсан нь больж, аажмаар манарсан, гайхаж бахадсан итгэлээр

солигдон сарнижээ. Хараагүй Деягийн арчаагаа алдсан ганцаардлын өөдөөс, түүнийг бүчсэн харанхуйн дундаас хэн нэгний гар сарвайн тосжээ.

Нэг нь нөгөөдөө шингэн ууссан хоёр шаналал өвтэгш амьдралд нэгдэх нь энэ. Хоёр хаягдмал харилцан бие биеэ танин олжээ. Хоёр тоногдсон амьтан дутуу дундыгаа нөхөхөөр нэгдэн нийлжээ. Нэгэнд нь дутуу юм нөгөөд нь байгаа учраас бие биедээ татагджээ. Нэг нь аль нэг зүйлээр ядуу байхад нөгөө нь баян байлаа. Нэгийнх нь гай тотгор, нөгөөгийнх нь баялаг болж байв. Хэрэв Дея сохор биш байсан бол Гуинпленийг шилж сонгож авах байсан юм гэж үү? Хэрэв Гуинплен зэрэмдэглэгдээгүй байсан бол, Деяг бусдаас илүүд үзэх байсан гэж үү? Мэдээжээр Дея, цаадах нь эрхтэн дутуу хүнд дурлахгүй байсан шиг, түүнд сэтгэлтэй болохгүй байсан билээ. Гуинплен үзэшгүй муухай амьтан байсан нь Деягийн хувьд ямар нэг жаргал байжээ. Дея хараагүй байсан нь Гуинплений хувьд ямар их аз байв аа? Тэдний тойрох аргагүй догшин тавилангийнх нь эмгэнэлт төсөө байгаагүй сэн бол, тэдний холбоо санахгүй зүйл байх сан. Хайр сэтгэлийнх нь гүнд бие биедээ зайлшгүй шаардлагатай хэрэгцээ байлаа. Гуинплен Деяг аварсан бол Дея нь Гуинпленийг аварчээ. Хоёр шоовдор амьтны учирсан нь бие бие рүүгээ тэмүүлэхийн үндэс болжээ. Энэ бол зовлонгийн далайд унасан хоёрын тэврэлт байлаа.

Үүнээс илүү ойр дотно, илүү горьдлогогүй, илүү ташуурам юм гэж байхгүй.

Гуинплен цаг ямагт «Түүнгүйгээр би яах байв аа!» гэж бодно.

Дея цаг ямагт «Түүнгүйгээр би гэдэг хүн юу болох байв аа!» гэж бодно.

Хоёр цөлөгдмөл амьтан эх оронтой болоод, засахын аргагүй, үйлийн үргүй гай тотгор болох Гуинплений тамга; Деягийн хараагүй нь тэднийг нэгтгэн, хоёуланд нь хэмжээлшгүй сэтгэл ханахын эх булаг болж өгчээ. Тэд өөрсдөө өөрсдийгөө л болгон, довоо шарлуулж, өөрсдөөс нь гадуур юм байна гэдгийг бодох ч үгүй байлаа. Бие биетэйгээ ярих, бие биедээ ойртох нь жаргал болж, хэн хэнийхээ сэтгэлийн ялимгүй ч атугай хөдлөлийг байнга ажиглан, нэгэн адил хүсэл мөрөөдлийн нэгдэлд хүрч, ав адилхан юмыг хоёул зэрэг боддог байлаа. Гуинплений алхааг сонссон Деяд бурхны гишгээг сонсох мэт санагддаг байлаа. Тэд туяа гялбан, хөгжим уянгалж, нүд гялбам уран барилга дунд, сэтгэл зүүдний бодол хөвсөн ямар нэгэн анхилуун үнэр ханхлан од түгсэн бүрэнхийн дунд бие биеэ тас тэврэн байлаа. Тэд бие биедээ нэгэнт хамаарагдах

болжээ. Үүрд ерөнхий нэгэн баяр бахдалаар холбогдсоноо ойлгож байв. Зовлон үүрэхээр заяагдсан хоёр амьтны бий болгосон энэхүү диваажингаас илүү хачин жигтэй юм гэж орчлонд үгүй биз ээ.

Тэд үгээр илэрхийлэхийн аргагүй жаргалтай байлаа.

Өөрсдийнхөө тамыг, тэнгэрийн орон болгон хувиргажээ.

Дурлал таны хүч чадал гээч ийм ажээ!

Дея, Гуинплений инээхийг сонсон, Гуинплен инээж байгаа Деяг хардаг байв.

Ийнхүү ер бусын жаргал цэнгэл бий болж, амьдралын бүрэн гүйцэд баяр бахдал биеллээ олж, аз жаргалын нууцлаг асуудал шийдэгдэх нь энэ. Хэн тэгээ вэ гэвэл хоёр хувьгүй амьтан!

Гуинплений хувьд Дея нь гэрэл туяаны биелэл, Деягийн хувьд Гуинплен нь дээд төрөлтний биелэл болж байлаа. Ингэж байна гэдэг бол, итгэл гэдэг айхавтар нууцыг дотроо агуулан байх нүдэнд үл харагдах дээд төрөлтний айхавтар битүүлэг нууц билээ. Аль ч шашинд итгэл гэдэг л чухам маргашгүй зүйл байдаг, гэхдээ энэ нь хангалттай. Хэмжээ хязгааргүй нэгэн хэрэгтэй зүйлийг мах цусанд төрсөн хүн харж чаддаггүй ч түүнийг мэдэрч байдаг билээ.

Гуинплен бол Деягийн бурхан шүтээн нь байлаа.

Заримдаа хайр сэтгэлдээ жолоо алдсан Дея түүний өмнө, энэтхэгийн дуган дахь онгон шүтээний өмнө наманчилж буй гоо сайхан тайган шиг өвдөг сөхөрдөг байлаа.

Ёроолгүй хавцал, түүний голд гэрэл гэгээтэй баян бүрд байх агаад тэнд бие биеийнхээ гэрэлд гялбасан амьдралд хамаагүй хоёр амьтан байна гээд бодоод үз л дээ.

Энэ хайр сэтгэлтэй зүйрлэхээр ариун юм нэгээхэн ч үгүй билээ. Дея цаанаа хүсдэг байж болох ч гэлээ үнсэн озох гэж юу байдгийг мэддэггүй байлаа. Хараагүй байна гэдэг ялангуяа эмэгтэй хүнд, сэтгэл зүүдний бодолгүй байна гэсэн үг биш. Таньж мэдэхгүй юм ойртоход чичрэн дагжиж байлаа ч гэлээ, зугтаан зайлдаггүй жамтай. Гуинплений хувьд сэтгэл донслуулсан балчир бага нас нь түүнийг юм боддог болгожээ. Хэчнээн ихээр мансуурч буйгаа мэдрэх тусмаа төчнөөн ихээр ичингүйрдэг байв. Энэхүү багын найзтайгаа, энэхүү гэрэл гэдгийг мэдэхгүйтэйгээ адилхан нүгэл гэдгийн тухай огтын ч төсөөлөлгүй охинтой, энэхүү өөрийг нь эрхэмлэн хайрлах гэдэг ганцхан зүйлийг л хардаг сохор охинтой юу хүссэнээ хийж болох байв. Гэвч тэр Деягийн өгөх тэр зүйлийг хулгайлан авснаас өөрцгүйгээр бодох байжээ. Уйтгартай авч сэтгэл ханан, гэм зэмгүйхнээр хайрлаж явахаар зориг шулуудсан агаад

өөрийн зэрэмдгийг ойлгох тусмаа ариун явдлыг сахих нь улам ч нэмэгджээ.

Сайх аз жаргалтай хос тэрүүхэндээ л, тэнгэрийн оронд амьдарч байлаа. Тэндээ огторгуйн хүрээ лүгээ адил зайнаас, эр нөхөр эхнэр хүүхэн байлаа. Хязгааргүйд таталцал, газарт хүйс болох номин цэнхэр манангийн дунд тэр хоёр солилцон андалддаг байлаа. Тэд бие биедээ сэтгэлийнхээ үнсэлтийг бэлэглэнэ.

Тэд ямагт хамтын амьжиргаатай байсан агаад өөрөөр амьдарч болно гэж санаа оноонд нь ч ордоггүй ажээ. Деягийн бага нас Гуинплений өсвөр настай давхацжээ. Тэд хамтдаа өсөн өндийжээ. Бүхээгт тэрэг нь томхон шиг унтлагын өрөөнөөс хэтрэхгүй учир тэд удаан хугацаагаар нэг дор унтаж байжээ. Тэд авдар дээр, Үүрс шалан дээр унтан аргалж байжээ. Нэгэн өдөр, Дея тэгэхэд нялх хэвээрээ шахуу байж, Гуинплен том болсноо гэнэт мэдрээд, анх удаа ичих нь тэр. Тэгээд Үүрст «Би ч гэсэн бас шалан дээр унтмаар байна» гэжээ. Тэр оройдоо хөгшний хажуугаар, баавгайн арьсан дээр хэвтээд өгөв. Тэгэхэд нь Дея уйлжээ. Цуг унтдаг нөхрөө үгүйлж байгаа нь энэ. Гэвч хэдийнээ сэтгэлтэй болоод байгаа Гуинплен, зовж, өөрийнхөөрөө зүтгээд өнгөрөв. Энэ үеэс эхэлж Гуинплен Үүрстэй хамт газар унтдаг болжээ. Зуны дулаан оройд, Гомотой хамт гадаа унтана. Дея арван гурав өнгөрсөн хойноо ч, энэ байдалд хараахан дасаж чадахгүй хэвээрээ л байв. Үдэш унтахынхаа өмнө ихэвчлэн, «Гуинплен миний хажууд ирээч, би унтмаар байна» гэж хэлнэ. Түүний хилэнцгүй нойр Гуинпленийг хажуудаа зайлшгүй байлгах хэрэгтэй ажээ. Өөрийгөө нүцгэн шалдангаар хардаг хүн л нүцгэн бие гэж юу байдгийг мэднэ, ийм болохоор Дея нүцгэн бие гэж юу байдгийг мэддэггүй ажээ. Аркадын¹²⁶ ч юм уу, Отаитийн гэнэн хонгор зан. Зэрлэг Деягийн дотночлох нь Гуинпленийг зожиг болгожээ. Бараг нас бие гүйцсэн хойноо ч Дея орон дээрээ сууж байгаад урт өтгөн гэзгээ самнаж байхдаа, цамц нь мөрнөөс нь унан, залуугийн ид хавыг харуулсан булбарай цээжээ гарган Гуинпленийг дууддаг удаа байдаг байлаа. Гуинплен ув улайж, харц буруулан, гэм зэмгүй нүцгэн биеэс болж, орох байх газраа олж ядан, амандаа бувтнаснаа нүүр эргүүлэн, айж сандарснаасаа болоод гараад явчихна. Харанхуйгаас төрсөн Дафнис¹²⁷ ийнхүү харанхуйд умбасан Хлоягоос зугтах нь энэ.

Эмгэнэлт орчинд цэцэглэн дэлгэрсэн амар жимэр байдал ийм буюу.

Үүрс тэдэнд,

— Өөдгүй новшнууд минь, дурлалцацгаа! гэдэг байлаа.

VI. Халамжлан хүмүүжүүлэгч Үүрс ба асрамжлагч Үүрс

Үүрс бас түрүүчийнхээ хэлсэн дээр,
— Мөдхөн энэ хоёроор нэг тоглоом хийгээдэхье. Гэрлүүлэх
минь гэдэг болжээ.

Үүрс, Гуинпленд хайр сэтгэлийн онолыг өгүүлэн,
— Дурлал аа гэж! Оройн дээд бурхан энэ галыг яаж асаадгийг
мэдэх үү? Эрэгтэй эмэгтэй хоёрыг ойртуулахдаа, хооронд нь
чөтгөрийг хавчуулна. Нэг оч буюу өөрөөр хэлбэл ганцхан харцаар л
энэ бүгд шатчихна шүү дээ гэнэ.

— Харцтай, харцгүй болохоо хүрвэл болно шүү гэж Деяг
бодонгоо Гуинплен хариулна.

Харин Үүрс үүнийг нь татгалзан,
— Мангуу амьтан! Сэтгэл зүрхэнд чинь бие биеэ харахын тул
нүд хэрэгтэй байдаг юм уу? гэдэг байлаа.

Хааяа Үүрс хөөрхөн тоглоом, шоглоом хийчихнэ. Гуинплен ч
заримдаа Деяд хөл алдан, хайр сэтгэлдээ мансуурангаа, баргар
царайлан, гэрч болгохгүй гэсэндээ Үүрсээс дөлдөг байлаа. Нэгэн
удаа Үүрс түүнд,

— Хүүе, бүү зов? Дурласан эр тахиа нуугддаггүй юм гэжээ.

— Тийм ээ, гэвч бүргэд бусдын харцанд өртдөггүй шүү дээ
хэмээн Гуинплен хариулав.

Өөр зарим үед, Үүрс өөрөө өөртөө,

— Венерагийн¹²⁸ их тэрэгний явдалд саад хийх ч хэрсүү
ухаалаг хэрэг. Манай хоёр хоорондоо дэндүү сайн болоод байна даа.
Энэ маань яваандаа тийм ч хүсмээргүй уршиг тарьж болно.
Түймрийг урьдаас гаргахааргүй болгоё байз. Сэтгэлийнх нь омгийг
дарж өгье байз гэж үглэнэ.

Тэгээд Деяг унтаж байх үед Гуинпленд, түүнийг өөр юм хийж
байх үед Деяд хандан иймэрхүү зүйлийг урьдаас сануулан
өгүүлрүүн,

— Дея, чи Гуинпленд тэгтлээ дасах хэрэггүй шүү. Өөр хүнээр
амьдрах гэдэг аюултай. Хувиа бодож, амиа аргалах л аз жаргалын
хамгийн найдвартай үндэс дээ. Эрэгтэй хүн гэдэг маань тун ч
амархан эмэгтэй хүнээс холдчихно шүү. Түүнээс гадна Гуинплен
яваандаа хамраа сөхөхийг хэн байг гэхэв. Ямар их амжилт олж
байна даа! Түүний хэр зэрэг амжилт олж буйг чи зүүдлэх ч үгүй!

— Гуинплен, ийм тэнцвэргүй юм юунд ч хэрэггүй. Нэг талаас
хачин муухай зэрэмдэг, нөгөө талаас гоо сайхны туйл, энэ талаар

бодох л хэрэгтэй дээ. Хүү минь дүрэлзсэн сэтгэлээ барина аа хө. Деяд тэгтлээ татагдах хэрэггүй. Түүний тулд л өөрийгөө төрсөн юм гэж арай үнэнээсээ итгээд байгаа юм биш биз дээ? Гэвч наад сэглэгдсэн муухай нүүр царайгаа, түүний төгс гоо үзэсгэлэнг бодооч. Тэгээд та хоёрын дунд ямар их зай байгааг хар. Манай Деяд юм бүхэн байна!

Хүзүүнийх нь цагааныг, үсийг нь, тэр гүзээлзгэнэ шиг уруулыг нь ээ! Хөлийг нь яана! Гарыг нь ч гэсэн дээ! Булбарайхан бондгор мөр, үзэсгэлэнт царайг нь, хэлэх ч үг алга. Намбалаг сайхнаар алхаж гишгэхэд нь гэрэл цацрах шиг. Тэгээд тэр ухаалаг яриа, уянгалаг хоолойг нь ээ. Энэ бүгдийн хажуугаар тэр чинь эмэгтэй хүн шүү гэдгийг бодоод үз. Тэр чинь сахиулсан тэнгэр байхаар тийм тэнэг хүн биш. Энэ бол жинхэнэ гоо сайхны биелэл мөн. Энэ бүхнийг сайтар бодож үзээд, тайвширч үз.

Иймэрхүү ятгалга нь Дея, Гуинплен хоёрын хайр сэтгэлийг улам бадруулахаас хэтэрсэнгүй. Үүрс амжилт олоогүйдээ гайхан, өөр хүн өөртөө хэлж байгаа юм шиг,

— Хачин юм даа, би гал руу тос цутгаад байгаа мөртөө л унтрааж чадахгүй юм даа гэжээ.

Тэдний сэтгэлийн галыг унтраах ч юм уу, эсвэл ялимгүй ч болов хөргөө гэж бодож байлаа гэж үү? Мэдээжээр үгүй. Хэрэв ингэдэг юм аа гэхэд тэр сэтгэлээр унах байжээ. Сэтгэлийнх нь угт, тэдний хувьд гал болж байсан сайх дурлал, өвгөний хувьд илч болж сэтгэлийг нь тайтгаруулна.

Гэхдээ заримдаа бидний сэтгэлийг татдаг юмыг жаахан зэмлээд өгөх хэрэгтэй шүү дээ. Үүнийгээ хүмүүс хэрсүү ухаан гэж нэрлэдэг.

Гуинплен, Дея хоёрын хувьд Үүрс бараг эцэг нь ч, бас эх нь ч байлаа. Амандаа үглэн, яншиж байж тэднийг өсгөн өндийлгөж, тэжээн тэтгэжээ. Хоёр хүүхдийг үрчилж авсны дараа мухлаг тэрэг улам ч хүндрэн, Үүрс байсхийгээд л Гомотой хамт тэргээ чирэх хэрэгтэй болжээ.

Эхний хэдэн жил ийнхүү өнгөрсний хойно, Гуинпленийг нас бие гүйцэх үед, Үүрс бүрмөсөн хөгширч, одоо өвгөнийг Гуинплен нь чирэх ээлж ирэх нь тэр.

Гуинплений том болж байгааг харсан Үүрс түүний сэглэгдсэн царай зүснээс үндэслэж, ирээдүйг нь урьдаас айлдан,

— Чиний баялгийг бодолцсон байна шүү хэмээн лүндэгнэнэ.

Өвгөн, хоёр хүүхэд, чононоос бүрдсэн сайх нэгэн айл үүгээр түүгээр тэнэн хэсүүчлэнгээ хоорондоо улам улмаар дотно болсоор

байв.

Тэнэмэл амьдрал хүмүүжилд огтхон ч саад болсонгүй. «Тэнэнэ гэдэг чинь өснө гэсэн үг» гэж Үүрс айлдана. Харваас Гуинплен, энэ тэр яармагт үзүүлж байхаар нэгэнт зориулагдсан болохоор, Үүрс түүнийг амьтныг инээлгэн нугарагч болгон хүмүүжүүлэнгээ, байдаг л эрдэм ухаанаа түүнд харамгүйгээр заан сургаж байлаа. Заримдаа Гуинплений аймшигт баг руу халз ширтэнгээ «Эхлэлт нь тийм ч муугүй шүү» гэнэ. Ийм ч учраас энэхүү эхлэлтийг нугарагч, марзганагчийн хүмүүжил, гүн ухаан, амьдрах эрдэнийн элдэв чимэглэлээр дүүргэж байлаа.

Тэр нь Гуинпленд байнга л,

— Гүн ухаантан бол. Ухаантай байна гэдэг юунд ч ажрахгүйг хэлдэг юм. Намайг хар л даа, би хэзээ ч уйлж явсангүй. Ухаантай болохоороо л энэ. Хэрэв би уйлахыг хүсвэл, надад шалтаг олдохгүй юм гэж арай бодоогүй биз дээ? хэмээн давтан давтан ярина.

Зөвхөн чоно нь л чагнаж суудаг, өөрөө өөртэйгөө ярихдаа Үүрс,

— Гуинпленд би бүгдийг сургалаа бүр латин хэл хүртэл заалаа. Деяд болохоор юу ч, тэр бүү хэл хөгжмийг ч зааж чадсангүй гэнэ.

Хоёулыг нь дуулдаг болгожээ. Өөрөө бас жижигхэн лимбэ, Бертран Дюгесклений товчоонд «гуйлгачны хөгжим» гэж тодорхойлсон симфони найрал хөгжмийн хөгжилд түлхэц болсон лир хэмээх чавхдаст хөгжмөөр шавгүй тогложихдог байв. Энэ концерт нь үзэгчдийг даллан дуудна. Үүрс чавхдаст хөгжмөө цугласан олонд харуулаад,

— Үүнийг латинаар *organistrum* гэж нэрлэдэг юм хэмээн тайлбарлана.

Тэр нь Дея, Гуинплен хоёрт дуулах эрдмийг Орфей, Ежид Беншуагийн аргаар заадаг байв. Нэг бус удаа хичээлээ зогсоож,

— Орфей бол, Грекийн дуучин! Беншуа бол Пикардайн дуучин байсан юм! гэж урамтай бахадсан өнгөөр дуу алдана.

Энэхүү нарийн нямбай хүмүүжлийн ёс дэглэм нь хоёр хүүхдийн бие биеэ эрхэмлэн хайрлахад нь нэгээхэн ч түвэг удсангүй. Тэр хоёр, ойрхон суулгасан хоёр зулзаган мод мөчрөөрөө шүргэлцэн орооцолдож том мод болон ургадаг лугаа адилаар зүрхээ нэгтгэн нэгэн хэмээр цохилуулан өсөж томорчээ.

— Хамаа алга, энэ хоёрыг гэрлүүлэх минь гэж Үүрс бувтнана. Тэгснээ,

— Тэр хайр сэтгэл нь намайг бүр залхааж гүйцлээ гэж үглэх нь сонсогдоно.

Өнгөрсөн үе нь, тэр бүү хэл дөнгөж саяхан өнгөрсөн үе гэж Гуинплен, Дея хоёрын хувьд байсангүй. Тэд Үүрсийн хэлж ярьснаар л түүнийхээ тухай мэддэг байв. Тэд Үүрсийг «Аав» гэж дууддаг байлаа.

Гуинпленд балчир үеийнх нь ганц дурсамж байсан нь, түүний өлгийн дээгүүр жирэлзэн өнгөрөх чөтгөр шулмууд шиг юм байлаа. Харанхуйд хэн нэгний аймаар муухай хөл өөрийг нь дэвслээд байсан мэт сэтгэгдэл хоногшин үлджээ. Албаар тэгсэн юм уу эсвэл санамсаргүй тэгээ юү гэдгийг мэдэх арга алга. Бүх болсон явдлыг нэгд нэгэнгүй санаж байгаа юм нь түүнийг далайн эрэгт орхисон тэрхүү эмгэнэлт явдал байв. Гэвч тэр шөнө нялх Деяг олсон нь түүний хувьд аймшигт шөнийг гэрэл гэгээтэй өдөр болгосон лугаа адил хэрэг байв.

Деягийн дуртгал гэвэл Гуинпленийхээс ч илүү бүрхэг, хольж хутгалдсан учир бүх зүйл энэхүү манан дунд умбан алга болжээ. Эхийгээ л нэг хайрсан хүйтэн юм байсныг бүүр түүрхэн санана. Тэр нар гэдэг юмыг харсан юм болов уу гэвэл магадгүй л юм. Тэр нь ардаа орхисон хоосон зайг амьдруулах гэж байдаг хүчээрээ оролдоно. Нар гэж юу вэ? Ямар нэг хурц халуун, одоо Гуинплен орыг нь эзлэх болсон зүйл шиг л бүдэг бадагхан санагдана.

Тэд хоорондоо шивнэж ярина. Хорвоо дээр хамгийн чухал зүйл бол шивэр авир хийх явдал гэдэг нь эргэлзээгүй байх. Дея Гуинплендээ,

— Гэрэл гэгээ бол чиний минь дуу хоолой гэнэ.

Нэгэн удаа Гуинплен шаа торготой ханцуй нь завсраар цухуйх Деягийн гарыг харж байснаа тэсэлгүй уруулаа наажээ. Тийм муухай уруул, ийм цэвэр ариун үнсэлт, Деягийн баярласан гэдэг нь жигтэйхэн. Хацар нь улаа бутраад явчхав. Мангасын үнсэлтээс шөнийн харанхуйд умбасан, гоо сайхан магнай дээр үүрийн туяа татах шиг болжээ. Үүн сацуу айснаасаа болоод Гуинплений амьсгаа нь дээр гарсан ч гэлээ сайх диваажингийн үзэгдлийг, нөмөрсөн алчуур хөдлөхөд дороос нь ил гарсан цасан цагаан хэнхдэгийг нь харахгүй байж чадсангүй.

Дея ханцуйгаа мөрөндөө хүртэл шамлаад, нүцгэн гараа Гуинплен рүү сунгаж,

— Аль вэ, дахиад! гэвэл цаадах нь зугтааж байж нэг юм өнгөрөөв.

Маргааш нь сайх тоглоом дахин үргэлжлэв. Тэгэхдээ үнэндээ хэд хэдэн хувилбартай байсан нь мэдээж. Дурлал хэмээгч амттайхан ангал руу гайхамшигтайгаар гулсан орох нь энэ буюу.

Энэ бол эзэн тэнгэр, хөгшин гүн ухаантан болохынхоо хувьд инээмсэглэн ширтэж байдаг зүйл билээ л.

VII. Хараагүй сохор зөн билгийн хичээлийг заадаг

Заримдаа Гуинплен өөрийгөө зэмлэнэ. Аз жаргалтай байгаа ч цаанаа бол дотроо гэмших шахуу байлаа. Өөрийг нь харж чадахгүй хөөрхий охиныг өөртөө сэтгэлтэй болгоно гэдэг түүнийг хуурч байгаагаас ялгаагүй санагдана. Хэрэв нүд нь гэнэтхэн хараа орвол тэр охин юу гэх байсан бэ? Өөрийг нь тэгтлээ татаж байсан юманд яасан их дургүй нь хүрч, жигших байсан бол? Өөрийн аймшигт соронзонгоос яаж зугтаах байсан бол! Нүүрээ алгаараа яаж дарах байсан бол! Яаж хурдхан шиг зугтаах байсан гээч! Зовлонтой сэжиг түүнийг тамлана. Өөр шиг нь мангас дурлах эрх байхгүй гэж өөртөө хэлнэ. Одонд бишрэгдсэн аварга могой! Гуинплен үнэн байдлыг, сохор одонд нээн хэлэх нь өөрийн үүрэг хэмээн үзжээ.

Нэгэн удаа Деяд тэр бээр,

— Би их муухай амьтан шүү дээ гэхэд нь,

— Чамайг сайн хүн гэдгийг мэднэ ээ, хэмээн хариулжээ.

Гуинплен яриагаа үргэлжлүүлж,

— Бүх хүний инээхийг чи сонсдог шүү дээ. Тэр чинь надыг харснаас л тэр. Учир нь би зэрэмдэг амьтан гэв.

— Би чамд хайртай гэснээ Дея хэсэг чимээгүй болоод, — Намайг үхэж байхад чи дахин амьдруулсан. Чамайг хамт байхад хажууд минь тэнгэр байгааг мэдэрдэг юм. Гараа өгөөч, бурханд гараа хүргэмээр байна! гэв.

Тэр хоёрын гар нэг нь нөгөөгөө хайн тэмтэчсэнээ, чанга атгалцав. Аль нь ч дахин ам ангайсангүй, хайр сэтгэлийнхээ илчинд ханаад дуу гаргалгүй суулаа.

Дүнсгэр Үүрс энэ яриаг сонссон байжээ. Маргааш өглөө гурвуулаа цуг сууж байснаа,

— Ингэхэд Дея ч гэсэн гоё биш шүү дээ гэв.

Энэ үг зорьсондоо хүрсэнгүй. Дея, Гуинплен хоёр хэлснийг нь сонссон ч үгүй. Бие биедээ ууссан сайх хоёр, Үүрсийн мэргэн сургаалын учир начрыг тэр бүр нарийвчлан нягтлах нь үгүй. Үүрсийн мэргэн ухаан ийнхүү талаар өнгөрнө.

Гэвч энэ удаа, Үүрсийн урьдчилан сануулсан «Дея ч бас гоё биш» үгэнд энэхүү номын хүний эмэгтэйчүүдийг зэгсэн мэддэгийг нь гаргасан өнгө байв. Гуинплен үнэнч шударгыг эрхэмлэснээрээ бас болгоомжгүй явдлыг гаргасан нь эргэлзээгүй. Деягаас өөр ямар ч эмэгтэйд, ямар ч хараагүй хүүхэнд «Би их муухай амьтан» гэж хэлэх нь аюултай байж мэдэх байлаа. Хараагүй дээрээ бас сэтгэлтэй

байдаг гэдэг, хоёронтоо сохорсонтой адил буюу. Ийм байдалд, хүсэл мөрөөдөл гэгч оргилон байдаг ажгуу. Бүтэхгүй санаа бол хүсэл мөрөөдлийн амин тэжээл. Хайр дурлалаас хүсэл мөрөөдлийг нь салгачихвал, идэж уухыг нь булаагаад авчихаас юуны ялгаатай билээ. Дурлал үүсэн бий болоход, сэтгэл санааныхтай адилаар, бие сэтгэлийн шагшин гайхах гээд л бүх л төрлийн хөөрөл бахдал хэрэгтэй байдаг. Үүнээс гадна эмэгтэй хүнд ойлгоход бэрх зүйлийг ярих хэрэггүй. Тэр энэ талаар бодолхийлэн мөрөөдөж эхлэн, бодол санаа нь буруу тийшээ эргээд явчих нь цөөнгүй. Таавар оньсого бол мөрөөдлийг эвдэж бусниулаад хаячихдаг. Болгоомжгүй хэлчихсэн үгнээс болж цочирдох нь нэгэнт үүсэн бүрдсэн зүйлд ан гаргах нь ч байдаг. Заримдаа санаандгүй хэлчихсэн үгнээс болоод чухам яагаад гэдгийг бүү мэд зүрх гэгч юм өөрөө ч мэдэлгүй хоосон хөндий оргиод явчихдаг. Сэтгэлтэй хүн, өөрийнх нь аз жаргал нэг л дундуур болоод явчихыг ажиглан мэддэг. Цав гарсан савын зугуухан нэвчихээс аймшигтай юм гэж үгүй.

Аз болж, Дея шал ондоо шавраар хийгдсэн агаад бусад эмэгтэйгээс эрс ялгаатай хүн байлаа. Нэг үгээр хэлэхэд ховорхон биетэй хүн байж. Танхил сулхан биетэй ч, зүрх нь тийм бус ажээ. Түүний хамгийн гол юм нь хайр сэтгэлд цэвэр ариунаар хэлбэрэлтгүйгээр ханддаг нь байлаа.

Гуинплений хэлсэн үгнээс болж бодолд орж байсан нь, нэгэн удаа доорх зүйлийг түүнд хэлснээр төгсжээ.

— Муухай байх гэдэг чинь юу гэсэн үг вэ? Ямар нэг хүнд муу юм хийнэ гэсэн үг. Гуинпен ямагт сайн үйл хийж явдаг болохоор тэр сайхан хүн гэсэн үг.

Дараа нь балчир хүүхдүүд, хараагүй хүмүүст ихэвчлэн байдаг нөгөө л асууж шалгаасан маягаараа үргэлжлүүлэн,

— Харах ий? Та нар хараатай улс энэ үгийг юу гэж нэрлэдэг вэ? Би харахгүй ч гэсэн мэднэ. Минийхээр бол харна гэдэг олон юмыг хааж байдаг шиг санагддаг гэв.

— Чи үүгээрээ юу хэлэх гээд байна? гэж Гуинпленийг асуухад,

— Хараа гэдэг үнэнийг харахад саад болдог юм хэмээн Дея хариулав.

— Тийм биш ээ, гэж Гуинпленийг хэлбэл,

— Тийм юм чинь гэж Дея эсэргүүцээд, — Чи өөрийгөө муухай гэдэг шүү дээ гэв.

Тэгээд түр зуур бодолд орсноо,

— Худалч гэж нэмж хэлэв.

Гуинплен баярлахаас өөр яах вэ. Үнэнээ нэгэнт хэлээд байхад үнэмшсэнгүй. Одоо сэтгэл нь тайвширч, хайр сэтгэл нь ч адилхан түгших юмгүй болжээ.

Ийнхүү тэд яван явсаар, Дея арван зургаа хүрч, Гуинплен хорин тавыг шүргэжээ.

Энэ үед тэд анх уулзсан өдрийнхөөсөө «юугаараа ч ахиж чадсангүй» гэдгийг одоо хэлж болох юм. Тэр бүү хэл ухарчээ. Учир нь Дея дөнгөж арван сартай, Гуинплен арван настай байхдаа тэд хуримынхаа шөнийг өнгөрөөснийг уншигч та санаж буй биз ээ. Тэдний хайрын сэтгэлд нүгэлгүй ариун бага балчир үе нь үргэлжилсээр авай. Ийнхүү заримдаа оройтсон алтан гургалдай шөнийн дуугаа үүр хаяартал донгодох нь байдаг бус уу.

Тэдний энхрийлэл нь гар атгалцахаас хэтэрсэнгүй. Хааяа нэг Деягийн нүцгэн мөрөнд Гуинплен чичгэнэсэн уруулаа наах төдийхөн хангалттай ажээ.

Хорин дөрөв, арван зургаан нас. Ингээд нэгэн өглөө нөгөө «тоглоом хийгээдэхье» гэдгээ мартаагүй явсан Үүрс тэдэнд хандан,

— Энэ хэд хоногоос та хоёр ямар шашин шүтэхээ шилж авах хэрэгтэй болох нь дээ гэв.

— Яах гэж? хэмээн Гуинплен асуулаа.

— Гэрлэх гэж.

— Бид чинь гэрлэчихсэн шүү дээ гэж Дея хариуллаа.

Тэр хоёрын байгаагаас илүүгээр, эхнэр нөхөр байж болох юм гэж Дея зүүдэлсэн ч үгүй.

Чухамдаа гэхэд сайх охины цайлганаар сэтгэл ханасан байдал, байгаагаасаа илүүг харахгүй хоёр сэтгэлийн гэнэн баяр бахдал нь Үүрст харин ч бүр таашаагджээ. Үүрс энэ тухай дурссан нь зөвхөн үглэх хэрэгтэй байсандаа л тэгжээ. Харин эмнэлгийн талыг гадарладаг хүний хувьд Дея бие махбодын хувьд хэтэрхий залуу биш юм аа гэхэд ямар ч байсан дэндүү эмзэг сул гэж боддог байжээ.

Энэ бол хэзээд ч оройтохгүй зүйл юм.

Гэлээ ч тэд аль хэдийнээ гэр бүл болоогүй юм гэж үү дээ? Хэрэв орчлонд эвдэршгүй холбоо гэж байдаг бол тэр нь Гуинплен Дея хоёрын холбоо биш юм гэж үү? Энэхүү гайхамшигт холбоо тэр хоёрыг тэврэлдүүлэхэд хүргэсэн гайт үйлээс л төрөн гарчээ. Тэгээд энэ холбоо нь хангалтгүй гэсэн юм шиг, гай тотгорт нь дурлал гээч юм наалдан тогтож нийлээдэх нь ээ. Цэцгээр сүлжсэн зангилаагаар бөхөлж холбосон төмөр гинжийг таслах хүч гэж хаана байх билээ?

Хэзээ ч хагацахгүй хос гэж энэ л байлгүй яах вэ. Деяд гоо үзэсгэлэн байсан бол, Гуинпленд гэрэл гэгээ, хараа байлаа. Аль аль

нь л инжээ авчирчээ. Тэр хоёр зүгээр нэг эр эм байснаар зогсохгүй, гэнэн хоргүйн ариун хаалтаар л зөвхөн тусгаарлагдсан гайхалтай таарсан хос байлаа. Зөвхөн Деяг л бахдан гайхаж, түүнд зүрх сэтгэлээ зориулан хүсэл мөрөөдлөөрөө амьдарч явъя гэж Гуинпен хэчнээн хичээвч, тэр бээр ямар ч байсан эр хүн билээ. Үйлийн үргүй амьдралын хуулийн нөлөөг арилгах аргагүй. Тэр нь хамгийг бүтээгчийн эрхээр байгальд байдаг бүхний адилаар битүүлэг исэлтэд өртөгдсөн нь мэдээж. Заримдаа үзэгчдийн өмнө гарах үед, энэ нь түүнийг олны дундаас аль нэг эмэгтэй хүн рүү харахад хүргэдэг авч, тэр дорхноо саяын өдсөн харцаа буруулах, сэтгэлдээ гэмшин бушуухан холдохын түүс болно.

Бас түүнийг урамшуулж, хөхүүлдэггүй байсныг нэмж хэлье. Түүний харсан бүх эмэгтэйн царайд зэвүүрхэн, дур гутаж, жигшсэн байдал байгааг ажигладаг байлаа. Деягаас өөр ямар ч эмэгтэй түүнд хүртээмжгүй гэдэг нь ойлгомжтой ажээ. Энэ нь түүний гэмшихэд нэмэр болох ажээ.

VIII. Зөвхөн аз жаргалтай төдийгүй буянаа эдэлсэн энх амьдрал

Үлгэрт ямар их үнэн юм байдаг гэж санана. Нүдэнд үл үзэгдэх чөтгөрт шүргэн хайруулна гэдэг бол муу юм бодогдсоноос болж дотроо гэмшин зовохыг хэлнэм.

Гуинпленд муу юм санаж бодно гэж байдаггүй болохоор хэзээ ч дотроо гэмшин тарчилдаггүй байлаа. Гэвч хааяа нэг өөрөө өөртөө сэтгэл ханамжгүй байдаг байв.

Дотоод сэтгэлийн бүүр түүрхэн догдлол.

Энэ нь чухам юу байв гэвэл юу ч биш байлаа.

Гуинпен, Дея хоёрын аз жаргалд дутаж гутах юм байсангүй. Одоо тэд бүр байчхаад ядуу зүдүү ч гэж хэлүүлэхээргүй болжээ.

1689 оноос 1704 оны хооронд өөрчлөлт гарчээ.

1704 онд хааяа үдшийн бүрий болох үеэр, далайн эрэг хавийн энэ тэр жижиг хотод чийрэг хос морь хөллөсөн бараа сүртэй ачааны бүхээгтэй тэрэг орж явааг харж болох байлаа. Бүхээгтэй тэрэг нь дөрвөн дугуйн дээр дээврийн оронд доод хөндлөвчтэй, тавцангийн оронд шалтай, уруу нь харуулаад тавьчихсан хөлөг онгоцны их биеийг санагдуулна. Дөрвөн дугуй нь ачааны тэрэгнийхтэй хэмжээгээрээ адилхан, ив ижилхэн ажээ. Дугуй, арал, бүхээг нь тэр чигтээ доороосоо эхлээд дээшээ зугуухнаар тодорсон ногоон өнгөөр будсан ажээ. Дугуй нь лонхны бүдэг ногоон өнгөтэй байхад орой нь тод ногоон өнгөтэй ажээ.

Энэхүү ногоон өнгө яваа яваандаа олны анхаарлыг татах болж, яармагт цуу нь түгж, хүн зон «Green box» буюу «Ногоон хайрцаг» хэмээн нэрлэх болжээ.

«Ногоон хайрцгийн» хоёр өнцөгт нь хоёрхон цонхтой. Ард нь буулгадаг гишгүүр шаттай хаалга байна. Дээврээс цухуйх мөн л ногоон өнгөөр будсан яндангаар утаа суунаглана. Энэхүү дугуйтай жижиг байшингийн ханыг байнга шинээр чийдэж, гялалзтал нь угаадаг ажээ.

Тэрэгнийхээ дотор талтай хаалганы оронд хэрэглэдэг цонхоор холбогдсон дэлбэгчийн суудал дээр, морины хондлой дээгүүр, жолоо барьсан өвгөний хоёр талд дагинасын хувцас өмссөн цыган эмэгтэй сууж бүрээ үлээнэ. Хотынхон энэхүү хоёр тийш ихэмсгээр далбилзах хөөрхөн байшинг амаа ангайн ширтэж, ам амандаа түүний тухай яриа болно.

Үүрсийн хуучин мухлаг тэрэг, улам боловсронгуй болгосон бүхээгт тэргэнд байраа тавин жинхэнэ театр болон хувирчээ.

Тэргэн дороо чоно гэхэд чоно биш, нохой гэхэд нохой биш амьтныг гинжилжээ. Энэ бол Гомо байлаа.

Морь тэргийг залж яваа хөгшин дэлбэгч нь манай гүн ухаантан биеэрээ байх нь тэр.

Нөгөө муу мухлаг тэрэг яаж яваад ийм олимпын сүйх тэрэг болон хувирдаг байна аа?

Учир нь Гуинплений алдар цуунд байгаа ажээ.

Үүрс Гуинплэнд,

— Чиний баялгийг бодолцсон байна шүү! гэж хэлэхдээ хүмүүс амжилт хэмээн тооцдог жинхэнэ зөн гэгчийг харуулсан ажээ.

Үүрс Гуинпленийг шавиа болгосныг уншигч нар санаж байгаа байх. Таньж мэдэхгүй хүмүүс царайг нь шинээр бүрэлдүүлэн бий болгосон бол Үүрс ухааныг нь бий болгохыг хичээн, сайх амжилттай урласан багийн цаана аль болох их бодол санааны нөөц багтаахыг чармайжээ. Жаал хүү өсөн өндийж, хүн амьтан инээлгэж болохоор боллоо гэж үзэнгүүтээ, түүнийг тайзан дээр буюу, мухлаг тэрэгний өмнөх модон тавцан дээр гаргадаг болжээ. Гуинплений тайзанд гарч ирсэн нь ер бусын явдал болов. Үзэгчид тэр дорхноо л шагшин шуугьж эхлэх нь тэр. Хэн ч, хэзээ ч ийм элэг хөшмөөр инээдэмтэй амьд багийг харж явсангүй. Хэн ч ийм гайхамшигийг ямар аргаар олж авсныг хэлж чадсангүй. Нэг хэсэг нь энэхүү бусдыг уруу татагч инээдийг төрөлхийн хэмээн, нөгөө хэсэг нь зохиомол хэмээн үзэж байв аа. Ийнхүү чухам үнэн нь тааварт булуулан, замын уулзвар зах зээл гудамж талбай, яармаг, баяр наадмын үед хаана л бол хаана хүн зон Гуинпленийг харах гэж гүйлдэнэ. Ийм «гайхамшигтай тоглолтын» ачаар тэнэмэл жүжигчдийн хоосон түрийвчинд эхлээд лиар¹²⁹ дараа нь су¹³⁰ эцэст нь шиллинг¹³¹ цутган орох болжээ. Нэг газрын үзэгчдийн хорхойг дарсныхаа дараа тэрэг нөгөө газар луу нүүн шилжинэ. Өнхөрч яваа чулуунд бол үүний ашиг тус гэж юу байх билээ, харин дугуйтай жижиг байшингийн хувьд бол нүүдэллэсний ачаар баяжиж байлаа. Ийнхүү он жил урсан өнгөрч, хотоос хот дамжин нүүдэллэх Гуинплен ч нас бие гүйцэнгээ улам ч муухай царайтай болж, эцэст нь Үүрсийн урьдчилан зөгнөсөн баялаг ирэх нь энэ.

— Чамайг гоёсон улс ямар их тус чамд хүргэв дээ, хүү минь! гэж Үүрс дуу алдана.

Сайх «баялаг» нь Гуинплений амжилтыг удирдан зохицуулж байдаг Үүрст насаараа мөрөөдөж явсан, дотроо театр багтчихмаар уужимхан бүхээгт тэрэгтэй болж авах гэсэн хүслийг нь биелүүлж өгчээ. Шинжлэх ухаан, урлагийн буянт үрийг таригч жинхэнэ театр

байлаа. Түүнээс гадна, Үүрс маань Гомо, Гуинплен, Деягаас бүрдсэн жүжигчид дээрээ хос морь, бидний дээр өгүүлсэн дагинасын дүр болон зарцын үүрэг гүйцэтгэдэг болсон хоёр эмэгтэйг нэмж авах бололцоотой болжээ. Тэр үед тэнэмэл жүжигчдэд үлгэр домгийн ший байвал л тун ашигтай байлаа.

— Бид бол нүүдлийн дуган хэмээн Үүрс ярьдаг байв.

Хот суурины эрээвэр хураавар амьтад дотроос гүн ухаантны шилж авсан хоёр цыган нь царай зүс муутай залуухан хүүхнүүд байсан агаад, Үүрс нэгэнд нь Феба, нөгөөд нь Бенера буюу англи дуудлагад нийцүүлэх хэрэгтэй тул Фиби, Винос гэдэг нэр өгчээ.

Феба тогоо барин, хоол унд аялуулж, Венера нь урлагийн дуганыг цэвэрлэн цэгцтэй байлгана.

Түүний дээрээс тоглолттой өдрүүдэд Деяг хувцаслуулдаг байлаа.

Тэнэмэл жүжигчид маань ихэс дээдсийн адил «ард олонд харагдахаасаа» бусад цагт нь Дея хоёр цыган эмэгтэйн адилаар цэцгэн хээтэй өргөн банзал, ханцуйгүй богинохон цамц өмсөнө. Үүрс, Гуинплен хоёр хантааз, савхин өмд болон далайн цэргийн хөлгийн усан цэргүүд шиг өндөр түрийт савхин гутал өмсөнө. Гуинплен ажил хийх үедээ, эсвэл биеийн тамирын дасгал хийхдээ савхин энгэрэвч нэмж өмсөнө. Гуинплен морьдоо арчилна. Үүрс, Гомо хоёр бие биеэ л бөөцийлнө. Дея «Ногоон хайрцагтаа» бүр дасаж, дотуур нь нүдтэй хүн шиг л итгэлтэйгээр нааш цааш хөдөлнө.

Энэхүү нүүдлийн байшингийн дотор талын тавилга, төхөөрөмжийг сонирхох хүн байгаад түүн рүү шагайн харвах аваас Үүрсийн чөлөөнд гаргасан хуучин мухлаг тэрэг, Гомо одоо хөллөгөөнд явж тэрэг чирэхээ байсан шиг замаар дэнслэн донслуулахаа бүрмөсөн болиод цагаа хүлээн нэгэн булангийн хананд бэхлээтэй байгааг харж болох ажээ. Ачааны тэрэгний бүр мухарт, хаалганы баруун талд шахагдсан тэр мухлаг Гуинплен, Үүрс хоёрын унтлагын өрөө, жүжигчдийн хувцсаа сольдог өрөөний үүрэг гүйцэтгэх болжээ. Одоо тэнд хоёр ор байх агаад буланд нь гал тогоо байна.

Хөлөг онгоцны өрөө тавилга хүртэл «Ногоон хайрцгийн» дотор тал шиг байгаа бололцоондоо тохируулан сайтар тунгаан сул зайг ашиглан байрлуулсан байдаггүй билээ. Бүх зүйлийг урьдаас ян тан төлөвлөн бодож, байрыг нь олон эмхлүүлжээ.

Нимгэн ханатай бүхээгт тэрэг хоорондоо хаалганы оронд нимгэн бөс унжуулсан онгорхойгоор орж гардаг гурван хэсэгтэй

ажээ. Арын хэсэгт нь эрэгтэйчүүд, эхний хэсэгт нь эмэгтэйчүүд суух агаад тэдгээрийг заагласан дундах хэсэг нь театр болдог ажээ. Хөгжмийн зэмсэг болон жүжгийн бусад хэрэгслийг гал тогоондоо хадгална. Таазанд тулгах шахуу хийсэн индэр дээр тайзны чимэглэл байна. Энэ индэр дээрх шатыг сөхөхөд л, ид шидийн гэрэлтүүлэгт зориулсан дэнлүүнүүдийг харж болно. Энэхүү гэрэлтүүлгийн ид шидийн хэрэглүүрийг Үүрс зориг бадрангуйгаар тохируулан хэрэглэдэг ажээ. Тэр өөрөө жүжгээ зохионо.

Авьяасыг нь тоочъё гэвэл барахгүйн дээр есөн жорын ид шидийг үзүүлж чадна. Түүнээс гадна янз бүрийн дуу авиаг дуурайн дуугарч, санаанд оромгүй зүйлийг үзүүлж, гэрэл сүүдрийн хугарлаар, үзэгчдийн хүссэн үсэг тоог элдэв дүрсийг гэнэт гэрэлтүүлэн гаргаж бүрэнхийн дунд алга болгон, бас бус хачин жигтэй зүйлүүдээр үзэгчдийг амыг нь ангайтал гайхуулах мөртөө, өөрөө тэдний гайхан бахархаж байгааг тоох ч үгүй, даяанд сууж буй хүн лүгээ адилаар алмайран бодол болох шиг санагдана.

Нэг удаа Гуинплен түүнд,

— Аав аа, та илбэч шиг юм аа гэвэл, Үүрс хариуд нь,

— Яаж мэдэх вэ, үнэндээ би илбэч ч байж болох юм шүү дээ гэж хариулжээ.

Үүрсийн уран дүйгээр боссон «Ногоон хайрцагт» аргыг нь олж сийлсэн хэрэгсэлтэй байсны нэг нь, урд хойд дугуйн хоорондох зүүн хананы дунд хэсэг нь нугастай агаад хүссэн цагтаа гинж арааны тусламжаар өргөдөг гүүрэрхүү буулгаж болдог ажээ. Тэгэхдээ ханыг шалтай эгцрэх үед углуурга дээрх гурван тулгуур нь, ширээний хөл шиг газарт эгцээрээ тулж, театрын тайз болон хувирах сайх ханыг тогтоон барих ажээ. Үзэгчдийн өмнө ийнхүү буулгасан хана нь тайз бүхий жинхэнэ театр болох нь энэ. Хажуугаар санаандгүй өнгөрөхдөө нүүрээ буруулах пуритан шашин номлогчдын үгээр бол ийм тайз нь тамын хаалгатай хаанаас нь харсан ч адилхан ажээ. Яг иймэрхүү юм зохион бүтээсэн болохоор нь л Соломон хаан Фесписийг торлогдон шийтгэсэн байж таарна.

Гэхдээ Фесписийн бүтээсэн нь санасныг бодвол урт настай байсан юм. Бүхээгт тэргэн театр одоо ч гэсэн байдаг. Яг л ийм нүүдлийн тайзан дээр арван зургаа, арван долоодугаар зуунд Англид, Амнер болон Пелкингтоны бүжгэн жүжиг, дуурийг, Францад Жильбер Колений малчдын сэдэвт жүжгийг, Фландрид яармагийн үеэр, хуурамч пап гэж хочлогдсон Климентийн давхар найрал дууг, Германд Тейлийн «Адам Еваг», Италид Анилучча, Кафоссиын венецийн инээдэмт гарааг, Венузын хан хүү Жезуалдын

ойн жүжгийг Лаур Гидоччоных «хошигнолыг» одон орны судлалын эцэг Венченцо Галилейн Филений цухалдал, «Уголины үхлийг» тоглож байсан агаад тэр байтугай Галилей өөрөө виоле да гамба хэмээх хуураар тоглонгоо, дуугаа дуулж байсан юм. 1580 оноос эхэлсэн Италийн алдарт дуурийн анхны оролдлогууд чөлөөтэй задгай шүлгээр, бааздуухан малчны хошигнолыг түрж байлаа.

Үүрс, Гуинплен хоёрыг бүх хогшил хөрөнгөтэй нь, дэлбэгчийн суудлаас алдрын мэдээч лүгээ адилаар бүрээ татах Фиби Винос хоёртой тээж яваа, итгэл найдварын өнгөтэй бүхээгт тэрэг, сайх утга зохиолын тэнэмэл агуу гэр бүлийн нэгэн хэсэг нь болжээ. Конгрио Гуинпленийг түлхэхгүй байсан шиг, Феспис Үүрсийг цаашаа гэхгүй байсан биз ээ.

Аль нэг тосгон ч юм уу хотын талбайд ирэнгүүтээ Үүрс, хоёр бүсгүйн бүрээ татахын завсар хоорондуур тэдний хөгжмийг, сурган заасан маягаар тайлбарлаж гарна.

— Энэ бол грегорианы¹³² найрал хөгжим! гэж өндөр дуугаар зарлаад, — Хүмүүс ээ, түүхэнд том ололт болсон энэхүү грегорианы жаягт ая нь Италид амброзианы¹³³ жаягтай, Испанид мозарабын¹³⁴ жаягтай халз үзэлцэн, тэднийг арай ядан дийлсэн билээ гэж урсгана.

Дараа нь «Ногоон хайрцаг» Үүрсийн үзэмжээр хаа нэгтээ зогсож аваад үдэш нь тайз болох ханаа буулган, театраа нээж, жүжгээ эхлэх ажээ.

«Ногоон хайрцгийн» засал чимэглэл нь уран зурагт дөргүй Үүрсийн зурсан байгалийн зураг агаад хэрэг гарсан үед тэр нь агуй болох ч үе бий.

Хөшгийг нь хурц өнгөтэй дөрвөлжин дөрвөлжин торгоны өөдсөөр зүйж оёжээ.

Үзэгчид тайзны өмнө гудамж, талбайд наранд шаруулан, бороонд норсон ч хамаагүй дугуйран зогсоно. Тэр үеийн театрын хувьд бороо шороо одоогийн театрынхыг бодвол илүү уршиг тарьж байв. Заримдаа эвийг нь олж, буурчийн газрын хашаанд үзвэрээ үзүүлэх агаад энэ үед байшингийн давхрын тоогоор үелсэн лоожтой болно. Ийм маягаар битүү байранд байгаа театраас ялгаагүй болж, үзэгчид ахиухан төлөх хэрэгтэй болно.

Үүрс, жүжгийг зохиох, түүнийг тоглох хөгжимдөх гээд л түүний оролцохгүй юм алга. Винос модон янчрынхаа даралтыг хулсан цохиураар чадварлагаар дэлдэн, Фиби гитарын нэгэн төрөл болох хөгжмийнхөө утсыг намбаатайяа чимхлэн татна. Чоно ч хувиа тавихгүй ажил хэрэгт оролцоно. Тэр нь жүжигчдийн бүрэлдүүнд хэдийнээ орчхоод, зүгээр ч үгүй бэсрэгхэн дүрд чамбайхан

тоглочихно. Үүрс, Гомо хоёр Үүрс нь бие барьсан баавгайнхаа арьсыг нөмөрчхөөд, Гомо нь өөрт нь яв цав таарсан чононыхоо арьстай тайзан дээр зэрэгцэн гарч ирэх үест үзэгчид энэ хоёрын чухам аль нь жинхэнэ араатан болохыг таньж ядахад нь Үүрсийн нар нь гарч бахаа хангана.

IX. Уран сайхныг ойлгодоггүй хүмүүс яруу найраг хэмээн нэрлэдэг ойворгон зан

Үүрсийн бичдэг жүжиг нь одоо үеэс жаахан хоцрогдсон утга зохиолын нэгэн төрөл болох интерлюди¹³⁵ байлаа. Бидний үеийг хүрч ирж амжаагүй нэг жүжгийг нь «ursus vursus¹³⁶» гэдэг байв.

Гол дүрийг зохиогч өөрөө тоглож байсан бололтой. Тайзны араар орох шиг болсноо л хүн сүрдэм баавгай ухасхийн гарч ирнэ. Энэ гарааны даруухан бөгөөд магтууштай санаа нь үүнд л байжээ.

Үүрсийн интерлюдийн нэр нь заримдаа энэ мэтчилэн латинаар байх агаад доторх шүлэг, хэллэг нь испаниар байх нь цөөнгүй. Шүлэг нь тэр үеийн кастилын ихэнх арван дөрвөн мөрт шиг сүүл холбосон байдаг байлаа. Энэ нь үзэгчдийг эвгүйцүүлдэггүй. Тэр үед испани хэл зэгсэн түгээмэл хэл болж, английн усан цэргүүд, ромын цэргүүд карфагены хэлээр ярьж байснаас дутахгүйгээр кастил аялгуугаар чөлөөтэй урсгадаг байлаа. Пловтыг¹³⁷ уншаад үз. Ер нь ч тэгээд, театрт сүмийн мөргөлийн үе шиг латин юм уу өөр ямар нэгэн сонсогчдод ойлгомжгүй гадаад хэл хэрэглэх нь хэнбугайд ч түвэг уддаггүй байлаа. Мэддэг ганц хоёр үгээ хөгжилтэйгөөр хэлж даган баясацгаана. Энэ нь ялангуяа манай хөгшин галлийн Францыг, сүсэг бишрэлийн жаягийг мөрдөхөд нь тус болсныг тэмдэглүүштэй.

Сүмд, мөргөлчид маань «Immolatus» гэхэд нь «Өргөлийн хургыг», «Sanctus» гэхэд нь «Хонгор минь, намайг үнсээч»-ийг дуулдаг байлаа. Ийнхүү зоргоороо байдлыг эцэс болгохын тул Триентийн сүмийн тусгай тогтоол гаргасан хэрэг.

Үүрс, Гуинпленд зориулж жичид нь жүжиг зохиосондоо их додигор байв. Энэ нь түүний бүтээлийн оргил нь байлаа. Бүхий л санаа сэтгэлээ тэр чигээр нь зориулжээ. Байгаа бүхнээ бүтээлдээ шингээнэ гэдэг бүтээлч хүний том ялалт байдаг бус уу. Хорвоод мэлхийг бий болгодог мэлхий шилдэг бүтээлийг туурвидаг. Та тээнэгэлзээд байна уу? Өөрөө оролдоод үз л дээ.

Үүрс бүтээлээ тал талаас нь сайтар хянан төгс болгожээ. Түүний энэ бүтээлийг «Гэсгээгдсэн нажид» гэж нэрлэнэ. Үйл явдал нь гэвэл:

Шөнийн цаг. Хөшиг нээгдэхэд «Ногоон хайрцгийн» өмнө цугласан хүн зоны нүдэнд харанхуйгаас өөр юу ч харагдахгүй. Түнэр харанхуйн дунд дөнгөн данган ялгагдах чоно, баавгай, хүн гурвын дүрс хөдөлж буй нь мэдэгдэнэ. Чоно нь чоно, баавгай нь Үүрс, хүн нь Гуинплен байлаа. Чоно, баавгай хоёр байгалийн

догшин хүчийг, ухамсаргүй тэмүүллийг, зэрлэг бүдүүлэг байдлыг төсөөлжээ. Хоёулаа Гуинплен рүү дайрна. Энэ бол хүнтэй тэмцэн буй нажид байлаа. Харанхуйд алийг нь ч сайтар ялгахын аргагүй. Цагаан өмсгөлтэй Гуинплен хориглон тулалдаж өтгөн үс нь нүүрийг нь халхлан буужээ. Тэгээд ч эргэн тойрон нь хав харанхуй. Баавгай хүрхрэн, чоно шүдээ хавиран гийнаж, хүн орь дуу тавина. Хүн, хүчинд автан хоёр араатны доор орно. Тэр бээр туслахыг гуйн, дэмжлэг эрж, хязгааргүйд хандан зүрх эмтэрмээр уйлагнана. Амьсгаа нь тасрах гэж байгаа бололтой цээж нь хэржигнэнэ. Үзэгчид, зэрлэг амьтнаасаа ялгарах юмаар маруухан хүй нэгдлийн үеийн хүний амь тавин тарчилж буйг харж байгаа нь энэ. Нуруу хүйт оргим, ёрын муухай санагдаж, амьсгаагаа хураан ширтэнэ. Дараахан нь, араатнууд ялан дийлж, хүн нь залгигдахад бэлэн болжээ. Тэмцэл, орилоон хүнгэнээн болж байснаа гэнэт таг чимээгүй, нам гүм болжээ. Харанхуйд дуулах сонсогдоно. Амьсгаа авахтай болж, уяхан хоолойгоор дуулах дуун чих дэлсэнэ. Битүүлэг хөгжим ч сайх үл үзэгдэгчийн дууг даган хангинаад, гэнэт хаанаас яаж гарч ирснийг бүү мэд, цагаан дүрс тодрон гарна. Энэ дүрс нь гэрэл, тэр гэрэл нь эмэгтэй хүн, тэр эмэгтэй хүн нь оюун ухаан байлаа. Амгалан тайван, цэвэр цэмцгэр, гоо үзэсгэлэнтэй номхон даруугийн бэлэг тэмдэг болсон Дея гэрэл гэгээ цацруулан гарч ирэх нь энэ буюу. Үүрийн туяан дундаас тодрох, туяарсан гэрлийн бараа, нөгөө дуу түүнийх ажээ. Цаанаа л нэг сэтгэл хөдлөм, эвлэгхэн донжтой хоолой. Харагдахгүй байсан юм нүдэнд үзэгдэх болж, үүрийн гэгээ угтан дуугаа өргөнө. Сахиулсан тэнгэр ч юм уу алтан гургалдайн дуу сонсогдож байна гэлтэй. Сайх үзэгдэлд нүд нь гялбасан нөгөө хүн ухасхийн өндийгөөд, араатнуудыг нударгалан хөсөр унагана.

Үзэгчид учрыг нь оломгүй аргаар тайзан дээгүүр аажуухан хөвөх мэт хөдлөн, үүгээрээ тэднийг мэл гайхуулсан үзэгдэл нь Английн усан цэргүүд л лав өөгүй ярьж байна гэж бодогдохоор испани хэлээр дараах шүлгийг намуухнаар дуулна:

Ora! Hora!
De palabra
Nace rason
Da luze el son¹³⁸

Дараа нь Дея, доороо нүхэн харанхуйг яг харж байгаа юм шиг хараагаа доошлуулаад,

Noche quita te de alli
El alba canta hallali¹³⁹

Түүнийг дуулах тутам нөгөө хүн аажуухнаар өндийн эгцэрч, аянгад дайруулсан мэт хөсөр хэвтэх хоёр араатныг өвдөглөн хоёр гараа үзэгдлийн зүг сунгана. Үзэгдэл түүн рүү эргэн дуугаа үргэлжлүүлж,

Es menestir a cielos ir
Y tu que llorabas reir¹⁴⁰

гэснээ, тэнгэрийн эрхсийн сүр жавхланг үзүүлж улам ойртож,

Gebra barson!
Dexa monstro
A tu negro
Capara son¹⁴¹

гээд духан дээр нь гараа тавина.

Тэгтэл, харанхуйн дундаас түрүүчийнхээс илүү цангинасан хүчтэй, сэтгэл хөдлөм бөгөөд баярласнаасаа чичгэнэн зүрх алдан биширсэн дуу цуурайлна. Энэ бол одод эрхсийн дууны хариуд өргөн барьж буй хүний дуу ажээ. Дийлдэн унасан чоно, баавгай хоёрыг харанхуйд дарж өвдөглөсөн хэвээр, тэргүүн дээр нь Деягийн мутар тавиастан чигээр Гуинплений дуулах нь:

O ven! ama!
Eres alma
Soy caroson¹⁴²

Гэнэт, харанхуйг нэвт зүссэн хурц гэрэл шууд Гуинплений нүүрэн дээр тусна.

Харанхуйн дундаас мангасын баг гараад ирнэ.

Үүнийг хараад үзэгчдийн сэтгэл яаж хөдөлдгийг үгээр хэлэхийн аргагүй. Инээх гэгчийн нар нь гарав уу гэлтэй юм болно. Инээдэм санамсаргүй гэнэтийн юмнаас гардаг, тэгвэл энэ тайллаас илүү гэнэтийн санамсаргүй юм гэж байж болох уу даа? Инээдэмтэй мөртөө айдас хүрэм баганад туссан гэрлийн ойлгоос үүссэн үзэгчдийн сэтгэгдлийг юутай ч харьцуулахын аргагүй. Эргэн тойрон, ойр хавь тэр чигээрээ, дээр ч, доор ч, өмнө ч, хойно ч эр эмгүй халзан толгойтой хөгшин улаа бутарсан хүүхэд, цайлган

цагаан, уур уцаартай, хөгжилтэй сэргэлэн, урвагар улцан цөм хөхрөлдөн, тэр байтугай юу ч хараагүй гудамжаар явж байсан хүн хүртэл энэхүү учир зүггүй хөхрөлдөөнийг сонсоод инээхгүй байж чаддаггүйг хэлэх юун. Хүн зоны ийм учир тоймгүй инээд наадам нь байдгаараа алга ташиж, хөл дэвслэн орилолдохоор төгсөнө. Хөшиг хаагдахад, Гуинпленийг орь дуу тавин дуудацгаана. Түүний амжилтад хязгаар байхгүй «Гэсгээгдсэн наждыг та үзсэн үү?» гэдэг үг хүн бүрийн амнаас салахгүй. Бүгд л түүнийг харах гэж гүйлдэнэ.

Бодож санах юмгүй амарлингуй хүмүүс ч, ганьхарч гуньсан хүмүүс ч, санаа гэж чинжүү болсон амьтад ч инээх гэж ирцгээнэ. Барьж боломгүй инээдийг заримдаа өвчин ч юм уу гэж санамаар. Гэвч орчлонд хүний айдаггүй тахал гэж байдаг л юм бол, энэ нь инээж баясах гэдэг халдварт өвчин мөн байх. Гуинплен зөвхөн ядуусын дунд л нэртэй болжээ. Хүн зон гэдэг маань жижиг хүмүүсээс л бүрдэнэ шүү дээ. «Гэсгээгдсэн наждыг» ганцхан пеннигээр үзэж болно. Томчуул бол орохдоо сохор зоос төлдөг газраар тоож явахгүй.

Удаан хугацаанд, тархиа гашилтал бодож байж гаргасан бүтээлээ Үүрс хайхрах нь мэдээж.

— Энэ маань Шекспир гэгчийн л маягаар бичсэн юм шүү дээ гэж «Гэсгээгдсэн наждыг» зохиогч маань даруухнаар өгүүлнэ.

Дея, Гуинплен хоёрын эрс ялгаа нь үзэгчдэд Гуинплений үзүүлэх сэтгэгдлийг улам ч хүчтэй болгоно. Эрэмдгийн хажууд гарч ирэх цагаан үзэгдэл нь хүмүүст, бурхан тэнгэр заларч байна уу гэлтэй гайхаш төрүүлнэ. Хүмүүс Деяг битүүхэндээ түгшсэн маягтай гөлрөн ширтэнэ. Түүнд дээд тэнгэрийн ямар нэг юм байгаа юм шиг, хүнд байдаг муу муухайг мэдэхгүй ариун онгон боловч бурхныг танин мэдсэн нь нүдэнд илт тусна. Хараагүй гэдэг нь харваас илт авч, түүний хажуугаар бүгдийг харж байдаг нь өөрийн эрхгүй мэдэгдэнэ. Тэр ид шидэт ертөнцийн босгон дээр зогсож байна уу гэлтэй, орчлонгийн гэрлээс өөр гэрлээр гийгүүлэгдсэн юм шиг санагдана. Тэр нь огторгуйн эрхсээс нүгэлт хорвоод, тэнгэр яаж ажиллаж хөдөлдөг шигээр туяа цацруулан ажиллахаар буун иржээ. Тэгээд сэжиг хүрэм муухай амьтныг олж, түүнд сэтгэл гэдгийг амилуулан өгчээ. Тэр нь бүтээн бий болгохын их хүчийг үзүүлж, тэр бүтээлдээ сэтгэл ханан баясахын зэрэгцээ хар буун хирдхийх аж. Үзэсгэлэнт царайд нь сайн үйлийг хийе гэсэн эргэлт буцалтгүй эрмэлзэл, бүтээсэн үйлийнхээ үр дүнг гайхсан алмайрал харагдах шиг болно. Өөрийн зэрэмдэгт хайртай нь илт ажээ. Цаадхаа зэрэмдэг амьтан гэдгийг мэдсэн болов уу? Түүнд хүрсэн болохоор

мэдсэн байж таарна. Түүнийг түлхэж хажиглаагүйг нь харахад мэдээгүй байж таарна. Эрс тэс, гэрэл харанхуй хоёрын зохицол нь үзэгчдийн тархинд эцэс төгсгөлгүйд умбасан бүрэнхийг бий болгоно. Ариун нандин юм, бүдүүлэг дорд юмтай яаж нийлдэг юм бэ, оюун санаа материд ямар янзаар нэвтрэн ордог юм бэ? Яахаараа нарны гэрэл нэг ёсны хүн болдог байна аа, эрэмдэг амьтан яаж хувиран өөрчлөгдөж, хэлбэр дүрсгүй юм диваажингийнх шиг төгс төгөлдөр болчихдог байна аа? гэдэг бүдэг бадаг харван орж ирэх эдгээр бүх нууц, Гуинпленийг хараад учир зүггүй инээж хөхрөхийг улам ч нэмэгдүүлэн сэтгэлийг хөөргөнө. Үзэгч гэдэг маань юмыг гүнзгийрүүлэн бодож өөрийгөө ядраахыг хүсдэггүй учир, зохиолчийн цаад санааг ухаж авья гэж тархиа зовоохгүй байлаа ч гэсэн, тайзан дээр харсныхаа хэрээр бага ч атугай зүйлийг ойлгоно. Сайх ер бусын жигтэй жүжиг, хүний дахин хувирахын нууцын хөшгийг ялимгүй сөхжээ!

Деягийн хувьд, сэтгэл хөдлөлийг нь хүний хэлээр илэрхийлэхийн аргагүй. Цугласан олон хүн гэдэг юу байдгийг мэдэхгүй мөртөө, хүн зоноор хүрээлүүлсэн байна гэдгээ мэдэрнэ. Баахан орилоон шуугиан сонсохоос өөр юм байхгүй. Түүний хувьд бөөгнөрсөн хүмүүс гэдэг сэвэлзэн үлээх лүгээ адил санагдана, угтаа ч яг л ийм юм шүү дээ. Нэг үе нөгөө үеэр солигдоно гэдэг ч хүртэл өнө мөнхийн амьсгал юм. Хүн амьсгаа авна, гадагш гаргана, тэгээд амьсгаа хураана. Хүмүүсийн дунд Дея ганцаардсанаа мэдэрч, хөл доор нь ёроолгүй ангал харлан ангайх мэт дагжталаа чичирнэ. Гэвч ёроолгүй ангал руу нисчих гээд сэтгэл нь байдгаараа хөдөлсөн ямар ч гэмгүй амьтан, үл мэдэх юмыг хараан тачаадахад бэлэн байдаг тэр үед, Дея самбаа алдан самгардалгүй ганцаардаж буйгаа дотроо мэдрэвч тулсан аюул, бүүр түүр түгшүүрийг сэтгэлийн хүчээр даван туулж, гэнэт итгэл нь сэргэн урамшиж, таг харанхуй орчлонгийн дундах авралын сэжмээс шүүрэн авч, Гуинплений хүчирхэг тэргүүн дээр гараа тавина. Үгээр илэрхийлэхийн аргагүй баяр бахдал! Өтгөн буржгар үсэн дундуур ягаахан хуруунууд нь шурган орно. Ноос үсэнд хүрэхэд, ямар нэгэн сэрлийг ямагт төрүүлдэг билээ. Дея хонины ноосыг илбэн байвч түүнийгээ арслан гэдгийг мэддэг байлаа. Зүрх сэтгэл нь тайлбарлахын аргагүй хайраар бялхана. Айх аюулгүй болсноо мэдрэн, өөрийн аврагчийг олох нь тэр. Үзэгчид бол шал ондоогоор, Гуинплен аврагдаж, тусламжийн гараа сунгасан хүн нь Дея боллоо гэж бодно. Деягийн сэтгэл доторхыг нэгд нэгэнгүй ойлгосон Үүрс «Сүйд болох юм алга!» гэж бодно. Санаа нь амран тайвширч, баяр хөөр болсон Дея сахиулсан тэнгэрээ хайрлан

өхөөрдөж байхад, цугласан хүн зон мангасыг л ширтэн, мөн л сэтгэл булаагдах боловч, шал өөр байдлаар элгээ хөштөл инээлдэн угтана.

Жинхэнэ хайр сэтгэлд ханаж цатгалдана гэж байдаггүй. Байдаг бүхнээрээ оюун ухааных болж, хөрнө гэдгийг үзэхээ болино.

Шатсан мөчир үнс болдог ч, огторгуйн од хэзээ ч тэгэхгүй. Деягийн хувьд үдэш бүр, сэтгэл догдлон дур булаагдаж, цугласан олныг хөштөл хөхрөлдөж байхад энхрийллээсээ болоод уйлахад ч бэлэн байдаг ажгуу. Түүний тойрон, инээд, хөгжөөн нүргэлэн, өөрөө ч энэхэн үес аз жаргалаар дүүрэн байдаг авай.

Гэнэт гарч ирэх Гуинплений аймаар дүрээс болоод ийнхүү учир дүрсгүй инээж хөхрөх юм гэж Үүрсийн санаанд огтхон ч ороогүй явжээ. Тэр нь энэхүү хөхрөлдөөний оронд инээмсэглээд өнгөрөхийг л илүүд үзэх байсан агаад, үзэгчдээс арай учиртайхан шиг хандахыг л хүлээж байсан хэрэг. Гэвч ялалт бол хэзээд санаа амрааж байдаг зүйл гэдгийг хэлэх юун. Тэгээд Үүрс маань орой бүр, орлогоо тоолон, фартинг нь нийлээд хэдэн шиллинг болж байгааг тооцоолонгоо жүжгийнхээ ялимгүй хачирхалтай амжилтад дасаж эвлэрсээр байлаа. Түүнээс гадна, тэр бүх инээд наадам намжсаны дараа «Гэсгээгдсэн нажид» үзэгчдийн санаанд таарч байгаа бөгөөд, тэдэнд нэгийг бодогдуулан, сэтгэлд үлдэх нь гарцаагүй гэж өөртөө хэлдэг байв. Тэр ерөөсөө буруу бодоогүй ч байж болох юм. Урлагийн аливаа нэгэн бүтээл хүмүүсийн ухамсарт мөрөө үлдээдэг жамтай. Үнэндээ ч энэхүү чоно, баавгай, хүний үйл хөдлөл болон хөгжмийн ая, нийлэмж зохицолд номхорч буй зэрлэг орилолдоон, үүрийн гэгээнд сүлэгдэн байх харанхуй, гэрлийг цацруулан гаргаж буй дуу зэргийг анхааралтай ажиглаж байгаа жирийн хүдэх хүн зон сайх «Гэсгээгдсэн нажид» шүлэглэсэн жүжигт хүний баяр бахдалаар хорон санаат хүчийг дийлэн байгаа гэрэлт эхлэлтийн энэхүү ялалтад тодорхой бус авч, гүн талархалтайгаар, тэр ч байтугай нэлээд хүндэтгэлтэйгээр ханддаг байлаа.

Хүдэх хүн ардын бүдүүлэг бааздуухан зугаа цэнгэл ийм байсан ажээ.

Тэд илүү дутуу харах ч юм байхгүй, үүндээ бүрэн сэтгэл ханана. Жирийн ардууд, өндөр дээдсийн зугаа болгодог, «ариун шударга тэмцээнийг» үзэх боломж ч байсангүй, өндөр сурвалжтануудтай адил Филем-ге-Медоны эсрэг Хелмсгейлд мянган алтан зоос тавих чадал ч байсангүй.

Х. Амьдралын гадна хаягдагчаас үзэгдэл юмс, хүмүүсийг үзэх нь

Хүн гэгч амьтан өөрт нь үзүүлсэн баяслын төлөө явал хорлонтой юм хийе дээ гэж ямагт цаанаа бодож явдаг. Үүнээс л жүжигчнийг үзэн ядаж, зэвүүцэх гэгч гарч ирнэ.

Энэ хүн миний сэтгэлийг татан зугацуулж, уйтгар гарган хөгжөөж тайвшруулан, дур булааж, ёс суртахуунаар өргөж, хэрэгтэй, ашигтай байх юм. Би хариуд нь ямар муу юм хийе дээ? Доромжлох уу. Үзэн ядаж жигшинэ гэдэг бол холоос алгадна гэсэн үг. Түүнийг алгадаад байдаг хэрэг. Тэр надад таалагдсан болохоор, өөдгүй амьтан байж таарна. Тэр надад үйлчилж байна, үүнийх нь төлөө би үзэн ядна. Түүн рүү нүүлгэх чулуу хаана байна? Санваартан, чулуугаа нааш нь өгөөдөх! Гүн ухаантан, өөрийнхийгөө, аль вэ нааш нь өг! Боссюэ ч сүмээс түүнийг хөөгөөдөх! Руссо ч түүнийг харааж муучлаадах! Уран илтгэгч минь, аман доторх хайргаараа түүнийг булаадах!¹⁴³ Баавгай минь, түүн рүү бул чулуу нүүлгээдэх! Модыг чулуугаар нүдэн унагаж, жимсийг нь сэгсчин салгаж, үмхлэн идэцгээе. Зүйтэй! Зайлаг! Яруу найрагчийн шүлгийг уншина гэдэг тахал тусахаас ялгаагүй. Энэ муу марзганагч чамайг! Амжилтын чинь шан болгож хүзүүнд чинь төмөр дөнгө углан, гутамшгийн баганад хүлэх минь. Ялалтыг нь гутамшиг болгоцгооё. Амьтан хүн цуглуулан шавуулж, өөрийгөө улам ганцаардуулдаг. Ийнхүү дээд анги гэгддэг баян ангиас жүжигчнийг нийгмээс салгадаг аргыг бүтээн бий болгосон нь нөгөө алга ташилт юм шүү дээ.

Энгийн хүдэх ардууд арай ийм хатуу сэтгэлгүй. Тэд Гуинпленийг огтхон ч гадуурхан зэвүүрхсэнгүй. Огтхон ч үзэн ядсангүй. Гэвч Английн хамгийн сүүлчийн боомтод байгаа хамгийн сүүлчийн хөлгийн хамгийн сүүлчийн бүрэлдэхүүнд байгаа, нүх чигжигчийн хамгийн адаг нь хүртэл энэхүү «новшийн» зугаацуулагчаас өөрийгөө хамаагүй дээрд үзэх агаад, лорд хүн нүх чигжигчээс ямаршуухан дээгүүр байдаг лугаа адилаар, нүх чигжигч нүүдлийн жүжигчнээс дээгүүр байх ёстой гэж бодно.

Ийнхүү Гуинпен бусад алиалагч, жүжигчдийн адилаар алга ташуулан байвч, аргагүй л гав ганцаардан байх ажээ. Ер нь хорвоод аливаа нэгэн амжилт бол ялт хэрэг бөгөөд түүнийгээ цагаатгах хэрэгтэй болдгийг хэлэх юун. Ямар ч сайн юмны хажуугаар, саар юм байдаг жамтай.

Гуинплений хувьд тэр саар нь байхгүйтэй адил, учир нь амжилтынх нь сайн, саар хоёр тал хоёулаа л санаанд нь таарна. Алга ташихад ч, ганцаардахад ч, аль алинд нь сэтгэл ханана. Алга ташилт түүнд баялгийг бий болгож, ганцаардах нь түүнд жаргалыг авчирна.

Нийгмийн доод давхаргад баян байна гэдэг таягаа тулчхалгүйхэн шиг явахыг хэлнэ. Нөхөөсгүй хувцастай, гэдэс цатгалан, голомтдоо утаа гаргачих түлштэй байна, өлсөхөөрөө идэх юмтай, цангахаараа уух юмтай байна гэсэн үг. Хэрэгтэй бүх юм нь гарын дор, тэр бүү хэл гуйлгачинд гар цайлгачих ганц хоёр зоостой байна гэсэн үг. Зарим нэг эрх чөлөөг олгосон, ийм чинээлэгдүүхэн амьдралыг Гуинплен олж авчээ.

Гэхдээ сэтгэлээр хэмжээгүй баян байсан нь хайр сэтгэл байлаа. Өөр юуг хүсэмжлэх билээ?

Илүү хүсэх юм юу ч байсангүй.

Эрэмдгээс нь ангижруулья гэдэг л түүнд тавьж болох цор ганц санал байж болох юм. Гэвч тэр үүнийг яаж дургүйцэн хэрэгсэхгүй байх байсан гээч! Багаа хуу татан хөсөр хаяж, жинхэнэ царайндаа эргэн орж, анх байсан шигээ, яаж мэдэх вэ хөөрхөн, өхөөрдөм болдог юм гэхэд яагаад ч үүнийг зөвшөөрөхгүй байлаа. Тэгдэг юм гэхэд Деягаа юугаар тэжээх билээ? Түүнд хайртай байдаг, номхон нь дэндсэн хөөрхий сохор амьтан юу болох билээ? Нэг ёсны цор ганц алиалагч болгосон тэрхүү нүүрэн дээрх ёрын инээдгүйгээр жирийн л нэг марзганагч, тайзан өөд шидэлсэн сохор зоосыг цуглуулагч эгэл нугарагч байж, Дея өдөр болгон ам хөдөлгөх юмтай байж чадахгүй байхыг хэн мэдэх вэ? Сэтгэл хөдлөм бардам омогтойгоор, сайх арчаагүй тэнгэрийн бүтээлийг хамгаалагч гэдгээ ойлгон мэдэрнэ. Харанхуй, Ганцаардал, Гачигдал, Үхээнц дорой, Бүдүүлэг, Өлсгөлөн, Ангах цангах гэсэн гуйланчлал үгүйрлийн долоон ам түүний өмнө ангайлдахад, Гуинплен тийм луутай тулан тэмцэж буй хутагт Георги болж байлаа. Тэгээд ч тэр гуйланчлалыг ялан дийлсэн юм. Яаж, юугаар? Өөрийнхөө эрэмдэг муухайгаар. Үзэшгүй муухайнхаа хүчээр хүн зонд хэрэг болж, дэмжиж туслан, амжилтаас ялалтад хүрч, их том хүн болжээ. Хүн зонд биеэ харуулахад л мөнгө урсан орж ирнэ. Цугласан хүн зоны эзэн нь, хүдэх ардын амьд бурхан нь байв. Деягийн төлөө хүссэнээ хийж чаддаг байлаа. Хэрэгцээтэй бүхнийг нь хангахыг мэрийнэ. Түүний бүх хүсэл, цамаан зан, элдэв маягийг нь сохор хүнд байж болох тэр л хязгаарлагдмал хэмжээнд үг дуугүй биелүүлнэ. Дээр хэлсэнчлэн Гуинплен, Дея хоёр бие биедээ аргагүй л нэг тэнгэрийн бошиг байлаа. Гуинплен нь бүсгүйнхээ далавч дээр, Дея нь эрэгтэйнхээ гар

дээр өргөгдөн байгаагаа мэдэрнэ. Өөртөө хайртай хүнийг хамгаалан, оддыг бэлэглэж байгаа хүнд хэрэгцээтэй бүхнийг өгнө гэдгээс илүү аятайхан юм гэж юу байх билээ. Гуинплен энэхүү жаргал цэнгэлийг амсан ойлгож байлаа. Энэ бүхний төлөө, эрэмдэг муухайдаа л ачийг нь санах хэрэгтэй байв. Ийм эрэмдэг зэрэмдэг нь түүнийг бүхнээс дээгүүр болгожээ. Түүнийхээ ачаар л өөрийгөө ч, өрөөлийг ч мөр бүтэн, гэдэс цатгалан авч явж, түүнийхээ хүчээр л биеэ даасан, эрх чөлөөтэй, алдар нэртэй, сэтгэл ханасан, омог бардам байдаг ажээ. Эрэмдэг муухай нь түүнийг юм ажирдаггүй, жишим ч үгүй болгожээ. Үйлийн үр хэдийнээ муу юм хийж чадахаа больж, итгэлийг эвдэн цохилт өгсөндөө сульдаж гүйцээд харин энэ цохилт нь Гуинпленийг ялалтад хүргэчихжээ. Сайх зовлонгийн ёроолгүй хавцал, гэрэлт аз жаргалын оргил болон хувирах нь тэр. Гуинплен эрэмдэг зэрэмдгийнхээ олзны хүн болсон авч Деятай хамт байлаа.

Энэ бол бидний дээр өгүүлсэнчлэн, диваажин болон хувирсан хар гэр байлаа. Тэр хоёр болон бусад хүний хооронд нэвтэршгүй хана байлаа. Тэгэх тусмаа л сайн. Энэ хана тэр хоёрыг бусдаас тусгаарлах боловч бас хамгаалж байлаа. Эргэн тойрны амьдралаас ийм хол Дея, Гуинплен хоёрт, ямар хор хүргэж болох билээ? Амжилтыг нь булаан авах гэж үү? Тэр болохгүй. Үүний тул эрэмдэг царайг нь өөрчлөх хэрэгтэй болно. Деягийн хайр сэтгэлийг булаан авах гэж үү? Тэр болохгүй. Дея түүнийг ерөөс хараагүй юм. Деягийн хараа эгнэгт эмчлэгдэхгүй. Эрэмдэг нь Гуинпленийг ямар таагүй байдалд оруулав! Ямар ч биш. Ямар давуу талыг өгөв? Бүгдийг. Эрэмдэг ч гэсэн, түүнийхээ ачаар л байж болох юм хайр сэтгэлтэй золгожээ. Эрэмдэг зэрэмдэг хоёр зөнгөөрөө бие биедээ татагдан, нэгэн цул болох нь энэ. Хайрлагдаж байна гэдэг бол бүх юм гэсэн үг биш үү? Гуинплен өөрийн зэрэмдэг муухайг бодохдоо ачийг санан талархдаг байлаа. Түүний хувьд сайх тамга нь тэнгэрийн адис шиг санагдана. Хэзээ ч арчигдаж, алга болохгүй гэдгийг нь баяр хөөр болон ухамсардаг байв. Түүнээс, үүнийг нь ямар ч аргаар яагаад ч булааж авч чадахгүй байна гэдэг ямар их аз вэ! Нааш цааш сүлжилдсэн замын уулзвар, яармагийн талбай, алсад зураих зам харгуй, газар дээр хүн зон бужигнан толгой дээр нь хөх тэнгэр цэлийж байсан цагт маргаашдаа итгэлтэй байж болно. Дея юугаар ч дутаж гачигдахгүй, тэд хоёр биеэ янаглан энхрийлэх болно. Гуинплен царай зүсээ Апполоныхоор солихгүй байх байлаа. Зэрэмдэг байна гэдэгт л түүний хамаг аз жаргалын учиг нь байв.

Ийм ч учраас бид хүүрнэлийнхээ эхэнд хувь заяа гар таталгүй хишиг хайрласныг өгүүлсэн билээ. Энэ орхигдсон амьтан эрх танхи

хүү нь байлаа. Эргэн тойрныхоо хүмүүсийг өрөвдөхдөө хүртэл жаргалтай байдаг байлаа. Ер нь ч өр нимгэнтэй хүн байв. Тэгээд ч бас эргэн тойрондоо болж байгаа юмыг санаандгүй гүйлгэн хардаг байжээ. Учир нь, орчлон ертөнц дээр биеэ огоорон бүрмөсөн зожгирсон хүн гэж байхгүй бөгөөд, байгаль маань ч хийсвэр юм биш.

Гуинплен ертөнцөөс тусгаарлагдан хашигдсандаа их баяртай байдаг ч, хааяа заримдаа нөгөө ханан дээгүүрээ өнгийн цаад тал руу хардаг байлаа. Ингэснийхээ дараа өөрийн байдлыг бусдынхтай жишин харьцуулангаа учиргүй баяртайгаар Дея руу, ганцаардал руугаа эгэн ирнэ.

Эргэн тойрондоо юу хараа вэ? Байнгын нүүдлийнх нь ачаар, өдөр болгон нэг нь нөгөөгөөр солигдон агч, энэхүү алаг цоог хүн зон гэгч нь юу байв аа? Ямагт өөр өөр хүн байх авч, угтаа бол бас л нөгөө цугласан олон хүн шүү дээ. Ямагт шинэ шинэ царай харагдах авч нөгөө л бахь байдаг гуйлгачид. Элдэв хэмхэрхий хагархайн холион бантан. Үдэш болгон, нийгмийн гарцаагүй ядуу зүдүү түүнийг, түүний аз жаргалыг тойрон бүчнэ.

«Ногоон хайрцаг» нэрд гаран алдаршжээ.

Доогуур үнэ нь доод ангийг татан дуудна. Гуинплен рүү ирдэг хүмүүс нь ядуу зүдүү, ядарч сульдсан, заяа нь орхисон амьтан байдаг. Түүн рүү архи хараад хорхойтдог лугаа адилаар тэмүүлэн ирцгээнэ. Гуинплен тайзан дээрээсээ энэхүү дүнсгэр уйтгартай хүн зоныг сэтгэлдээ тунгаан болгооно. Түүний ухаанд эцэс төгсгөлгүй ядуу зүдүүгийн дүр зураг нэг нь нөгөөгөө мөр даран орж ирнэ. Хүний царай зүс гэдэг, эзнийхээ дотоод сэтгэл түүний бүхий л амьдралыг тусган байх агаад учрал бүр нь ямар нэг мөрөө үлдээсэн нууц битүүлэг үйлдлийн үр дүн ажгуу. Эдгээр нүүр царайнд, үрчлээсэнд Гуинплений хараагүй зовлон зүдүүр, хор шар, хорон санаа, доромжлол гутамшиг, бухимдал цөхрөлийн ул мөр үгүй ажээ. Энэ хүүхдүүдийн ам харваас өнөөдөр юу ч идээгүй бололтой. Энэ хүн эцэг нь, тэр эмэгтэй эх нь байна. Сүйрч яваа айл гэдэг нь илт. Тэр нэг царай бол, муу муухайд автагдан гэмт хэрэг хийхээс сийхгүй болсон хүнийх байж таарна. Учир нь ойлгомжтой, харанхуй бүдүүлэг, ядуу зүдүү л тийм юм хийхэд түлхжээ. Байгалиас заяасан сайн санаатай боловч, нийгмийн дарамт, дарлалд сөхрөн үзэн ядахаас өөр юмгүй болж хувирсан царай ч байна. Буурал толгойтой хөгшний духан дээр «өлсгөлөн», залуу эмэгтэйн духан дээр «биеэ худалддаг» нь бичээстэй харагдана. Учиг нь нэг ижил боловч, залуу хөгшин хоёрт, өөр уршиг тарьжээ. Цугласан олны дотор ажиллаж

чадах боловч хөдөлмөрийн багажгүй олон гар байна. Эдгээр хөдөлмөрчдөд ажиллахаас илүү юмгүй боловч ажил нь алга ажээ. Заримдаа ажилчин хүний дэргэд цэрэг, хааяа эрхтэн дутуу хүн суух нь харагдахад Гуинплений нүдэнд дайны сүүтгэнэл үзэгдэх шиг санагдана. Энд ажилгүйдлийг, тэнд мөлжих явдлыг, түүний цаана боолчлолыг олж харна. Зарим нэгийнх нь царайд хүнээс аажуухнаар эргээд мал болон хувирч байгаа барин тавин шинж тэмдгийг ажиглах агаад, энэхүү ягуухан доройтол нь нийгмийн хувь тавилантай дээд ангийн дарамт хүчирхийллийн эрхээр доод давхаргынхны дунд бий болдог ажээ. Сайх нүхэн харанхуйн дунд Гуинпленд ганцхан гэрэлтэй цэг байлаа. Дея тэр хоёр зовлон туулан байж аз жаргалаа олж авчээ. Бусад бүх юм хараалын им тэмдгээр тамгалагджээ. Гуинплен, дээрээ хүч чадал, эд хөрөнгө, нэр хүндтэй, аз нь нь шовойсон эрх дархтнууд байгааг мэддэг, тэд өөрийг нь санаатай бус ч гэлээ дэвслэн гишгэчихдэгийг мэдэрдэг байлаа. Бас доор нь заяа нь орхин, зэвхий даасан хөөрхий амьтад байгааг ч харна. Тэр өөрийгөө, Деяг, энэ хоёр ертөнцийн дунд байгаа ялимгүй мөртөө цаанаа бол хэмжээ хязгааргүй аз жаргалаа харна. Дээд талд нь эрх дураараа юу ч хийдэггүй, хөгжиж цэнгэн, бүжиглэж наадсан, бусдыг хээвнэг гишгэчсэн хүмүүсийн ертөнц байна, доод талд нь нөгөө дэвсүүлэн гишгүүлдэг хүмүүсийн ертөнц байна. Харанхуй нь гэрлийнхээ хөлийн дэвсгэр болно гэдэг, нийгмийн ужиг эмгэгийг илтгэсэн өөдгүй явдал мөн. Гуинплен энэ гаслантай үзэгдлийн учрыг олох гэж мэрийнэ. Ямар доромж тавилан бэ! Хүн ингэж хөсөр хаягдаж, мөлхдөг байх нь ээ! Хог шороо, доромж гутамшигт ингэтлээ дасал болон, ингэж ой гутмаар биеэ гаргуунд хаясан нь, сайх бузар булайг хөлөөрөө дэвслээд хаячих хүслийг оргилуулна. Ингэж амьд явахын хэрэг юу байна аа? Энэхүү өлсгөлөн, мунхаг харанхуй хүн зоны дунд, хаашаа ч харлаа гэсэн гэмт хэрэг, ичгүүр гутамшгийн асуултын тэмдэг дүүрэн! Ийм амьдралаас болоод л, хаашаа ч зайлахын аргагүй хууль мэт, хүн эвдрэн, ичих нүүрээ алдаж эхэлнэ. Доромжлол басамжлалыг үзэлгүй өнгөрөх хүүхэд ганц ч алга! Яваандаа биеэ худалдахгүй байх охин энд ганц ч алга! Ядахдаа хүнд тоогдчихмоор байж чадах ганц ч сарнай эдний дунд үгүй ажээ!

Заримдаа Гуинплен, энэхүү өдий төдий үр дүнгүй эрмэлзэл, тэмүүлэл, үрэгдэн мөхөж байгаа өдий төдий бэрхийг туулсан хүчин ач тач тулалдаж байгаа сайх харанхуйн гүн рүү сэтгэл догдлон, гярхайгаар ажиглан ширтэхэд, түүний нүднээ нийгмийн золиос болон идэгдсэн айл гэр, хуульд баригдан гаж буруу болчихсон ёс

заншил, ял шийтгэлээс болж идээ бээрт баригдсан шарх сорви, алба гувчуурт байдгаа барчихсан ядуу зүдүү, мунхаг харанхуйн дунд төөрөлдөн ташуурсан ухаалаг хүмүүс, өлсгөлөн амьтдаар дүүрэн живж яваа сал, дайн, ган гачиг, цөхрөл, үхэл, зовлон өртөнө. Хотол олны ядуурал, зовлонгийн энэхүү элэг эмтрэм дүр зураг түүний зүрхийг байж ядтал нь базлуулах нь бий. Хүн төрөлхтний шаналал зовлонгийн далайн бүхий л хөөсийг харав уу гэлтэй. Тэр өөрөө боомтод далдлагдан байж, хөлөг онгоц сүйрэхийг хажуугаас нь ажиглан байлаа. Заримдаа зэрэмдэг нүүрээ гараараа таглан байж, элдвийг бодон гиюүрнэ.

Аз жаргалтай байна гэдэг ямар тэнэг юм бэ! Зүүдэлж байгаа юм шиг! Түүний толгойд утгагүй түмэн бодол орж ирнэ. Урьд нэгэн цагт нялх хүүхдийг аварч чадсан юм чинь, одоо бүхий л хувь заяагүй өрөвдөлтэй амьтдад цөмд нь туслах юм сан гэдэг тэсгэлгүй хүслэн оргилно. Бүүр түүр хүсэл мөрөөдөл нь заримдаа бодит байдлыг нь мартуулчихаад, хэр хэмжээгээ ч мэдэхээ болиод «Яаж, чухам яаж энэ ядуу хүмүүст тусалдаг юм билээ?» гэж өөрөөсөө асууна. Заримдаа бодолдоо автагдчихаад үүнийгээ хүнд дуулдахаар хэлэхэд нь Үүрс мөрөө хавчсанаа түүнийг яаж байна даа гэсэн шиг удаан ширтэнэ. Гуинплен нөгөө л мөрөөдөлдөө автсан хэвээр.

— Ээ чааваас, хэрэв надад эрх мэдэл байдаг сан бол энэ хөөрхий үгээгүйчүүдэд туслах сан. Гэвч би чинь юу билээ хэн билээ? Өчүүхэн хумхын тоос. Би юу хийж чадах вэ? Юу ч чадахгүй гэж сууна.

Тэр андуурчээ. Үгээгүй ядууст тэр чамлахааргүй зүйлийг хийж, тэднийг инээлгэдэг байв.

Хүмүүсийг инээлгэнэ гэдэг, мартуулна гэсэн үг гэдгийг бид дээр тэмдэглэсэн билээ.

Хүмүүст зовлонг нь мартагнуулахыг бэлэглэж байгаа хүнээс өөр хүн төрөлхтөнд сайн үйлийг бүтээн ивээгч байдаг гэж үү?

XI. Шударгын тунхагч Гуинплен, Үнэний зарч Үүрс

Гүн ухаантан бол тандуулаас өөрцгүй. Бусдын санааг мэдэхийг хүсэгч Үүрс өөрийн шавийг тал талаас нь анхааралтай ажиглана. Бидний гадагш нь гаргадаггүй дотор бодол маань духан дээр бичээстэй байдаг агаад царайг нь хараад хүний доторхыг мэддэг хүнд ив илхэн байдаг билээ. Ийм ч учраас Гуинплений сэтгэлд болж байгаа юм, Үүрст өртөхгүй өнгөрнө гэж байхгүй. Нэгэн өдөр Гуинпленийг бодол болоод сууж байтал, Үүрс хувцасны нь хормойноос угзачсанаа, ууртайгаар өгүүлрүүн:

— Чи чинь, орчин тойрноо ажигладаг болжээ дээ, мангуу минь! Болгоомжлоорой, энэ чамд хамаагүй юм шүү! Чиний хийх ганц юм чинь, Деягаа л хайрлах явдал. Чи давхар аз жаргалтай хүн. Нэг талаар цугласан олон чиний нүүр амыг харж байдагт, нөгөөтээгүүр Дея түүнийг чинь хардаггүйд байгаа юм. Чамд байгаа энэ аз жаргал уг нь чамд байх ёсгүй юм. Нүүр амыг чинь хараад чамд үнсүүлэх эмэгтэй хүн хорвоод байхгүй. Чиний элбэг дэлбэгийн баталгаа болох хошуу ам, чамд баялгийг бий болгож байгаа энэ хоншоор уг нь чинийх биш юм шүү. Чи ийм нүүр амтай төрөөгүй юм. Чи наадахаа тамын орноос авчихсан юм. Чи чөтгөрөөс царайг нь хулуучихжээ. Чи ой гутам үзэшгүй муухай амьтан, өөрт ногдсон заяандаа л баярлаж яв. Юм юм нь таарсан энэ орчлон хорвоод, зүй ёсны аз заяатай хүн, тохиолдлын азтай хүн гэж байдаг. Чи тохиолдлын азтай хүн. Чи тэнгэрийн од унаад орсон зооринд амьдарч байна. Хөөрхий од чамд заяагдаж дээ. Тэр нүхнээсээ мөлхөн гарах гэж бүү оролд, одоо л алдчихгүй чанга атга, аалз минь! Торонд чинь Венера бурхны бадмаараг эрдэнэ гэрэлтэж байна. Олсноос чанга атгаж болгоо. Бодол болон гиюүрдэг болсныг чинь харж байна, энэ бол тэнэг явдал. Миний хэлэхийг сонс, би чамтай жинхэнэ яруу найргийн хэлээр ярья. Деяд улам их үхрийн мах, хонины хавирга идүүлэмз, хагас жил болоход л түрэг хүүхэн шиг бүдүүрээд ирнэ, олон юм бодолгүй түүнтэй суучих. Чамд нэг, хоёр гурваар ч тогтохгүй баахан хүүхэд төрүүлж өгнө. Миний гүн ухаан гэдэг энэ дээ. Нэмж хэлэхэд, аз жаргалтай байна гэдэг огт муу юм биш. Өөрийн хүүхэдтэй болно гэдэг сайхан хэрэг. Хүүхэдтэй болчихоод, тэднээ манцуйлаад л, нусыг нь арчаад л, унтуулаад л, хар халтрыг нь угаагаад л, тэд чинь чамайг тал талаас бүчин шавах болно. Хэрэв тэд инээж хөхөрвөл сайн л байна, уйлж орилбол бүр ч сайн, орилно гэдэг бол амьдарна гэсэн үг. Хагас жил хөхнөөс нь

гаргахгүй байлгаж, нэг настайд нь мөлхүүлж, хоёр настайд нь хөлд оруулж, арван тавтайд нь гараас бүрмөсөн гаргаж, хорьтойд нь хайр дурлалыг амсуулах талаар л сайн анхаараарай. Хэнд энэхүү баяр баясгалан байна, тэр хүнд бүх юм байгаагаас ялгаагүй. Миний хувьд ийм азаа өнгөрөөчихсөн хүн, ийм учраас ч би гэдэг хүн малаас ялгаа юун. Гайхамшигт яруу найргийг бүтээгч, орчлон хорвоогийн анхны бичгийн хүн бурхан тэнгэр гарын бичээч Монсодоо «Үржүүлж өсгөөд бай!» гэж хэлж бичүүлсэн нь байдаг. Сударт ингэж бичсэн байгаа юм. Тэгэхээр үржүүлээд бай, мал минь. Харин ертөнцийн хувьд бол, ямар байсан тэр чигээрээ л байх болно. Чиний санаа тавьсан тавиагүй, муу юм болдог замаараа л болно. Үүнд санаа зовох хэрэггүй. Өөрт хамаагүй юмаар бүү оролд. Холуур өнгөрөх гайг бүү даллаад бай. Инээдмийн жүжигчин, хүнд харуулахын тул байдаг болохоос өөрөө харахын тул байдаггүй юм. Ертөнцөд хэн нь толгойлон зонхилдгийг мэдэх үү? Зүй ёсны аз заяатай хүмүүс. Чи бол тохиолын азтай хүн гэдгийг дахин санууллаа шүү. Чи бол өөрт хүртээлгүй аз жаргалыг луйврын аргаар олж авсан хүн. Тэд бол хууль ёсны гарцаагүй эзэмшигчид, харин чи бол муу мэхээр шургалан орогч, хууль бусаар түшсэн амьтан. Чамд өөр юу хэрэгтэй юм? Өөдгүй амьтан, жаргалдаа ташууран гортоно гэдэг энэ дээ! Уг нь Деятай дэр нийлүүлчхээд үр удмаа харсан шиг суувал чамд өлзий болох сон. Энэ бол булхай, муу зальгүйгээр хүрч очиход амаргүй л жаргал даа. Дээд зиндааны, орчлонгийн жаргалд тусгай эрх эдэлж байдаг хүмүүс, өөрөөс нь доор байдаг амьтад иймэрхүү жаргал эдэлж байгаад дургүйцдэг юм. Хэрэв тэд чамаас ямар эрхтэйдээ ийм жаргалтай байна гэж асуувал чамд хариулах юм олдохгүй байх вий. Чамд тэдэн шиг жаргалд умбаж байх хүндэт жуух алга шүү дээ. Юпитер, Аллах, Вишнүү, Саваоф гээд, хэн нь ч юм бэ дээ, бүү мэд тэдэнд аз жаргалыг хайрлажээ. Тэднээс айж яв. Өөртөө лай хураахын нэмэр, тэдний хэрэгт бүү оролц. Өөдгүй амьтан минь, зүй ёсны азтай хүн гэж юу болохыг мэдэх үү? Энэ бол аймшигтай амьтан, энэ бол лорд! Өө, лорд гэдэг үү! Хүний биеийг олон төрөхөөсөө өмнө амьдралд тэр хаалгаар л орж ирэхийн тул ад чөтгөрийн, нүдэнд үл үзэгдэх орчлонд, далдуур хөнөөж, багагүй хутган үймүүлсэн амьтныг хэлнэ. Хүний төрлийг олохын тул мөн ч их зовоо доо! Мэдээжээр түүнд өөр санаа зовох юм байгаагүй байж таарна, гэвч шударга тэнгэр минь, ихэд чармайсан хөдөлмөр гэдэг нь ээ! Харалган, дураараа тэнэг амьтан болох хувь заяа гэгч, өлгийтэй байхаас чинь эхлээд л өөрийг чинь бусад хүний дээр сандайлах эрхтэй болгон, санаандаа хүргэхийг хэлнэ! Театрт сайн

суудлыг нь авахын тул пиу худалдагчийг нь худалдаж авч байгаа хэрэг! Манай гавьяат амралтдаа гараад байгаа хуучин бүхээгийн ханан дээрх санамжийг унш, цэцэн мэргэн ухааны минь судрыг болгоо, тэгвэл чи лорд хэмээгч юу юм гэдгийг мэдэж авна. Лорд бол бүх юмтай, өөрийн бие нь ч бүх юм болдог хүн. Лорд бол хүний ертөнцийн хууль ёсыг улаадаа гишгэчсэн; залуудаа хөгшин хүний эрхийг эдлэн, хөгширсөн хойноо залуугийн хийморь золбоотой байдаг хүн юм. Лорд нь садар самуун атлаа гүндүүгүй шударга төвшин улсын хүндэтгэлийг хүлээнэ, аймхай атлаа зоригтнуудыг удирдана, бусдын хөдөлмөрийг сорон амьдардаг хувалз, бүдүүлэг харанхуй атлаа Кембриж, Оксфордын их сургууль төгссөн үнэмлэхтэй, тэнэг мулгуу атлаа яруу найрагчид өөрт нь зориулан магтууг өргөн барина, эрэмдэг муухай атлаа бүсгүйчүүл, хүүхний инээмсэглэлээр шагнуулна. Терсит лүгээ адил мөртөө Ахиллийн дуулгыг өмсөнө, туулайнаас ялгаагүй атлаа арслангийн арьс нөмөрсөн байдаг юм. Миний хэлснийг чи буруугаар бүү ойлгоорой, лорд болгон заавал бүдүүлэг мунхаг, аймхай, эрэмдэг муухай, хөгшин зөнөг байдаг гэж байгаа юм биш, би зөвхөн лорд гэдэг маань өөртөө ямар ч хохирол, алдагдалгүйгээр дээр хэлсэн бүхнийг байлгаж болно л гэж хэлж байгаа санаатай юм. Үгүй шүү хө, лордууд маань хачир дээрээ бол эзэн ноёд. Английн эзэн хаан бол мөн л лорд, ихэс дээдсийн доторх, тэргүүн амбан, энэ бол их юм, энэ бол бүх юм. Хаад вангуудыг Данийн лорд, Ирландын лорд, Нэгдсэн арлуудын лорд гэж нэрлэж байсан цаг ч бий. Норвегийн лорд гэхэд л хаан гэж дуудуулдаг болоод гурван зуухан жил болж байна. Английн хамгийн эртний хаан Луцийг, гэгээн хутагт Телесфор «милорд Луций» гэж гуайлдаг байсан юм. Тайж лордууд гэж байдаг, өөрөөр хэлбэл цөм адилхан эрх ямбатай гэсэн үг. Хэнд гэж асуу даа. Хаанд л байхгүй юу. Би лордуудыг улсын хуралтай (парламент) хольж хутган ташуураагүй байна.

Улсын хурал бол ард олны хуралтай. Саксууд нормандад эзлэгдэхээсээ өмнө *wittenagemot* гэж нэрлэж байснаа, байлдан дагуулагч нормандчууд *parliamentum* хэмээн нэрлэдэг болжээ. Аажим аажмаар, ардуудыг хөөн гаргасан юм. Хурлын танхимыг хуралдуулах хааны лүндэнд хуучин «*ad consilium impendendum*»¹⁴⁴ гэж байдаг байснаа одоо ерөөсөө л «*ad consentiendum*»¹⁴⁵ гэдэг болжээ. Доод хурлын танхим бол зөвшөөрснөө мэдэгдэхээс өөр эрх байхгүй. «За» гэж хэлэхдээ л эрх чөлөөтэй байна. Тайж нар бол өөр хэрэг, тэд «Үгүй» гэж хэлж чадна. Тэд ийм эрхтэй гэдгээ, хэрэг дээр нь ч нотолсон юм. Тайж нар хааныг цаазалж чадна, тэгвэл ардууд

бол чадахгүй. Нэгдүгээр Карлыг¹⁴⁶ цаазалсан явдал бол хааны эрхийг бус харин тайж нарын онцгой эрх ямбыг эвдсэн хэрэг, тэгээд Кромвелийн¹⁴⁷ араг ясыг дүүжлүүрт санжгануулсан нь зүйн хэрэг. Лордууд эрх мэдэл, хүч чадалтай. Яагаад? Яагаад гэвэл тэдний гарт хамаг баялаг байдаг.

Хэн «Doomsdaybook» буюу «Аймшигт цээрлүүлэлтийн номын» хуудсыг эргүүллээ дээ? Энэ ном бол Английг лордууд захирч байдгийн баталгаа юм. Энэ бол Байлдан дагуулагч Вельгельм вангийн үед гаргасан английн харьяат нарын мэдэлд байгаа газар тариалангийн хөрөнгө зөөрийн цэс бөгөөд их сангийн дээд түшмэл лорд хадгалж байдаг юм. Энэ цэсээс ямар нэг юм хуулж авахын тул мөр болгонд нь дөрвөн су-гээр бодож төлнө. Их сонин ном доо! Би жилдээ есөн зуун мянган франц франкийн орлоготой Мармелюк лорд гэгчийн гэрийн эмч байсныг чи мэдэх бил үү? Үүнийг чи бодоод үз дээ, мал минь! Линдсей гүнгийн цэцэрлэгт байдаг молтогчин туулайгаар л, Таван боомтын бүх хоолны савыг амаар нь гартал идүүлэн цатгачхаж болно гэдгийг чи мэдэх үү! Тэгвэл түүнээс гар тосоод үз дээ! Бүх юм нь тооцоотой. Хулгайн анчин болгоныг дүүжилнэ. Ангийн богцноос нь молтогчны дэлдэн чих цухуйж байсных нь төлөө л, зургаан хүүхдийн эцэг дүүжлүүрт савлаж байхыг би харсан юм даа. Өндөр дээдэс гэдэг чинь ийм л улс. Лордын ганц молтогчин туулай, хүний аминаас ч илүү. Ингээд нэгэнт л хорвоод лорд гэж байгаагаас хойш, хүүш дуулж байна уу луйварчин минь, бид үүнийг сайн юм гэж үзэх ёстой мэдэв үү! Ер нь тэгээд бид үүнийг муу юм гэж үзлээ ч гэсэн тэдэнд ямар пад байх билээ? Ард олон бас татгалзаж үзнэ гээч. Бодоод үзээч! Плавтад хүртэл ийм инээдмийн юм үзээд өгье ч гэсэн байхгүй! Энэ өрөвдөлтэй өтнүүдийг, лордын хүнд зовлонтой даралтын эсрэг дуугаа өндөрлө гэж зөвлөх гүн ухаантан байх юм бол инээдэмтэй хэрэг болно. Энэ бол төөлүүр хорхой, зааны хөлтэй азаа үзнэ гэдэгтэй утга нэгэн зүйл. Би нэг удаа, армаана сохор номины үүрийг гишгэчихийг харсан юм. Цөмийг нь хэмх гишгэлгүй яах вэ. Гэвч тэр бээр юунд ч буруугүй. Энэ цагаан санаат, гэмгүй аварга амьтан, ядахдаа хорвоод номин гэдэг амьтан байдгийг зүүдэлсэн ч үгүй явжээ. Хонгор минь, няц гишгүүлж байгаа сохор номин бол, хүн төрөлхтөн юм. Бие биеэ няц гишгэнэ гэдэг байгалийн хууль. Чи арай сохор номин өөрөө юу ч няц гишгэдэггүй гэж боддог юм биш биз дээ? Тэр чинь хачигтай харьцуулахад аварга бөгөөд хачиг нь өөрийн ээлжид эрвээхийн авгалдайтай харьцуулахад аварга байх жишээтэй. Гэвч цааш нь элдвийг бодож гүнзгийрүүлэхээ орхиё. Хүү минь

хорвоод сүйх тэрэг гэж байдаг. Сүйхэнд лордууд залрах бөгөөд болгоомж муутай явган хүмүүс дугуйн доогуур нь орж, ухаалаг нэг нь замаас нь зайлаад гарчихна. Хажуу тийшээ булт үсрээд л өнгөрчих. Миний хувьд би лордуудад хайртай ч, цэрвэж явдаг юм. Би нэгнийд нь амьдарч байлаа. Энэ маань надад тэдний тухай сайхан бодол хадгалж явахад бүрэн хангалттай. Үүлэн дундах гэрэл туяа мэт шилтгээнийг нь санаж байна. Миний мөрөөдөл хуучныг сэргээлээ. Барилга байшингийн нүсэр томоороо, хэсэг бүрийн хэмжээ зохицлоороо ч, баян тансаг гоёл чимэглэлээрээ ч, хажуу залгаа барилгаасаа ч, Мармедьюк өргөөнөөс гайхамшигтай юм үгүй. Ер нь ингэхэд, лордуудын өргөө гэр, ордон, шилтгээн гэдэг манай цэцэглэж байгаа эзэнт улсын доторх хамгийн сүр хүчтэй, баян тансгийн цуглуулга юм шүү дээ. Би дээдэстээ хайртай. Би тэдний эрх мэдэл, ямба хэргэмд, баян тансаг байдагт нь баярлаж явдаг хүн. Харанхуйн дунд бээрч ядарч буй би гэдэг хүн, номин хөх тэнгэрийн өчүүхэн хэсэг болох лорд хэмээгчийг анхааралтайгаар дуртайяа ширтэн харж байдаг. Мармедьюкийн өргөөнд найман дөрвөлжинд хуваагдан, хэсэг бүрийг чимэглэн хайсалсан, тэгш өнцөгт хэлбэртэй хашаа дундуур орж ирнэ. Тэдгээрийг хооронд нь өргөн замаар холбож, голд нь хоёр усан сантай, зургаан багана дээр тогтох нарийн хийцтэй бөмбөгөр оройтой найман өнцөгт гоёмсог усан сан оргилон байдаг байлаа. Тэнд би, Сен-Жак гудамжны япончуудын сүмийн ширээт лам, франц эрдэмтэн дю Кростой танилцсан юм. Мармедьюкийн өргөөнд, тэн хагас нь Кембрижийн их сургуулийн судрын дацанд байгаа Эрпениусын номын сангийн хагас нь хадгалагдана. Би гоёж чимэглэсэн гонхон доор сууж аваад л уншиж гарна. Иймэрхүү юмыг энгүүндээ сониуч зантай цөөн тооны жуулчин, аянчид л сонирхоно шүү дээ. Марзан шаар минь, түшээ гүний суудал дээр арван дөрөвдүгээр сандалд суудаг Грей-Ролстоны лорд эрхэмсэг Вильям Норт гуай эзэмшлийн ууландаа чиний наад хүн аймаар бөндгөр дээрх үснээс чинь хамаагүй олон өндөр өндөр модтой гэдгийг мэдэх үү? Эбингдоны гүн Норрис Райкот лордод «Баатарлаг явдал түншүүрээс хүчтэй» гэсэн утгатай, гэхдээ уг чанартаа бол мангар минь:

«Эр зориг бол дайны оньсон хөдөлгүүрээс хүчтэй» гэж орчуулбал зохих «*Virtus ariete fortior*» гэсэн уриатай дөрвөлжин хоёр зуун тохой өндөр цамхаг байдгийг мэдэх үү? Тийм ээ, би дээдсээ хүндэтгэн биширч, өмнө нь мэхийн хүндэлнэм. Чухамдаа лордууд л өндөр төрөлт эзэн хаантай хамт, үндэстнээ элдэв ашигтай зүйлээр хангах гэж үйлээ үзэн санаа нь зовдог улс. Тэдний овсгоотой цэлмэг

ухаан нь элдэв бэрхшээлтэй нөхцөл байдалд тодрон гардаг билээ. Газар сайгүй юм бүгдэд толгой цохидгоо байхыг нь харвал бах ханах сан. Тэд мэдээжээр тэргүүлсэн хэвээрээ л. Германд ноёны зэрэг, Испанид үе залгамжлах ёс гэж нэрлэдэг тэр зүйлийг Англи, Францад тайжийн хэргэм зэрэг хэмээнэ. Энэ орчлон гэдэг маань тун ч тааруухан бүтээгджээ гэж үзэх үндэс, хаанаас нь харсан ч байгаа болохоор бурхан тэрхүү өө сэвийг ажиглан мэдчихээд, аз жаргалтай хүмүүсийг ч бас бүтээж чадна гэдгээ батлан харуулахын тул гүн ухаантнуудыг тайтгаруулан баярлуулах гэж лордуудыг бий болгожээ. Ингэснээр бурхан анхныхаа алдааг залруулж, эвгүй байдлаас нэр төртэйгөөр мултрах нь тэр. Дээдэс бол аргагүй л ихсүүд. Тайж өөрийнхөө тухай ярихдаа «nos¹⁴⁸» гэсэн үг хэрэглэнэ. Ганц тайж байхад л олон тоонд байдаг. Эзэн хаан, тайж нарыг «nostry¹⁴⁹» хэмээнэ. Тайж нар олон олон ухаалаг хуулийг гаргасан бөгөөд тэдгээрийн дотор эдлэнгээс нь зулзаган улиангар огтолсон хэнийг ч болов цаазаар авч цээрлүүлэх хууль ч бий. Тэд бусдаас хамаагүй дээд зиндааных учир, зөвхөн өөрсдийнх нь хэл яриатай байдаг. Сүлд судлалд, хар өнгийг, энгийн язгууртны сүлднийхийг бол «элс» хэмээн нэрлэж, ноёны сүлднийхийг «хорголж» хэмээн, харин тайжийнхыг бол «очир алмас» гэж нэрлэнэ. Очир алмасын тоос, од түгсэн шөнө, аз жаргалтай хүмүүсийн хар өнгө ажээ. Тэр бүү хэл энэ дээдсийн хооронд ч зарим зэрэг байдаг. Түшээ гүний дотуур хувцсыг бэйлийнхтэй хольж угаахдаа бэйлийг зөвшөөрвөл л угааж болно. Энэ бүгдийг гайхамшигтайгаар бодон зохицуулсан агаад, энэ нь үндэстнийг сахин хадгалах дэнчин билээ. Ард түмний хувьд, хорин таван ван, таван бэйс, далан зургаан гүн, есөн бэйл, жаран нэгэн түшээ гүн, бүгд нийлээд заримыг нь «өндөр дээдэс» нөгөө заримыг нь «эрхэмсэг дээдэс» хэмээн өргөмжилдөг зуун далан зургаан тайжтай байна гэдэг юутай азтай хэрэг билээ! Энэ бүгдийн хажуугаар хаа нэгтээ навсгар ноорхой амьтад дайралдах нь юуны хамаатай билээ, нохой долоо! Бүх юм алт байж яаж болох вэ. Ноорхой цоорхой бол ноорхой цоорхой л байгаа биз! Гэхдээ түүний хажууд дээдсийн гял цал байгаа л юм чинь! Нэг нь нөгөөгөө нөхөн цагаатгадаг. Орчлонд ядуу зүдүү амьтад байгаа нь ямар хамаа байна! Тэд баячуулын аз жаргалыг босгоход зайлшгүй хэрэгтэй эд юмс болж байдаг. Чөтгөр ав! Манай лордууд бол бидний алдар гавьяа. Мохены түшээ Гүн Чарльз Мохены зөвхөн тайган нохойнуудын үнэ Мургетийн уяман өвчтөний эмнэлэг ч юм уу эсвэл 1553 онд, дөрөвдүгээр Эдуардын үндэслэсэн Иисус Христийн нэрэмжит хүүхдийн эмнэлгийн өртөгтэй тэнцэнэ. Лидсийн ван Томас Осбори

зарц шивэгчин нарынхаа зөвхөн ёслолын хувцсанд нь зориулж жил болгон таван мянган алтан зоос үрдэг байжээ. Испанийн дээдчүүлийн дэргэд, ганц ч улаан мөнгөгүй болтол нь үгүйрүүлчихгүйн тул эзэн хаанаас томилсон дэмчтэй байдаг ажээ. Энэ бол олиггүй юм. Манайхны лордууд ойворгон ухаангүй явдалд гаргуутай улс даа. Би үүнийг нь хүндэлдэг. Атаач жөтөөч амьтад шигээр тэднийг сонжиж муучлахаа больцгооё. Миний хажуугаар өнгөрөх гоё үзэгдлийг хараад хэчнээн баяртай байдаг гээч. Надад гэрэл заяагдаагүй юм байж, хамаа алга. Харин түүний ойлго туяа нь над дээр тусаж байна шүү дээ, энэ чинь. Яр шарх дээр чинь гэж хэлэх үү, чи? Чөтгөр лүүгээ тонил! Би бол Тримальхионыг харан харан баясаж байгаа Иов юм. Өө, огторгуйн орны туяа гэрэл цацарсан гайхамшигт гараг! Сарны гэрэлтэйгээ байна гэдэг бас их юм шүү. Лордуудыг устгах! Хэдийгээр ухаан солиотой ч гэсэн Орестод хүртэл ийм санаа толгойд нь орж ирэхгүй. Лордууд ашиггүй хортой гэж хэлэх бол төрийн үндсийг эвдлэн устга гэсэнтэй утга нэг буюу эсвэл хүмүүс бол хонь шиг өвс зулгаан, нохойд томоотойхон шиг хазуулан амьдрахын төлөө бүтээгдээгүй юм гэдэг өөдгүй санааг хэлэхтэй ижил юм. Хонь бэлчээрийнхээ нугын өвсийг юу ч үгүй болтол нь хивж; малчин хониныхоо ноосыг тожийтол нь хяргадаг биз дээ. Хамгийн үнэн шударга нь юу байна? Их барьсан ч өмхий, бага барьсан ч өмхий. Миний хувьд бүх юм надад яаж ч байсан хамаагүй. Би бол ядарсан нэг марзганагч, амьдралд үхэн хатан зууралдаад байх юм алга. Орчлонгийн амьдрал бол зөвхөн түр зуурын толгой хоргодсон хэрэг. Беркширийн гүн, Генри Боус Ховардын жүчээнд нэг нь цул мөнгөн хөлтрөг хударгатай, нөгөө нь цул алтан тоног хэрэгсэлтэй хорин дөрвөн ёслол, найрын сүйх байдаг гээд бодоод үз л дээ! Бурхан минь, хүн болгонд найр хуримын хорин дөрвөн тэрэг байхгүй гэдгийг мэднэ, гэхдээ ингэлээ гээд орилж чарлаад байх хэрэггүй! Нэгэн шөнө чи, царцчих дөхсөн, тэнд чинь сүйдтэй юм юу байна! Хорвоод орон гэргүй амьтан мундаа юу. Бусад хүн ч бас хүйтэн нойтон, ам руу хийх юмгүйгээсээ зовж зүдэрч л байна. Хэрэв тэр хүйтэн болоогүй байсан бол чамайг хайрлаж сүйд болох нь байтугай, харах ч үгүй байсныг мэдэж байна уу, үгүй юу. Энэ тухай сайн эргэцүүлэн бод, сагсгар элээ минь. Ер нь тэгээд сэтгэл дундуур хүн бүхэн гомдоллож орилоод унавал мөн ч аятайхан хөгжим болох вий! Дуугай байна гэдэг бол цэцэн ухаанч зарчим. Үйлээ үзэн шаналахаар цээрлүүлэгдсэн амьтдыг, тэнгэр бурхан амаа хамхин дуугай байх лүндэн буулгадаг гэдэгт би итгэж байна, эс тэгвэл бурхан маань өөрөө үүрд чарлахыг сонсож байхаар

цээрлүүлэгдчихнэ шүү дээ. Олимпын тайван жаргал нь Коситын¹⁵⁰ анир чимээгүй байсны хүч юм. Тэгээд хүн зон амаа тат! Би улам сайн хийж байна, би дэмжиж шагшин гайхаж байна. Би дөнгөж саяхан чамд лордуудыг хуруу даран дурдлаа, гэвч түүн дээр хоёр ёнзон хамба, хорин дөрвөн хамбыг нэмэх хэрэгтэй юм байна. Үнэндээ энэ тухай бодохоос уяраад явчихдаг юм. Нэгэн удаа би, татвар хураагчийнд, номын дацангийн агар, хар болон шашны талын тэргүүн хүний нэг хутагт Рафозгийн хэрэгцээнд зориулан ойр орчмынх нь тариачдаас хурааж авсан сайхан улаан буудайн дүнхийсэн нурууг харснаа санаж байна аа. Эрхлэгч өөрөө түүнийг ургуулах гэж зовдоггүйнхээ ачаар мөргөл, номдоо хангалттай цаг гаргаж чаддаг байлаа. Миний эзэн байсан Мармедьюк лорд маань Ирландийн мөнгөн сангийн нярав. Йоркийн гүнлэгийн Герсбургын тэргүүн даамал байсныг чи мэдэх үү? Анкастерийн вангийн удмаас үе залгамжлан эдэлдэг албан тушаал болох, хааны гарын түшмэл лорд нь өндөр дээдсийг хаан ширээнд залрах өдөр нь хувцсыг нь өмсүүлж шагналд нь дөчин тохой хамба хилэн болон хааны унтсан ор дэрийг хүртээд, хар очирт бэрээг баригч түүний төлөөний хүнээс ямагт түрүүлж явдгийг чи мэднэ үү! Тавдугаар Генрихээс, бэйл болгон соёрхсон Роберт Брент ноён Английн хамгийн ахмад бэйл биш гэж зүтгэхийг чинь харах юмсан. Нэр нь хэргэм болж өгдөг Риверс лордоос бусад бүх лордын цол хэргэм нь эдэлбэр газар эзэмших газар эзэмших эрхтэй байдаг юм. Тэд бусдад алба гувчуур ногдуулах эрхтэй нь, жишээ нь өнөөгийн байдлаар жилийн орлогын фунт стерлинг бүрээс дөрвөн шиллинг татах бөгөөд энэ нь дараагийн жил бас сунгагдсан нь ямар сайхан юм бэ! Нэрсэн охиос цүүвэн татаж, архи, шар айргаас гувчуур хураан, эд бараа жинлэж хэмжсэнээс хувь аваад, алимын дармал, лийрийн идээшмэл дарс, амуу соёолж, нэрсэн арвай, чулуун нүүрс гээд л өдий төдий юмнаас алба гувчуур тэсгэн авах нь ямар гайхамшигтай санаа билээ! Байгаа дэг журмаа бөхийн хүндэтгэе. Хувраг санваартан маань хүртэл лордын гарыг харна шүү дээ. Мений хамба гэхэд л Дербийн гүнгийн харьяат. Лордууд сүлдэн дээрээ байрлуулдаг өөрийн гэсэн ан амьтантай. Дээд тэнгэр хүрэлцээгүй тооны араатан амьтдыг бүтээсэн болохоор лордууд шинэ зүйл зүйлийн амьтны ухаалаг гаргасан юм. Тэд сурвалжит язгууртан, санваартнаас хамаагүй дээгүүр байдаг шиг ч юм уу, бодон гэрийн гахайнаас хамаагүй дээгүүр байдаг шиг жирийн бодонгоос хамаагүй дээгүүр, сүлдний бодонг бий болгосон юм. Тэр арслангийн дунд бүргэд, бүргэдийн дунд арслан болох далавчаараа арслан айлгаж, зогдроороо

бүргэдийг айлгагч бүргэдийн толгойтой, жигүүртэй арсланг бий болгожээ. Тэдэнд хийморь сүлднийх нь могой, бодь гөрөөс, луу, хангарди, сааван, ховдос бий. Энэ бүгд нь бидний нурууг хүйт оргиулан айлгах боловч, тэдэндээ гоёл чимэглэл болох ажээ. Тэдэнд сүлд, тэмдгийн судар гэдэг амьтны хүрээлэн байдаг бөгөөд тэр хүрээлэнд нь нүдэнд үзэгдэж, зүүдэнд оромгүй мангасууд архиралдана. Тэдний ихэрхэг зангаас үүсэн гарсан тийм хачин жигтэй амьтантай ямар ч ой ширэнгэд дайралдахгүй биз ээ. Тэдний ихэрхэг зан нь харанхуй шөнө, хуяг дуулга болсон, гартаа хааны очрыг барин давируулаа тачигнуулан, их дуугаар «Бид бол өвөг дээдэс!» гэж дуу тавин зугаалж яваа элдэв сүүтгэнэлээр дүүрчихсэн ажээ. Цох ургамлын үндсийг иддэг бол, сүлд нь ард олны өнгөтэй өөдтэйг залгичихдаг юм. Ингэх ч ёстой юм! Бид хууль горимоо үүнээс болж өөрчлөх хэрэг үү? Язгууртан ноёд гэдэг бол дэглэм журмын салшгүй хэсэг, Шотландад, өөрийн эзэмшлээс өчүүхэн ч хазайлгүйгээр гучин бээр газрыг мориор шулуухан давхичих ван байдгийг чи мэднэ үү? Кентерберийн ёнзон хамба лорд сая франкийн жилийн орлоготойг чи мэднэ үү! Өндөр дээдэс маань элдэв төрлийн албанаас чөлөөтэй шилтгээн, ой мод, өвөлж авсан эдлэн, түрээс эзэмшлийн газар, албатаасаа авах гувчуур, хөрөнгө хураах торгууль зэргээс ордог сая илүү фунт стерлингийг нь оролцуулалгүй жилдээ тусгай зориулалтаар долоон зуун мянган фунт стерлинг авдгийг мэднэ үү? Үүнд дургүйцэн байдаг тэр хүмүүс бол өөрсдийнхөө тэнэгийг л харуулж байгаа хэрэг.

— Тийм ээ, баячуудын диваажин ядуусын тамаар бий болдог юм байна гэж Гуинплен бодол болсон байдалтай бувтналаа.

ХII. Яруу найрагч Үүрс, гүн ухаантан Үүрсийнхээ дурыг булаах нь

Дея орж ирлээ. Гуинплен түүнийг харснаа дараа нь юу ч үзсэнгүй нүд нь харанхуйлна. Дурлал гэгч ийм байдаг хойно доо. Ямар нэг бодлын эргүүлэгт хоромхон зуур орж, бүрэн автагдах тохиолдол байдаг. Гэтэл хайрлаж дурладаг бүсгүй чинь бидний сэтгэл дэх бүхэл бүтэн ертөнцийг арчин хаяж байж ч мэдэх юм гэдгээ ядахдаа анзаарах ч үгүй ороод ирэхэд, шууд холбогдолгүй юм бүгд сарнин арилдаг билээ.

Энд нэг ялимгүй юмны тухай хэдэн үг хэлье. «Гэсгээгдсэн наждын» дотор Гуинпленд хандаж хэлэх ёстой «monsto¹⁵¹» гэдэг үг Деяд таалагдсангүй. Заримдаа тэр үед хүн бүхний мэддэг испани хэлний хомсхон мэдлэгийг нь далимдуулаад, Дея тэр үгийг нь дур мэдэн өөрчлөхдөө «хүсэл болсон» гэдэг утгатай «quiero» гэдэг үгээр сольчихдог байжээ. Үүрс эх зохиолоо ийнхүү өөрчлөхөд нь дуртай биш байдаг байв. Тэр нь Деяд хандаж, манай үед Моэссар Виссод хэлсэн шиг «Чи жүжгийн зохиолд хүндэтгэлтэйгээр хандахгүй байна шүү» гэж дуртайяа хэлж чадах байлаа.

«Инээдэг хүн» гэдэг нэрээр Гуинплен алдар цуутай болжээ. Түүний жинхэнэ нэр нь, төрөлхийн царай нь инээдэг багийн дор алга болсон лугаа адилаар сайх хочинд дарагдан мартагджээ. Түүний нэр цуутай болсон нь ч царайны нь адил баг байв.

Тэглээ ч гэлээ, түүний нэр нь «Ногоон хайрцгийн» нүүрэн талын ханан дээр хадсан өлгөөс дээр дурайна. Үүрсийн зохиосон бичээст өгүүлрүүн:

«Энд 1690 оны нэгдүгээр сарын 29-ний шөнө, арван настайдаа хорон санаат Компрачикосуудад Портлендийн далайн эрэг дээр хаягдаад, жаал байснаа эрийн цээнд хүрсэн, өнөөдөр «Инээмтгий хүн» гэдэг алдартай болсон Гуинпленийг харж болно.

Эдгээр тэнэмэл жүжигчдийн байж байгаа нь, эмчлэн сэргийлэх эмнэлэгт байгаа уяман өвчтөнүүдийн амьдрал юм уу, эсвэл ямар нэг Атлантидын¹⁵² оршин суугчдын элбэг дэлбэг амьдрал ахуйтай адилхан ажгуу. Өдөр бүр л өөрсдөд нь хэзээ язааны дасал болсон яармагийн хөл үймээн, дуу шуу болсон хүмүүсийн өмнөх тоглолтоосоо шууд л гадаад ертөнцөөс бүрэн ангижирсан нам гүмд шилжин орно. Орой болгон тэд, амьсгаа хураасан хүн булшинд ордог шиг энэ ертөнцийг орхин алга болсноо, маргааш өглөө нь дахин амь орно. Жүжигчин гэдэг бол гэрэлт цамхгийн эргэлдэх

дэнлүү бөгөөд, нэг тодрон харагдаж нэг бөхөн алга болдог гэрэл юм. Үзэгчдийн хувьд, тэр нь зөвхөн сүүтгэнэл, гэрэл сүүдэр хоёр ээлжлэн солигдож байдаг энэхүү хорвоогийн гялс гялс хийх туяа билээ.

Тоглолт дууссаны дараа сайн дурын хорионд орно. Жүжиг төгсөж, үзэгчид сэтгэл ханасан шинжтэй шуугилдан, залгаа гудамжаар тарж эхлэнгүүт, «Ногоон хайрцаг» цамхаг өргөдөг гүүрийг сөхөх мэт, буулгадаг ханаа өргөн, байранд нь аваачихад, бусад хүн зоноос бүрмөсөн харилцаа тасрах нь тэр. Нэг талд нь хорвоо ертөнц, нөгөө талд нь нүүдэг модон байшин байх агаад түүн дотор эрх чөлөө, ариун цагаан сэтгэл, амь бие үл хайрлах эр зориг, гэнэн хонгор зан, аз жаргал, хайр дурлал од мичид лүгээ адил гялалзан байна.

Зөн билигт хараагүй, түүнд сэтгэлээ өгсөн эрэмдэг хоёр, гараа атгалцан, бөөрөө нийлүүлэн, толгой холбон суугаад, жаргалдаа мансууран аяархан ярилцана.

Ногоон хайрцгийн дунд хэсэг үзэгчдийн хувьд тайз, жүжигчдийн хувьд хоолны өрөө болон давхар үүрэг гүйцэтгэнэ. Юмсыг савс л хийвэл харьцуулах дуртай Үүрс, үүнийг ашиглан тэрэгнийхээ дунд хэсгийг абиссины овоохойн «аррадаш»-тай адилтгана.

Үүрс олсноо тоолчхоод, дараа нь ширээнд сууна. Хайр дурлалын хувьд бүх юм туйлын сайхан санагдана. Сэтгэлтэй улс цуг суугаад идэж уух нь тэдний хувьд, оочиж балгах тоолон нь үнсэж байгаа юм шиг, дур булаамаар бие биедээ хүрэлцэн шүргэлцэх боломжийг олгоно. Шар айраг юм уу дарсаа сараана цэцгийн цоморлогоос шүүдрийг уух лугаа адил ганц аяганаас ууна. Нийлсэн хоёр сэтгэлтэн үдшийн цагаар ийнхүү байх нь ижил хоёр шувуу шиг санагддаг бус уу. Гуинплен Деядаа туслан, талх махыг нь жижгээр хэрчиж, цайг нь аяганд нь хийж өгөнгөө улам ойртон шахаж сууна.

— Үгүй ер! гэж Үүрс дуугарах боловч сайх үглэлт нь өөрийн эрхгүй инээмсэглэлээр солигдоно.

Чоно ширээн доор амиа борлуулан, ногдсон яснаасаа өөр юунд ч анхаарлаа үл хандуулна.

Винос, Фиби хоёр ногдсоноо хуваан идэж, хэнд ч саад болохгүй хувиа аргална. Хүнээс бишүүрхэн дөлөх нь арилаагүй байгаа энэхүү хоёр хагас зэрлэг хоорондоо цыганаараа шулганалдана.

Хоолны дараа Дея, Фиби Винос хоёртой хамт «эмэгтэйчүүдийн хэсэг рүү» явна. Үүрс, Гомогоо «Ногоон

хайрцгийн» доор гинжинд нь уяхаар цуг гарахад, Гомерийн баатар ч юм уу Их Карлын шадар цэрэг шиг дурласан хүнээс агтчин болж хувирсан Гуинплен морьд руугаа явна. Шөнө дунд болоход бүгд давсан жинд явж, зөвхөн өөрт ногдсон хариуцлагаа мартаагүй чоно л байсхийгээд л өрөөсөн нүдээ нээн харж хэвтэнэ.

Маргааш өглөө нь цөм дахин цуглацгаана. Өглөөний цайндаа бүгдээрээ адилхан талх, гахайн давсалсан махтай идэж 1678 оноос Англид хэрэглэх болсон цайгаар даруулна. Дараа нь Дея, Үүрсийн зөвлөснөөр, бие султайн учир испани заншлаар хэдэн цаг дугхийж байх хооронд Гуинплен, Үүрс хоёр тэрэгний доторхыг янзлан, нүүдлийн амьдралтай хүмүүст захаас аван байдаг элдэв жижиг сажиг зүйлийг гадаа янзалж, аялуулна.

Гуинплен, хааяа нэг өдрийн од шиг «Ногоон хайрцгаа» орхин салхинд гарахдаа, аль болох хүн амьтангүй замаар, эзгүй хээр явна. Хот руу орох болбол зөвхөн шөнийн цагаар, гудамжинд царайгаа танигдуулчихгүйн тулд өргөн хүрээт бүрх малгайгаа нүд рүүгээ дарж өмсөөд явна. Түүний царайг зөвхөн тайзан дээр л харж болно.

Ер нь ч тэгээд «Ногоон хайрцаг» хотоор орох нь ховор. Хорин дөрөвтэй Гуинплений үзсэн хамгийн том хот нь Таван боомт байжээ. Гэлээ ч Гуинплений нэр алдар нэмэгдэж цуурайтсаар байв. Эгэл жирийн хүн зоны хүрээнээс хальж, дээд давхаргад улам дуулдсаар байлаа. Яармагийн хачин сонин зүйлийг сонирхогчид, элдэв шалдав ховор нандин, хачин жигтэй юмны хойноос хөөцөлдөгчдийн дунд, хаана ч юм, нэг газраас нөгөөд нүүдэллэсэн, энд ч нэг, тэнд ч нэг үзэгдээд өнгөрдөг, ер бусын царай зүстэй хүн гарч гэнэ хэмээх яриа амнаас ам дамжих болов. Түүний тухай амтай бүхэн шагшин, эрж хайж, «Тэр... хаана байна! Яаж нэг хардаг юм билээ?» гэлцэнэ. «Инээмтгий хүн» яахын аргагүй цуунд гарчээ. Түүний цуу ямар нэг хэмжээгээр «Гэсгээгдсэн наждад» ч туяагаа тусгана.

Ийнхүү байтал нэгэн өдөр, нэр алдрыг хүсэн, бодолдоо автсан Үүрс,

— Лондон орох хэрэгтэй гэж хэллээ.

Гуравдугаар дэвтэр. АН ЦАВ ҮҮССЭН НЬ

I. «Тедкастерийн буурчийн газар»

Тэрхэн үед Лондонд ганцхан гүүр байсан нь байшин барилга дээр нь барьчихсан Лондоны гүүр байлаа. Энэ гүүр нь Лондоныг, Темза мөрний хайргаар хучигдсан, зарим газраа жинхэнэ хавчил гэмээр нарийн мухар гудамж сүлжилдсэн Саутворк тосгонтой холбож өгнө. Хоттойгоо адилхнаар уг дүүрэг нь элдэв төрлийн байшин барилга, орон сууц, модон мухлаг пингээр шаваастай байсан нь гал гарахад ганц идэш нь болж өгөхөөр ажээ. 1666 он үүний үнэн болохыг харуулсан билээ.

Тэр үед Саутворкийг Соудрик гэж дуудаж байсан бөгөөд өнөөдөр бараг Соузоурк гэж дуудаж байна. Ер нь английн нэрийг дуудах хамгийн сайн арга нь түүний эгшгийг дуудахгүйд л байгаа юм. Жишээ нь, Саутгемптоныг шууд л Стпнтн гээд хэлчих.

Тэр үед Четэмийг «je t'aime¹⁵³» гэж дуудаж байсан үе.

Тухайн цагийн Саутворк, Вожирар¹⁵⁴ Марсельтай адилхан байдаг шиг одоогийн Саутворктой адилхан байлаа. Тэр үед хөл хөдөлгөөн тасардаггүй боомттой тосгон байсан бол одоо хот болжээ. Темза мөрөн дээр барьсан аварга урт том, хуучин хананд том том цагариг бэхэлж, гол мөрний онгоцнуудыг аргамждаг байв. Энэ ханыг Эффрокийн хана буюу Эффрок-Стоун гэдэг байлаа. Йорк, саксоных байхдаа Эффрок хэмээх нэртэй байсан юм. Домгоор бол, уг хананы бэлд Эффрокийн нэгэн ван осолдон живсэн юм гэдэг. Үнэндээ ч тэр хавийн ус нь ямар ч ван живчихээр гүнзгий билээ. Ус татарсан үед ч хүртэл гүн нь арван алдаас доошгүй байдаг билээ. Энэ найдвартай зангуут зогсоол далайн хөлгийг ч өөртөө татах агаад, голландын хуучирсан цүдгэр далбаат хөлөг «Вограат» энгүүндээ Эффрок-Стоуны зогсоолд зангуугаа хаядаг байлаа. «Вограат» долоо хоног тутам, Лондоноос Роттердам, тэндээсээ буцаад Лондон руу шууд аялал хийнэ. Бусад онгоц өдөрт хоёр удаа Детфорд, Гринвич юм уу Гресвенд рүү ус татрах үед яваад, түрэх үед буцаж ирнэ. Гресвенд хүрэхэд хэдийгээр хорин бээрээс хэтрэхгүй ч гэлээ зургаан цаг явна.

«Вограат» өнөөдөр бол зөвхөн далайн музейд л харж болохоор цөөрсөн хөлгүүдийн нэг байлаа. Түүний цүндгэр их бие нь жонкийг¹⁵⁵ санагдуулна. Тэр үед Франц, Грекийг аль болохоор жишээ болгодог байхад Голланд, Хятадыг ихэд дуурайдаг байжээ. «Вограат» нь онгоцныхоо хөндийд ус нэвтэрдэггүй эгц босоо халхавч ханатай, хоёр далбаатай хүнд хөлөг агаад голдоо гүнзгий

том өрөөтэй, тавцангийнхаа хошуу хитэгт, өнөөгийн цамхагтай төмөр хөлөг шиг тавцан нь хажуу хашлагагүй хөлөг байлаа. Хажуугүй байсан нь далайн шуурганы үед усны түрлэгийг багасгах илүү талтай боловч түүний хажуугаар онгоцны багийг далай руу шидчих гээд байдаг аюултай байв. Өндөр давлагаа ямар ч торох юмгүй учир тавцан дээр буй далайчийг хамаад явчих талтай байв. Далайд унаж амиа алдах нь байнга тохиолдох учир иймэрхүү маягийн хөлгийг яваандаа хэрэглэхээ больжээ. «Вограат» бүр Гресвендэд ч зогсохгүйгээр шууд Голланд орно.

Эффрок-Стоуны ёроолоор хагас нь хад, хагас нь зориудаар хийсэн хуучны чулуун мөг байдаг байсан нь хөлгийг усны түвшин ямар ч үед хамаагүй хананд аргамжихыг хөнгөлнө. Хананд хоорондоо нэлээн зайтай хэд хэдэн газар шат гаргажээ. Энэ нь Саутворкийн хойд үзүүр болж байлаа. Овоолсон шороон далан нь засмал эргийн хашлага лугаа адилаар Эффрок-Стоуны сэрвэн дээгүүр тохойлдон доош харах бололцоотой болгожээ. Эндээс Темза мөрөн нүдний өмнө харагдана. Голын нөгөө эрэгт Лондон хотын зах болж, тариалангийн талбай эхэлнэ.

Эффрок-Стоуны ойролцоо, Темза мөрний тохойд Сент-Жемсийн ордны бараг эсрэг талд, Ламбет-хаусын ар талд, тэр үед Фокс-хол хэмээн нэрлэгддэг асан зугаацах газраас холгүй шаазан сав хийдэг ваарын үйлдвэр, өнгийн шил лонх хийдэг шилний үйлдвэр хоёрын хооронд, шимтэй өвс ногоо халиурсан, Францад, модон бөмбөг наадах талбай гэж алдаршсан, Англид bow ling-green¹⁵⁶ хэмээгдэгч том өргөн талбайн нэг байдаг байлаа. Bow ling-green гэдгийг бид bou lingrin болгочихжээ. Өнөөдөр энэхүү ногоон нугыг гэртээ бий болгосон бөгөөд тэгэхдээ зөвхөн ширээн дээр л байлгаж байна. Ногоон цэмбээр ширгийг орлуулан, түүнийгээ ясан бөмбөг цохих (биллиард) гэж нэрлэнэ.

Ер нь тэгээд bowling-green гэдэг үгтэй адилхан бульвар (boulevard-boule vert) гэдэг үг байхад бид нар bowlingrin гэдэг үг гаргасны учир ойлгомжгүй юм. Толь бичиг гэгч ийм буурьтай эрхэмд иймэрхүү илүү хээнцэр байдал юунд хэрэгтэй байдгийг гайхаад барамгүй юм..

Саутворкийн «ногоон нугыг» Таринзофилд гэдэг байсны учир нь эрт дээр цагт Таринзо-Моклайн түшээ гүн хэргэмтэй байсан Гастингсын түшээ гүнд харьяалагдаж байжээ. Таринзофилд түшээ гүнээс Теткастер түшээ гүнд шилжин, дараа нь гүн Орлеаны ван нэлээд сүүлд Пале-роялийг түрээсэлсэн шиг нийтийн зугаалгын газар болгон түрээсэлжээ. Хожим нь цагийн эрхээр Таринзофилд

эзэнгүй болсон хөрөнгө хэмээгдэн сүмийн харьяаны нутаг болох нь тэр.

Таринзофилд нь нэг ёсны, илбэч, овлогч, тэнцүүрчин, алиа хошин жүжигчин, хэсүүл хөгжимчдийн саравч, урц заарцагласан, ёнзон хамба Шарпын хэлсэнчлэн «чөтгөрийг сонирхон харахаар ирсэн» элдэв жорын сониуч амьтад цаг үргэлж бужигнасан байнгын яармагийн талбай байлаа. «Чөтгөрийг сонирхох» гэдэг нь жүжиг үзэх гэсэн үг ажээ.

Нэг талаар яармагийн театруудаас үзэгчдийг нь булаадаг ч нөгөө талаар тэдэнд үзэгчид өгч байдаг нэлээн хэдэн гуанз, гоёл чимгээ зүүсэн талбай руу нүүрэн талаа харуулан, жилийн турш ашиг орлого чамлахааргүй олно. Энэ нь жирийн гуранзууд болохоор зөвхөн өдрийн цагаар л онгойно. Үдэш, эзэд нь хаалгаа цоожилж аваад, түлхүүрээ хармаалаад гарна. Эдгээр гуанзны зөвхөн ганц нь л буурчийн газрын маягтай бөгөөд «ногоон нуга» даяар цорын ганц бөх бат сууц байлаа. Яармагийн урцыг бол дуртай цагтаа буулгаад аваад явчихна. Тэр бүх нүүдлийн жүжигчдийг нэгэн газарт тогтоох юм гэж байхгүй. Тэд бол угаасаа нүүдлийн амьдралтай улс.

«Тедкастерийн буурчийн газар» гэж талбайн хуучин эзний нэрээр нэрлэгдсэн сайх байшин нь гуанз гэхээсээ илүү дэн буудал, хоолны газар гэхээсээ илүү буурчийн газартай төстэй байлаа. Том дааман хаалгаар нь ороход өргөн хашаа харагдана...

Талбай руу гарсан энэ хаалга нэг ёсны «Тедкастерийн буурчийн газрын» ёслолын орц байлаа. Дэргэд нь орж гарч байгаа улсын энгүүндээ ашигладаг хажуугийн хаалга бас байна. Албан ёсны бус, ташрамын бүх юмс олонхын дурыг татаж байдгийг хэлэх юун. Энэ намхан хаалга талбайгаас гуанз руу орж гарч байх цорын ганц үүд байв. Үүдээр алхангуут л уудам ч гэсэн утаа униар дүүрсэн намхан таазтай, ис тортог суусан ханатай, ширээ сандал өрсөн архины мухлагт шууд ороод явчих нь тэр. Үүдний дээр, хоёрдугаар давхарт цонх гаргаж, түүний төмөр тагтархуу юман дээр буурчийн газрын хаягийг дүүжилжээ. Сайтар оньслон түгжсэн дааман хаалга хэзээ ч онгойхгүй учир хашаанд орохын тул заавал гуанзны дундуур өнгөрөх хэрэгтэй болно.

«Тедкастерийн буурчийн газар» эзэн, зарц хоёр л байна. Эзнийг Никльс, зарцыг Говикем гэнэ. Эргэлзээгүй Николай байснаа англи дуудлагаар Никльс гэгддэг болсон эзэн нь нарийндаа хатсан бэлэвсэн эр, ямагт хуулиас айн чичирч, түүнийг хүндэтгэж явдаг хүн ажээ. Үсэрхэг гартай, өтгөн хөмсөгтэй эр байлаа. Орж ирсэн хүмүүсийг үйлчлэн, Говикем гэж дуудуулагч арван дөрвөн настай

жаал хүүгийн хувьд, тэр нь данхар толгойтой, дүрсгүй царайтай, ямагт хормогч зүүнэ. Үсийг нь тожийтол зассан нь түүний хараат байдлыг нь илчилсэн санаа бололтой. Жаал хүү доод давхарт, хуучин нохойн хонуур байсан бяцхан пинд унтана. Энэхүү хонуурынх нь цонхшуу юм нь «ногоон нуга» тийш харсан дугариг нүх байлаа.

II. Салхинд урсгах уран үг

Зэгсэн хүчтэй салхи сийгж, хүйт даасан нэгэн үдэш, болж л өгвөл гудамжинд гарахгүй юм сан хэмээн хүн болгон бодож баймаар тэнгэр муухай аашилсан үед, нэг хүн Таринзофилдийг хөндлөн гарч явснаа гэнэт «Тедкастерийн буурчийн газрын» хана доор зогсов. 1704-1705 оны өвлийн сүүл сар байлаа. Хувцсаар нь харвал усан цэрэг баймаар энэ хүн цаанаа л нэг хүдэх энгийн хүнд баймааргүй, харин ордныхонд баймаар намба төрхтэй, өндөр гоолиг нуруутай эр ажээ. Тэр яагаад зогсов гэвэл чагнах гэж зогсжээ. Хэнийг чагнаа юм бол? Хананы цаана буй хашааны хаа нэгтэй цуурайлах, хөгшин хүнийх боловч, гудамжаар явж байгаа хүнд дуулдахаар чанга дуугарч байгаа хүний дууг чагнажээ. Мөн энэхэн үес, нөгөө хүн яриад байгаа хашаанд, олон хүн дүнгэнэлдэх нь чих дэлсэв. Нөгөө дуу өгүүлрүүн:

— Лондоны оршин суугч эрэгтэй эмэгтэй хүмүүс ээ, би энэ байна. Би та бүхэнд англи болж төрсөнд тань чин сэтгэлийн баяр хүргэе. Та нар бол агуу их үндэстэн. Бүр цааш нь хэлбэл, та нар агуу их муусайн амьтад. Та нар нударгаар нүдэлцэхдээ, сэлмээр хатгалцсанаас илүү сайн байна. Та нар гайхамшигт ажилтай улс. Та нар бол бусад үндэстнийг идэж байдаг үндэстэн. Үүнээс гайхалтай эрхэлсэн ажил гэж хаана байх вэ! Бусад бүх ард түмнийг залгина гэдэг Английг тусгай байранд гаргаж байна. Улс төр, гүн ухаан, колони бүхэл бүтэн ард түмнийг залан удирдах урлаг, гар урлал, үйлдвэрлэл өөрсдөдөө ашиг авчрах муу юмыг бусдад хийх чадварын талаар та нар хэнтэй ч зүйрлүүлшгүй, гайхалтай улс. Энэ орчлон дэлхийд, нэг нь «Хүмүүсийн эзэмшил» нөгөө нь «Английн эзэмшил» гэсэн хоёр хаяг зурайн байх тэр өдөр ойрхон байна. Би хүнд ч, хүмүүст ч хамаарагддаггүй ч гэлээ үүнийг та нарын алдрын төлөө л баталж байна. Учир нь би доктор гэдгээ айлтгая. Нэг нь нөгөөдөө саад болохгүй. Эрчүүдээ, би зааж сургаж байна. Юуг гэж асуу л даа. Хоёр янзын зүйлийг: мэддэг юмаа, бас мэддэггүй юмыг. Би эм тан зарж, санаа төрүүлдэг хүн. Ойртож байгаад, миний хэлэхийг сонс. Та нарыг шинжлэх ухаан уриалан дуудаж байна. Чихээ сайн тавь. Хэрэв тэр чинь жижиг бол жаахан үнэнийг тогтоож болох юм, хэрэв том бол тэр лүү чинь их хэрэгтэй хэрэггүй юм орно доо. Тэгэхээр анхаар даа. Би бол *psuedodoxia epidemica*¹⁵⁷ гэж нэрлэгддэг шинжлэх ухааныг заадаг хүн. Миний нөхөр хавьтсан ойртсоноо бүгдийг инээлгэдэг, би бол хүнд юм бодуулдаг. Инээдэм

гэдэг маань эрдэм мэдлэг шиг буянтай гарал үүсэлтэйн учир нэгэн хайрцагт хамтдаа байдаг юм. Демокритаас¹⁵⁸ «Чи үнэнийг яаж мэддэг юм?» гэж асуухад «Би инээж мэддэг» гэж хариулсан байдаг. Хэрэв надаас «Чи яагаад инээж байна?» гэж асуувал би «Яагаад гэвэл үнэнийг мэдэж байна» гэж хариулна. Гэхдээ би инээдэггүй хүн. Би бол алдаа мадаг, атгаг сэжгийг устгадаг хүн. Би та нарын тархи толгойг цэвэрлэж өгнө. Бузар булайгаар дүүрсэн байна. Бурхан бол ард түмэн андуурч буруутаад хууртагдаж байхыг зөвшөөрдөг. Худлаагаар даруу зан гаргадгаа больцгооё. Би бурханд, түүний буруу байлаа ч гэсэн сүсэглэн итгэдэг гэдгээ нуух юмгүй хүлээнэ, гэхдээ би хог новш байхыг харвал (алдаа мадаг гэдэг маань угтаа хог новш гэсэн үг) шүүрээд хаячихна. Би энэ танин мэдэхүйгээ хаанаас олж авав аа? Энэ бол миний хувийн хэрэг. Хүн бол өөрийнхөөрөө юм мэдэж авахыг эрмэлздэг. Лактанций¹⁵⁹ Вергилийн хүрэл толгойд асуулт тавихад цаадах нь хариулж байлаа. Хоёрдугаар Сильвестр¹⁶⁰ шувуутай ярилцдаг байсан. Шувуу ярьж чаддаг юм гэж үү дээ? Эсвэл хутагт хамба маань жиргэдэг байгаа юу? Энэ бол бүрхэг орхигдсон асуудал. Жүүдийн шашны гэвш Елиазарын үхсэн хүүхэд нь хутагт Августинтай ярилцаж байсан гэдэг. Энүүхэндээ гэж хэлэхэд, би энэ бүх явдлын үнэн эсэхэд сүүлчийнхээс нь бусдад эргэлздэг л юм. Үхсэн хүүхэд ярьсан байж гэж саная. Гэвч хэлэн дор нь одны ордыг дүрслэн гаргасан алтан пайз байсан гэж байгаа. Тэгэхээр энэ маань бас л булхай гэсэн үг. Юмны учир амархан тайлагдаж байгаа биз. Намайг тал тохой татдаггүй хүн гэдгийг харж байгаа биз дээ. Би үнэнийг хуурмаг зүйлээс нь ялгаж, салгадаг. За тэгэхээр, бүдүүлэг харанхуй хүмүүс болох та бүгд, мэдээжээр мунхаглаж явдаг зарим төөрөгдлийг чинь, би та нарыг салгахыг туйлаас хүсэх учраас одоо хэлж өгье. Диоскорид¹⁶¹ лантанз дотор ямар нэг бурхан байна гэж боддог байжээ. Хризипп¹⁶² түүнийг нь үхрийн нүдэнд, Иосиф¹⁶³ манжинд, Гомер¹⁶⁴ саримсанд байна гэж үздэг байж. Тэд цөмөөрөө андуурсан юм. Эдгээр ургамалд бурхан бус чөтгөр л байгаа юм. Би хэрэг дээр нь шалгаж үзсэн. Еваг¹⁶⁵ уруу татсан могойнд, Кадмюсынх¹⁶⁶ шиг хүний нүүр байсан гэдэг худлаа юм. Гарсиа да Горто, Кадамосто, Жан Гюго, Тревскийн хамба нар, заан барихын тул мод хөрөөдөөд л гүйцээ гэдгийг үгүйсгэдэг. Би тэдэнтэй санал нийлэх тал руу байдаг. Иргэд ээ, хуурамч үзэл санаа бол Люциферийн¹⁶⁷ мэрийж зүтгэсний ачаар л гарч ирсэн юм. Тийм ноёны засаглалын үед, хамгийн хор хөнөөлтэй төөрөгдөл, мунхаг явдал гарахаас ч өөр арга байхгүй. Сайн санаат хүмүүс ээ, Клавдий

Пулькр¹⁶⁸ тахианууд чингэлгээсээ гарахгүй байснаас үхсэн юм биш, хэргийн гол нь Люцифир түүний хадан гэртээ очих цаг ойртсоныг нь мэдчихээд, тахиануудыг будаа тонших дургүй болгочхож дөнгөсөнд байгаа юм. Вельзовул¹⁶⁹ эзэн хаан Веспасианд¹⁷⁰ сохор доголлон хүнд хүрээд л нүд оруулж, хөлтэй болгодог ид шидийг өгсөн нь уг нь хүний хувьд магтууштай боловч, түүний санаа нь өөдгүй юм. Ард иргэд ээ, эм тан болгож өвсний үндэс хэрэглэж, зөгийн бал эр тахианы цусаар нүдэнд жин тавьдаг эрдэмтэн нэртэй мэхч луйварчдаас дөлж явцгаа, бүү итгэ. Энэ бүх худал хуурмагийг ялган салгаж сурцгаа. Юпитер (Бархасбадь¹⁷¹) байгалийн шаардлагыг хангаснаар Орион¹⁷² (Гурван марал) ертөнцөд мэндэлсэн гэдэг ташаа зүйл, угтаа бол Меркури¹⁷³ (Буд) л дээрх байдлаар энэ одыг бий болгосон юм даа. Адамд хүйс байсан гэдэг ч худлаа. Хутагт Георгий¹⁷⁴ мууг устгахад дэргэд нь ямар ч гэгээний охин байгаагүй юм. Хутагт-Иеронимагийн өрөөнд, задгай зуухан дээр нь дүүжин цаг байгаагүй юм. Нэгдүгээрт, агуйд байгаа хүнд юуных нь өрөө байх билээ, хоёрдугаарт тэнд задгай зуух ч байсангүй, гуравдугаарт, тэр үед цаг гэгч юмыг бодож олоогүй байсан үе. Бүгдийг нь шалгаж үз! Алдаа завхралаа засацгаа! Намайг сонсож байгаа эрхэм хүмүүс ээ, хэрэв та нарт, бамбайн өвсийг үнэрлэсэн хүний тархинд гүрвэл бий болж, самуурсандаа бух зөгий болон харагдаж, адуу бөхгөнө болж, амьсгаа хураасан хүн амьдаасаа хүндэрч, маргад эрдэнэ ухнын цусанд хайлж уусан, нэгэн модон дээр харагдах төөлүүр хорхой, ялаа, аалз гурав өлсгөлөн, дайн, тахал болон хувирч гөрөөсний толгойноос олдсон өтөөр унадаг өвчнийг анагаадаг гэвэл ийм юманд бүү итгэ. Энэ бүгд цөм төөрөгдөл. Харин үнэн юм гэвэл, одоо хэлье. Далайн нохойн арьс аянгаас хамгаална, бах шороогоор хооллодог учраас л толгой дээр нь чулуу ургаж байгаа нь тэр, иерихоны сарнай битүүний өдөр цэцэглэдэг, могой яшил модны сүүдрийг даадаггүй, заанд үе мөч байхгүй учир, мод түшин зогсоогоороо унтана, хэрэв тахианы өндгийг бах мэлхийгээр даруулах юм бол, түүнээс сааван төрүүлдэг дигваранз гарна, хэрэв сохор хүн нэг гараа шүтээний зүүн талд тавиад, нөгөөгөөрөө нүдээ дарах юм бол хараа орно, хурьцал эдлээгүй ч гэсэн эх болж болно. Сайн санаат иргэд ээ, энэ барин тавин үнэнийг биедээ шингээн зооглогтун? Ингээд та бүхэн бурханд яаж итгэхээ өөрөө мэдэцгээ. Жүржид итгэдэг цангасан хүн шиг үү, ташуурт итгэдэг илжиг шиг үү гэдэг нь та нарын дур. Одоо би та бүхэнд жүжигчдээ танилцуулъя.

Энэ хоромд зэгсэн хүчтэй салхи дэгдэн, бусад барилгаас сондгой баригдсан сайх буурчийн газрын цонхны хүрээ, самбарыг тачигнуулав. Энэ нь тэнгэрийн хүрхрэлт газарт бууж уу гэлтэй. Уран үгт маань хувь хяраатай хүлээзнэснээ, үгээ үргэлжлүүлэн;

— Завсарлага. Дургүйцэх юм алга. Аквилон яриг л дээ. Эрчүүд ээ, би уурлахгүй. Салхи гэдэг маань бусад ганцаардмал даяанч, аглагч нарын адилаар их яриасаг. Дээр тэр хүнтэйгээ ярих юм билээ. Тэгээд л энд үглэж, байгаа нь энэ. За би тасарсан яриагаа үргэлжлүүлье. Та нарын өмнө жүжигчид маань байна.

Бид дөрвүүлээ *A lupo principio* миний анд найз чононоосоо эхэлье. Энэ маань өөрийн үүлдэр угсааг нуудаггүй юм. Хар л даа, та нар. Ухаалаг, төлөв, сургуультай амьтан байгаа биз дээ. Бурхан харваас эхлээд үүнийг шинжлэх доктор болгох гэж байсан бололтой, гэвч үүний тул жаахан маанагдуу байх хэрэгтэй байсан аж, гэтэл энэ маань тийм биш. Үүнд маань атгаг сэжиг гэж байхгүй, бас язгууртан дээдсийн өчүүхэн ч үнэр байхгүй гэдгийг нэмэн хэлье. Өлөгчин чонотой байх бүрэн эрхтэй ч гэлээ, бололцоо гарахад гичийтэй ойртохоосоо ч буцахгүй. Үүний үр удам нь хэрэвзээ байдаг л юм бол, эхийнхээ цор цор хуцах, эцгийнхээ улих хоёрыг дуурайн архирдаг байж таараа. Учир нь энэ маань ульдаг юм. Хүмүүстэй хамт байхад улихаас ч биш яах вэ. Соёл иргэншилд хүлцэл өчин хуцдаг ёс бий. Ийм зөөлөн ааш зан уудам сэтгэлийн илрэл яахын аргагүй мөн. Гомо бол нэг ёсны төгс төгөлдөр нохой. Нохойг хүндэтгэх хэрэгтэй. Нохой гэж ёстой хачин жигтэй амьтан хэлээрээ дуугарч, сүүлээрээ инээдгийг нь бод л доо. Хүмүүс ээ, Гомо бол ухаанаараа, мексикийн үс ноолуургүй, кселейцениски хэмээх чононоос огт дутахгүй агаад өр зөөлөнтэйн хувьд хавьгүй илүү юм. Тиймээс ч номхон амьтан. Хүнд тусалдгийнхаа хувьд даруухан. Өрөвчхөн сэтгэлтэй, хэнд ч хэзээ ч туслахад бэлэн байдаг агаад түүнийгээ чимээгүйхэн хийчихнэ. Буруу хөлийнхөө хийж байгаа сайн юмыг зөв нь мэдэхгүй. Сайн тал нь үүндээ байгаа юм даа. Миний хоёр дахь андын тухай гэвэл, мангас гэдэг ганц үг л хэлье. Түүнийг харцгаа, та минь. Дээрэмчид нялх байхад нь далайн эзэнгүй эрэг дээр хаячихсан юм. Нөгөөдөх нь бол сохор. Ийм хүн мундаа юу? Үгүй. Бид цөмөөрөө сохор харалган. Харамч хүн сохор, алтыг л харж дурлана уу гэхээс, баялгийг хардаггүй. Эхлэлтийг харна уу гэхээс төгсгөлийг нь хардаггүйгээрээ үрлэгч хүн сохор. Өөрийн үрчлээг хардаггүйгээрээ сээтэгнүүр хүүхэн сохор. Өөрийн мунхгийг хардаггүйгээрээ эрдэмтэн хүн сохор. Мэхчин булхайчийг хардаггүйгээрээ шударга хүн сохор. Бурхныг олж хардаггүйгээрээ

мэхчин хүн ч сохор. Орчлонг бүтээсэн өдрөө, өөрийнх нь бий болгосон зүйл дотор чөтгөр шургалсныг хараагүй бурхан ч бас сохор. Та нарын дүрийг ажиглалгүй ярьж байгаа би, өөрөө ч гэсэн сохор. Биднийг дагаж яваа сохор бүсгүй бол битүүлэг шүтлэгийн тайлгач юм. Веста¹⁷⁵ түүнд зулаа итгэж бариулсан байхад үгүй гэх газаргүй. Түүний зан аальд нь нэг л битүүлэг тэгсэн атлаа хонины ноос шиг зөөлөн юм бий. Би түүнийг батлахгүй гэх нь ээ эзэн хааны охин л гэж итгэж явдаг. Магтууштай, итгэхгүй байх явдал бол ухаантай хүний шинж.

Миний хувьд гэвэл би сургана ч, анагаана ч, элдвийг эргэцүүлэн бодно ч, эм тан өгч болно ч. Chirurgus sum¹⁷⁶

Би чичрэг, хумхаа, тахал зэрэг бас бус халдварт өвчнийг анагаана. Бараг бүх төрлийн эмгэг, үрэвсэл бол жинхэнэ өвчнийг гадагш гаргахад хэрэгтэй бөгөөд, сайтар сувилсны үр дунд бүднийг улам ч муу зовлонгоос салгадаг билээ. Гэлээ гэхдээ би та нарыг олон толгойт хатги буюу мундастай бол гэж зөвлөхгүй ээ. Энэ бол ёстой ямар ч ашиггүй балай өвчин. Түүнээс болж үхнэ, тэгээд л гүйцээ. Би бол мунхаг, бүдүүлэг хүн биш. Би уран үг, яруу найргийг дээдлэн, энэхүү эх дагинастай, ямар ч гэмгүй ойрхон харилцаатай байдаг хүн. Өөрийн яриаг зөвлөгөөгөөр дуусгая. Хүндэт ноёд, хатагтай нар аа, сэтгэлийнхээ гэрэл гэгээтэй хэсэгт, буянт үйл, даруу зан, шударга ёс, үнэнч шулууныг, хайр дурлалыг хөгжүүлцгээ. Ийм маягаар, хорвоогийн хүн бүр, цонхон дээрээ савтай цэцгийг байлгаж чадах билээ. Ноёд, дээдсээ би хэлдгээ хэлж дууслаа. Одоо жүжиг эхэлнэ.

Нөгөө хувцсаараа усан цэрэг баймаар хүн, эл яриаг гаднаас дуустал нь сонсож аваад, буурчийн газрын намхан танхимд орж ширээ сандлын хоорондуур явсаар орохын үнэ болгож шаардсан хэдэн зоосыг төлөнгөө шууд хүн заарцагласан хашаа руу гарвал, өрөөсөн ханаа буулгасан дугуйтай урц харагдлаа. Тайзан дээр баавгайн туламлан өвчсөн арьс угласан нэгэн өвгөн, муухай баг шиг царайтай залуу эр, сохор бүсгүй, чоно зогсож байна.

— Чөтгөр алгад! Мөн гайхалтай жүжигчид ээ! гэж усан цэрэг хашхирах шахам дуугарав.

III. Замын хүн дахин гарч ирсэн нь

Мэдээжээр «ногоон хайрцаг» Лондонд ирснийг уншигчид маань мэдэж аваа биз ээ. Тэд Саутворкд буудаллажээ. Хэзээ ч, тэр бүү хэл өвөл хүртэл яармаг нь хаагддаггүй үнэлж баршгүй сайн талтай «ногоон нуга» Үүрст өөрийн эрхгүй аятайхан санагдсаныг хэлэх юун.

Хутагт Павелын сүмийн оройг харж байх нь ч тааламжтай. Явж, явж, Лондон нь чамлахааргүй сайн юмтай хот байлаа. Хутагт Павелд зориулсан сүм барина гэдэг бас ч гэж мэдээжийн зүрх зориг гаргалаа гэсэн үг. Сүмийн жинхэнэ хутагт нь хутагт Петр байв. Хутагт Павелын дэндүү их дээгүүр санаа нь сэжиглэлтэй агаад, сүмийн талаар тухайлахдаа буруу номтны үзэл рүү орчихно. Хутагт Павел бол тохиолдлоор л хутагт болчихсон юм. Тэр нь арын хаалгаар тэнгэрт гарчихсан ажээ.

Сүм гэдэг бол өлгөөс хаяг гэсэн үг. Хутагт Петр нь ягшмал номлолын хот Ромыг илэрхийлж байдаг бол, хутагт Павел буруу номтны хот Лондоныг илэрхийлнэ.

Ертөнцийг үзэх үзэл нь орчлонгийн бүх юмыг хамарч байдаг Үүрс, энэхүү өнгө ялгааг бүрэн үнэлж чадахтайгаа хүн учир, түүний Лондон руу тэмүүлсэн нь хутагт Павелд талтай байдгаасаа ч болсон байж болох юм.

Үүрс «Ногоон хайрцагт» цаанаасаа зориулчихсан юм шиг «Тедкастерийн буурчийн газрын» хашаанд суурьшиж авчээ. Тэрэг нь ч бэлэн зэлэн театр гэсэн үг. Дөрвөлжин хашаа, гурван талаасаа сууцын байшингаар хүрээлүүлсэн агаад харин дөрөв дэх талд нь байшингийн эсрэг харуулан босгосон битүү ханатай байлаа. Энэ хананд дааман хаалгатайн ачаар хашаанд оруулж ирсэн «Ногоон хайрцгийг» тулгаж тавьжээ. Багана дээр тогтоосон асартай урт модон тагтыг хоёрдугаар давхрын суугчдад зориулан босгожээ. Тэр нь дотор нүүрэн талын дагуу эгц өнцөг гарган тужид нь үргэлжилнэ. Нэгдүгээр давхрын цонхнууд нь хаяаны суудал болж, чулуу дэвссэн хашаа голын суудал болж, тагт нь дээд давхрын суудлын үүрэг гүйцэтгэнэ. Хананд тулган тавьсан «Ногоон хайрцгийн» өмнө «үзэгчдийн танхим» ийнхүү бий болох нь тэр. Энэ нь «Отелло», «Лир ван», «Хар шуургыг» анх тавьсан «Бөмбөрцгийг» өөрийн эрхгүй санагдуулна.

«Ногоон хайрцаг» байгаа хананы нэг буланд жүчээ байна.

Хуулийг хүндлэхийн эрхээр, чоныг үлэмжхэн ацаг хөлсөөр байлгах болсон буурчийн газрын эзэн Никльстэй Үүрс бүх зүйлсийг тохиролцож амжжээ. «Ногоон хайрцгаас» ховхолж авсан «Инээмтгий хүн Гуинплен» гэсэн зарлалыг буурчийн газрын хаягтай хамт өлгөжээ. Гуанзны танхимд хашаа руу шууд гарсан хаалгатайг уншигчид мэдэж байгаа билээ. Энэ хаалганы хажууд ёроолыг нь цөмлөсөн том торхоор, Фиби, Винос хоёр ээлжлэн суух болсон «мөнгө хураагчийн» шовгор хийжээ. Бүх юм өнөөгийнхтэй ойролцоо гэж хэлж болно. Орсон хүн болгон мөнгө төлнө. «Инээмтгий хүн» гэсэн өлгөөсний доор, цагаан будгаар будаж дээр нь нүүрсээр «Үүрсийн алдарт бүтээл «Гэсгээгдсэн нажид» гэдгийг томоор бичсэн хаягийг хоёр хадаасаар тогтоожээ.

«Ногоон хайрцгийн» эгц өмнө шахуу, тагтны голд, хоёр талаараа модон хананцартай шилэн хаалгаар ордог суудлыг «сурвалжит дээдэст» зориулан засжээ.

Тэнд нь хоёр эгнээгээр, арван хүн сууж болохоор ажээ.

— Бид Лондонд байна. Сурвалжит үзэгчид ирэхэд хүртэл бүх юмыг бэлэн зэлэн байлгах хэрэгтэй гэж Үүрс хэлсэн ажээ.

Түүний хүслээр энэ «суудалд» буудлын аль олигтой сандлуудыг тавьж, гол дунд нь, интоорыг товойлгосон алтан хатгамалтай утрехтийн хамба хилэнгээр бүрсэн том түшлэгтэй сандал байгаа нь, ямар нэг түшмэлийн авгай жүжигт морилж ирж магадгүй гэдгийг бодолцсон хэрэг.

Жүжгээ ч тоглож эхлэх нь тэр.

Хүн зон ч дорхноо л чамлалтгүй цуглав.

Гэвч сурвалжтаны тусгай суудал хоосон байдаг байлаа.

Үүнийг л муухан гэхгүй юм бол, ямар ч алиалагч, жүжигчин ийм амжилтыг урьд өмнө үзэж явсан нь үгүй. Саутворк тэр аяараа «Инээмтгий хүнийг» харах гэж хойно урдаа орон гүйлдэнэ.

Таринзофилдийн хэрмэл илбэчин, жүжигчдийг Гуинплен жинхэнэ сандралд оруулж бачимдуулах нь тэр. Ангар шувууны торонд дайран орсон шонхор хамаг тэжээлийг нь тоншин идэх лүгээ адилаар, Гуинплен тэднээс хамаг үзэгчдийг нь булаан авчээ.

Сэлэм ам руугаа гудрагч, алиалагч зэргийн тааруухан жүжигчдээс гадна, яармагийн талбайд, жинхэнэ ший жүжиг тоглуулдаг байжээ. Морьтон, утсан дээр тэнцэгчтэй циркийн зүгээс өглөөнөөс орой болтол ятга, бөмбөр, хуур, хийл, хуучир, хонх, угалзан бүрээ, хэц, хэнгэрэг, хөөрөгт цуур, герман лимбэ, англи урама, гуурсан бишгүүр, хөндлөн бишгүүр зэрэг бүх л төрлийн хөгжмийн зэмсэг сүртэйгээр цуурайлна.

Том дугариг цацарт, орчин үеийн пиренейн хурдан гүйгч Дульма, Борденав, Мейлонг нар хэдийгээр Пьерфитийн шовх оройгоос Лимасоны хөндийд, бараг унаж байгаа юм шиг буудаг ч гэсэн тэдний чигчий хуруунд нь ч хүрэмгүй үсэрч харайгчид тоглоно. Тэнд бас алиалагч-бартай нүүдлийн амьтны хүрээлэн ч байв. Түүнийг амьтан сургагч нь ташуурдахад, шилбүүрийг нь угз татан аваад, гөрмөл сурыг нь амандаа үмхэнэ. Гэвч энэхүү аймшигт савартай, ангайсан амтай архирдаг алиалагчийг ч Гуинпленээс болоод хүн амьтан тоохоо больжээ.

Сонирхон хачирхаж, алга таших, хүн зон цуглан, мөнгө цуглуулах гээд л «Инээмтгий хүнд» хэрэгтэй юм болгон байх ажээ. Нүд ирмэхийн зуур л энэ бүхэн бий болно. «Ногоон хайрцгаас» өөр, хүнд тоогдох юм үлдсэнгүй.

— «Гэсгээгдсэн нажид» маань, дийлсэн нажид болчхов оо хөөрхий гэж жүжигчдийн этгээд хэлээр «ширээний бүтээлгийг өөр лүүгээ чангаадаг болсон» буюу Гуинплений ололтын хагасыг өөрийн болгосон Үүрс хэлнэ.

Гуинплен ер бусын амжилт олж, аз нь шовойж байлаа. Гэхдээ энэ нь орон нутгийн чанартай байв. Алдар нэрд усан саадыг давна гэдэг айхавтар юм байдаг. Шекспирийн нэр Англиас Францад хүрч ирэхэд зуун гучин жил шаардагдсан юм. Ус бол хана гэсэн үг, хэрэв Вольтер, дараа нь үүндээ ихэд харамсах болсон, Шекспирт туслаагүй сэн бол, Шекспир манай өнөө үед ч хүртэл, хананы нөгөө талд, хэсэгхэн аралдаа л алдар нэртэй чигээрээ үлдсэн байхыг хэн байг гэхэв.

Гуинплений алдар Лондоны гүүрийг даван гарсангүй. Тийм том хотод цуурай нь цуурайтан, шагшаан болчихоор хэмжээнд хүрээгүй байлаа. Ямар ч байсан анхныхаа үед л ийм байдалтай байв. Гэвч Саутворк нэгийн зэрэг алиалагчийн нэр алдрыг мөрөөдөн агч хорхойг нь дарахад хангалттай байлаа

— Олзны маань хүүдий ч, нүгэл үйлдэж эндчихсэн охин шиг л барин тавин харсаар байтал цүдийгээд ирлээ шүү гэж Үүрс өгүүлнэ. «Ursus rusus»-ээ эхэлж тоглоод дараа нь «Гэсгээгдсэн наждаа» тоглоно.

Завсар хооронд нь Үүрс, «энгастримитийнхаа» гайхамшигт авьяасыг үзүүлж уруулаа хөдөлгөлгүй дуугарч алдана. Үзэгчдийн аль дуртайнх нь хоолойг дуурайн, дуу дуулж, хашхирч гуугчиж байгаа хүний дууг цаад хүмүүсийг нь гайхаж амаа ангайтал нь адилхан дуугарч, заримдаа олон хүний шуугиан шагшааныг

гаргахдаа, ганц өөрт нь үй олон хүн байдаг юм уу даа гэмээр их дуу гарган хүнгэнэнэ. Гайхалтай авьяас шүү!

Үүнээс гадна, бид бүгдийн дээр мэдсэнчлэн, Цицероноос дутуугүй уран үгийг урсган, эм тан наймаалж, хүн зон эмчлэн, тэр байтугай өвчтөнийг хөл дээр нь босгоод ирнэ.

Саутворк илбэдүүлжээ.

Саутворкт «Ногоон хайрцгийг» баяр хөөр болон халуун дотноор угтаж авсан нь Үүрст тааламжтай байсан боловч, түүнийг гайхуулсангүй.

— Эд чинь дээр цагийн тринобантууд шүү дээ хэмээснээ, — Эдний юмны учрыг нарийн мэддэгийнх нь хувьд бол, Беркст суудаг атробатчууд, Сомерсетийн оршин суугчид болох бельгичүүд, Йоркийг үндэслэн байгуулсан парисынхантай харьцуулаад ч байх юм алга л даа гэж нэмж хэлнэ.

Жүжгийн үеэр гол суудал болсон буурчийн газрын хашаа, өмсөж зүүсэн нь ядуу ч гэлээ, сэтгэл санаа нь бахдан сэргэсэн үзэгчдээр дүүрнэ. Эд бол завьчин, ачаа зөөгч, хөлгийн мужаан, гол мөрний онгоцны жолоо баригч, дөнгөж сая хуурай газар хөл тавьчихаад олсон хэдийгээ наргиан наадам, хүүхэн хоёрт үрж байгаа усан цэргүүд байлаа. Мөн хөтөч дэлбэгч, архины мухлагийн байнгын хүмүүс, ямар нэг сахилга бат алдан, улаан дүрэмт хувцасныхаа хар дотрыг эргүүлэн өмсөхөөр шийтгэгдэж «хар торгон цэрэг» гэж олны дунд хочлогдох болсон цэргүүд байна. Бүгд л гудамжнаас шууд театрт орж, тэндээсээ шууд архины мухлаг руу зүтгэнэ. Тэнд хэчнээн уулаа ч гэсэн жүжгийн амжилтад ямар ч муу юм болохгүй нь сайхан. «Хүмүүсийн шаар» гэж нэрлэм эдгээр улсын дотор нэг хүн бусдаас содон харагдана. Өндөр нуруутай, зузаан лагс, бусдын дэргэд хавьгүй өргөн мөртэй тэр хүн бусад харчуулын адил хувцас өмсөх боловч тэр нь цэвэрхэн, урагдаж цоороогүйг нь харваас тэдэн шиг тийм ядуу биш ажээ. Хөөрсөн сэтгэлээ барьж чадахгүй, нударгалан байж зай гарган, үс нь сэгсийн хараал ерөөл урсгаж, орь дуу тавьснаа, элэг доог хийж, хэрэгцээ гармагц хэгжүүн нэгнийх нь нүдийг таглаад тэр дор нь лонх дарс өгөхөөр болно.

Энэ байнгын хүн нь нөгөө бидний танил, гудамжнаас орж ирэнгүүтээ дуу алдсан эр мөн байлаа.

Урлагийг ойлгодог хүний хувьд тэр бээр «Инээмтгий хүнийг» харангуутаа үнэлэн, Гуинпленд дур татагджээ. Өдөр болгон үзэгдэхгүй боловч ирсэн үедээ шууд л үзэгчдийг «дагуулан хөгжөөгч» нь болно. Алга ташилт нижигнэн нүргэлж, амжилтын

давалгаа нэгэнт тааз байхгүй учир таазанд хүртэл гэж хэлж болохгүй ч гэлээ хангалттай цэлийх үүлэнд хүрэн алдана (Сайх үүлнээс, заримдаа дээр нь адар гэж байхгүй, Үүрсийн суут бүтээлийг бороо асгаран, хайр найргүй шүрших нь бий).

Яваа яваандаа Үүрс нөгөө хүнийг ажиглан, Гуинплений хараанд ч мөн өртөгддөг болжээ.

Түүний нүүрэнд муу юм огтхон ч хийхгүй, анд болж болох хүн гэдэг нь илт ажээ.

Үүрс, Гуинплен хоёр тэр хүнтэй болж өгвөл танилцах эсвэл наад зах нь ядахдаа чухам хэн болохыг нь мэдэхийг тэсгэлгүй хүснэ.

Нэгэн орой тайзны ар тал болсон «Ногоон хайрцгийн» гал зуухны өрөөний хаалганы дээр, буудлын эзэн Никльстай санамсаргүй дайралдсан Үүрс, үзэгчдийн дунд байгаа нөгөө хүнийг заагаад,

— Энэ хүнийг та таних уу? гэж асуув.

— Танихаар барах уу?

— Хэн бэ?

— Усан цэрэг.

— Нэрийг нь хэн гэдэг юм? гэхэд,

— Том-Жим-Жек гэж буурчийн газрын эзэн хариулав.

Тэгээд эзэн буудал руугаа очихоор «Ногоон хайрцгийн» ар талын эвхдэг шатаар бууж явангаа ер бусын гүн утгатай сургамж хэлсэн нь:

— Тэр хүн лорд биш нь ямар харамсалтай вэ. Мөн айхавтар монди гарах байсан даа!

Хэдийгээр «Ногоон хайрцаг» буурчийн хашаанд буудалласан ч гэлээ, ердийн хэвшлээ юугаар ч өөрчилсөнгүй, хуучнаараа л бүхнээс зожгирсон хэвээр байлаа. Буурчийн газрын эзэнтэй хааяа нэг үг солилцдогийг эс тооцвол, тэд буудалд байнга суудаг хүмүүс болон түр орж гарч байгаа хүмүүстэй огтхон ч хавьтаж ойртохгүй, тэрүүхэндээ л бүгж өдрийг өнгөрөөнө.

Саутворкт ирснээсээ эхлэн Гуинплен, жүжгээ дууссанаас хойш, хүмүүс хоол ундаа идэж уун, морьдод өвс тэжээлийг нь өгч, Үүрс, Дея хоёр унтахаар өөр өөрийн хэсэгт орсны дараагаар шөнийн арван нэг, арван хоёр цагийн хооронд «ногоон нуга» руу эрүүл агаараар амьсгалахаар гардаг зуршилтай болжээ. Хүсэл мөрөөдөлд автах нь, од түгсэн тэнгэр цэлийх шөнийн цагаар салхинд гаргахад хүргэдэг. Залуу нас гэдэг бол битүүлэг хүлээлт, ийм ч учраас залуу хүмүүс шөнийн цагаар ямар ч зорилгогүй, дуртай нь аргагүй тэнүүчлэх нь бий. Ийм орой болсон хойно яармагийн талбайд ийш тийш гуйвлан

сүүдгэнэх хэдэн архичнаас өөр хүн амьтан үл үзэгдэнэ. Хүнгүй болсон архины гуанзнууд хаалгаа хааж «Тедкастерийн буурчийн газрын» намхан танхимын гэрэл унтарч, хаа нэгтээ буланд, хамгийн сүүлчийн үйлчлүүлэгчийг гэрэлтүүлж байгаа лаа ёлтгонон, сайн хаагдаагүй буудлын цонхны хаалтын завсраар бүдэг гэрэл тусаад, бодол болон, сэтгэл нь ханаж, мөрөөдөлдөө хөтлөгдсөн Гуинплен өгүүлшгүй аз жаргал сэтгэлд нь оргилон буйг мэдрэн, энэхүү хагас хаагдсан хаалганы ойролцоо өөдөө сөөргөө алхална. Тэр юун тухай бодоо вэ? Деягийн тухай, бүгдийг, тэгсэн мөртөө юуны ч тухай биш, хамгийн нандин зүйлийг бодно. Деягийн хажууд байгаа ямар нэг учигаас татагдаад байгаа юм шиг, буудлаас хэзээ ч хол явдаггүй байлаа. Хашаанаас гараад хэдхэн алхах л түүнд хангалттай.

Тэгээд буцаж хэдийнээ цөм унтчихсан, «Ногоон хайрцагтаа» ороод өөрөө унтахаар хэвтэнэ.

IV. Үзэн ядалт огт төсгүй хүмүүсийг ч хамаатан садан болгодог

Бусдын амжилтад, ялангуяа түүнээс болж хохирсон хүмүүс бүр ч нүд үзүүрлэдэг. Идүүлсэн нь иддэгтээ талтай байх нь тун ховор зүйл. «Инээмтгий хүн» бол жинхэнэ том үйл явдал байлаа. Ойр хавийн илбэ жилбэ гаргаж, марзганагчид эгдүү нь хөдлөн зэвүүрхэж байлаа. Театрын амжилт гэдэг бол хүн зоныг сорон хамж, эргэн тойрноо эзгүйрүүлдэг догшин хуй юм. Өөдөөс нь харсан мухлаг сандралд орно. «Ногоон хайрцгийн» орлого нэмэгдэх тусам, бид дээр хэлсэнчлэн, ойр хавийн, хөрш зэргэлдээ улсуудынх нь орлого багасна. Саяхан болтол үзэгчдээр тасардаггүй байсан задгай шийний урцнууд гэнэтхэн хүнд тоогдохоо больжээ. Энэ нь хоорондоо холбоотой хоёр саванд хийсэн шингэний нэгийнх нь түвшин доошлох нь, нөгөөгийнх нь түвшин дээшилснээр л мэдэгдэж байдагтай утга нэг юм.

Бүх театр энэхүү түрэлт, татралтыг мэднэ. Нэгнийх нь ус дүүрэх нь нөгөөгийнхийгөө гүехэн болгох нөхцөл болдог. Хавь ойрын тайзан дээр авьяасаа олны өмнө үзүүлж, бүрээ бөмбөрийн дуугаар үзэгчдийг татдаг яармагийн шоргоолжны үүр, «Инээмтгий хүнээс» болж сүйрч байгаагаа ойлгон цөхрөөд шээс алдчих дөхөвч, хажуугаар нь Гуинпленийг гайхан нүд гялбаж байлаа. Хэрмэл жүжигчин, марзганагч, алиалагч, илбэч жилбэч цөм түүнд атаархана. Адгуусны хоншоор гаргасан энэ амьтан мөн азтай яа! Утсан дээгүүр явагч жүжигчин эхчүүд, өөрсдийнхөө хөөрхөн багачууд руу уурласан байртай харж, Гуинпленийг заан,

— Чамд ийм нүүр ам заяадаггүй яасан харамсалтай юм!
гэцгээнэ.

Зарим нэг нь тийм хөөрхөн төрсөнд нь зэвүүцэн хүүхдээ балбаж өгнө. Цөөн бус эх, хэрэв нууцыг нь мэддэг сэн бол хүүхдийнхээ нүүр амыг олон таван юм бодолгүй «Гуинплен маягаар» зэрэмдэглэхээр байлаа. Ямар ч орлого олдоггүй сахиулсан тэнгэрийнх шиг царай, эзнээ баяжуулдаг чөтгөрийн хоншоортой харьцуулахад юу ч биш.

Нэг удаа ёстой л сахиусан тэнгэр гэмээр өхөөрдөм хөөрхөн царайтай хүүгээ, дурлалын тэнгэр болон тайзан дээр тоглож байхад эх нь,

— Бидний хүүхдүүд яахаараа ийм заяагүй төрдөг байна аа! Гуинплений ийм азтай төрснийг хараач гэж дуу алдан нударга зангидаж хүүдээ харуулснаа, — Үүнийг чинь мэддэг сэн бол ёстой нэг үзүүлээд өгөх юм сан! гэж хашхичжээ.

Гуинплен бол алтан өндөг гаргадаг тахиа байлаа. «Ямар гайхамшигтай юм бэ!» гэж бүх л урцанд ам амандаа шуугилдана. Хэрмэл жүжигчид гайхан шагширч, тачаадсан маягтай шүдээ хавиран байж, Гуинпленийг нүд салгалгүй харцгаана. Хорон санаа бахдахыг, атаархал гэж нэрлэдэг, тэр үедээ бүр ульдаг гээч. «Ногоон хайрцгийн» хөршүүд «Гэсгээгдсэн нажид»-ын амжилтыг баллахаар оролдон, хоорондоо ярьж тохироод шүгэлдэж, хуухиран, элдвээр орилж үзжээ. Энэ нь Үүрсийн хувьд, Гортензийн маягаар үзэгчдэд хандан уран үг урсгах шалтаг болж, Том-Жим-Жекэд, шуугьсан олныг журамтай болтол нь хэд хэдийг нь сайтар нударгалаад өгөх боломж олгожээ. Том-Жим-Жекийн ийнхүү нударганы амт үзүүлсэн нь Гуинпленийг өөртөө улам татан, Үүрсийн хүндэтгэлийг хүлээх болгожээ.

Гэлээ ч үүнийгээ ойртож илэрхийлсэнгүй. «Ногоон хайрцгийн» жүжигчид маань хуучин хэвээр тэрүүхэндээ зожгирон хувиа борлуулж, довоо шарлуулах ажээ. Том-Жим-Жекийн хувьд, нөгөө толгойлогч нь болсон шаарнуудаасаа хамаагүй илүү гэдэг нь харваас илт, хэнтэй ч дотносож нөхөрлөдөггүй, элдэв хэрүүл зодооныг өдөөн түйвээгч, нэг харагдаж байснаа, нэг ор сураггүй алга болон, хүн болгоны танил авч нэг ч хүний анд биш эр байлаа.

Том-Жим-Жекээс гомдолгүйгээр алган боов амссаныхаа дараа ч Гуинплэнд жөтөөрхөгч нар ялагдлаа гэдгээ хүлээсэнгүй. Жүжгийг нураах гэсэн оролдлого нь бүтэхээ байхаар Таринзофилдийн хошин жүжигчид гомдол мэдүүлжээ. Тэд захиргаанд гомдол гаргав. Энэ бол ерийн алхам. Бидний замд хэн нэгний амжилт хөшилдөөд

байвал, бид эхлээд хүн зоныг турхирч үзээд дараа нь цагдаагийн газраас тусламж хүсдэг шүү дээ.

Марзганагч жүжигчидтэй, санваартнууд дуун дээр нийлжээ. «Инээмтгий хүн» бурхны ном айлдагчдад ч хохирол үзүүлжээ. Задгай ший тавьдаг газар хоосроод зогсоогүй сүм ч эзгүйрчээ. Саутворкийн таван сүмийн эзэмшлийн дугануудад мөргөлчид цөөрчээ. Гуинпленийг харахын тул хүмүүс, мөргөлөөс дутаан дөлдөг болов. «Гэсгээгдсэн нажид», «Ногоон хайрцаг», «Инээмтгий хүн» гэсэн энэхүү буруу номтны булай үгс бурхан шашны ариун номлолоос дээр үзэгдэх болжээ.

Бүх хүнд улих дуун *vox clamantis deserto* ийм нөхцөлд тааламжтай байна гэж байхгүй агаад, засгийн эрх мэдэлтнээс тусламж гуйна. Таван сүмийн ширээт лам Лондоны хамбад гомдол тавин, хамба ламтан өөрийн ээлжид хатан хаанд хошуу өргөжээ.

Хэрмэл жүжигчдийн гомдолд шашныг бас дурдсан байлаа. Шажин бурхныг доромжилж байна гэж өчжээ. Гуинпленийг илбэч жилбэч хэмээгээд, Үүрсийг буруу номтон гэжээ.

Санваартнууд нь харин эсрэгээр, нийтийн хэв журмыг зөрчиж байна гэдэг шалтаг гаргажээ. Сүмийн асуудлыг дуугүй орхиод, улсын хурлын хууль баримтыг зөрчсөнийг эш татжээ. Энэ нь илүү зальжин арга байв. Учир нь энэ хэрэг, зургаахан сарын өмнө 1704 оны арван сарын 28-нд нас эцэслэсэн Локкийн үед болсон агаад, Болинброк¹⁷⁷, Вольтерд амархан халдаачихсан үл итгэх үзэл оюун санаанд нэгэнт нөлөөгөө үзүүлж эхэлсэн үе байлаа. Хожим нь Лойол хутагт хамбыг дахин босгож ирсэн шиг, Веслей дахин христосын хөлгөн сударт хандах болсон юм.

Ийм маягаар «Ногоон хайрцаг» руу хоёр талаас нь хэрмэл жүжигчид «таван судрын¹⁷⁸» нэр барин, санваартнууд цагдаагийн журамд дулдуйдан дайрч гарах нь тэр. Нэг талаас тэнгэр, нөгөө талаас замын хөдөлгөөн, гэхдээ санваартан нар нь замын хөдөлгөөний төлөө, марзганагч жүжигчид нь тэнгэрийн төлөө байлаа. Санваартнууд «Ногоон хайрцгийг» замын чөлөөтэй хөдөлгөөнд саад тотгор болж байна гэгцгээж, хэрмэл жүжигчид нь шүтээнийг доромжилж байна гэж мэдүүлжээ.

Ийм юманд хүрчихээр ямар нэг шалтаг байв уу? Гомдол мэдүүлчихээр үндэс гаргасан юм гэж үү? «Ногоон хайрцгийн» өдүүлсэн гэмт хэрэг нь юу байв аа? Хэргийн гол нь тэдэн дотор чоно байжээ. Англид чоно байхыг хориглодог. Ямар ч нохой байж болно, чоно бол болохгүй. Англи, хуцдаг нохойг зөвшөөрөх боловч ульдаг нохой байхыг зөвшөөрөхгүй байдаг нь хашаа гэр, ой модыг

заагласан хэрэг. Саутворкийн сүмийн таван харьяаны газрын хамба, дэмч нар дээшээ тавьсан гомдолдоо, чоныг хуульд харш хэмээн ялласан хааны болон улсын хурлын олон горим дүрмийг дурджээ. Төгсгөлд нь, Гуинпленийг гянданд хорьж, чоныг торонд суулгах, тэгээд болдоггүй юм бол Англиас хөөн гаргахыг... гуйжээ. Тэдний үзэж байгаагаар бол ингэхийг нийгмийн хэв журам, энгийн зорчигчдыг аюулаас хамгаалах гарцаагүй явдал... шаардаж байгаа ажээ. Бас шинжлэх ухааны нэрийг ч барьсан байв. Тэд, VIII Генрихийн үеэс үүсэн байгуулагдсан төр улс шиг өөрийн гэсэн тамга тэмдэгтэй, өвчтэй хүнийг гэмт хэрэгтний хэмжээнд авааччихдаг, тогтоолыг нь зөрчиж, зааврыг нь гажуудуулсан хэнийг ч болов шоронд хийлгэчих эрхтэй, ард иргэдийн эрүүл мэндийг хамгаалахад чиглэгдсэн олон дүрэм журмынхаа дотор шинжлэх ухааны үндэстэй баталсан, «Лондоны наян эмч нар» хэмээх эрдмийн байгууллагын гишүүдийн тодорхойлолтыг эш татжээ. Энэхүү маргахын аргагүй баримтад нь «Хэрэв чоно хүнийг түрүүлээд харчихвал, тэр хүн амьдралдаа сөөнгөтнө. Түүнээс гадна хүнийг барьж ч болно» гэсэн байлаа.

Ийнхүү Гомо хяхан хавчигдахын золиос болжээ.

Үүрс буудлын эзний ачаар сайх битүүлэг хатгалгыг мэдэж байжээ. Тэр нь цагдаагийн газар, шүүх хоёрын савраас айх учир сэтгэл түгшсэн нь мэдээж. Шүүхийн түшмэлээс айж эмээхэд, ганцхан сүрдүүлэг л хангалттай. Заавал ямар нэг юманд буруутай байх албагүй. Үүрс ер нь захирагч, шүүхийн харгалзагч, шүүгч түшмэлүүдтэй ойртож хавьтахыг огтхон ч хүсдэггүй байв. Тэдгээр эрх тушаалтнуудыг ойроос харахыг ч боддоггүй байв. Туулай тайга нохойтой учрахыг хэр зэрэг хүсдэг билээ, түүнтэй адилхнаар Үүрс шүүхийн газрын төлөөлөгчидтэй танилцахыг хүсдэггүй ажгуу.

Тэр нь Лондонд ирсэндээ хэдийнээ амаа барьдаг болоод байлаа.

— Жаргалтай газар хүн тогтдоггүй ээ гэж өөртөө хэлснээ, — Би энэ зүйр үгийг хэрэггүй юм гэж боддог байлаа, тэгсэн чинь андуурчээ. Тэнэг үнэн чинь явсаар байгаад хамгийн зөв зүйтэй юм байдаг байжээ гэж үглэнэ.

Шашны нэрийг барин дайрч байгаа хэрмэл жүжигчид, анагаах ухааны төлөө санаа нь зовсон санваартан гээд л тийм хүчтэй нэгдсэн хүчний эсрэг, Гуинплений нь илбэ жилбэ гаргасан хэмээн, Гомог галзуу өвчин тараагч хэмээн сэжиглэгдсэн «Ногоон хайрцагт» цорын ганц тус болж байгаа юм байсан нь, Англид том хүч байдаг орон нутгийн захиргааны назгайран гараа хамхин суудаг нь байлаа. Чухам энэхүү юу ч хийхгүй назгайрдгаас л английн эрх чөлөө бий

болжээ. Англид эрх чөлөө гэдэг нь, Английг эргэн тойрон хүрээлсэн далайтай нь адилхан. Энэ бол далайн түлхэлт гэсэн үг. Бага багаар ёс заншил хуулийнхаа дээр гарчихна. Ёроолгүй ангалд живсэн юм шиг, айхавтар догшин хууль зүй, түүний дээр нь заншил байна. Гэвч догшин хэрцгий хууль дүрэм, одоо ч гэсэн, нөгөө нүүгэлтсэн тунгалаг эрх чөлөөний завсраар нэвчин гарсаар л байгаа билээ. Англи гэдэг маань энэ юм.

«Инээмтгий хүн», «Гэсгээгдсэн нажид» болон Гомо, өөрсдийн эсрэг хэрмэл марзганагч жүжигчид, бурхны ном номлогчид, хамба нар, доод танхим, лордын танхим, эзэн хаан, Лондон, бүх Английг ч босголоо гэсэн Саутворк түүний талд зогсож байгаа үед тайван байж болох байлаа. «Ногоон хайрцаг» хотын дүүргийн ганц зугаацуулдаг юм нь болж, орон нутгийн захиргаа ч түүнд хааш яаш хандаж буй бололтой. Англид, хэрэгсэхгүй байна гэдэг бол хамгаалж байна гэсэн үг. Саутворк бүрэлдэхүүнд нь ордог Сюрей гүнлэгийн захирагч хараахан хөдлөхгүй байгаа үед Үүрс уужимхан амьсгаа авч, Гомо бөх гэгч унтаж болох ажээ.

«Ногоон хайрцгийг» үзэн ядаж гадуурхсан нь талаар болсон учир, харин амжилтад нь улам түлхэц болжээ. «Ногоон хайрцагт» хуучныхаасаа дордох юм юу ч байсангүй. Харин ч илүү гэмээр. Үзэгчдийн дунд далдуур хөнөөн, улыг нь шагайх гэсэн тухай яриа чих дэлсжээ. Үүнийхээ ачаар илүү их нэр алдартай ч болов. Хүн зон, ховыг зөнгөөрөө гадарлан, золиос болж байгаагийнх нь талд оржээ. Хавчин хяхагдахын бай болно гэдэг өрөвдөх сэтгэлийг төрүүлдэг. Ард түмэн, засгийн хуруу заналхийлэн чичилж байгаа бүгдийг зөнгөөрөө хамгаалалтдаа авдаг. Ховын золиос бол, ам хүрэхийг хориглосон жимс бөгөөд үүнээсээ болоод улам ч хазаад үзэх юм сан гэдэг хорхой хөдөлгөнө. Хэн нэгэнд ялангуяа өндөр тушаалтанд тааламжтай бус алга ташилт хэчнээн аятайхан санагддагийг хэлэх юун. Үдшийг ч таатайхан шиг өнгөрөөчхөөд, хажуугаар нь хавчигдаж байгааг нь өрөвдөж буйгаа илэрхийлээд, хавчиж байгаад нь зэвүүцсэнээ гаргаж сууна гэдэг тааламжтай зүйл. Дарлагдаж буйг ивээснээ үзүүлэхийн хамт, зугаацаад авна шүү дээ. «Ногоон нугын» нүүдлийн урцны эзэд хоорондоо тохиролцон, дургүйцэн исгэрч, «Инээмтгий хүнийг» аль болохоор эвгүй байдалд оруулах санаагаа орхиогүй үргэлжлүүлж байсныг нэмж хэлье. Тэгтэл үүнээс илүү түүний амжилтад тус болох юм гэж байсангүй. Дайснууд дуу шуугиан дэгдээх нь ялалтыг улам бататган, өргөжүүлж байлаа. Магтаж байгаа найз бол хормон муулж байгаа дайснаас өмнө дуугаа хураадаг билээ. Муу хэлэх хор болдоггүй.

Үүнийг дайснууд ойлгодоггүй юм. Тэд дуугаа татан муучлахгүй байж чаддаггүй бөгөөд үүнд л тэдний ашиг тус байгаа юм даа. Тэд амаа хамхиж яагаад ч чаддаггүй бөгөөд үүгээрээ л хүн амьтны сонирхлыг татчихна, «Гэсгээгдсэн наждыг» үзэхээр цуглах хүн зон улам олширсоор байлаа.

Үүрс, далдуур хуйвалдаан, гомдол гарсан тухай Никльсын хэлснийг дотроо хадгалан жүжигчин хүнд зайлшгүй хэрэгтэй тайван байдлыг нь алдуулж, сэтгэлийг нь зовоохгүй гэсэндээ энэ талаар Гуинплэнд үг цухуйлгасангүй. Хэрэв муу юм тохиолдоход хүрвэл, энэ тухай хэзээ ч мэдэж амжина.

V. Очирт бэрээ баригч

Гэлээ ч нэгэн удаа Үүрс, улам сайн сэргэмжлэхийн тул дээрх болгоомжлолоосоо няцан, Гуинпленийг нэг сандраагаад авах нь зүйтэй юм гэж боджээ. Үнэндээ ч Үүрсийн бодолд, яармагийн хэрмэл жүжигчид, сүмийнхний битүү хатгалгаас илүү чухал асуудал энэ удаа тохиолдсон хэрэг. Орлого тоолж байх үеэр, шалан дээр унасан фартингийг [179](#) авангаа Гуинпен, хүн зоны ядуу зүдүүгийн бэлгэ тэмдэг болсон зоос, түүн дээр товойлгон гаргасан хаан титмийн агуу их мөлжигч хатан хаан Аннагийн дүрс хоёрын хоорондох эрс тэс ялгааг гайхахдаа, энэ талаар эргэцүүлэн бодож явдгаа, буурчийн газрын эзний дэргэд хэдэн ширүүн үгээр хэлчихжээ. Никльс сайх хэлснийг нь цааш нь дамжуулж, тэр нь явсаар Фиби, Винос хоёроор дамжин Үүрсийн чихэнд дуулдах нь тэр. Үүрс уурласандаа дээлдээ багтахгүй шахам юм болов. Хуйвалдагчийн үг! Эзэн дээдсийг доромжилно гэнэ ээ! Гуинпленийг аль муухайгаар харааж загнаж гарав.

— Наад ой гутмаар амаа тат. Хүч чадалтай томчууд юм хийлгүй зүгээр сууж, өчүүхэн доогуурх нь амаа хамхиж явдаг хуультай юм. Ядуу хүнд байдаг цорын ганц нөхөр бол дуугүй байх явдал, «За» гэдэг ганц богино үгийг л хэлэх ёстой. Юу гэвэл хүлээж авч, юм бүгдийг зөвшөөрөх бол түүний ганц эрх юм. Шүүгчид ч «за», эзэн хаанд ч «за» гэх хэрэгтэй. Дээдэс гэдэг чинь дур нь хүрвэл биднийг гүвдэж л байдаг улс, би ч гэсэн балбуулж л явлаа. Энэ бол тэдний эрх дархын хэрэг, бидний ясыг хэмхчлээ гэхэд тэдэнд хотойх юм юу ч байхгүй. Яс ярхирах гэдэг бол нэг төрлийн бүргэд, саваа бэрээний анхных нь болох очирт дулдуйг бишрэн хүндэтгэе. Хүндэлнэ гэдэг бол болгоомжлол, үг дуугүй захирагдана гэдэг бол биеэ хамгаална гэсэн үг. Хааны тухай халтай үг хэлж байгаа хүн бол, арслангийн зогдрыг хайчлах гэж зүрхэлсэн охин өөртөө ямар аюул авчирч байгаатай утга нэг юм. Үнэн чанартаа сохор зоосноос ялгаагүй фартингийн тухай тэнэг юм ярьсныг чинь дууллаа, зах дээр бол годгор давсалсан май загас авдаг, тэр зоосны талаар өндөр дээдсийн дүрстэй зоосны талаар чихэнд чимэггүй, олиггүй юм хэлсэн байна билээ. Болгоомжил. Дотроо бодолтой, дороо суурьтай байж үз. Шийтгэл гэж нэг юм байдгийг сана. Хуулийг хүндэлнэ ээ хө. Чи, зулзаган мод огтолсон хүнийг шулуухан дүүжлүүрт аваачдаг, ам алдах дуртай хүнийг хөлд нь дөнгө углачихдаг оронд байна шүү. Энд архичныг ёроолыг нь цөм цохисон торхонд оруулаад, толгой,

гарт нь зориулж нүх гаргаад, явъя явж ч чадахгүй, хэвтье хэвтэж ч чадахгүй болгочихдог юм. Вестминстерийн сүмийн нутагт, танхимд хүн зодсон хүнийг насаар нь шоронд хорьж, эд хөрөнгийг нь хураадаг. Харин хааны ордонд тэгвэл баруун гарыг нь огтолно. Хамрыг нь сөргөөд дус гоожуулчихад л хэдийнээ өрөөсөн гаргүй болох нь байна шүү дээ. Буруу номтон гэж илчлэгдсэн хүнийг хамбын шүүхийн тогтоолоор түүдэгт шатаана. Кетберт, Симпсоныг үл ялих юмны төлөө л хүрдэлж алсан юм. Гурван жилийн өмнө 1702 онд, харж байгаа биз дээ, сав саяхан, улсын хуралд өмнөхөн нь үг хэлсэн доод танхимын төлөөлөгчдийн нэрийг хэвлэн гаргаж жудаггүйтсэн Даниэль Дефо¹⁸⁰ гэгч нэг өөдгүй амьтныг гутамшгийн баганад хүлсэн юм. Эзэн дээдсээс урвасан хүнийг өрлөөд, зүрхийг нь суга татан, энэ зүрхээр нь хацрыг нь ороолгодог ёстой. Энэхүү шударга ёс, эрхийн үндсэн ойлголтыг наад бөндгөртөө хийж ав. Хэзээ ч илүү үг бүү дуугар, жаахан эвгүй юм болоход л яваад өгөхөд бэлэн байх хэрэгтэй. Миний зүрх зориг үүнд л байгаа юм, чи ч гэсэн үүнийг дагаж яв. Зориг гаргахдаа шувууг дуурай, чалчихдаа загасыг дуурай. Ер нь Английн сайн юм нь дэндүү зөөлөн хууль цаазтайдаа л байгаа юм.

Ийнхүү ятгаж авсны дараа Үүрс нэг хэсэгтээ тайвширч чадсангүй. Харин Гуинплен тоосон ч үгүй. Туршлагагүй залуу халуун насны зүрх зориг гэдэг энэ. Ер нь ч Гуинплений сандраагүй нь оножээ. Учир нь хэд хэдэн долоо хоног амар жимэр өнгөрч, хатан хааны тухай үг нь ямар ч уршиг тариагүй юм шиг байлаа.

Угийн ямар ч юманд амарлингуй байж сураагүй Үүрс л чимээ авсан бор гөрөөс шиг тал тал тийшээ сэрэмжлэн харна.

Гуинпленийг сурган загнаснаас хойш хэдэн өдрийн дараа, нэг удаа Үүрс талбай руу харсан дээврийн цонхоор харж байснаа, царай нь зэвхийрэв.

— Гуинплен!

— Юу вэ?

— Хараач.

— Хаашаа.

— Талбай руу.

— Тэгээд юу гэж?

— Тэр явж байгаа хүнийг харж байна уу?

— Хар хувцастай хүнийг үү?

— Тийм.

— Гартаа бороохой шиг юм барьсан хүнийг үү?

— Тийм.

- Тэгээд яагаа вэ?
- Тэгэхээр ийм байна. Гуинплен, энэ хүн бол wapentake
- Wapentake гэдэг чинь юу вэ?
- Энэ бол тойргийн гүйцэтгэгч түшмэл.
- Тойргийн гүйцэтгэгч түшмэл гэдэг чинь юу вэ?
- Энэ бол praepositus hundredi
- Тэр praepositus hundredi гэдэг ямар хүн бэ?
- Энэ бол аймшигтай түшмэл, зуутын дарга.
- Гарт нь юу байгаа юм?
- Энэ бол iron weapon
- iron weapon гэдэг юу юм бэ?
- Төмөр очирт бэрээ.
- Түүгээр юу хийдэг юм?
- Юуны өмнө түүнд тангараг өргөдөг юм. Ийм болоод л түүнийг очирт бэрээ баригч гэж нэрлэдэг.
- Дараа нь,
- Дараа нь түүгээр хэн нэгэнд хүрнэ.
- Юугаар?
- Төмөр бэрээгээр.
- Очирт бэрээ баригч төмөр бэрээгээр хүрнэ гэнэ ээ?
- Тийм.
- Энэ юу гэсэн үг вэ?
- Намайг дагаад яв гэсэн үг.
- Тэгээд, дагаад явах хэрэгтэй юу?
- Тийм.
- Хаашаа?
- Хаашааг нь яаж мэдэх вэ?
- Гэвч тэр чинь хаашаа явахыг хэлдэггүй юм уу?
- Үгүй.
- Яагаад?
- Тэр нэг ч үг дуугарахгүй, түүнд ч юм ярихгүй.
- Гэхдээ...
- Тэр чамайг төмөр бэрээгээр хүрэхэд л бүгдийг хэлчихлээ гэсэн үг. Чи дагаад явахаас өөр мөргүй.
- Хаашаа явах хэрэг вэ?
- Дагуулсан зүгт нь л.
- Чухам хаашаа?
- Түүний хүссэн зүгт л явна даа, Гуинплен.
- Явахгүй гэвэл яах вэ?
- Дүүжлэгдэнэ.

Үүрс толгойгоо дахин цонхоор цухуйлгаж харснаа, удаан гэгч нь амьсгаа авч,

— Тэнгэрийн өршөөл, хажуугаар өнгөрөөд явчихлаа! Манайх руу ирээгүй юм байна гэж хэлэв.

Гуинплений болгоомжгүй дуугарчихсан хэдэн үгнээс болж хов жив хошуу өргөх вий хэмээн Үүрс дэндүү их айчихсан бололтой.

Хажууд нь байхад хэлчихсэн Никльсын хувьд «Ногоон хайрцгийн» хөөрхийлөлтэй амьтдыг эрх баригчдын хараанд орууллаа гээд ямар ч ашиг байхгүй ажээ. «Гэсгээгдсэн нажид» хоёрын хоёр амжилтын баталгаа болж байлаа «Ногоон хайрцагт» урлаг ялан байхад, түүний ачаар архины мухлагт архидалт цэцэглэн идэвхжиж байлаа.

VI. Муурт байцаагдсан хулгана

Үүрс дахин сэтгэл зовох болсон нь үнэндээ зэгсэн аймаар зүйл байлаа. Энэ удаа яах аргагүй өөртэй нь холбоотой асуудал гарчээ. Бишопсгейтэд, гурван эвгүйхэн царайтай хүнээс бүрдсэн комиссын өмнө дуудагджээ. Эдгээрийн нэг нь вестминстерийн дацангийн төлөөлөгч, шашны номлолын доктор, нөгөө нь «Наятын эрдмийн байгууллагын» төлөөлөгч, анагаах ухааны доктор, гурав дахь нь Грешелийн эрдмийн байгууллагын төлөөний хүн, иргэний эрх, түүхийн ухааны доктор байлаа.

In omni re scibili¹⁸¹ болсон энэ гурван шинжээч, Лондоны зуун гуч, Мидлсекскийн гүнлэгийн далан гурван сүмийн харьяаны нутаг дэвсгэр дээр олны өмнө хэлсэн үгэнд хяналт тавьж байх үүрэгтэй агаад далимд нь Саутворкийг хянаж байдаг ажээ. Иймэрхүү бурхны номын шүүх одоо ч гэсэн Англид байсаар байгаа бөгөөд гэмтнүүдийг хайр найргүй гэсгээнэ. 1868 оны арван хоёрдугаар сарын 23-нд лордын нууц зөвлөгөөнөөр баталсан, Арчийн шүүхийн шийдвэрээр хутагт Макончи, жирийн ширээн дээр зул асаасны төлөө л донгодуулж, дээрээс нь шүүхийн зардлыг төлж байжээ. Бурхны хурал, мөргөл тоглоно гэж байдаггүй.

Ийнхүү нэгэн өдөр Үүрс гурван эрдэмтэн доктороос шүүхэд дуудагдсан бичиг авах нь тэр. Аз болоход, дуудах бичгийг өөрт нь гардуулсан учир, нууцыг задруулахгүй хадгалж чаджээ. Ганц ч үг дуугаралгүй ум хумгүй шаардсаныг гүйцэтгэн, чухам яаснаасаа болоод шазруун үг хэлсэн хэрэгт сэжиглэгддэг билээ хэмээн бодол болж дагжин чичирсээр очлоо.

Бусдад амаа хамхиж явахыг байнга зөвлөж сургаж явдаг хүнд энэ нь аймшигтай сургамж болжээ.

Garrule, sanate ipsum¹⁸² Журам сахиулагч албаны гурван доктор, Бишопсгейтийн нэгдүгээр давхрын том танхимын гүнд гурван хар арьсан бүрээстэй зөөлөн сандал дээр залран, толгой дээрх хананд нь Минос, Эак, Радамантын¹⁸³ цээж барималтай өмнөө ширээ, хөлийнхөө хажууд вандан сандал тавьжээ. Намбатай, төвшин дэмчийн араас танхимд орж ирсэн Үүрс, эрдэмтдийг харснаа, тэр дороо л толгой дээгүүр нь харагдах тамын орны догшин шүүгчдийн нэрийг сайх гуравт нэг нэгээр нь дотроо өгч амжжээ.

Тэр гурвын нэг, шашны номлолын доктор, Минос вандан дээр суу гэж дохив.

Баавгайг балаар, докторыг латинаар аргадаж болно гэдгийг мэдэх Үүрс хичээнгүйгээр шаланд хүртэл мэхийснээ, бөхийсөн чигээрээ хүндэтгэлийг үзүүлэн.

— Tres taciunt capitulum¹⁸⁴ гэж дуугарснаа, номхон хүлцэнгүй байдал зэвсэггүй болгодог ёсоор, толгой бөхийлгөсөн чигээр вандан дээр суув.

Доктор болгоны өмнө ширээн дээр бөөн бичиг цаас байх агаад түүнээ хуудас хуудсаар нь эргүүлнэ,

Минос байцаалтаа эхлэн,

— Та олны өмнө үг хэлдэг биз? хэмээн асуув.

— Тийм ээ гэж Үүрс хариулав.

— Ямар эрхтэй гэж тэр билээ?

— Би гүн ухаантан хүн.

— Энэ бол эрхтэй болгож байгаа хэрэг биш.

— Түүнээс гадна би хэрмэл жүжигчин.

— Энэ бол өөр хэрэг.

Үүрс санаа нь амран, уртаар амьсгаа авав. Минос үргэлжлүүлэн,

— Жүжигчний хувьд ярьж болно, харин гүн ухаантны хувьд та амаа хамхиж явах ёстой.

— Хичээж явъя гэж Үүрс хэллээ.

«Би чинь ярих дуртай хүн, гэтэл дуугарахгүй байх хэрэгтэй байдаг. Бэрхтэй юм болох нь ээ» гэж бодож байлаа.

Их л айж байв.

Бурхан номлогч асуултаа үргэлжлүүлэн,

— Та чихэнд чимэггүй юм ярьдаг хүн байна. Та бурхан шашныг доромжилж байна. Та барин тавин үнэнийг үгүйсгэж байна. Та жигшүүртэй цуу үг тарааж байна. Жишээлэхэд л, хурьцал эдлээгүй ч эх болж болно гэж хэлсэн байна.

Үүрс аажуухан толгойгоо өргөөд,

— Би тэгж хэлээгүй ээ. Би харин, эх боллоо ч гэсэн хурьцал эдлээгүй байж болно гэсэн юм гэв.

Минос бодол болсноо,

— Үнэндээ энэ чинь, шал өөр юм байна гэж хүнгэнэв.

Энэ нь чухамдаа адилхан зүйл. Гэлээ ч Үүрс анхны цохилтыг няцааж чадлаа.

Минос, Үүрсийн хариултыг тунгаан бодсоор, өөрийнхөө мунхагт хутгалдаж гүйцсэнээс болж нэг хэсэгтээ чимээ аниргүй болов.

Үүрсийн Радамант гэж нэрлэсэн түүх эрхийн доктор, Миносын барьц алдсаныг булах гэхдээ, Үүрсэд хандан,

— Хэрэгтэн, таны элдэв шазруун үг, төөрөгдлийг тоолъё гэвч барагдахгүй. Та жишээ нь, Брут, Кассий¹⁸⁵ хоёр замдаа негртэй тааралдсанаас болж Фарсалийн тулалдаанд¹⁸⁶ ялагдсан гэдэг баримтыг үгүйсгэсэн байна гэв.

— Би энэ нь бас Цезарь хамгийн авьяаслаг жанжин байснаар тайлбарлагдана гэж л хэлсэн хэмээн Үүрс бувтнав.

Түүхийн төлөөлөгч шууд домог руу орж,

— Та Актеоны¹⁸⁷ жигшүүрт явдлыг зөвтгөсөн байна гэв.

— Нүцгэн эмэгтэйг харчихлаа гэхэд эрэгтэй хүнд нэр төргүй юм болоод байх нь юу байх вэ гэж би бодож байна хэмээн Үүрс болгоомжтойхон зөрөөд үзэв.

— Та андуурч байна гэж шүүгч ширүүслээ.

Радамант дахин үүх түүх рүү орж,

— Митридат¹⁸⁸ хааны морин цэрэгт тохиолдсон золгүй явдалтай холбогдуулан та, зарим өвс ногооны бүхэнд мэдэгдэж байгаа шинж чанарыг үгүйсгэсэн байна. Та *securidica* өвснөөс болж морины тах ховхорч ойчихгүй гэж ярьсан байна.

— Өршөөх ажаамуу, би энэ шинж чанар зөвхөн *sterracavollo* гэдэг өвсөнд л байдаг гэж хэлсэн. Аль ч өвс ногоонд байдаг шинж чанарыг би үгүйсгээгүй сэн билээ гэснээ дуугаа улам намсган, — Аль ч хүүхэнд байдгийг мөн адил гэж нэмэн хэллээ.

Сүүлийнхээ үгээр Үүрс, хэчнээн сэтгэл зовж байгаа ч гэлээ барьц алдаагүй байна гэдгээ өөрөө өөртөө үзүүлэх гэж мэрийжээ.

— Би хэлснээ гүйцээгээдэхье гэж Радамант өөрийнхөөрөө зүтгэсэн хэвээр, — Сципион¹⁸⁹ Карфаген хотын хаалгыг онгойлгох гэж хүсэхдээ *Aethiopsis* өвсийг авч явсан нь тэнэг хэрэг болсон, учир нь таныхаар бол тэрхүү өвсөнд цоож онгойлгодог ид шид байхгүй гэж хэлсэн байна гэв.

— Би зүгээр л, *Lunaria* өвсийг хэрэглэсэн бол илүү байх байжээ гэж хэлсэн шүү дээ.

— Энэ бол асуудалтай л хэрэг гэж бас л дөнгүүлсэн Радамант бувтнав.

Тэгснээ дуугаа хураачихлаа.

Бурхан номлооч Минос сэхээ авч, Үүрсийг дахин байцааж эхлэв. Тэмдэглэж авсан юмаа дэвтрээсээ хараад авах цаг гэрчээ.

— Та аурипигментыг хүнцлийн төрөлд багтааж, түүгээр хордуулж болно гэсэн байна. Үүнийг чинь хөлгөн сударт үгүйсгэж байгаа юм даа.

— Хөлгөн судар үгүйсгэж байгаа ч, хүнцэл батлаад өгч байгаа юм даа гэж Үүрс санаа алдан өгүүлэв.

Үүрсийн дотроо Эак гэж нэр өгсөн, анагаах ухааны албаны төлөөлөгч, саяхан болтол ам ангайхгүй байснаа одоо ярианд оролцон, нүдээ албаар хагас анин ихэмсэг дүр үзүүлэн байж, Үүрсийг дэмжин,

— Муу биш хариулт байна гэж дуугарав.

Үүрс байдгаараа инээмсэглэн хариу талархлаа.

Миносын царай дорхноо барайгаад явчхав.

— Би үргэлжлүүлье гэснээ, — Хариулаарай, Василиск¹⁹⁰, Кокатрикс нэртэй могойнуудын хаан гэдэг нь худлаа хэмээн та хэлсэн байна гэв.

— Өндөр төрөлт гэгээн минь, би василискийн алдрыг муутгая гэж өчүүхэн ч бодоогүй, тэр байтугай, хүн толгойтой гэдэг нь лавтай гэж хэлснийг яана.

— За тийм байж гэж Минос хүйтэн өнгөөр өгүүлснээ, — Гэхдээ та Перий нэг удаа шонхрын толгойтой василискийг харсан гэж нэмж хэлсэн байна. Үүнийгээ та баталж чадах уу? гэв.

— Зовлонтой л юм байна гэж Үүрс хариуллаа.

Энэ үедээ горьдлого нь барагдаж байгааг Үүрс мэдэрч байлаа.

Түүний барьц алдаж буйг гадарласан Мичос үргэлжлүүлэн,

— Та христосын шашинд орсон жүүд муухай үнэртэй байдаг гэж хэлсэн байна.

— Гэвч би жүүдийн номд орсон христосын шашинтан шал өмхий байдаг гэж нэмж хэлсэн билээ.

Минос, муу бүхний нь уудлан илрүүлсэн дэвтрийг харснаа,

— Та хамгийн өөдгүй, дэмий үг тарааж байна.

Та Элиан¹⁹¹ заан яаж сургаал бичиж байсныг харсан гэж ярьсан байна.

— Өндөр дээдэс минь, үгүй шүү. Би армаана яаж гүн ухааны ном хаялцаж байсныг Оппиан¹⁹² сонссон гэж л ярьсан.

— Эвэрлэг модоор хийсэн пяр тавагт хүссэн идээ, будаа өөрөө л гараад ирдэг гэдгийг та үгүйсгэсэн байна.

— Би, чөтгөрөөс танд өгсөн таваг л ийм ид шидтэй байна гэж хэлсэн.

— Надад өгсөн гэв үү, чи?

— Лам багш минь танд биш ээ, надад! Үгүй ээ, хэнд ч биш! Би хүн болгонд гэж хэлж байгаа санаа нь энэ.

Үүрс дотроо «Би юу яриад байгаагаа өөрөө ч мэдэх юм алга» гэж бодож амжив. Сэтгэл нь хэдий их догдолсон ч, түүнээ тэгтлээ ил

гаргасангүй. Үүрс нэгийгээ үзсээр байлаа.

— Энэ бүгд чинь нэг талаар чөтгөрт итгэхийг санал болгоод байна аа даа.

Үүрс сандарсангүй,

— Өндөр дээдэс минь, би чөтгөрт итгэдэг. Чөтгөрт итгэнэ гэдэг бурханд итгэхийн нөгөө тал. Нэг нь нөгөөгийнхөө байдгийг баталж байгаа хэрэг. Чөтгөрт жаахан ч атугай итгэдэггүй хүн бурханд үнэнээсээ сүслэн итгэж чадахгүй. Нар байдаг гэдгийг хүлээдэг хүн, сүүдэр байдгийг хүлээх хэрэгтэй. Чөтгөр бол бурхны шөнө нь юм. Шөнө гэдэг юу вэ? Өдөр байдгийн баталгаа шүү дээ.

Үүрс, гүн ухаан, шашин хоёрыг маргахын аргагүйгээр хольж хутгаж байж уран үгийг урсгаж гарах нь тэр. Минос дахиад л бодолд орж, үг ч дуугарахаа болив.

Үүрс ч уртаар амьсгаа авахтайгаа боллоо.

Гэтэл санамсаргүй дайралтад өртөж эхлэв. Дөнгөж саяхан түүнийг бурхны номлогчоос ихэрхгээр хамгаалж асан, анагаах ухааны төлөөлөгч Эак холбоотон байснаа гэнэт довтлогч болон хувирах нь тэр. Урдаа тавьсан бөөн бичиг цаасан дээр нударгаа пад хийтэл тавингаа Үүрсийг шууд хирдхийлгэн,

— Болор бол мөс ууршсаны үр дүн, алмас эрдэнэ бол болрын мөн тийм ууршилтын үр дүн гэдэг нь батлагдсан зүйл. Мөс болор болохдоо мянган жил болдог бол, болор алмас болоход мянган зуун шаардлагатай. Та үүнийг үгүйсгэсэн байна.

— Үгүй шүү, гэж Үүрс гунигтай дуугарснаа, — Би зүгээр л мянган жилд мөс хайлаад дуусчхаж болох бөгөөд мянган зууныг тоолох гэдэг амаргүй гэж л хэлсэн.

Байцаалт үргэлжлэн, асуулт хариулт, сэлэм зөрөлдөх мэт ар араасаа цуварна.

— «Ургамал ярьж чаддаггүй» гэж та мэлзсэн байна.

— Ерөөсөө үгүй. Гэвч үүний тул дүүжлүүрийн дор л ургах хэрэгтэй дээ.

— Мандрагор¹⁹³ хашхирдгийг зөвшөөрч байна уу?

— Үгүй, тэр чинь дуулдаг юм.

— Зүүн гарын ариун хуруу буюу ядам хуруу зүрхний өвчнийг анагаах чадалтай гэдгийг та үгүйсгэсэн гэж үнэн үү?

— Би зөвхөн, зүүн тал руугаа нулимах л муу ёр гэж хэлсэн.

— Та галт галбинга шувууны талаар тун доромж өөдгүй юм хэлсэн байна.

— Эрдэмтэн шүүгч минь, миний хэлсэн юм нь ердөө галт галбингын тархи, толгой өвдүүлдэг болохоос амттай тансаг идээ

гэсэн маягийн юм байгаа юм. Плутарх¹⁹⁴ харин бүр ч хамаагүй хадуураад явчихсан байна. Учир нь галт галбинга гэж хэзээ ч байгаагүй шүү дээ.

— Зэвүү хүрмээр яриа байна, наадах чинь. Шанцын саваагаар үүрээ засдаг синамалк, Паразиатид хороо хийхэд ашиглаж байсан мунан хошуут диваажингийн шувуу болох гарди, гуравласан хошуутай семенда шувууг л андууран галт галбинга гэдэг байсан юм. Гэхдээ галбинга байсан юм шүү.

— Би татгалзахгүй байна.

— Та бол илжиг.

— Их тааламжтай байна.

— Та заяахайгаар цээжний бахыг анагааж болно гэж зөвшөөрсөн боловч, энэ нь түүний үндсэнд байдаг ид шидээс болж байгаа юм биш гэж нэмж тайлбарласан байх юм.

— Би заяахайн анагаах чадлыг, түүнээс Иуда¹⁹⁵ дүүжилж үхсэнээр тайлбарласан юм.

— Үнэнд ойролцоо л бодол байна гэж эмч Эакийг одоо л муу үгээр утаж болохтой болсондоо додигор байгаа Минос бувтнав.

Маажигдсан ихэрхэг зан нь уур болон хувирч, Эакийн хор шар нь буцалжээ.

— Тэнүүлч новш таны наад ухаан хөл шигээ төөрөлдөж гүйцжээ. Та хачин жигтэй, сэжигтэй зантай хүн байна шүү. Илбэ жилбэ гаргахаас ч буцахгүй бололтой. Та үл мэдэгдэх амьтантай холбоотой байдаг. Та харц ардуудад зөвхөн өөрийнхөө хоосон бодолд байлгадаг болохоос, байгаль дээр байдгийг нь хэн ч мэддэггүй юмыг ярьдаг, жишээ нь гемороус ч гэх шиг.

— Гемороус гэдэг Тремеллийн харсан загалмайт могой.

Энэ хариулт, доктор Эакийг ялимгүй сандаргав бололтой.

Үүрс үргэлжлүүлэн,

— Гемороус гэдэг нь Кастелийн тэмдэглэсэн заарт чононцор ч юм уу хүдэр гэдэгтэй л адилхан байдагт нь эргэлзэхийн аргагүй гэв.

Эак эцсийнхээ аргыг хэрэглэн хэцүү байдлаас гаран,

— Таны амнаас гарсан хорлонтой үгийг энд үсэг гээлгүй бичсэн байна. Чагнаж бай гээд Эак тэмдэглэлээсээ уншсан нь: «Фалагигель, аглафотис гэдэг хоёр ургамал харанхуй болмогц гэрэлтдэг. Өдөр нь цэцэг, шөнө нь од» гэсэн байна хэмээгээд Үүрсийг тас ширтэн,

— За, өөрийгөө зөвтгөж хэлмээр юм байна уу? гэв.

— Ургамал бүхэн дэнлүү. Түүний сайхан үнэр нь гэрэл хэмээн Үүрс хариуллаа.

Эак хэдэн хуудас эргүүлснээ,

— Халиуны булчирхайнаас минжний булчирхайтай адил шингэн ялгардгийг та үгүйсгэсэн байна.

— Энэ асуудлын талаар Аэцид итгэхийн хэрэггүй байж болох юм гэж л хэлсэн.

Эак аймаар догшин дүртэй болж,

— Та эмнэлгийн ухааныг ажил болгон хэрэглэдэг үү? гэхэд,

Үүрс нь даруухнаар,

— За, би энэ салбарыг жаахан оролддог гэв.

— Амьд хүн дээр үү?

— Амьсгаа хурааснаас нь илүү амьд дээр нь л гэж Үүрс дуугарав.

Үүрс нухацтай мөртөө ихэд царайчилсан байдалтай хариулах нь сайх хоёр өнгөний гайхалтай нийлэмжид, цаанаа л нэг анасан байдал илэрхий. Дэндүү даруухан ярихыг нь ажигласан Эак түүнийг доромжлоод авах хэрэгтэй юм гэж үзэв.

— Юундаа гөвтнөөд байгаа юм? гэж бүдүүлгээр дээрэлхэхэд нь Үүрс,

— Залуу хүмүүс л гөвтнөдөг, над шиг хөгшин нь аахилахаас цаашгүй. Чааваас гэж надад янцаглахаас өөр юм алга гэххэв.

Эак яриагаа үргэлжлүүлнэ,

— Та өвчтэй хүнийг эмнэхээр оролдоод, тэр хүн чинь үхдэг юм бол, таныг цаазлах болно гэдгийг сануулья гэв.

Үүрс хариуд нь,

— Хэрэв эдгэрчихвэл яах вэ? гэж асууж зүрхлэв.

— Тэгчихдэг юм бол хэмээн доктор зөөлөрснөө, — Таныг бас л цаазлах болно гэлээ.

— Ялгаа ч бараг алга даа.

— Өвчтөн амьсгаа хураасан нөхцөлд, юм мэддэггүйн учир шийтгэгдэнэ, эдгэрсэн нөхцөлд шазруун зан гаргасны учир шийтгэж байгаа юм. Алинд нь ч гэсэн таныг дүүжлүүр хүлээж байх болно доо.

— Би энэ нарийн учрыг мэдээгүй явжээ. Тайлбарлан сэнхрүүлсэнд баярлалаа. Манай гайхамшигт хууль зүйг нэгд нэгэнгүй мэднэ гэж байдаггүй юм байна хэмээн Үүрс бувтнав.

— Болгоомжтой бай!

— Үнэнхүү сүсэглэе.

— Таны юу хийдгийг бид мэдэж байна.

«Би үүнийгээ тэр болгон мэддэггүй» гэж Үүрс дотроо бодож суулаа.

— Бид таныг шоронд хаячхаж болох л байна.

- Би ойлгож байна, эрхэм дээдэс минь.
- Та дур мэдэн буруу хэрэг үйлдсэнээ үгүйсгэж чадахгүй.
- Гүн ухаантны хувиар өршөөл гуйя.
- Таныг элдэв булай юм олныг үйлдсэн гэж байна.
- Дэндүү аймшигтай андуурсан байна.
- Өвчтэй хүнийг анагаадаг гэсэн байна.
- Би гүжирдлэгийн золиос болжээ.

Үүрс рүү чиглэсэн гурван хос сүрдмээр хөмсөг зангиран, гурван эрдэм номын царай бие бие рүүгээ ойртон, шивэр авир хийх сонсогдлоо. Сайх гурван шинжлэх ухааны албаны төлөөлөгчийн гурван толгой дээр, илжгэнд л углаж баймаар ганц малгай байгаа юм шиг Үүрсийн нүдэнд харагдаад явчхав. Сайх гурван битүүлэг учиртай шивгэнээн хэдэн хувь үргэлжлэх зуур, Үүрс айснаасаа болоод бие нь нэг хөрж, нэг халууцаж ядан байтал, тэргүүлэгч нь болох Минос эцэст нь хөдөлж ядан, түүн рүү эргээд, яатлаа уурласан амьтан,

- Эндээс зайл! гэж дуугарлаа.

Халимын гэдэснээс шидэгдэн гарсан Ионы сэтгэгдэл шиг сэрэл Үүрст төрлөө.

Минос үгээ үргэлжлүүлэн,

- Энэ удаа таныг тавья гэв.

Үүрс дотроо «Дахиж ирэх ч гонж биз дээ! Анагаах ухаан баяртай» гэж бодов. Тэгээд сэтгэлийн угт, «Одоогоос эхлээд өвчтэй хүнийг мажийхад нь саад болохоо больё, чи минь» гэж санаж авлаа.

Толгойгоороо шал шүргэтэл нугаран тонгойж, тал тал руугаа, докторууд, цээж барималд, ширээнд, сандалд, хананд хүртэл мэхийн бөгсөөрөө ухарсаар хаалганд хүрлээ.

Тэр танхимаас ямар ч хэрэг хийгээгүй хүн шиг аажуухан холдсоноо гудамжинд гарангуутаа л гэмт хэрэгтэн мэт ухасхийн харайлгалаа. Үнэн мөний шүүхийн төлөөлөгчид гэдэг маань ойртоод ирэхээр хачин аймшигтай, ойлгохын аргагүй сэтгэгдлийг төрүүлэх агаад хэдийгээр ял зэмгүй өнгөрлөө ч гэлээ, ум хумгүй зугтаан арилахаас өөр үггүй.

Гүйж явахдаа Үүрс тэсэлгүй,

— Би ч амархан саллаа даа. Би бол зэрлэг эрдэмтэн, тэд бол гаршсан тэжээмэл эрдэмтэд юм. Докторууд л эрдэмтдийг мөшгөдөг юм. Хуурамч шинжлэх ухаан бол жинхэнэ шинжлэх ухааны ялгадас, тэгээд түүнийг гүн ухаантныг баллахад ашиглана гээч. Гүн ухаантнууд, хуурамч баримтаар дүгнэгчдийг бий болгосноороо, өөрсдөө нүхээ ухчхаж байгаа юм.

Дуучин хөөндэйн баасан дээр ургадаг мөөгөнцрөөс наалдамхай бодис гарган авч, түүний тусламжаар хөөндэйг барьдаг билээ.

Turdus sibi malum cacat [196](#)

Бид Үүрсийг дэндүү их ёсорхог хүн гэж гаргахыг хүсэхгүй байна. Тэр нь бодлоо гаргадаг өвөрмөц хэллэгийг хамаагүй хэрэглэдэг зантай хүн. Энэ талаар бол тэр бээр Вольтерээс илүүгээр эрээлж цээрлэдэггүй ажээ.

«Ногоон хайрцагтаа» буцаж ирээд Үүрс, Никльсд удаан алга болсноо гудамжинд нэг аятайхан хүүхэнтэй дайралдсанаар тайлбарлажээ. Тохиолдсон адал явдлынхаа тухай ганц ч үг дуугарсангүй.

Зөвхөн үдэш л Гуинплений чихэнд,

— Би гурван толгойтой Цербер нохойг номхотгосон гэдгийг мэдэж ав хэмээн шивгэнэжээ.

VII. Гуулин зоосны дунд алтан зоос юуны учир орж ирэх вэ?

Санамсаргүй явдал болжээ.

«Тедкастерийн буурчийн газар» хоног ирэх тусам, улам улмаар хөгжөөн цэнгээн, инээд наадмын үүр болж байлаа. Үүнээс илүү хөгжил баясалтай бужигнааныг хаанаас ч олохын аргагүй. Эзэн, зарц жаал хүү хоёр эль, стаут, портер дарсыг үйлчлүүлэгчдэд сунаж унатлаа аягална. Үдэш намхан адарт тэнхимийн бүх цонх гэрэлтэй, сул ширээ ганц ч олдохгүй болно. Дуулж, хуурдан, төмөр сараалжтай нүүрс дүүртэл чихсэн хуучны задгай зууханд галын дөл өрвөлзөнө. Гал шуугиан хоёрын агуулах уу даа гэмээр болно.

Хашаанд, чухамдаа гэвэл театрт улам ч олон хүн цуглана.

Хотын захын бүх үзэгчид, Саутворкийн бүх оршин суугчид «Гэсгээгдсэн нажид» руу зай завсаргүй цувалдан, хөшиг нээх үед буюу өөрөөр хэлбэл «Ногоон хайрцгийн» өргөдөг хана буух үед, бүх суудал эзэнтэй болж, бүх цонх үзэгчдээр дүүрч, тагт пиг дүүрэн хүнтэй болно. Хашаа дотор дэвссэн ганц ч хавтан үзэгдэхгүй, хашаа дүүрэн шахцалдсан хүмүүсийн толгой л харагдана.

Зөвхөн дээдэст зориулсан суудал л бахь байдгаараа хоосон үлдэх ажээ. Үүнээс болж тагтны яг гол дунд, жүжигчдийн хэлээр бол «цөмөрхий» гэдэг нэгэн хар нүх харагдана. Хэн ч үгүй. Эргэн тойрон хүн зон заарцаглах авч, тэрүүхэн тэнд хов хоосон.

Нэгэн үдэш тэнд, хэн нэгний дүрс үзэгджээ.

Энэ нь бямба гараг, англичуудын ням гарагийн уйтгараас урьтан хөгжилдөж авъя гэж адгадаг тэр өдрийн орой байлаа. Танхимд пиг дүүрэн хүн.

Бид «танхим» гэж байна. Шекспир хүртэл цагтаа, удаан хугацаагаар буудлын хашаанд жүжгээ тавьж, түүнээ танхим гэж нэрлэдэг байсан юм.

Хөшиг нээгдэн «Гэсгээгдсэн нажид» эхэлтэл, энэ үед тайзан дээр Гомо, Гуинплен хоёртой байсан Үүрс, сурснаараа үзэгчдийг тойруулан харснаа золтой л дуу алдчихсангүй.

«Дээдчүүлийн» хэсэг хүнтэй байлаа.

Суудлын гол хэсэгт, утрехтийн хамба хилэнгээр бүрсэн түшлэгтэй сандал дээр эмэгтэй хүн сууж харагдав.

Хажууд нь хэн ч байсангүй, ганцаархнаа тэр тусгай суудлыг эзэмшжээ.

Зарим хүн амьтан гэрлээс бүтсэн юм шиг санагдах нь бий. Энэ эмэгтэй Деягийн адил туяа татуулавч, өөр маягтай ажээ. Дея үүр

гийх төдийхөн байсан бол энэ эмэгтэй үүрийн улаан туяа байлаа. Дея гоо сайхны бэлгэ тэмдэг бол энэ хүүхэн нүд гялбам үзэсгэлэн байв. Деяг гэнэн хонгор, ариун явдал, цэвэр цагааны биет жишээ гэвэл энэ бүсгүй хондон улаан биеэрээ агаад, улайж ичнэ гэдгээс айдаггүй нь мэдрэгдэж байлаа. Түүний туяа нь тэр хэсэгхэн суудлаасаа хальж, эмэгтэй өөрөө онгон шүтээн лүгээ адилаар хөдлөх ч үгүй сүр жавхлантай заларна.

Балиар заваан үзэгчдийн дундаас, эрдэнийн анар чулуу мэт гэрэлтэн, орчин тойрондоо цацруулах гэрэл нь бусад хүнийг харанхуйд живүүлэх шиг болгоно. Эргэн тойрныхоо хүмүүсийн сүүмгэр царайг сүр хүчээрээ дарна.

Бүх хүн түүнийг ширтжээ.

Үзэгчдийн дунд Том-Жим-Жек харагдав. Тэр бусдын адилаар танихгүй хүүхний нүд гялбуулам гэрэлд дарагдан алга болжээ.

Үзэгчдийн анхаарлыг татан, жүжигт хандах идэвхийг нь сулруулснаар «Гэсгээгдсэн наждын» амжилтад муугаар нөлөөлж байлаа.

Хэдийгээр ойрхон суусан хүмүүст зурсан юм шиг санагдавч тэр нь барин тавин бодит хүн байлаа. Бодит бодитдоо эмэгтэй хүн байв. Өндөр, махлагдуу биетэй, чээж биеэ аль болохоор ил гаргажээ. Чихэнд нь «Английн түлхүүр» гэдэг хачин унжлагатай том сувдан ээмэг санжганана. Алтан утсаар угалзалсан саамын шаагаар хийсэн даашинз нь, зургаан зуун экюгээс дээш үнэлэгдэх учир хүний санаанд багтамгүй ганганд тооцогдох ажээ. Тэр үеийн дэндүү задгай маягаар хөхийг нь дөнгөж хаасан цамцны нь энгэрийг том доржпалам зүүгээр тогтоожээ. Цамцыг нь Австрийн Анна хатанд дэвсгэрийн даавуу хийсэн, бэлзгийн нүхээр цувьж болдог фризийн нимгэн даавуугаар оёжээ. Дунд нь ганц хоёр нал эрдэнэ гялалзах, бадмаараг хуяг өмсчихсөн юм уу гэмээр банзал нь ч гэсэн гялалзан очтох эрдэнийн чулуунууд шигтгээстэй ажээ. Хятад бэхээр будсан хөмсөг нь нумарч, гар тохой, мөр, эрүү, самсаа, аньсага, чихний гэдэс, алга хуруунуудын үзүүр нь улайран энэхүү улаа бутарсан өнгө нь цаанаа л нэг сэтгэл гижигдэм ажээ. Гоо үзэсгэлэнтэй байхыг ихэд хүсдэг нь түүний бүхий л байгаа байдлаас илэрхий. Хэрэг дээрээ аймаар гоо үзэсгэлэн бүрдсэн хүүхэн байлаа. Наалинхай мигуй болон хувирч ч чадах ирвэс байв. Нэг нүд нь хөх, нөгөө нүд нь хар ажээ.

Гуинплен Үүрстэй адилаар тэр хүүхнийг гайхан харсаар л байв.

«Ногоон хайрцаг» тэр чигээрээ л уран зөгнөлийн жүжиг байв. «Гэсгээгдсэн нажид» театрын жүжиг гэхээсээ илүү зүүд гэлтэй

бүтээл байжээ. Үүрс, Гуинплен хоёр үзэгчдэд, сүүтгэнэлийн үзэгдэл юм уу даа гэсэн сэтгэгдэл төрүүлэн дасчихжээ. Энэ удаа нөгөө сүүтгэнэл нь үзэгчдийн дунд гараад ирэх нь тэр. Одоо жүжигчид маань өөрсдөө айн ширвээдэх ээлж нь иржээ. Тэд өөрсдөө хий үзэгдэлд сэтгэл татагдан байлаа.

Тэр хоёрын хувьд, хооронд нь байгаа зайнаас болж театрын «танхимын бүдэг бадгаас болж, хүүхний дүр мананд бүртэлзэн, хоосон хий юм шиг л санагдана.

Яриа байхгүй эмэгтэй хүн нь эмэгтэй хүн, тэгэхдээ зүгээр сэтгэлд нь ургаад, нүдэнд харагдаад байгаа юм биш байгаа! Тэднийг хүрээлэн буй харанхуйн дунд гэрэл гэгээ ийнхүү гэнэт гарч ирсэн нь тэр хоёрыг цочирдуулжээ. Энх амгалангийн орчлонгоос нисэн ирсэн үл мэдэгдэх гараг уу гэлтэй. Цацрах туяанаасаа болж улам ч сүртэй харагдана. Сайх эмэгтэй, шөнийн тэнгэрт зурайх тэнгэрийн заадас шиг гялбалзана. Эрдэнийн чулууд нь од шиг санагдана. Доржпалам зүү нь зургаан мичид ч байж болох юм. Гял цал буусан цээж бие нь ид шидийн юм шиг харагдана. Энэхүү бодит ертөнцийн зочныг харангуут л шууд энх амгалангийн орны хүйтэн хөндий ойртолтыг мэдрэх шиг болоод явчихна. Диваажингийн орны тэртээгээс, сайх нигүүлсэнгүй тунгалаг царай, ядуу ягир «Ногоон хайрцаг» түүний өрөвдөлтэй үзэгчдийн дээрээс тонгойжээ. Тэнгэрийн орны хүн ч сонирхсоноо үзэхийн хажуугаар хүн зоны сониуч зангийн бай болж байлаа. Тэртээ дээрээс бууж ирээд, газарт байгаа амьтдын нүдний зугааг гаргах нь энэ.

Үүрс, Гуинплен, Винос, Фиби, цугласан олон цөм л сайх гэрэлд нүд нь гялбан дагжиж байхад, мөнхийн харанхуйд умбан агч Дея л түүнийг гадарласангүй.

Энэ эмэгтэйн гадна байдалд хэдийгээр сүүтгэнэл гэдэг үгэнд холбогдчихоор ямар нэг юм байхгүй ч гэлээ нэг л хий хоосныг бодогдуулна. Түүнд тийм нууцлаг, хий үзэгдлийн агаар уур болсон ч юм уу, утаа униар татсан юм юу ч байсангүй. Энэ бол улаа бутарсан, эрүүл саруул, чийрэг сүүмгэр үзэгдэл байв. Гэлээ гэхдээ Үүрс, Гуинплен хоёрын байгаа харааны нөхцөлөөс болж, түүнийг нэг л хүмүүн бус юм шиг харагдуулна. Мах цуснаас төрсөн вампир¹⁹⁷ гэж нэрлэгддэг сүүтгэнэл байдаг шүү дээ. Хүн зоны хувьд зөвхөн сүүтгэнэл болсон зарим нэг хатан хаан жилд гучин саяыг залгиж, ядуу хүн ардынхаа цусыг сорон, тарган цатгалан байх нь бий.

Эмэгтэйн ар талд, бүрэнхийн дунд, түүний зарц el mozo намбатай, цэвэрхэн залуухан цагаан царайтай, хүүхэд шиг жижигхэн хүн зогсоно. Тэр үед их залуу, тэгсэн мөртөө их намбатай

зарц нар маяг болж байжээ. Зарц нь толгойноосоо хөлөө хүртэл гал улаан хилэн хувцас өмсөж, алтан утсаар хатгамалласан малгайд нь тогосын өд сагсалзах нь дээгүүр айлын зарц гэдгийг онцлох тэмдэг бөгөөд хатагтайн өндөр байр байдлыг гэрчилнэ.

Зарц бол эзэн ноёны салшгүй хэсэг, ийм ч учраас сайх хатагтайн сүүдэрт байгаа, урт хормойг нь өргөж явдаг хиаг харах хүн байсангүй. Бидний ой, олон юмыг хүсээгүй байхад тогтоочихдог нь цөөн бус. Жижигхэн хиагийн цулцгар хацар, ихэмсэг дүр, хиаз оён өдөөр чимсэн малгай ой тойнд нь хадгалагдлаа гэдэгт Гуинплен эргэлзсэнгүй. Гэхдээ зарц хэн нэгний харцыг өөртөө татахыг огт хүссэнгүй, хүний анхаарлыг татна гэдэг хүндэтгэлгүй болно гэсэн үг. Тэр бээр суудлын бүр хойно, хаалганд тулж, хатагтайгаас аль болох холхон байхыг хичээн тайван зогсоно.

Түүний хиа muchacho нь дэргэд нь байгаа боловч, эмэгтэй гав ганцаараа байгаа юм шиг санагдана. Зарц нарыг хүн гэж тооцохгүй нь мэдээж.

Энэ хүүхний, жүжгийн дүрд тоглож байгаагаас ялгаагүй гаргасан сэтгэгдэл хэчнээн их байсан ч «Гэсгээгдсэн наждын» төгсгөл үзэгчдийн сэтгэлийг өмнөхөөс нь илүүгээр хөдөлгөжээ. Урьдын адил үзэгчдийн дурыг булааж чаджээ. Танхимд гоёмсог үзэгч байснаас ч (үзэгч гэдэг маань заримдаа жүжигт оролцдог шүү дээ) байж болох юм, үзэгчдийн сэтгэл санаа нь булаагдан, цахилгаанжсан юм шиг болжээ. Энэ орой Гуинплений инээд хэзээ хэзээнийхээсээ илүүгээр уруу татаж байлаа. Цугласан бүгд л унаж тустлаа хөхрөлдөн, цорой нь татах холгүй байв. Тэр дуун дотроос Том-Жим-Жекийн тас тас хийтэл хөхрөх нь тодхон ялгарна.

Баримал мэт хөдөлгөөнгүй сууж байгаа нөгөө танихгүй эмэгтэй л, бүгдийг сүүтгэнэлийн нүдээр тойруулан харж огт инээсэнгүй. Гэвч энэ сүүтгэнэл нарны цацрал шиг нүд гялбам ажээ.

Жүжиг дуусаж, бүхээгт тэрэгний ханыг сөхсөний дараа «Ногоон хайрцгийнхан» ердийнхөөрөө гэр бүлээрээ цуглараад, Үүрс оройн хоолонд зассан ширээн дээр, бүх олсон орлогоо хүүдийнээс нь асгалаа. Бөөн зэс зоосны дунд гэнэт испанийн лан алт гялалзах нь тэр.

— Тэр шүү! гэж Үүрс орилох шахам дуугарав. Ногоорон харагдах зэс зоосны дундах алтан зоос үнэндээ, бүдүүн барги хүн олны дунд үзэгдсэн нөгөө хүүхэн шиг туяа татуулан гялалзана.

— Тэр суудалдаа квадрупл¹⁹⁸ төлж шүү! гэж Үүрс гайхан бахархсанаа илэрхийлэн дахин дуу тавив.

Энэ хоромд «Ногоон хайрцагт» буудлын эзэн орж ирээд бүхээгт тэрэгний арын цонхоор гараа гаргаснаа, бидний дээр ярьсан цонхтой нэг түвшинд байдаг нөгөө талбайн бүх юм харагддаг хананы салхивчийг онгойлгоод Үүрсийг талбай руу хар гэж дохилоо. Гуанзны тэндээс, баян тансгаар гоодож чимсэн морьдтой, өдөөр чимсэн малгайтай, бамбар асаан барьсан зарц нар дагалдуулсан ёслолын сүйх тэрэг хөдөлж байлаа.

Үүрс эрхий долоовор хоёроороо нөгөө алтан зоосоо хүндэтгэлтэйеэ чимхэн Никльст харуулснаа,

— Энэ бол охин тэнгэр! гэж дуугарав.

Тэгснээ булангаас өнгөрч явсан сүйх тэргэн дээр харц нь тусаж, бамбарын гэрэлд сүйхний орой дээр гэрэлтэн харагдах найман цэцэгт титмийг харах мөртөө.

— Үгүй охин тэнгэрээс ч дээгүүр юм. Энэ чинь гүнжин байна! гэж орилох нь тэр.

Сүйх тэрэг далд орж, дугуйн чимээ нь замхарлаа.

Хэдэн хором Үүрс хөшсөн юм шиг зогссоноо, ариун бэлгийг өргөн барихдаа бэлэг түгээгч яаж хөдөлдөг шиг зоос барьсан гараа ихэд эвлэгхэн дээш өргөв.

Тэгээд зоосоо ширээн дээр тавиад, түүнээс гараа салгахгүй хэвээр нөгөө «хатагтайн» тухай ярьж гарлаа. Буурчийн газрын эзэн мэддэгээ хэлэв. Тэр бол гүнжин гэнэ. Хэргэмийг нь мэдэж байлаа. Харин нэр нь хэн бэ? Нэрийг нь мэдэх хүн байсангүй. Никльс тэрхүү сүлд болсон, ёслолын саатай хувцастай зарц нартай сүйхийг ойроос харжээ. Хөтөч нь, тэргүүн сайд лордынхтой яг адилхан хиймэл үстэй байсан гэнэ. Испанид «бунхан-тэрэг» гэж нэрлэгддэг их ховорхон байдаг, дээрээ сүлдээр чимсэн авсны тагархуу хэлбэртэй гайхамшигтай сүйх ажээ. Зарц нь сүйхний хаалганы гадна талын гишгүүр дээр элбэгхэн багтчихаар жижигхэн биетэй. Энэ өхөөрдөм амьтад энгүүндээ язгуур сурвалжтай хатагтай нарын урт хормойг барьж явдаг агаад заримдаа хайр сэтгэлийн илгээмжийг аваачиж өгөхийг даалгадаг гэнэ. Малгай дээрх тогосын өдийг анзаарсан уу? Хатагтайнх нь өндөр сурвалжтай болохыг маргашгүй баталгаа тэр мөн. Тийм эрхгүй мөртөө зарц нарынхаа малгайг тийм өдөөр чимсэн хүн гомдолгүй торгууль төлдөг ажээ. Никльс ч хатагтайг ойрхноос харжээ. Жинхэнэ хатан хаан. Тийм баялаг хүнийг чимэхгүй байж чадахгүй. Арьс нь цав цагаан, харц нь ихэмсэг, явдал нь намбалаг, хөдөлгөөн нь итгэлтэй. Амьдралдаа юм хийж үзээгүй тэр гарын уран гоёыг юутай ч зүйрлэшгүй. Никльс тэрхүү судас нь гэрэлтсэн цагаахан арьсыг хүзүү, мөрийг нь улаа

бутарсан царайг нь, сувдан ээмэг, алтан энгэсэг түрхэн гоёмсог
янзалсан үс гээг, тоолохын аргагүй эрдэнийн чулуу, бадмаараг,
доржпаламынх нь тухай урсгаж гарав.

— Тэр чулуунууд нь нүд шиг хурц гялалзахгүй юм билээ хэмээн
Үүрс бувтнав.

Гуинплен юм дуугарсангүй.

Дея сонсож л байв.

— Тэгээд хамгийн гайхалтай юм нь юу байсныг мэдэх үү? гэж
Никльс асуулаа.

— Юу? гэж Үүрс асуув.

— Би түүний сүйхэнд суухыг нь харсан.

— Тэгээд яагаа вэ?

— Тэр ганцаараа суугаагүй шүү.

— Үгүй ер!

— Нэг хүнтэй хамт суусан.

— Хэн бэ?

— Таа л даа.

— Хаан уу? гэж Үүрс хэлэв

— Юуны өмнө, одоохондоо бидэнд хаан байхгүй. Биднийг
хатан хаан жолоодож байна. Гүнжинтэй хэн суусныг таагаач гэж
Никльс хэлэв.

— Юпитер үү? гэж Үүрс асуулаа.

— Том-Жим-Жек гэж буурчийн газрын эзэн хариулав.

Өдийг болтол ам нээгээгүй байсан Гуинплен өөрийн эрхгүй дуу
алдруун,

— Том-Жим-Жек гэнэ ээ?

Цөм гайхан цочирдохдоо дуугарсангүй. Тэгтэл гэнэт Деягийн
намуухнаар,

— Тэр эмэгтэйг ийшээ оруулахгүй байж болдоггүй юм уу? гэж
хэлэх сонстов.

VIII. Хордогдсоны шинж тэмдэг

«Сүүтгэнэл» дахин үзэгдсэнгүй. Тэр хэдийгээр тусгай суудалд дахин үзэгдээгүй боловч, Гуинплений сэтгэлд дахин дахин орж ирж байлаа.

Гуинплен бүр, ямар нэг хэмжээгээр аягүйрхэн байлаа.

Амьдралдаа анх удаа л эмэгтэй хүнийг харав уу даа гэж түүнд санагджээ.

Тэр дороо л ер бусын хүсэл мөрөөдөлд өөрийн эрхгүй автаж, нүгэлтэй юм бодож эхлэх нь тэр. Биднийг юунд ч хүргэж мэдэх зүүдний бодлоос зайлсхийж явах хэрэгтэй. Хүсэл мөрөөдөл бол нууцлаг явдал, үл мэдэгдэм анхилуун үнэртэй байдаг билээ. Бодлын хувьд тэр нь анхилам сарнайн үнэр лүгээ адил. Тэр нь заримдаа хорт үнэр шиг мансууруулан, бодол сэтгэлд угаар мэт нэвтрэх нь бий. Цэцгээр хорддог шиг, хүсэл, мөрөөдлөөр хордож болно. Мансууруулам сайхан, дур булаам, тэгсэн мөртөө аймшигтай амиа хорлож байгаа хэрэг!

Өөдгүй муу юм бодно гэдэг сэтгэлээ хорлож байна гэсэн үг. Түүнд л хордлого байгаа юм. Мөрөөдөл таныг дуудан даллаж, уруу татан, мэхэлж байгаад урхиндаа оруулаад дараа нь хоршоогоо болгож авангуутаа, ухамсар сэтгэлийг залилан мэхлэхдээ хамаатнаа хийнэ дээ. Эхэлж мансууруулж авчхаад дараа нь завхайруулна. Мөрийтэй тоглоомтой л утга нэг зүйл. Эхлээд хүн луйврын золиос байснаа дараа нь өөрөө луйвардаж эхэлдэг биз дээ.

Гуинплен мөрөөдөлд автжээ.

Тэр эмэгтэй хүнийг хэзээ ч харсангүй.

Хүдэх энгийн эмэгтэйчүүдээс зөвхөн сүүдрийг нь хармар аядаад, сэтгэлийг нь бол Деягаас олж харжээ.

Одоо жинхэнээр хараад авах нь тэр.

Цаагуур нь оргилсон халуун цус цохилох нь мэдрэгдэн байгаа бүлээн зөөлхөн арьс, сэтгэл татам нарийн гантиг ч юм уу, усны давлагааны үелзэл лүгээ адил биеийн хэлбэр дүрс, уриалан дуудсан мөртөө түлхэн татгалзсан ихэрхэг тоомжиргүй нүд, гялбам гоо сайхан цогцолсон царай зүс, түймрийн дотроос солонгорон гэрэлтэх мэт үс гэзэг, хорхойтсондоо чичрэм баян тансаг хувцас хунар, өөрийн эрхгүй татагдах нүцгэн цээж, тойрсон олны тачаалыг бадраах, тэгэхдээ зөвхөн холоос гэсэн ихэрхэг хүсэл, хүрч ойртохын аргагүй сэтгэл булаам сээтэгнэл, сүйрэх гэгч хий үзэгдэлтэй гараасаа хөтлөлцсөн хорхой хүргэсэн байдал, сэтгэлд нэгийг

амласан атлаа, ухааныг болохоор сүрдүүлсэн байдал, хүсэл айдас хоёроос төрсөн түгшүүрийн сэтгэл энэ бүгдийг Гуинплен харжээ. Эмэгтэй хүнийг байгаагаар нь харжээ.

Тэр нь илүү ч үгүй, дутуу ч үгүй эмэгтэй хүнийг л харах нь тэр. Түүний хажуугаар тэр нь бурхны орон, Олимпын эмэгтэй байлаа.

Хүйс гээч нууц түүний өмнө тодрох нь энэ ажгуу.

Гэхдээ хаана гэвэл хүрэхийн аргагүй алсад, санаанд багтах заагаас тэртээ холд ажээ.

Хувь заяаны тоглоом тохуу гэгч энэ бус уу. Тэнгэрийн юм, сэтгэл гэгчийг тэр гартаа барьж байлаа. Түүнийх болсон тэр зүйл нь Дея байв. Гэтэл хорвоогийн юм, хүйс гэгчийг тээр үүлэн завсраар хараад авчээ. Энэ нь нөгөө хүүхэн байлаа.

Гүнжин!

«Охин тэнгэрээс ч дээгүүр» гэж Үүрс хэлсэн билээ.

Ямар өндөр байна вэ! Хүсэл мөрөөдөл ч хүртэл ийм огцом өндөрт, авирахыг түвдэхгүй биз ээ.

Танихгүй эмэгтэйг бодож ухаанаа алдчих юм гэж үү дээ? Гуинплен өөрөө өөртэйгөө тэмцэлдэв.

Энэхүү бараг хаад ноёд шиг өндөр дээд хүмүүсийн амьдралын тухай Үүрсийн ярьсныг цөмийг санаж байлаа. Өдий хүртэл дэмий хэрэггүй юм шиг санагддаг байсан гүн ухаантны чалчаа яриа, одоо санаашралынх нь үндэс болж өгчээ. Бидний ой той умартах гэгчийн мананд өнгөцхөн бүрхэгдэх нь цөөн бус агаад, хэрэгтэй хоромд түүний цаана халхлагдсан зүйлийг завсар зальхайгаар нь харчхаж амждаг билээ. Гуинплен өөрөө дотроос нь гарсан энгийн хүдэх ардын доод ертөнцөөс хэмжээлшгүй дээр байдаг нөгөө хүүхэнд хамаарагддаг сурвалжтан, язгууртны тэр дээд ертөнцийг сэтгэлдээ ургуулан бодож ч үзлээ. Ер нь ингэхэд өөрөө тэр хүдэх ардад хамаарагддаг юм болов уу? Марзганагч болох өөрөө, хамгийн доордод тоогддог хүнээс бүр доор байдаг юм биш биз? Юм бодож сэтгэдэг болсон цагаасаа хойш анх удаа л, өнөөдөр бид ядуу дорой байдал гэж нэрлэхээр болсон басамжлагдсан байдлаа ойлгосноосоо болоод зүрх нь базлах болжээ. Үүрсийн тоочин гаргасан тэр дүр зургууд, тэр тодорхойлон зурагласан цамхаг шилтгээн, цэцэглэгт хүрээлэн, баганат сүүдрэвч, язгууртан сурвалжтануудын тэр эд баялаг, хүч чадал нь Гуинплений ой тойнд амилан босож, үнэн бодит юмс уран зөгнөлтэй холилдон үзэгдэнэ. Сайх хүршгүй өндрийн хий үзэгдэлд өөрөө автсан байлаа. Жирийн хүн лорд байна гэдэг бүтэшгүй хоосон зүйл шиг санагдана. Гэтэл тийм хүмүүс байж

байдаг. Байж боломгүй, ерөөсөө л байж болшгүй зүйл! Орчлонд лордууд байдаг л байна! Тэд чинь бусадтай адил мах цуснаас бүтсэн улс гэж үү? Юу л бол доо? Тэр нь бүх талаараа ханаар хүрээлэгдсэн гүнзгийгээс гүнзгий харанхуйд байгаагаар худгийн ёроолд байхдаа мэддэг хүн шиг, толгой дээрээ тэртээ алсад нүд гялбам гял цал буусан гэрэл гэгээ номин хөх, дүрс бараа сүлэгдэн эрээлжилсэн бурхны орныг харж байлаа. Сайх туяаран гэрэлтэх ертөнцийн голд гүнжин гэрэл цацруулан байна.

Гуинплен энэ хүүхэнд гайхмаар хачирхалтайгаар татагдах боловч хажуугаар нь бүтэшгүй юм бодож буйгаа мэдрэв.

Хачин жигтэй, балай дэмий юмыг байн байн санаандаа боддог боллоо. Сэтгэл зүрхийг өөрийнхөө хажууд байгааг мэдрэн алхам тутамдаа түүнтэй хавиран байвч, бие махбодыг нь хүрэхийн аргагүй алсад, туйлын хүрээнд харж байлаа. Энэ бодлын аль нь ч сэтгэлд нь тогтож өгсөнгүй. Минут бүрд ээлжлэн өөрчлөгдөж, нэг л тогтворгүй байх нь манан буданд төөрөлдөн дүйнгэтэх мэт. Энэ байдлыг сэтгэл санаа гүнзгий хямарсных гэхээс өөр аргагүй.

Гэвч гүнжинд ойртож очоод үзье гэдэг санаа түүний зүүдэнд ч орсонгүй. Аз болоход, бодолдоо ч хүртэл ийм өндөрт авирахыг зүрхэлсэнгүй.

Түүний салганах нь тархинд муу оёг төрүүлэхэд, сайх шатны гишгүүр дээр өрөөсөн хөлөө ганц удаа тавихад л гүйцээ. Бурхны орон руу авирч байна гэж бодож байтал, Бедлам¹⁹⁹ руу оччих нь тэр. Хурьцал гэгчийг үзсэн сэн бол Гуинплений сүнсийг зайлуулчих байлаа. Гэвч тиймэрхүү юмыг насандаа амсаж үзсэнгүй.

Ингэхэд тэр хүүхнийг дахин хардаг болов уу? Ер нь мэдээжээр, хэзээ ч үгүй биз ээ. Хэн ч гэсэн тэнгэрийн хаяанд гялсхийх гялбаанд сэтгэл алдан болчимгүй юм хийхгүй нь мэдээж. Тэнгэрт байгаа одыг харан харан сэтгэл татагдах гэвэл, бас ч яая гэхэв ойлгомжтой хэрэг. Байсан газраа л дахин гялалзан нүдэнд харагдах шүү дээ. Гэтэл гялсхийн өнгөрөх цахилгаанд хүн сэтгэл татагдана гэж байх уу даа?

Гуинплений сэтгэлд нэг мөрөөдөл нөгөөгөөрөө солигдон ээлжилнэ. Нүд гялбам баян тансгаар гоёж гоодсон, баримал мэт тусгай суудлын голд суусан сайх эмэгтэйн сүрлэг жавхлантай дүр хөрөг түүний бүдэг бадаг мөрөөдөл дунд нь тов тодорхой харагдсанаа дараа нь алга болно. Тэр эмэгтэйг бодсоноо дахин мартаж, өөр юмаар оролдоод, дараа нь эргээд л нөгөөхөө бодож эхэлнэ. Бодол нь түүнийг бүүвэйлж байгаа мэт боловч тайтгаруулан унтуулж чадахгүй байлаа.

Харин ч бүр мөрөөдлөөсөө болоод хэд хэдэн шөнө нүд аньж чадсангүй. Нойр хулжих гэдэг нойрсохтой адилаар элдэв зүүдээр дүүрэн байдаг.

Тархи толгойнд эргэлдэн байдаг, тэр гэхийн тэмдэггүй үйл явцыг бараг үгээр илэрхийлэхийн аргагүй билээ. Үгийн нэг эвгүй нь, бодол санаанаас илүүгээр тоймлон дүрсэлдэгт байдаг. Бодол санаа товтой дүрсгүйгээс болоод нэг нь нөгөөтэйгөө сүлэгдэн нийлдэг бол, үг бол шал өөр юм. Ийм учир сэтгэлийн хөдлөлийг гүйцэд үгээр илэрхийлэхийн аргагүй. Үгэнд хил хязгаар гэж байдаг бол бодол санаанд тийм юм байхгүй!

Бидний дотоод ертөнц тайлагдашгүй уужим болохоор, Гуинплен сэтгэл санаандаа болж байгаа тэр бүхэнтэй, Деягийн тухай бодлоо бараг холбосонгүй, Дея түүний сэтгэл, бодол санааны гол ариун зүйл хэвээр, юу ч түүнд ойртож чадахгүйгээрээ үлджээ.

Ингэхэд, иймэрхүү зөрчил хүн болгонд байдаг жамтай. Тэнд л мөргөлдөөн болж байлаа. Тэр үүнийгээ мэдээ болов уу? Муухан гадарлаж байлаа.

Хэн хүнд ялгаагүй, ан цав гарч мэдэшгүй хамгийн эмзэг газартаа сэтгэлийнхээ угт зөрчилдсөн хүсэл мөргөлдөн буйг тэр мэдрэн байлаа. Үүрсийн хувьд энэ бүгд алган дээр тавьсан мэт тодорхой байх байсан боловч, Гуинплен түүний учрыг олж, хужрыг тунгаах гэж зүдэрнэ.

Нэг нь туйлын хүслэн, нөгөө нь эмэгтэй хүн рүү татагдах хоёр төрөлхийн зан тэмцэлдэн байлаа. Харанхуй ангал дээгүүр тавьсан гүүр дээр, цагаан хар хоёр сахиулсан тэнгэрийн хооронд иймэрхүү тэмцэл болдог нь цөөнгүй.

Эцэст нь хар нь доош нисжээ.

Нэг өдөр л Гуинплен гэв гэнэт нөгөө танихгүй эмэгтэйд бодохоо болив.

Гуинплений газрын болон тэнгэрийн хоёр мөн чанарын тулалдаан, гол утгын мөргөлдөөн түүний сэтгэлийн угт, бараг ухамсарт нь хүрэн алдсан гүнд болоод өнгөрчээ.

Эргэлзээгүй ганц юм байсан нь, ганц ч хором Деяг эрхэмлэн хайрлахаа мартсангүй.

Аль хэдийнээ ч юм бэ дээ, бачимдан учраа олохоо больж, цус нь буцлам байсан юм шиг санагдана. Гэвч одоо энэ бүхэн төгсгөл болжээ. Зөвхөн Дея л түүнд үлджэ.

Деяг түр зуур ч болов аюулд орсон байсан шүү гэж хэн нэг нь хэлсэн бол Гуинплен гайхахын ихээр гайхах байсан билээ.

Ганц хоёр долоо хоногийн хойно, энэ хоёрыг айлган сүрдүүлж байсан хий юм алга болох нь тэр.

Гуинплений зүрх гал голомтоо, хайр дурлалаа гэсэн тэмүүллээр дүрэлзэн байлаа.

Ер нь ч тэгээд, бидний дээр тэмдэглэсэнчлэн, «гүнжин» дахин бараагаа харагдуулсангүй.

Үүрс үүнийг ерийн хэрэг гэж үзэж байв. «Квадруплтэй хатагтай» гэдэг ер бусын үзэгдэл. Ийм хүн ирээд л, төлөөд л, алга болоод өгнө. Хэрэв энэ давтагдаж гэмээж нь амьдрал дэндүү сайхан болчихно.

Деягийн хувьд гэвэл, тэр бээр өнгөрсөн явдал болсон нөгөө хүүхнийг дахин дурссан ч үгүй. Тэр ярианаас ямар нэг юм ойлгосон бөгөөд, Үүрсийн байсхийгээд л учиртайхнаар «Өдөр болгон лан алттай байдаггүй юм!» гэж уулга алдахыг сонсоод битүүхэндээ айж байжээ. Ингээд «тэр хүүхний» тухай огт дуугарсангүй. Энд л айхавтар гүнзгий зөн байлаа. Заримдаа сэтгэл санамсаргүйгээр болгоомжлон, нууц юм түүнд тэр болгон ойлгогдохгүй байдаг. Хэн нэгний тухай үг дуугарахгүй байх нь түүнээс өөрийгөө холдуулж байгаа хэрэг бус уу. Асууж сураглаж байж дуудчихаасаа айна. Хаалга хааж өөрийгөө хамгаалдаг шиг, ам ангайхгүйгээр өөрийгөө хамгаалж болно.

Гай түй мартагджээ.

Ямар нэг утга учиртай юм байсан гэж үү дээ? Үнэндээ тийм юм болсон гэж үү? Гуинплен, Дея хоёрын хооронд ямар нэг сүүдэр дайраад өнгөрсөн гэж хэлж болох уу? Дея энэ тухай мэдэхгүй бөгөөд Гуинплен нь мартчихжээ. Үгүй шүү. Юу ч болоогүй. Гүнжин зөвхөн хий юм харагдсан мэт холын холд замхарчээ. Гуинплен хором зуур санаашран мөрөөдөөд л одоо тэр зүүднээсээ салжээ. Арилж байгаа манангаас ямар ч ул мөр үлддэггүйтэй адилаар сарнисан мөрөөдлөөс юу ч үлддэггүй билээ. Тэнгэрт байгаа нар мэт, зүрхэнд буй хайрын сэтгэл үүл нүүгээд өнгөрдгийн адил хуучин хэвээрээ л дүрэлзэнэ.

IX. Abyssus abyssum vocat²⁰⁰

Өөр нэг хүн үзэгдэхээ байсан нь Том-Жим-Жек байлаа. Тэр гэв гэнэт л «Тедкастерийн буурчийн газраар» ирэхээ больжээ. Лондоны язгууртнууд, дээдсийн амьдралын хоёр хажууг харж чадахаар заяатай хүмүүс бол, яг тэрхэн үес «Долоо хоногийн сонинд» сүмийн харьяа нутгийн төрөгсдийн бүртгэлийн хоорондох зайд «Их эзэгтэйн зарлигаар Дэвид-Дерри-Моир лорд, Голландын эргээр харуул хийдэг далайн цэргийн цагаан ангид цэргийн хөнгөн хөлөг онгоцны ахмадаар дахин томилогдоод явах болсон» мэдээ гарсныг харсан байж таарна.

Үүрс ч, Том-Жим-Жекийг «Ногоон хайрцагт» ирэхээ больсныг нь ажиглачхаад санаа нь айхавтар зовжээ. Алтан зоос өгсөн хатагтайтай хамт нэг сүйхэнд сууснаас хойш тэр дахин үзэгдсэнгүй. Гүнжинг хулгайлаад явчихсан энэ Том-Жим-Жек тэр чигээрээ талаар болсон нь мэдээж. Ийм явдлыг цааш нь ухаад байвал яасан их сонирхолтой байх бол! Ямар олон асуулт гарах бол! Ийм учраас ч Үүрс ганц ч үг цухуйлгасангүй.

Цагтаа бас элдвийг амсаж, үзэж явсан Үүрс, дэндүү зоримгоор сониуч зан гаргавал яаж айхавтар түлэгддэгийг сайн мэднэ. Сониучирхана гэдэг сониучирхаж байгаа хүнтэйгээ зохицож байх ёстой. Чагнана гэхэд чихэнд халтай, ажиглаж харна гэхэд нүдэнд халтай. Юу ч харж, юу ч сонсохгүй байх л хамгийн ухаалаг явдал. Том-Жим-Жек гүнжингийн сүйхэнд суужээ, түүнийг нь буудлын эзэн харсан байна. Ледигийн²⁰¹ хажууд суудал эзэлсэн усан цэрэг гайхалтай санагдсан учир Үүрсийг болгоомжлоход хүргэжээ. Доод зиндааны хүнд, сурвалжит язгууртны адайр хачин аяг бол ариун нандин юм байх ёстой. Дээд төрөлт хүмүүсийн харц ядуус гэж нэрлэдэг үнсэнд ойчсон шалз шиг энэ амьтдад ямар нэг ер бусын юм харсан үедээ, үүрэндээ шургаж байхаас дээр юм үгүй. Дүлий дүнбэ сууж байгаа хүнд аюулгүй. Хэрэв хараагүй болж төрөх аз чинь дутсан бол нүдээ ань, аз чинь дутахад дүлий болоогүй бол чихээ тагла, хэлгүй болоход бэлэн төгс төрж чадаагүй аваас хэлээ хазчих хэрэгтэй. Мундагчууд хүссэнээрээ, доройчууд юу чадсанаараа л хүн болдог учраас, үл танихын өмнө зай тавьж өгцгөөе. Үлгэр домгийг түйвээн залхаахаа больё. Барин тавим харагдаж байгаа үзэгдлийн уг мухрыг олох гэж ухаж төнхөхөө больё. Өнгөц байдлыг нь л хүндэтгэн бөхөлзөж байцгаая. Бидэнд мэдэгддэггүй учир шалтгааны улмаас дээдчүүлийн хүрээнд болж байгаа од шинээр гарах ч юм уу

унтарч байгаа хов живийг анхаарахгүй орхицгооё. Бидэн шиг өчүүхэн хүмүүсийн хувьд энэ бол харааны эндүүрэл юм. Төрөл арилжин хувирах бол бурхны хэрэг, бидний дээр хаа нэгтээ халин элэх санамсаргүй дайралдсан язгуурт сурвалжийн хүмүүс өөрчлөгдөх ч юм уу алга болон одох нь бидэнд ойлгогдохын аргагүй, судлан мэдэхэд аюултай бүрхэг үйл явдал юм. Дэндүү ихээр сониучирхах нь өөрсдийн зугаа цэнгэл, хачин сонин аяг зандаа татагдсан бурхдын дургүйг хүргэх бөгөөд таны дэндүү анхааралтай ширтээд байгаа бух чинь Юпитер байжээ гэдгийг тэнгэрийн аянга ямар ч үгнээс илүүгээр хэлээд өгч болно гэдгийг санаж яв. Аймшигтай хүч чадалтнуудын биеийг ороосон жанчийн үрчлээ нугалаасыг сөхөхгүй байцгаая. Үл хайхрах бол ухаантай явдал. Таныг аврах юм, хөдлөхгүй таг чиг байхад л байна. Үхсэн хүн бол, тэгвэл таныг алахгүй. Шавж хорхойн цэцэн ухаан үүнд л байгаа юм. Үүрс үүнийг мөрдлөг болгодог байлаа.

Үгэнд дурласандаа байж сууж ядсан буудлын эзэн, нэгэн өдөр Үүрст,

— Том-Жим-Жек ерөөсөө үзэгдэхээ байсан байна шүү хө гэхэд нь Үүрс юу ч болоогүй юм шиг,

— Өө тийм үү? Би ажиглаагүй юм байна гэж хариулжээ.

Никльс, Том-Жим-Жекийг гүнжингийн сүйхтэй холбон эргэлзээгүй тийм ч сонсууштай бус үгээр өөрийн санаагаа илэрхийлэн бувтнахад нь зэгсэн болгоомжгүй санагдсан сайх яриаг нь Үүрс дуулаагүй царай үзүүлээд өнгөрөв.

Гэвч Үүрс, Том-Жим-Жекийг харамсахгүй байж чадахгүйгээр дэндүү жүжигчний маягтай хүн байлаа. Амьхандаа сэтгэл нь бас ч гэж зэгсэн зовжээ. Өөрийн сэтгэгдлийг, даруу номхонд нь итгэдэг, ганц баруун гар Гомотой л хуваалцана. Чононыхоо чихэнд,

— Том-Жим-Жекийг үзэгдэхээ больсноос хойш, би хүний хувьд хоосныг, яруу найрагчийн хувьд хүйт даахыг мэдэрч байна, халаг минь хэмээн шивгэнэжээ.

Сэтгэлийнхээ гунигийг найзтайгаа ийнхүү хуваалцчихаад жаахан санаа нь амрах шиг болов.

Энэ тухай Гуинплентэй ярилцахдаа ганц ч үг дуугараагүй агаад цаадах нь ч Том-Жим-Жекийг дурссангүй.

Үнэндээ ч байгаа бүхнээ Деяд зориулсан Гуинplen, Том-Жим-Жекийг бодохтой манатай байжээ.

Өдөр ирэх тусам Гуинplen танихгүй эмэгтэйг улам улмаар мартсаар байлаа. Деягийн хувьд, сэтгэлтэй хүн нь түр ч гэлээ сэтгэлээ хямруулаад авсныг зүүдэлсэн ч үгүй. Энэ үес «Инээмтгий

хүний» эсрэг элдэв, гомдол зүхэл, хов жив намджээ. Үзэн ядагсад харваас залхан тайвширсан бололтой. «Ногоон хайрцагт» ч, түүний эргэн тойронд ч нам гүм болж, бүх юм хэвдээ оржээ. Хошин хэсүүл жүжигчид санваартнууд ч, газрын гаваар орчхов уу гэлтэй. Аянгын пижигнээн намдах нь тэр. «Ногоон хайрцгийн» амжилтад заналхийлэх юмгүй болов. Заримдаа хүний хувь заяанд чимээ аниргүй амгалан үе гэнэт гарч ирэх нь бий. Гуинплен, Дея хоёрын сэтгэл дүүрэн аз жаргалыг энэхэн үес ямар ч сүүдэр гутаасангүй. Тэр жаргал нь яв явсаар, ямар ч юм дахин дээшээ өсдөггүй тэр цэгт хүрчээ. Ийм байдлыг илэрхийлэх үг гэвэл нь «оргил» юм. Аз жаргал, заримдаа далайн түрлэг лүгээ адилаар дээд түвшиндээ хүрчихдэг билээ. Дүүрэн жаргалтай байгаа хүмүүсийг түгшээдэг ганц юм нь, түрлэгийн дараа гарцаагүй ирдэг жамтай татрал юм.

Аюулаас хоёр аргаар зайлж болно. Нэг бол дэндүү дээгүүр байх, нэг бол дэндүү доогуур байх явдал юм. Хоёрдугаар арга нь нэгдүгээрээсээ арай илүү байдаг. Өчүүхэн шаахай хорхойг онож няц гишгэх нь нисэж яваа бүргэдийг олж харвахаас амаргүй байдаг билээ. Хэрэв орчлонд хэн нэг хүн ядуу доройнхоо ачаар айх аюулгүйгээ мэдэрч чадах сан бол, тэр нь бидний дээр өгүүлснээр Гуинплен, Дея хоёр байлаа. Тэгээд тэр нь, хэзээд ч энэ үеийнх шиг бүрэн гүйцэд байсангүй. Тэр хоёр нэг нь нөгөөгөөрөө амьдран, нэг нь нөгөөдөө тольдон тусаж байлаа. Зүрх гэгч, өөрийг нь хамгаалж байдаг ариун давс мэт хайр дурлалыг өөртөө шингээх агаад, залуу халуун насандаа бие биедээ сэтгэлээ өгөн, өтөл хөгшин насандаа ч хайрынх нь ааг арилахгүй байдаг хоёр хүний эвдэршгүй холбоо үүгээр тайлбарлагдана. Хайр сэтгэл занданшуулагдах нь байдаг. Дафнис, Хлоя²⁰² хоёр Филемон, Бавкида²⁰³ хоёр болон хувирна гэсэн үг. Үүрийн туяаг, үдшийн бүрэнхийтэй зүйрлэм тэрхүү өтөл насыг Гуинплен, Дея хоёрыг хүлээж байгаа бололтой. Одоохондоо тэд цэл залуугаараа байлаа.

Үүрс сайх дурлалыг, эмнэлгийн газраа хянаж буй эмч шиг ажиглан шинжинэ. Тэр үед нэрлэдэг байснаар тэр нь «гиппократын харцтай» хүн байлаа. Эмзэг, хувхай цагаан Деяг сайтар ажиглаж байгаад,

— Энэ охин жаргалтай байдаг нь ямар аз вэ! гэж үглэнэ.

Нөгөө удаа нь болохоор,

— Жаргалтай байна, эрүүл мэндэд нь эм л гэсэн үг! гэнэ.

Толгойгоо байн байн сэгсрэн, заримдаа 1650 онд Лувенд, Вописк Фортунадын орчуулгаар хэвлэсэн Авиценийг²⁰⁴

анхааралтай уншина. Түүнд сайх хуучин судраас «зүрхний эмгэгийг» тайлбарласан хэсэг нь л сонирхогддог байжээ.

Дея амархан тамирдаж байнга биеэр нь хөлс дааварлан, савс л хийвэл зүүрмэглэн, уншигчдын санаж байгаачлан өдөр байнга дуг хийдэг байлаа. Нэг өдөр Үүрс Гуинплен «Ногоон хайрцагт» байхгүйг тааруулан Деяг баавгайн арьсан дээр унтаж байх үед, сэмээрхэн түүн рүү тонгойж, зүрхний тус газар чихээ наан чагнав. Хэдэн хором чагнаж байснаа, толгойгоо өргөөд,

— Ялимгүй зовж цочирдоход л аюултай юм байна. Өвчин нь амархан газар авах шинжтэй гэж шивгэнэв.

Хүн зон «Гэсгээгдсэн нажид» руу үргэлжлэн цувсан хэвээр. «Инээмтгий хүний» амжилтад эцэс төгсгөл байхгүй гэлтэй. Бүгд л, Гуинпленийг харахаар гүйлдэж, зөвхөн Саутворк ч бус, Лондон хүртэл хэдийнээ аль нэг хэмжээгээр түүнд татагдах болов. Үзэгчид ч хүртэл одоо холимог байдалтай болж ирэв. Хэдийнээ зөвхөн усан цэрэг, хөтөч цугладгаа болиод доорд зиндааныхныг хараад л гадарладаг Никльсын үзэж байгаагаар бол элдэв язгууртнууд тэр байтугай, энгийн ардын байдалтай хувцасласан бэйл, бэйс ч үзэгдэх болжээ. Хувцас сольж өмсөх нь дээдчүүлийн зугаагаа гаргадаг зүйлийн нэг агаад, тэр үед жигтэйхэн их маягт тооцогддог байв. Ядуу харцын дунд язгууртнууд харагдах болсон нь сайны ёр, «Инээмтгий хүн» Лондоныг өөртөө татаж чадлаа гэдгийг гэрчилж байгаа нь тэр. Гуинплений алдар дээд зиндааны үзэгчдийн дунд нэгэнт нааштайгаар газар түгжээ. Үнэн хэрэгтээ ч тийм байв. Лондонд ганц ярьдаг юм нь «Инээмтгий хүн» болов. Түүний тухай зөвхөн лордууд л хөл тавьдаг «Магон-клубт» хүртэл яриа болно.

«Ногоон хайрцагт» бол ийм юм болж байна гэж зүүдэлсэн ч үгүй. Тэнд толгой хоргодогчид маань азтай жаргалтай байгаадаа л сэтгэл ханан байлаа. Деягийн хувьд орой болгон, Гуинплений буржгар ширүүн үсэнд хүрэх нь бахдам сайхан байдаг ажээ. Хайр сэтгэлд хамгийн гол нь зуршил болсон зүйл юм. Түүн дээр л амьдрал төвлөрнө. Өдөр болгон нар гарч ирдэг нь хорвоогийн зуршил. Хорвоо бол дурласан эмэгтэй, нар бол хайртай хархүү нь юм.

Гэрэл бол ертөнцийг тулж байдаг, нүд гялбам кариатида²⁰⁵ юм. Өдөр гэдэг маань ганц хоромд л өнгөрнө, шөнө нөмөрсөн ертөнц мандах наран дээр тулгуурлаж байдаг. Сохор Дея, Гуинплений тэргүүнд гараа хүргэнгүүтээ яг ийм халуун дулаан буцан ирж, итгэл найдвар төрөх шиг санагдана.

Бие биеэ эрхэмлэн дээдэлж хэнд ч тоогдохгүй хоёр амьтан, чив чимээгүйн дунд хоёр биедээ сэтгэлээ зориулна гэдэг, болж л өгвөл нэгэн зууныг ч болох нь ээ ийнхүү хэнд ч анзаарагдахгүй өнгөрөөсэй билээ гэж хүсмээр!

Нэгэн орон жүжгийн дараа цэцгийн мансууруулам сайхан үнэр мэт элбэг илүүдсэн гэмээр аз жаргалдаа тамирдчихсан Гуинплений толгой нь тааламжтай дүйнгэтсэн шиг «Ногоон хайрцгаас» холгүйхэн нугад ердийнхөөрөө гэлдрэн явж байв. Заримдаа сэтгэл буцаж гарам элдэв зүйлсээр дүүрэх үе байдаг. Шөнө саруулхан огт үүлгүй тэнгэрт одод гялалзана. Талбайд амьд амьтан байсангүй. Таринзофильдын тэнд энд, тархайсан модон байшинархуу юмнууд гүн нойрт дарагджээ.

Ганц гэрэл ёлтгонох нь хагас онгойсон хаалгатай «Тедкастерийн буурчийн газрын» дэнлүү бөгөөд Гуинплений эгж ирэхийг хүлээж байгаа нь тэр ажээ.

Саутворкийн таван сүмийн гонхонд шөнө дундыг мэдэгдэн цохиход, гонхон бүрийн хонх нь өөр өөрөөр хоорондоо адилгүй дуу цуурайлуулна.

Гуинплен Деяг бодож явлаа. Ер нь ч тэгээд энэ хүн өөр хэнийгээ бодох юм билээ? Гэвч энэ орой сэтгэл нь нэг л хачин догдолж, баяр хөөрөөр дүүрэн авч хажуугаар нь түгшүүр төрж, Деяг урдынхаасаа өөрөөр, эр хүн эмэгтэй хүнийг мөрөөддөг шигээр хүсэн мөрөөдөж байлаа. Үүндээ өөрийгөө зэмлэж байв. Энэ бол хайр сэтгэлийнх нь эрч буурч байгаа хэрэг. Түүнд эр хүний хүсэл далдуур төрж эхэлж байгаа нь энэ. Амттайхан захирангуй тэсэж ядсан байдал, тэр нь нүдэнд харагдаж, гарт баригдахгүй, нэг талд нь онгон охиноороо, нөгөө талд нь хүүхэн хүн байдаг хилийг алхаж байгаа нь энэ. Тэр санаа зовуурьтайгаар өөртөө асуулт тавьж, сэтгэлийнхээ гүнд ичин зовж байлаа. Урьдын Гуинплен маань аажим аажмаар өөрчлөгдөн бяд сууж, өөрөө ч мэдэлгүй идэршиж байжээ. Ичимтгий орь хөвүүн нэг л сэтгэл догдолсон байдалтай болжээ. Бидэнд гэрэл рүү хандсан нэгэн чих байдаг агаад түүгээрээ оюун ухаан юу хэлэхийг чагнан, нөгөө харанхуй руу хандсан чихээрээ төрөлхийн зөн юү гэж шивнэхийг чагнан байдаг билээ. Чухам энэхүү харанхуйн дуу чангаруулагч болох чихэнд, үл мэдэгдэх дуу хоолой Гуинплент ямар нэг юмыг цөхрөлтгүй шивгэнэнэ. Дурлалыг хүсэн мөрөөдөж буй залуу эрийн сэтгэл хэчнээн хиргүй тунгалаг байлаа ч, түүний хүсэл мөрөөдөл, тэр хоёрын хооронд эцсийн эцэст эмэгтэй хүний биеийн дүрс гарч ирнэ. Зүүдний бодол нүгэлгүй байдаг нь өнгөрчээ. Өөрөө ч мэдэлгүй, байгалиас заяасан эрмэлзэл түүнийг баринтаглажээ. Бид

бүгдийн дур татагдан, хорхой хүрэхийн эх булаг болсон жинхэнэ эмэгтэй хүний биеийн галбирт Гуинплен тачаадан татагджээ. Деягийн уяхан доожоо муутай галбирт тийм юм дутагдаж байлаа. Яагаад ч юм осолтой санагдах чичрээнийхээ үес, тэр нь бас ч гэж цаанаа айсан мөртөө Деягийн сахиулсан тэнгэр лүгээ адил дүр төлөвийг хорвоогийн эмэгтэй хүний дүрд буулган хувиргана. Эмэгтэй чи, бидэнд хэрэгтэй байдаг.

Диваажингийн дэндүү их гэнэн хонгор зан, яван явсаар дурлалыг бялууруулчихдаг. Хайр дурлалд, халуу дүүгэн чичгэнэсэн гар хөл, дагжин чичирсэн амьдрал, соронзон татах лугаа адил арилшгүй мөрөө үлдээсэн озолт, сэгсийн арзайсан үс гээг, цаанаа нэг учиртай тачаангуй тэврэлт хэрэгтэй ажээ. Сансрын өндөр дэндүү зовмоор агаад огторгуй бидэнд дэндүү хүнддэх ажгуу. Хайр сэтгэлд тэнгэрийн тал нь илүүдээд ирэх нь тулга дахь галын түлш нь ихдэн дөл улалзахгүй болдогтой утга нэг больюу. Ухаан нь гарч орж байгаа Гуинплений нүдэнд ташуурам амттай атлаа аймшигтай юм үзэгдэх нь тэр. Хоёр хүнийг шинэ амьдралын битүүлэг үүслээр холбодог тархи мансуурам ойртолтод бэлхэн, дуулгавартай номхон эзэмдэж хүрч болмоор Дея түүний өмнө гарч ирнэ. «Эмэгтэй хүн!» Дотор чээжиндээ, байгалийн хаашаа ч гарамгүй тэрхүү гүнзгий дуудлагыг сонсож байлаа. Зүүднийхээ бодлоор Галетейг бүтээж байгаа шинэ Пигмалион²⁰⁶ шиг сэтгэлийнхээ гүнд, дэндүү тэнгэрлэг авч барагтайхан диваажингийн дүр болох Деягийн ариун явдалтай дүр төлөвийг зоригтойёо өөрчилнө. Учир нь диваажин бол Ева юм. Ева бол эмэгтэй хүн, эх хүн, ариун хэвлийд нь ирээдүйн үе оршиж байдаг, хөхнийх нь сүү ширгээгүй, шинээр төрсөн ертөнцийг бүүвэйлэн агч, хорвоогийн өрлөг эх билээ. Эмэгтэй хүний хөх бол даль жигүүртэй харш зүйл. Онгон байна гэдэг эх болохын андгай юм... Гэлээ ч өдийг хүртэл Гуинплений мөрөөдөлд Дея мах цусанд төрсөн юм бүгдээс дээгүүр байдаг байлаа. Харин одоо мэгдэн бачимдахдаа, түүнийг бодлоороо доошлуулан, аливаа охидыг газартай холбон байдаг тэрхүү учигаас шүүрэн авчээ. Энэ учиг нь хүйс байлаа. Сайх хөнгөн дальтай шувуудын ганц нь ч дураараа элэн халих жамгүй. Дея ч гэх нь ээ бусдын адил байгалийн хуулийн эрхшээлд байх ёстой гэдгийг хагас хугас ойлгон мэдэж байгаа Гуинплен, түүнийг мөн тийнхүү захирагдаасай билээ хэмээн шунана. Энэ хүсэл нь түүнд өөрийн эрхгүй төрсөн агаад, цаг ямагт түүнтэйгээ тэмцсээр авай. Тэр Деяг нүгэлт хорвоогийн эмэгтэй болгон дүрсэлж байлаа. Тэр бүр байж боломгүй юмыг ч нүдэндээ дүрслэх болжээ. Зөвхөн онгод оруулаад ч зогсохгүй, хуял тачаалыг

гигигдэх бурхны бүтээл Дея, түүн рүү гилжийсхийн жинтүү дээр толгойгоо тавьжээ. Сайх ичгүүргүй үзэгдлээс ичин сандарна, түүний дотор ямар нэг хүч Деягийн дүрийг гутаахыг эрмэлзэнэ, сайх зургаас нүүр буруулан хий үзэгдлийг хөөнө, гэвч дараа нь дахиад л нүдэнд нь үзэгдэх, бүсгүйн ариун ёс суртахуун руу нь халдаж байгаа юм шиг санагдана. Дея түүний хувьд үүл байлаа. Дагжин чичрэн байж, нөмрөгийг сөхөх мэт энэхүү үүлийг Гуинплен хага ярж байлаа. Дөрөвдүгээр сар 207 байв.

Нуруу нугас ч гэсэн өөрийн хүсэл мөрөөдөлтэй байдаг.

Ганцаархнаа салхинд зугаалж яваа хүнд байдагчлан, Гуинплен жаахан гуйвганан нүдэн балай, чихэн дүлий алхаж явав. Хажууд хэн ч байхгүй байхад, элдвийг мөрөөдөх нь улам ч аятайхан байдаг билээ. Түүний бодол нь альхан зүг рүү тэмүүлнэ вэ? Тэр өөрөө өөртөө ч үүнийг зүрхлэн нээхгүй биз ээ. Тэнгэрт үү? Үгүй. Оронд уу? Түүнийг та нар харсан шүү дээ, однууд минь!

Яагаад «сэтгэлтэй болсон хүн» гэж ярина вэ? Уг нь «ганирсан хүн» гэж ярих ёстой юм л даа. Чөтгөрт ганирна гэж жичдээ зүйл, хүүхэнд, эмэгтэй хүнд ганирна гэдэг ерөнхий жам, эр хүн бүр, чухам биеэрээ сайх хохирлыг амсаж байдаг. Сайхан хүүхэн гэдэг ямаршуухан илбэч байдаг гээч! Дурлалын жинхэнэ нэр нь олзлогдох явдал юм.

Эмэгтэй хүний сэтгэлд ч эрэгтэй нь олзлогдоно. Бие цогцсоор ч бас адилхан. Заримдаа сэтгэлээс нь илүүгээр бие цогцост нь олзлогдох ч бий. Сэтгэл бол дурлалт бүсгүй, бие цогцос бол нууц амраг!

Чөтгөрийг хараацгаадаг. Гэвч тэр Еваг уруу татаагүй. Ева л түүнийг уруу татчихсан юм. Анх өдөхийг нь эмэгтэй хүн гаргажээ.

Люцифер хажуугаар нь тайван өнгөрч явсан юм. Тэгээд эмэгтэй хүн харангуутаа Ороолон болоод хувирчих нь тэр.

Бие цогцос бол үл мэдэгдэхийн гаднах бүрхэвч юм. Тэгээд ичимтгийгээрээ дур булаах нь хачин хэрэг. Түүн шиг сэтгэл догдлом юм гэж үгүй. Ичгүүрээ алдсан амьтан, ичиж байх гэдэг хачин юм шүү!

Яг энэ хоромд Гуинпленийг догдлуулан сандаргаж, өдөн дуудаж байгаа тэр юм нь сайх өнгөн талын үзэсгэлэн байлаа. Нүцгэн биед шунах үе бол аймшигт хором байдаг. Энэ үед бүдрэн алдаа гаргахад ядаж цөхөх юмгүй. Венерацийн цагаан өнгөнд ямар их харанхуй байдаг гэж бодно оо!

Гуинплений дотор ямар нэгэн хоолой чанга дуугаар Деяг, тэр охиныг, тэр найз эмэгтэйг, тэр бие цогцос, гал дөлийг, цээжээ ил

гаргасан Деяг дуудна. Тэр сахиулсан тэнгэрийг хөөн туухад ч бэлэн байв. Хайр сэтгэлтэй хүн болгоны тойрч гардаггүй дайрч гардаг туйлын хүслэнг аюулд өртүүлдэг нууцлаг хямрал. Орчлон хорвоогийн язгуурын хууль. Сэтгэлийн ариун гэрэл бөхөн бүүдийдэг хором.

Гуинплений Деяд дурласан сэтгэл нь эр эмийн хайр сэтгэл болж байгаа нь энэ ажээ. Цэвэр онгон хайр сэтгэл гэдэг шилжилтийн шат байдаг. Хаашаа ч гарахын аргагүй хором иржээ. Энэ бүсгүй Гуинпленд хэрэгтэй байлаа.

Тэр нь эмэгтэй хүнд татагджээ. Эхний ганц хоёр алхмаас нааших нь харагдахгүй эгц газар өмнө нь тулав. Байгалийн тод бус дуудлага хаашаа ч гарахын аргагүй хатуу. Эмэгтэй хүн гэгч ямаршуухан ёроолгүй хавцал байдаг гээч!

Гуинплений аз ирэхэд хажууд нь Деягаас өөр бүсгүй хүн байсангүй. Түүний хүсэж явдаг ганц бүсгүй хүн нь. Өөрийг нь хүсэж явдаг цорын ганц эмэгтэй нь тэр ажээ.

Гуинплен яагаад ч юм дагжталаа чичрэн, амьдрал түүнийг захирангуйгаар тулган дууджээ.

Түүний дээр хавар цагийн сэрхийлгэм нөлөөг яана. Од түгсэн шөнийн тайлбарлахын аргагүй цахилгаан гүйдлийг биедээ шингээн явлаа. Толгой хандсан зүгтээ сэтгэл мансууруулам бодолд автан алхана.

Шөнийн бүрэнхийд анхилан байх агаарт тархсан хаврын шим шүүсний согтууруулам сайхан үнэр, шөнийн цэцэгсийн алсад дэлбээгээ нээх анхилам үнэр, хаа нэгтээ нуугдсан жижиг үүрнээс сонстох яруу жиргээн, усны шоржигноон, навчсын сэрчигнээн, тал бүрээс сонстох сүүрс алдалт, сэрүүн бүлээн гээд л байгалийн энэ бүх нууцлаг сэрэл бол угтаа хавар цагийн нам дуугаар хуял тачаалыг өдөөн, сэтгэлийг гижигдэн мансууруулсан хүчирхэг дуунаас өөр юу ч биш юм. Сэтгэл хариуд нь утга учиргүй шулганан, өөрийнхөө юу хэлж байгааг ч үл мэднэ.

Чухамдаа энэ үед Гуинпленийг харсан хэн боловч: «Хүүе, хараач! Согтуу амьтан явж байгааг нь!» гэж бодмоор байлаа.

Үнэндээ ч тэр нь хүндэрсэн зүрхнийхээ даралт, хаврын улирал, шөнийн даралтад нуга даруулан хөлөө арай ядан зөөж явна. Эргэн тойрон хүн амьтан ч үгүй, анир чимээгүй учир Гуинплен өөрөө өөртэйгөө ярьж явлаа. Сонсох хүн байхгүй гэж бодсон үедээ хүн ганцаараа ярих нь бий.

Толгой гудайлган, баруун гараараа хуруугаа тэнийлгэсэн зүүн гарынхаа бугалгаас барин нуруу үүрээд аажуухан гэлдэрч явав.

Тэгтэл гэнэт гарт нь нэг юм шургуулан бариулчих шиг санагдаад явчхав.

Дорхноо ухасхийн эргэв.

Гарт нь нэгэн дугтуй, өмнө нь нэг хүн зогсож байлаа.

Энэ хүн л араас нь муур шиг мяраан ирээд, гарт нь сайх цаасыг атгуулснаас зайлсангүй.

Тэр цаас нь захиа байв.

Оддын гэрэлд тодхон харагдах тэр хүн, намхан нуруутай, булцгархан хацартай, шал хүүхдээрээ боловч, нэлээн погдойсон ихэрхүү янзын, тэр үед испаниар *sarpenoshe* буюу «шөнийн нөмрөг» гэж нэрлэдэг байсан урт хормойтой саарал цувных нь энгэрээр гал улаан өнгийн зарцын хувцас цухуйсан хүү байлаа. Их хамбын овоодойтой адилхан тод ягаан малгай духдуулсан нь түүнийг зарц гэдгийг хэлээд өгнө. Хятуу бялзуухайн багц өдийг малгайдаа хатгажээ.

Жаал хүү Гуинплений өмнө хөдөлгөөнгүй зогсох нь, зүүдэнд үзэгдсэн амьтан уу гэлтэй.

Гуинплен түүнийг гүнжингийн зарц болохыг танилаа.

Түүнийг гайхан цочирдсондоо дуу алдаж амжихаас нь өмнө, хүүхдийнх ч юм шиг, эмэгтэй хүнийх ч гэмээр жингэнэх дуу гарч,

— Маргааш яг энэ үеэр Лондоны гүүрэн дээр очоорой. Би тэнд байж байгаад таныг замчламз гэж хэлэх нь сонстов.

— Хаашаа? гэж Гуинплен асуув.

— Таныг хүлээж байгаа тэр газар луу.

Гуинплен, өөрийн мэдэлгүй барьсаар байгаа нөгөө захиа руу хараад авав.

Тэгээд толгойгоо дахин дээшлүүлээд харвал, нөгөө хиа хэдийнээ алга болон оджээ. Яармагийн талбайн тэртээ өнцөгт улам жижгэрэн сүүдгэнэх нэгэн дүрсийг харж болохоор ажээ. Энэ нь нөгөө зарц хүү байв. Удалгүй гудамж тойрон бараа нь харагдахгүй болов.

Гуинплен бараа нь тасарч яваа хиа руу харж байснаа, гартаа барьсан захиаг нь харав. Хүний амьдралд, дөнгөж тохиолдоод байгаа юм нь тохиолдоогүй юм шиг санагдах үе байдаг. Бэтгэрэн мэгдсэнээсээ болоод нэг хэсэгтээ болж өнгөрснөө ухааран ойлгож чаддаггүй. Гуинплен захиаг унших гэж байна уу гэмээр нүдэндээ ойртууллаа. Гэвч хоёр юмнаас болоод унших боломжгүйг ойлголоо. Нэгдүгээрт лацыг нь задлаагүй, хоёрдугаарт харанхуй байв. Буурчийн газар дэнлүү асаалттай байгаа гэдгийг санатлаа хэдэн минут болов. Тэгээд хаашаа явахаа мэдэхгүй байгаа юм шиг өөр зүг

рүү хэд алхав. Сүүдгэнэлээс зурвас авсан зүүдэн өвчтэй хүн л ингэж хөдлөх байлгүй дээ.

Эцэст нь нэг юм мэгдэж гайхширах нь гайгүй болов бололтой, буудал руу гүйхээрээ шахам очоод, онгорхой хаалганы гэрэлд нөгөө лацтай захиагаа дахин сайн харж авлаа. Лац дээр нь ямар ч тэмдэг байсангүй.

Харин дугтуйн дээр нь Гуинпленд гэсэн ганцхан үг байлаа. Лацыг нь ховхлоод, дугтуйг нь ураад, нөгөө захиаг дэлгэж гэрэлд ойртуулан, дараах зүйлийг уншлаа:

«Чи ой гутам эрэмдэг, харин би бол гоо үзэсгэлэнтэй. Чи хэрмэл марзганагч, би бол гүнжин. Би бол анхдугаар, чи бол адгийн сүүлч. Би чамайг хүсэж байна. Би чамд дурлаж байна. Хүрээд ир»

Дөрөвдүгээр дэвтэр. ГАЗАР ДООРХ ЭРҮҮГИЙН ГАЗАР

I. Хутагт Гуинплений хуял хөдөлсөн нь

Зарим цог эргэн тойрныхоо харанхуйг дөнгөн данган нэвтэлж байхад, зарим нь галт уулыг ч болов гал авалцуулчихна. Их түймэр гаргадаг оч ч байдаг шүү дээ.

Гуинплен захиаг уншчихаад, дараа нь дахин уншив. «Би чамд хайртай» гэдэг үгийг тодхон харж байлаа.

Түүний тархинд аймшигтай бодол хойно хойноосоо цувран эргэлдэнэ. Эхлээд өөрийгөө галзуурчхаж гэж хирдхийн бодов. Үнэндээ солиорчихжээ гэдэгт ямар ч эргэлзээ байсангүй. Үнэн хэрэг дээрээ байхгүй зүйлийг харсан байлаа. Шөнийн сүүдгэнэл хөөрхий амьтнаар тоглочихжээ. Улаан хувцастай хүн түүнд харагдах шиг санагдсан хэрэг. Заримдаа шөнийн цагаар ихэд нягтарсан намгийн уур, гал болон улалзаж, таныг гоочлон тохуурхах нь байдаг. Ингээд тоглоом тохуу хийж авчхаад, нөгөө хий юм, солиорчихсон Гуинпленийг орхин алга болох нь тэр. Харанхуй ийм юмыг элбэг хийж дөнгөнө.

Дараа нь эрүүл ухаантайгаа байна гэдэгт үнэмшээд, улам ч айж цочирдов.

Хий үзэгдэл үү? Үгүй байлгүй. Тэгвэл энэ захиа? Гарт нь байгаа энэ захиаг юу гэх вэ? Энэ дугтуй, лац, хэн нэгний бичигтэй цаасыг яах вэ. Тэгээд хэнээс ирүүлснийг нь мэдэж байдаг. Энэ адал явдалд ямар ч битүүлэг юм алга. Өдөн үзэг, бэх шүүрч аваад л зурвасыг бичжээ. Лаа асаагаад, лац хайлуулан битүүмжилсэн хэрэг. Гуинпленд хэмээн түүний нэрийг бичээгүй байна гэж үү дээ? Цааснаас нь анхилуун үнэр ханхална. Бүх юм ойлгомжтой. Жижиг хүнийг Гуинплен таньсан. Тэр тарваган хүн бол гүнжингийн хиа нь юм. Тэр улалзсан гал бол ёслолын хувцас юм. Тэр хиа маргааш яг энэ үеэр, Лондоны гүүрний эхэнд уулзъя гэдэг болзоо тавьжээ. Лондоны гүүр гэдэг маань хий юм гэж үү? Үгүй, үгүй, энэ бүгд хоорондоо холбоо авцалдаатай байж таарлаа. Солиорч дэмийрсэн юм ер алга. Энэ бол үнэн бодит байдал. Гуинплений ухаан сав саруул байна. Энэ бол аажим аажмаар агаарт замхран, ор мөргүй алга болдог зэрэглээ бус бодит юм байж. Гуинплен галзуу биш, тэр сэрүүндээ зүүдэлсэнгүй. Тэгээд захиаг дахин дахин уншиж гарав.

Тэгэлгүй яах вэ. Гэвч энэ чинь юу вэ? Гайхалтай.

Түүнийг бүсгүй хүн хүссэн байх нь ээ! Хэрэв тийм бол одоогоос эхлээд хэн ч «итгэмээргүй юм» гэдэг үгийг хэлэхээ болиг.

Хүүхэн хүн түүнийг хүссэн байна! Түүний царайг харсан бүсгүй хүн шүү! Сохор биш эмэгтэй хүн шүү! Тэр хүүхэн нь хэн бэ? Эрэмдэг бүсгүй юу? Үгүй, гоо үзэсгэлэнтэй хүүхэн. Цыган уу? Үгүй, гүнжин.

Үүнд юу нуугдаж байна вэ, энэ юу гэсэн үг вэ? Ийм ялалт гэдэг ямар аюултай вэ! Гэлээ гэхдээ ийм юмны өөдөөс бүхнийг умартан ухасхийхээс биш яах вэ?

Яалаа гэнэ ээ? Нөгөө лусын дагина, хий үзэгдэл, хатагтай, гял цал болсон хар сүүдгэнэл, тусгай суудлын үзэгч маань энэ хүүхэн байх нь ээ! Тийм ээ, мэдээжээр тэр эмэгтэй биеэрээ байна.

Гуинплений цээжинд гал шатаж байв. Нөгөө жигтэй танихгүй эмэгтэй нь энэ байлаа. Түүний амар тайвныг алдуулсан нөгөө хүүхэн. Энэ хүүхнийг хараад анх түүнд төрсөн бодол нь, сайх хар бараан галд улайстал халсан мэт сэтгэл догдлуулсан бодол нь Гуинпленийг дахин эзэмдлээ. Мартагнах гэдэг бол урьдах бичмэлийг нь арилгаад дээрээс нь бичдэг илгэн цаас л гэсэн үг. Гэнэтийн тохиолдол болоход л, аль хэдийнээ арилгачихсан юм шиг санагдах бүх юм, гайхан цочирдсон ой ухаанд мөрүүдийн хоорондуур тодрон гарч ирнэ. Гуинплен тэр хүүхний дүрийг зүрхнээсээ үлдэн хөөсөн гэж санагдаж байтал, ийнхүү нүднийх нь өмнө дахин тодрох нь энэ. Тэр дүр түүнд харагдан үлдэж, Гуинплений мөрөөдөлдөө догдолсон тархинд дур хүслээс нь гадуур арилшгүй мөрөө үлдээжээ. Түүний зөвшөөрөлгүйгээр, сэтгэлийнх нь гүн рүү нэвтрэн оржээ. Засахад бэрх муу юм болох, нь ч болж, дийлдэшгүй хүсэл мөрөөдлийн эрхэнд, дур татагдан орох нь тэр.

Яалаа гэнэ ээ! Түүнийг хүн хүслээ гэнэ үү? Яалаа гэж! Гүнж нь ширээнээсээ, шүтээн нь тахилын ширээнээсээ, баримал нь сууринаасаа, хий үзэгдэл нь үүлнээсээ бууж ирэх нь энэ үү? Яана гэнэ ээ! Байж болшгүйн дундаас хоосон бодол гарч ирлээ гэж үү? Яана гэнэ ээ! Хээтэй таазны энэ лус савдаг, биелсэн туяа гэрэл, үнэт эрдэнийн чулуугаар бүхнийг солонгоруулсан энэ лусын дагина, гоо сайхны амьд биелэл, хүрч ойртохын аргагүй сүрлэг энэ үзэсгэлэнтэй хүүхэн нүд гялбам өндрөөсөө Гуинплен рүү хандан тонгойлоо гэж үү дээ? Яалаа гэнэ ээ! Хүүрзгэнэ, луу хөлөглөсөн Аврорын их тэргээ толгой дээр нь зогсоогоод, түүнд «Хүрээд ир!» гэж хэлж байдаг. Яана гэнэ ээ! Түүнд, Гуинплэнд Элиперейг²⁰⁸ газарт хүртэл буулган басах аймшигтай атлаа тааламжтай хувь тохиож байна гэж үү? Энэ хүүхэн хэрэв шал өөр гарагийн хүнийг ингэж нэрлэж болдог бол, сайх бүсгүй Гуинплэнд өөрийгөө найр тавин, биеэ зориулж байдаг! Ухаарахын аргагүй явдал! Өврөө дэлгэн дуудаж байгаа

олимпын дар эх! Хэнийг гээч, Гуинпленийг шүү! Түүнийг дар эхийн цээжинд тэврэхийн тул, гэрэл туяа цацруулсан завхай эм түүн рүү гараа дэлгэн сарвайжээ. Ингэлээ гээд тэр хүүхэн өөрийгөө юугаар ч гутаахгүй. Энэхүү дээд төрөлтөнд ямар ч хир халдахгүй. Гэрэл бурхдыг угаан ариутгаж байдаг бус уу. Түүн рүү бууж ирсэн эх дагина юу хийж байгаагаа мэдэж байлаа. Гуинплений аймаар муухай эрэмдгийг мэддэггүй байсан юм биш ээ. Түүний царайг орлосон багийг нь харжээ! Тэгээд тэр баг түүнийг хирдхийлгэн зэвүүг нь хүргэсэнгүй. Хэдийгээр үзэшгүй муухай байлаа ч Гуинплен хайрлагджээ.

Хамгийн зүрхтэй хүсэл мөрөөдлийг ч энэ давжээ. Үзэшгүй муухайгаас нь болоод түүнд дурлажээ! Баг нь эх дагинын жигшүүрийг төрүүлсэнгүйгээр барахгүй түүнийг өөртөө татжээ. Дурлуулаад зогсоогүй, шунал тачаалыг нь хүргэжээ. Хүүхэн түүн рүү татагдсан төдийгүй түүнийг шилэн сонгожээ. Түүний сонгосон хүн нь Гуинплен!

Яана гэнэ ээ! Энэ эмэгтэйг тойрон бүчих тэр хааны хүрээлэн дунд, тэрхүү амарлингуй, гял цал болсон баян чинээлэг хүчирхэг хүмүүсийн дотор агь, жононгууд байж, хан хүүг тэднээс сонгож болох байв. Тэнд лордууд ч байлаа, тэр лордыг ч сонгож чадах байв. Гоё сайхан нүдэнд дулаан сэтгэл булаасан сүр жавхлантай эрчүүд ч байв, тэр Адонисыг [209](#) сонгож болох байлаа. Гэтэл тэр хэнд дур сэтгэл булаагдав аа? Гнафронд [210](#) шүү.

Гагцхүү аянга цахилгаан солир зөрөлдөн байдаг тэр хүрээлэнгээс сайх эмэгтэй, зургаан жигүүрт сахиулсан тэнгэрийг сонгож чадах байтал, замаг дунд мөлхөгч арчаагүй авгалдайг шилж авчээ. Нэг талаас нүд гялбам өндөр дээдэс, сүр жавхлан, тансаг чинээлэг, алдар нэрийн биелэл, гэтэл нөгөө талаас хэрмэл марзганагч. Тэгээд марзганагч жүжигчин бүгдийн дээр гарчээ! Энэ хүүхний зүрхэнд ямаршуухан дэнс байв аа? Өөрийн дурлалыг юугаар хэмжээ вэ? Тэр эмэгтэй толгой дээрх гүнжингийн титмээ аваад алиалагчийн хөлд шиджээ. Энэ эмэгтэй оройн дээд Олимпын эх дагинын гэрэл цацарсан титмээ аваад, эрэмдэг тарваган хүний ширүүн үстэй толгойд өргөжээ.

Шавж хорхой нь үүлэн цаадах орчинд гарч, одод эрхэс нь доошоо буусан энэхүү толгой нь уруугаа эргэсэн хорвоо, түүн рүү тусах гэрэлд нүд нь гялбан, хог новшны дунд гэрэл цацруулах болсондоо сандарсан Гуинпленийг залгин сорж байлаа. Гоо үзэсгэлэн, баян тансгийн эсрэг эгдүү нь хөдөлсөн төгс хүчит тэр хүүхэн мөнхийн харанхуйд өөрийгөө барин өгч. Гуинпленийг

Антинойгоос²¹¹ илүүд үзжээ. Харанхуйг харангаа сониуч зан нь хөдлөн, түүн рүү бууж ирээд ийнхүү эх дагинын тэнгэрээ орхисон нь өчүүхэн амьтныг хааны зэрэгт хүргэж, гайхалтай хачнаар түүнийг өргөмжилжээ. «Чи ой гутам эрэмдэг. Би чамд дурлаж байна». Энэ хэдэн үг Гуинплений бардам омгийг буруу талаас нь дөвийлгөчихжээ. Бардам омог гэдэг бол бүхий л баатар зоригтнуудын Ахиллийн өсгий²¹² мөн. Гуинплен эрэмдэг муухайгаараа бардамнаж болохыг ойлгож авчээ. Чухам түүний үзэшгүй муухайд нь л дурласан ажээ. Тэр нь Юпитер, Аполлон лугаа адил, тэд нараас бүр илүү ч байж болох жичдээ хүн юм. Тэр нь жир хүнээс дээгүүр гэдгээ, үзэгдээгүй эрэмдгээрээ бурхантай дүйцэхүйц гэдгийг ухан ойлгож аймшигтайгаар цочирдон балайрчээ.

Тэгээд ер нь, энэ хүүхэн гэдэг маань хэн байв? Энэ эмэгтэйн тухай Гуинплен юу мэдэх вэ? Бүгдийг мөртөө юуг ч мэдэхгүй. Тэр бол гүнжин гэдгийг мэдэж байлаа. Тэр гоо үзэсгэлэнтэй, баян тарган, ёслолын хувцастай зарц, хиа нар болон титмээр чимсэн сүйх ийг нь даган гүйдэг бамбар барьсан хурдан хүмүүстэй гэдгийг мэдэж байв. Тэр бүсгүй түүнд сэтгэлтэй болсныг, наад зах нь тэгж бичсэнийг нь мэдэж байв. Тэгээд цааш нь мэдэх юм алга байв. Хэргэмийг нь мэдэж байгаа ч нэрийг нь мэдэхгүй байлаа. Түүний бодлыг мэдэж байгаа ч амьдралыг нь мэдэхгүй байв. Тэр нөхөртэй хүүхэн үү, бэлэвсэн юм уу, эсвэл охин уу? Чөлөөтэй хүн үү эсвэл ямар нэг холбоогоор хэдийнээ холбогдсон хүн үү? Ямар гэр бүлээс гаралтай вэ? Түүнийг занга, урхи, далдуур өдөөн хатгалга хүлээж байгаа юм биш биз. Гуинплен, дээдчүүлийн, огт зүгээр гар хумхин суудаг нийгмийн тэр давхаргад ямаршуухан ужид самуун ноёлж байдгийг зүүдэлсэн ч үгүй, энэхүү өндөрлөгт, хатуу догшин дур булаагчид маань тарыг нь гүйцээсэн хайр дурлалынхаа орхидос дунд, зүүдний бодолд автан гиюүрдэг орогнох газар ч байдгийг мэдсэнгүй. Эрэгтэй хүний дээр гэж бодож явдаг эмэгтэйг уйтгар гэгч юм, ямар аймшигтай увайгүй явдлаар оролдоод үз хэмээн түлхдэгийг таамагласангүй. Нийгмийн ядуу доод хэсэг, дээд хүрээндээ чухам юу болж байдгийг мэдэх юмаар муу болохоор энэ бүхний тухай ямар ч төсөөлөл түүнд байсангүй. Гэлээ ч тэр ямар нэг муу юм болохыг ёрлоод байлаа. Энэ бүх нүд гялбуулсан юманд цаанаасаа нэг харанхуй байгааг зөнгөөрөө мэдээд байв. Тэр ойлголоо гэж үү? Үгүй, таачихлаа гэж үү? Бүр ч үгүй. Энэ захианы энгийн атлаа нэг л түгшүүр төрүүлсэн хаалт. Нэг талаас цаана чухам юу байна? Дэлгэн онгойлгосон хаалга, үнэнээ хүлээх нөгөө талаас оньсого.

Үнэнээ хүлээх, оньсого хоёр бол нэг нь өдөөн татсан, нөгөө нь айлган сүрдүүлсэн хоёр ам юм. Гэхдээ хоёулаа л нэг ижил «Зорилго» гэдэг үгийг хэлнэ.

Хэзээ ч муу санаат тохиолдол үүнээс илүүгээр арга мэх хийж, хэзээ ч дур хүслийг ийнхүү цагаа олон оргилуулж байсангүй. Хаврын улирал, байгаль дэлхийн сэргэлт, шим шүүсний шинэхэнд догдолсон Гуинплен тачаангуй мөрөөдөлд автагдан байлаа. Орчлон хорвоо шиг эрт галавын, устаж арилдаггүй, бидний хэн маань ч даван дийлж даанч чадаагүй төрөлхийн зан гээч, хорин дөрвөн насыг насалтлаа хүүхэд ахуйн юу ч үзээгүй ариун онгоноо хадгалан явсан сайх залуу эрийн цээжинд сэрж ирэх нь энэ. Чухам яг энэ хоромд, сайх хямралын хамгийн эгзэгтэй хүнд агшинд, тэр нь хайр дурлалаа илчлэхийг үзэн, түүний өмнө ховдсын нүд гялбам нүцгэн чээж гарч иржээ. Залуу нас гэдэг налуу хавтгай гэсэн үг. Гуинплен тийшээ халтирчээ. Хэн нэг нь түүнийг түлхсэн хэрэг. Хэн бэ? Хавар уу? Хэн бэ? Шөнө үү? Хэн бэ? Энэ бүсгүй юу? Хэрэв дөрвөн сар байгаагүй сэн бол хүмүүс улам ч буянтай байх сан. Цэцэглэсэн бут гэдэг бас нэг хамсаа! Дурлал бол хулгайч, хавар бол хулгайлсныг нь сэм дарагч мөн.

Гуинплен бачимдан мэгдэж байлаа.

Муу явдал модон улаатай гэгчээр, сэтгэл санаа багтарч үхмээр хортой утаа түүний түрүүнд явдаг. Дур татагдсан шударга үнэнч зан, муухай өмхий самхайгаас бөөлжис нь цутгаж байдаг. Тэндээс цоргилон гарах уур чанга сэтгэлтэй хүмүүст сануулга болдог байхад, сул сэтгэлтэйг нь манаруулан эргүүтүүлнэ. Гуинплен ч энэхүү битүүлэг бие тавгүй болохыг амсаад авчээ.

Түүний өмнө, салж өгдөггүй ацан шалаанууд бие биеэ түлхэн гарч ирнэ. Түүнийг уруу татан байгаа алдаа нь тодорхой дүртэй болж ирэв. Маргааш шөнө дунд, Лондоны гүүр, хиа гэдэг л. Очих уу? «Очно!» гэж бие цогцос нь хашхирч байхад, «Очихгүй» гэж сэтгэл нь хашхирна.

Гэлээ ч, өнгөц харахад гайхалтай бус ч, Гуинплен нэг ч удаа тийшээ явах уу яах вэ гэдэг асуултыг өөртөө тодорхойхон тавьж байсангүй. Уруу татдаг зүйл, хүнийг өөртөө сэмхэн шиг татчихдаг. Нэг мөсөн хөнтөрч болохгүй хачин хатуу архи л гэсэн үг. Хундагаа хажуу тийш нь тавьчаад жаахан хүлээж байтал чинь л анхны ганц балгаснаас л толгой чинь эргээд ирнэ.

Ганц эргэлзээгүй юм байсан нь, түүнийг араас нь ямар нэг юм түлхээд байгааг мэдэрч байлаа.

Тэр байдгаараа дагжин чичирч байв. Ёроолгүй ангалын ирмэг дээр зогсож байгаагаа харж байлаа. Тал талаас нь аюул занал өнгийж буйг зөгнөн хойшоо ухрав. Тэр нүдээ анилаа. Юу ч болоогүй хэмээн өөртөө итгүүлэхийг байдгаараа хичээн, ухаан нь солиорчээ гэж дахин бодохыг хичээж байв. Мэдээжээр, энэ нь хамгийн олигтой арга байлаа. Өөрийгөө ухаан солиорч гэж бодож чадвал л хамгийн ухаалаг хэрэг болох байв.

Үйлийн үргүй өвчин! Ганц удаа боловч санамсаргүйн золиос болсон хүн бүр иймэрхүү уйтгар гунигтай хормыг үздэг жамтай. Өөрт болж байгааг мэдсээр байж ажиглан хүлээж байгаа хүн бол ямагт, гэнэтхэн сэтгэл санаа руу нь дайрсан заяаны түншүүрийн цохилтыг зүрх шимшрэн чагнаж байдаг билээ.

Халаг хоохой, Гуинплен яаж ч чадахгүй тээнэгэлзэж байв! Гэвч үүрэг маань юу билээ гэдэгт эргэлзээ байхгүй тэр газар тээнэгэлзэнэ гэдэг ялагдлаа гэсэн үг.

Гэхдээ тэмдэглэвэл зохистой нэг зүйл бол, муу зан суусан хүнийг аягүйрүүлэн бачимдуулж мэдэх сайх захианы увайгүй илэн далангүй нь Гуинпленийг огтхон ч юм бодогдуулсангүй. Увайгүй, ичгүүрээ алдсан явдал гэж юу болохыг мэддэггүй байжээ. Садарч самуурах тухай битүүгээр хэлэв үү дээ гэж санаанд нь ч орсонгүй. Тэр бүү хэл, үүнийг ойлгох ч сөхөө байсангүй. Нарийн төвөгтэй тааврыг ойлгож ухаарахад дэндүү цэвэр ариундаж байлаа. Тэр эмэгтэйдээс зөвхөн сүр хүчийг нь л харж байжээ. Халаг хоохой, сэтгэл ханасны нь яана! Ихэрхэг зан нь зөвхөн ялалтыг л анхаардаг болгожээ. Дурлалын бай болохоосоо илүүгээр ичгүүргүй сониуч зангийн бай болоод байна гэдгийг ойлгоход түүнд, гэнэн хонгор сэтгэлд даанч байдаггүй, юм үзэж нүд тайлсан байдал буюу туршлага хэрэгтэй байлаа. «Би чамд дурлаж байна» гэдэг үгийн хажууд, «Би чамайг хүсэж байна» хэмээн дотор арзасхийлгэм нэмж бичсэнийг нь ажигласангүй. Дар эхийн адгуусны төрх нь Гуинплений анхааралд өртсөнгүй.

Ухаан бодол заримдаа довтолгоонд өртөх нь бий. Сэтгэлд бидний буянт үйл рүү уулгалдаг өөрийн булай амьтад байдаг. Эсрэг тэсрэг олон арван бодол, нэг нь нөгөөгийнхөө араас Гуинпленийг эзэмдэн заримдаа бөөнөөрөө нэгэн зэрэг дайрна. Тэгэхэд нь толгойгоо хоёр гараараа барин, шөнийн байгалийг ажиглах мэт, дотор нь болж байгаа юмаа арга нь ядсан байдлаар анхааран чагнана.

Гэнэт юу ч бодохоо больчихоод байгаагаа анзаарлаа. Элдвийг бодон эргэцүүлсээр, бүх юм алга болон оддог нөгөө хар ангалд

оччихжээ. Гэртээ харих хэдийнээ болчхоод байгааг ч санав. Шөнийн хоёр цаг болсон бололтой.

Хиагийн гардуулсан захиаг энгэрийнхээ халаасанд хийснээ, яг зүрхэн тус газар нь байгаад байх болно гэдгийг бодож үзээд, тэндээс буцаан гаргаж, үрчийтэл нь атгаснаа, тэр чигээр нь өмднийхөө дайралдсан уут руу чихчхээд буудал руу оров. Түүнийг хүлээж суугаад гараа дэрлэн ширээ түшин унтсан бяцхан Говикемаг сэрээлгүй сэмхэн алхан оронгоо, хаалгаа хааж, буудлын дэнлүүнээс нэг лааг асааж аваад оройтсон хүний ёсоор хар аяндаа л бүхий л болгоомжлох арга хэмжээг аван, хаалгыг оньслон, цоожинд нь түлхүүрийг нь эргүүлснийхээ дараа «Ногоон хайрцгийн» шатаар өгсөн гараад одоо унтлагын өрөө болон хувирсан хуучин мухлаг тэрэг рүү сэмээрхэн шурган ороод, унтаж байгаа Үүрсийг харснаа лаагаа унтраасан боловч орондоо орж хэвтсэнгүй.

Ийнхүү нэг цаг өнгөрлөө. Эцэст нь тамирдан, ор дэр гэдэг маань нойр гэсэн үг гэдгийг санаандаа дүрслэн, хувцсаа ч тайлалгүй дэрэн дээрээ толгой тавьж, харанхуйд гартсанаа хүлээн нүдээ анив. Гэвч түүнийг сэгсчин буй сэтгэлийнх нь догдлол хором зуур ч буурсангүй. Нойр хулжих гэдэг, шөнийн зүгээс хүнд хүч хэрэглэж байгаа явдал мөн. Гуинплен ихэд зовж байлаа. Амьдралдаа анх удаа л өөртөө дургүй нь хүрчээ. Бахдаж явдаг иймэрхүү нэрэлхүү зантай нь нэг л битүүлэг эмзэг холилдон байв. Юу хийх болж байна гэж зовсоор өглөө болгов. Үүрсийн босож байгааг мэдсэн боловч нүдээ нээсэнгүй. Бодол болсоор л. Захианы доторх бүх үг, эмх замбараагүй, сэтгэлд нь орж ирнэ. Сэтгэл ихэд зовж байгаа үед бидний бодол, давлагаа лугаа адил болдог билээ. Тэр нь далайн бүдэгхэн нүргээн шиг авиа гарган хаашаа ч юм тэмүүлэн бургилна. Түлхэлт, татралт, ёвролт, эргүүлэг, хадан хясааны ёроолд түр намсхийх, мөндөр, бороо, завсраар нь гэрэл нэвт туяарсан үүлс, юунд ч хэрэггүй хөөсний шүршдэс, галзуурсан мэт дээш цойлсноос дорхноо буцан унаж буй хий дэмий зарцуулсан хүч, онгоц сүйтгэх аюул, тал бүрд заналхийлэх үхэл, харанхуй гээд л далайд үзэгддэг тэр бүх зүйлийг хүний сэтгэлд ажиглаж болдог. Гуинплен сайх давлагаан дунд нүдүүлэн байх ажээ.

Сайх сэтгэлийн зовлон нь байж суухын аргагүй болоод ирдгийн даваан дээр, нүдээ аньсан хэвээр хэвтэж байсан Гуинплен хажууханд нь зохид аятайхан дуугаар,

— Гуинплен, чи унтсаар л байна уу? гэж асуухыг сонсов.

Нүдээ нээнгүүтээ, ухасхийн өндийж, орон дээрээ цомцойм суулаа. Мухлагийнх нь хаалга онгорхой, босгон дээр нь Дея зогсож

байв. Нүд, уруулаараа хараад хараад ханашгүй өхөөрдмөөр инээвхийлнэ. Тэр чигээрээ, өөрөө ч таамаглаагүй гэрэл туяа цацруулан зогсоно. Тэнгэрлэг хором гэгч энэ буюу. Гуинплен түүнийг анхааралтай харснаа нүд нь гялбан дагжтал чичирснээ, бүрмөсөн сэрэв. Юунаас сэрдэг билээ? Нойрноос уу? Үгүй, нойр хулжсанаасаа. Энэ бол нөгөөх нь, Дея нь байлаа! Тэгээд гэнэтхэн сэтгэлийн угт, үгээр илэрхийлэхийн аргагүйгээр, догшин салхин намжихыг, сайн нь муугаа ялсны гайхамшигтай бахдалыг мэдрэв. Тэнгэрээс түүн рүү ширтсэн харц, гайхамшигийг бүтээн гэрлийг авчрагч номхон хараагүй бүсгүй, зөвхөн үзэгдэх төдийхнөөрөө түүний сэтгэлийг хучин байсан харанхуйг замхруулжээ. Сэтгэлийг нь бүрхэн байсан манант хөшгийг үл үзэгдэх гар угз татан унагах мэт. Ээ бурхны аврал, ухаан нь дахин сэргэн саруул болох нь тэр! Сайх сахиулсан тэнгэрийн авралаар, тэр нь хуучны хүчтэй, сайн сэтгэлтэй, гэнэн цагаан Гуинплен боллоо. Бүхий л орчлон ертөнцийн адил, хүний сэтгэлд ч гэсэн иймэрхүү тэс ондоо хоёр юмны мөргөлдөх нь байдаг. Хоёулаа үг дуугарсангүй, гэрэл нь ч, ёроолгүй ангал нь ч, нам гүм нь ч, амарлингуй болсон нь ч. Гуинплений догдлон дэлссэн зүрхэн дээр, далайн од лугаа адил, Дея үгээр хэлэхийн аргагүй гэрэл цацруулан туяарч байлаа.

II. Зохид тааламжтайгаас хахир хатууд

Заримдаа зүүд зэрэглээ шиг юм ямар амархан бүтнэ гээч.

«Ногоон хайрцагт» цай уух цаг болоход, Гуинпленийг яагаад цайгаа уухаар ширээнд суусангүй вэ гэдгийг Дея, зүгээр л мэдэх гэж ирсэн нь энэ ажээ.

— Чи юу? гэж Гуинплен дуу алдав. Үүгээрээ цөмийг хэлжээ.

Түүний хувьд, Деягийн байгаа тэнгэрээс өөр ямар ч тэнгэрийн хаяа, хараа гэж байсангүй.

Хар салхи намжмагц гарч ирдэг далайн инээмсэглэлийг, хараагүй хүн бол сайх тогтуун амарлингуйн учрыг ойлгож чадахгүй билээ. Догширсон их уснаас түргэн номхордог юм гэж байхгүй. Энэ нь бүгдийг залгин баллахдаа хэчнээн амархан хөнгөнөөр хийдгээр нь тайлбарлагдана. Хүний зүрх ч ийм байдаг. Гэхдээ үргэлж ийм биш л дээ.

Деягийн бараа харагдангуут л, Гуинплений дотор байгаа гэрэл гэгээтэй бүх юм нь түүн рүү тэмүүлэн, нүд нь гялбасан түүнээс сүүтгэнэл цөм зугтаан одлоо. Хайрын сэтгэл гэгч юутай хүчтэй вэ!

Хэдэн хормын дараа тэр хоёр өөд өөдөөсөө харан сууж, дунд нь Үүрс, хөл доор нь Гомо хэвтэж байлаа, Доор нь жижиг дэн улалзах тунхуу ширээн дээр байна. Фиби, Винос хоёр хашаанд юм хийж байлаа.

Өглөө ч, орой ч адилхан бүхээгт тэрэгний голын тасалгаанд хооллоно. Нарийхан ширээг зайчлан тавихдаа, Дея «Ногоон хайрцгийн» орох үүдтэй зэрэгцээ агч жижиг цонх руу нуруугаа харуулан суухаар таарчээ. Гуинплен Деягийн аяганд цай хийж өгнө. Тэдний өвдөг шүргэлцэн байлаа.

Дея аягатайг намбатайяа аван, үлээж байснаа гэнэтхэн найтаав. Яг энэ агшинд дэнлүүний дээгүүр, үнс болсон цаасны тасархай шиг утаа бутран байлаа. Энэ утаанаас болж Дея найтаажээ.

— Юу вэ? гэж Дея асуухад,

— Юу ч биш ээ хэмээн Гуинплен хариулснаа инээмсэглэв.

Тэр нь гүнжингийн захиаг дөнгөж шатаасан нь энэ ажээ.

Хайртай болсон эрэгтэйн сэтгэл бол түүний янаг эмэгтэйн сахиулсан тэнгэр байдаг ажээ.

Захиаг алга хийчхээд Гуинплен нэг л хачин сэтгэл амраад явчхав. Бүргэд жигүүрийнхээ хүчийг мэдрэх лугаа адилаар тэр нь өөрийн цэвэр ариуныг мэдрэн байлаа.

Тэрхүү утаатай хамт буруу зүгийн дон нь замхран, тэрхүү цаасны өөдөстэй хамт, гүнжин өөрөө үнс болчих шиг санагджээ.

Гарт дайралдсан аягаа аван, нэг аяганаас уунгаа тэр хоёр зогсолтгүй ярьсаар байлаа. Сэтгэлтэй хосын шулганаан бол богширгын жиргэх л гэсэн үг. Нугас- Ээж²¹³ Гомерт л тэнцэх хүүхэд зан. Дурласан хоёрын яриа бол тэр чигээрээ л яруу найраг, тэдний харилцан үнсэлцэх нь бүхлээрээ хөгжим гэсэн үг.

— Чи нэг юм мэдэж байна уу?

— Үгүй шүү.

— Гуинплен, бид араатан амьтан ч юм шиг, бас тэгээд жигүүртэй ч юм шиг зүүдэллээ.

— Жигүүртэй л бол шувуу гэсэн үг хэмээн Гуинплен шивнэхэд,

— Араатан амьтан бол сахиулсан тэнгэр байж таарна хэмээн

Үүрс үг хавчуулав.

Яриа үргэлжилсээр л,

— Хэрэв чи хорвоод мэндлээгүй байсан бол. Гуинплен...

— Тэгээд юу гэж?

— Тэгвэл бурхан байхгүй гэсэн үг болно.

— Цай дэндүү халуун байна шүү. Амаа түлчхэв дээ, Дея

— Чи үлээгээд зөөгшрүүлээдэх дээ.

— Өнөөдөр чи ямар сайхан харагдаж байна аа!

— Чамд ямар их юм яримаар байна гээч.

— Ярь л даа.

— Би чамд хайртай!

— Би чамд ухаангүй дуртай!

Үүрс аман дотроо,

— Хөөрхөн амьтад ч бол доо, тэнгэр минь! гэж бувтнав.

Дурлалд ялангуяа дуугай байх нь дур булаамаар байдаг. Энэ зуур хайр энхрийлэл хуралдан хуримтлагдаж, дараа нь амттайхнаар сэт тавин гардаг билээ.

Жаахан чимээгүй сууж байлаа. Дея, дуу алдан өгүүлрүүн.

— Чи минь мэддэг сэн бол! Үдэш жүжиг тоглож байхдаа, чиний духанд гараа хүргэх тэр агшинд... аяа халаг, чи ямар буянтай тэргүүнтэй гэж бодно оо, Гуинплен! Чиний үсийг гартаа мэдрэх тэрхэн хоромд, би дагжталаа чичрэн, үгээр хэлэхийн аргагүй баяр бахдал төрж, намайг тойрон байгаа энэхүү мөнхийн харанхуй орчлонд, гав ганцаархнаа байхаар заяагдсан энэ хорвоод миний байгаа энэхүү эмх замбараагүй харанхуйд, надад болон бусдад ч нөлөөлдөг энэхүү хуурамч ертөнцөд цорын ганц тулах цэг байна. Энэ бол тэр маань. Энэ бол чи гэж би өөрөө өөртөө хэлдэг юм.

— Өө, чи надад хайртай юм аа, гэж Гуинплен дуу алдсанаа, — Надад ч гэсэн, газар дээр байдаг ганц хүн маань чи юм шүү. Миний хувьд чи бол бүх юм, Дея минь, надаас юу дуртайгаа шаард, би биелүүлнэ. Чи юу хүсэх сэн бол? Чамдаа зориулан би юу хийх ёстой вэ? гэв.

Дея хариуд нь,

— Би мэдэхгүй. Аз жаргалтай байна гэлээ.

— Тийм ээ, бид жаргалтай улс хэмээн Гуинплен дуугарлаа.

Үүрс дуугаа өндөрлөн ширүүлж хэлрүүн,

— Тийм бий! Та нар жаргалтай байна гэнэ ээ? Энэ бол ялт хэргээс ялгаагүй хэрэг. Би та нарт хэдийнээ сануулаад байгаа шүү. Та нар жаргалтай байдаг гэнэ ээ? Ядахдаа хүн амьтанд харагдахгүй байхыг хичээж яв. Аль болохоор уйтан газар байхыг бод. Аз жаргал гэдэг хамгийн давчуу буланд л нуугдаж байх ёстой. Улам жижиг болон атийж, хүний нүдэнд бүү өрт. Хүн хэчнээн шальгүй өчүүхэн болох тусам, бурхнаас заяах аз жаргал нь төчнөөн их байдаг юм. Хувь заяандаа хангалуун байдаг улс, хулгайч луйварчин шиг л нуугдах хэрэгтэй. Өө, өөдгүй муу галт хорхойнууд та нар, гэрэл цацруулж байна уу, гайгүй ээ, та нарыг, бяц гишгээд өгөхөөр сайхан юм болох вий! Юундаа ингэглээ тэнэгэрхэн нялуурна вэ? Сэтгэлтэй хосууд, хошуу амаа нийлүүлэхийг нь харж суух ёстой дуэнья²¹⁴ нь би биш. Явсаар байгаад та нар намайг залхаачихлаа. Чөтгөр лүүгээ тонилцгоо!

Дууны ширүүн өнгө нь зөөлөрсөөр бараг эелдэг гэмээр болохыг мэдчихээд, сэтгэл догдлолоо нуухын тул дуугаа өндөрлөн яншив.

— Аав аа, та яагаад ийм ууртай дуугаар ярина вэ? гэж Дея хэлэв.

— Яагаад гэвэл, би хүмүүс дэндүү жаргалтай байхад дургүй гэж Үүрс хариу дуугарлаа.

Гомо ч найзыгаа дэмжиж буй бололтой, сэтгэлт хосын хөл дор архирах чимээ сонсогдлоо.

Үүрс бөхийн, Гомогийн толгой дээр гараа тавиад,

— Тэгнэ ээ тэр, чи бас дургүй байна уу? Архирч байх чинь. Наад чонон бөндгөр дээрх үс чинь босчхож. Чи хайр сэтгэлийн хам хум ярианд дургүй юм шив дээ. Чи ухаантай болохоороо л тэгж байгаа юм. Гэхдээ ялгаа алга, амаа хамхи. Чи хэлэх гэснээ хэлж, ярилаа шүү дээ. Одоо дуугаа тат гэв.

Чоно дахин архирав.

Үүрс ширээн доогуур тонгойн харснаа,

— Гомо томоотой бай! Аль вэ, гүн ухаантан минь, бүү зөрүүдлээд бай гэв.

Гэвч чоно хөл дээрээ босон, хаалганы зүг харснаа соёогоо арзайлгана.

— Чи чинь юу болчхов оо? гээд Үүрс шилэн хүзүүнээс нь зууран авав.

Дея чонын аяглахыг анзаарах ч үгүй, Гуинплений дууны өнгөнд уяран, бодолдоо дарагдсан чигээр, зөвхөн сохор хүмүүст л байдаг, заримдаа тэдэнд зүрх сэтгэлийнхээ дуу аялгууг, тэдэнд дутагдан агч гэрэл гэгээг орлон байдаг ямар нэг хөгжмийн эгшгийг сонсох бололцоо олгодог тэрхүү онгод нь орсон байдалтай байлаа. Сохорсон гэдэг бол, үүрдийн гүн гүнзгий дуурьсал хөг сонстон байдаг газар доорх харанхуй билээ.

Үүрс Гомотой ярилцан доошоо тонгойж байх хооронд Гуинплен толгойгоо өргөн харлаа.

Тэр аягатай цай уухаар завдан амандаа авчирсан байснаа түүнээ уулгүй, баадуу нь суларсан аятай жигтэйхэн удаанаар аягаа ширээн дээр тавьснаа, хуруугаа тэнийлгэсэн чигээр, тэр чигээрээ хөшин, нэг зүгт гөлийн амьсгаа авахаа болив.

Деягийн цаад талд хаалган дээр нэг хүн зогсож байлаа.

Танихгүй хүн юүдэнтэй урт хар цув өмсжээ. Хиймэл үсээ хөмсгөндөө хүртэл дарж, гартаа хоёр үзүүртээ титэмтэй, сийлбэр гаргасан төмөр бэрээ барьжээ. Бэрээ нь бахим, богинохон эд байв.

Энхжиний орны модны мөчир завсраар нь толгой нь цухуйх Медуз байна гэж бодоод үз л дээ.

Үүрс хэн нэгэн хүн орж ирлээ гэдгийг мэдрэн, Гомог барьсан чигээрээ толгой өндийлгөн харснаа, аймшигтай зочныг танилаа. Хамаг бие салганаад ирэв.

— Очир бэрээ баригч байна гэж Гуинплений чихэнд шивгэнэхчээ аядав.

Гуинплен саналаа.

Гайхаж балмагдсандаа золтой л дуу тавьчихсангүй, хэлээ хазаад өнгөрөв. Хоёр үзүүртээ титэмтэй төмөр бэрээ нь iron weapon байжээ.

Энэ бол хотын шүүгч нар албанд орохдоо тангараг өргөдөг байсан, Английн хуучин цагдаа нар цолоо авдаг байсан нөгөө алдарт очирт бэрээ байлаа.

Хиймэл үстэй хүний цаад талын бүрхэг дунд айж сандарсан буудлын эзний дүрс сүүдгэнэнэ.

Сайх хүн ганц ч үг дуугаралгүй, эрин галавын баримт бичгийн Фемида²¹⁵ биеэр заларсныг үзүүлж, инээмсэглэн суугаа Деягийн дээгүүр баруун гараа сунган, төмөр бэрээгээр Гуинплений мөрөнд хүрснээ зүүн гарын эрхий хуруугаар, ардаа байгаа «Ногоон хайрцгийн» үүд рүү заав. Бэрээ баригчийн дуун гарахгүйгээс болж улам ч захирангуй санагдах энэхүү давхар зангаа нь «Намайг дагаад яв» гэсэн үг ажээ.

Pro signo exeundi, sarsum trahe²¹⁶ гэж нормандын сүмийн жаягийн жагсаалд байдаг.

Төмөр бэрээ тавиулсан хэнбугай ч байлаа захирагдан дагах эрхээс бусад бүх эрхээ хасуулна. Сайх дуугай тушаалын эсрэг юу ч дуугарч болохгүй. Английн хууль дүрмийг зөрсөн этгээдийг хамгийн хатуу цээрлэл заналхийлэн байдгийг хэлэх юун.

Хуулийн хатуу мутар өөр дээр нь буулаа гэдгийг ойлгон Гуинпен цочин татвалзсанаа, тэр дорхноо чулуу шиг хөшчихөв.

Тархин дундуур нь ямар ч хүчээр буулгаад авсан байлаа гэхэд, энэхүү төмөр бэрээгээр мөрөнд нь хүрэхээс илүүгээр мангартуулахгүй байсан биз ээ. Цагдаагийн түшмэлийг дагаж яв хэмээн тушаасныг харжээ. Гэвч яагаад? Үүнийг тэр ойлгосонгүй.

Үүрс ч бас тэнгэрийн суманд дайрагдсан мэт болсон ч, ямар ч байсан болсон явдлыг эргэцүүлэн бодохтойгоо байлаа. Тэр, өрсөлдөгчид, тэнэмэл жүжигчид, «Ногоон хайрцгийг» нууцаар ховлосныг, гэмт хэрэгтэн хэмээн үзэгдэж мэдэх чоноо, Бишопсгейтийн гурван шүүгчтэй ном хаялцсанаа бодож үзэв. Юмыг яаж мэдэх вэ, сүүлчийнх нь хамгаас аймшигтай бодол нь эзэн хатны засаглалын тухай Гуинплений хэлсэн чихэнд чимэггүй, өөдгүй үгс байлаа. Үнхэлцгээ хагартлаа айж байв. Дея инээмсэглэсэн хэвээр сууна.

Гуинпен, Үүрс хоёрын хэн нь ч үг дуугарсангүй. Хоёуланд нь л Деяг сандруулчихгүй байх юм сан гэдэг ганц бодол байжээ. Чоно ч бас тиймэрхүү юм бодсон бололтой, архирахаа больжээ. Үнэндээ, Үүрс, түүний хүзүүнээс зуурсан хэвээрээ л байв.

Ер нь ч Гомо цагаа тулахаар заримдаа болгоомжилж чаддаг байжээ. Заримдаа адгуус амьтан ухаалгаар номхордгийг хараагүй хүн гэж хаана байх билээ. Чоно хүнийг ойлгодог тэр хэмжээгээрээ л Гомо өөрийгөө гэмт хэрэгтэн гэж мэдэрсэн байхыг хэн байг гэхэв.

Гуинпен бослоо.

Сөргөөгөөд ямар ч нэмэргүйг ойлгож байв. Ямар ч асуулт тавьж болдоггүй тухай Үүрсийн хэлснийг ч санаж байлаа. Бэрээ баригчийн өмнө ямар ч өчилгүй босож зогсов.

Түшмэл мөрөн дээрээс нь төмөр бэрээгээ буулгаад, түүнээ ихэд захирангуйгаар урагш нь сунган барив. Тэр үед цагдаагийн энэ зангаа нь бүх хүнд ойлгомжтой. «Энэ хүн намайг дагаж яв. Бусад нь байсан газартаа үлд. Чимээгүй» гэсэн тушаал байжээ.

Дуугарах ч хүн гарсангүй. Цагдаагийн газар, цаг үргэлж л элдвийн дэмий яриаг тас цохин хориглодог учиртай. Иймэрхүү янзын баривчилгааг «хувь хүний хорих» гэж нэрлэдэг байжээ.

Түшмэл дороо эргэдэг оньстой хүүхэлдэй шиг, огцом хөдлөн нуруугаа эргүүлснээ, гарах үүд рүү намбатай жигд алхлан чиглэлээ. Гуинплен Үүрс рүү харлаа.

Үүрс хариу болгон, мөрөө хавчин, хоёр тохойгоо сүвээндээ нааж гараа алдалснаа, хөмсгөө дээш нь хөдөлгөсөн нь ухаандаа «Үл мэдэгдэх хувь заяандаа захирагдахаас даа» гэсэн үг байлаа.

Гуинплен Дея руу харахад, тэр ямар нэг юм мөрөөдсөн шинжтэй харагдав. Тэглээ ч нүүрэнд нь инээмсэглэл хэвээр байх ажээ.

Гуинплен хуруугаа уруул дээрээ наагаад, илэрхийлэхийн аргагүй ялгуум үнсэлт илгээлээ.

Цагдаагийн түшмэлийг цааш эргэнгүүт айх нь жаал гайгүй болсон Үүрс, энэхүү хормыг ашиглан, зүрх гаргаж байж, Гуинплений чихэнд,

— Аминдаа хайртай бол, асуухаас нь өмнө бүү ам ангай гэж шивгэнээд авав.

Өвчтэй хүний өрөөнд байгаа хүн огт чимээ гаргахгүйг хичээдэг шиг Гуинплен сэмхнээр хананаас өлгөсөн бүрх, нөмрөг хоёроо авснаа, нөмрөгөө нүдэндээ хүртэл татан ороож, бүрхээ сайтар дарж авав. Хувцсаа тайлалгүй хэвтэж байсан болохоор ажлын хувцас, савхин энгэрэвч хоёртойгоо байлаа. Дея руу дахин харав. Бэрээ баригч «Ногоон хайрцгийн» гадна хаалгаар гарснаа, бэрээгээ дээш нь гозойлгон бариад, буулгадаг шатаар доошилж эхэллээ. Гуинплен түүний араас, нүдэнд харагдахгүй гинжээр чангаагаад байгаа мэт даган алхана. Үүрс Гуинплений хойноос харж байтал, чоно гомдолтойгоор улихад нь Үүрс түүнийг дор нь тайвшруулаад «Одоохон буцаад ирнэ ээ» гэж шивгэнэлээ.

Хашаа дотор цагдаад тал олох гэсэндээ, буудлын эзэн Никльс айснаасаа орилолдон буй Винос, Фиби хоёрыг ууртайгаар хялалзан дохиж чимээгүй болгов. Цаад хоёр нь хар нөмрөгт, төмөр бэрээ барьсан хүнийг даган явж байгаа Гуинпленийг цөхөрсөн шинжтэй амаа ангайн харна.

Хоёр бүсгүй, гэнэтхэн агуйн адраас унжих үнээний хөх болчхов уу гэлтэй хөшжээ.

Цочирдон гайхсан Говикем, хагас онгорхой цонхоор нүдээ эргэлдүүлэн гайхан харна.

Цагдаагийн түшмэл эргэж харах ч үгүй, хуулийн амьд биелэл гэдгээ ухамсарсан хүний хүйтэн амарлингуй байдлаар Гуинпленээс хэдэн алхмын өмнө толгой гэдийн алхана.

Дув дуугүй хоёул хашаа дундуур, дараа нь гуанзны танхим дундуур өнгөрөөд талбай руу гарч ирлээ.

Буурчийн газрын үүдэнд хэдэн явуулын хүн бөөгнөрөн, шүүхийн гүйцэтгэгч тэргүүтэй баахан цагдаа зогсож байлаа. Цочирдон гайхсан сониуч улс, англи хүн бүрд байдгаар, цагдаагийн бэрээг харчхаад, дуу шуу ч гаргалгүй номхноор зай тавин зам гаргахад, бэрээ баригч, Темза мөрний хажуугаар өнгөрдөг Little217 strand гэж нэрлэдэг нарийхан гудамжийг зүглэн алхав.

Хоёр талаараа цагдаагаар харгалзуулсан Гуинплен, хувхай цайсан амьтан, хөлөө зөөхөөс өөр ямар ч илүү дутуу хөдөлгөөн хийсэнгүй, нас эцэслэсэн хүнд өмсгөдөг цагаан хувцас угласан мэт нөмрөгөөрөө биеэ ороон, хөшөө баримал л сүүтгэнэлийн араас тэгж алхах байсан болов уу гэмээр, амаа бөглүүлсэн мэт хүний араас дуу шуу ч үгүй даган, буурчийн газраас аажуухан холдож явлаа.

III. Lex, Rex, Fex218

Өнөөдрийн англи хүнийг цочирдуулан гайхуулмаар ямар ч тайлбаргүйгээр баривчилна гэдэг тэр үеийн Их Британийн цагдаагийн газрын ажилд байнга хэрэглэдэг арга байжээ.

Бүүр хоёрдугаар Георгийн үед Habeas corpus219-ыг хайхралгүй Францад lettres de cache220 хэмээгддэг нууц баривчлах зарлиг гаргахад хүргэсэн шиг эгзэгтэй тохиолдолд хэрэглэдэг байжээ.

Уолнолд221 тулгасан ялын нэг нь тэр хүн Нейгофыг222 яг ийм аргаар баривчлах явдлыг гаргасан ч юм уу эсвэл бүр өөрөө зохион байгуулсан гэдэгт байсан юм. Энэ ял нь хаанаас нь харсан ч үндэслэл муутай байсны учир нь корсын хаан Нейгофыг зээл олгогч нар нь шоронд суулгачихсанд байгаа юм л даа.

Фемгерихтийн223 ажилд өргөн хэрэглэдэг байсан ямар ч өчиггүй баривчилгааг, английн хуулийн элбэг тал хагасынх нь үндэс болж өгсөн германы заншилд зөвшөөрөгдсөн байдаг агаад, нөгөө хагасыг нь бүрдүүлж өгсөн нормандын ёс заншил ч зарим талаараа түүнийг өөгшүүлдэг байсныг хэлэх юун.

Юстининий224 өргөөний сахиулуудын захирал silentiarius imperialis буюу «эзэн хааны дуугай дэмч» нэртэй байсан гэдэг. Иймэрхүү маягаар баривчилгаа явуулж байсан английн шүүгчид: Canas latrant sergentes - Sergenter agere, id est tacere225 гэх мэтийн нормандын олон олон эх бичигт тулгуурладаг байсан юм. Тэр нь Ландульф Сагаскын горимын 16 дугаар зүйлд агч Fecit imperator silentium226 гэдгээс иш татсан байдаг. Энэ нь Филипп хааны 1307 оны баримт бичгийн: Maltus tenebimus bastonerios qui, abmutesentes, sergentare valeant227 гэснийг дуурайсан ажээ. Үүнийг нь үзэхэд Английн хаан нэгдүгээр Генрихийн дүрмийн VIII бүлгийн: Sarge signo jissus. Taciturnior esto. Hos est esse in captione regis228 гэснээс эш татсан ажээ.

Тэд, ялангуяа эртний феодалын Английн салшгүй хэсэг гэж үздэг нэгэн зарлигийг дуртайяа урдаа барьдаг байсныг үгчлэн буулгавал: «Бэйсийн удирдлагад, цэргийн дарга нар байна. Тэдний үүрэг нь нийгмийн бүх хорон муу санаатныг ямар нэг хүнд гэмт хэрэгт шийтгэгдэгчдийг, зайгуул хүмүүс, цөлөгдөгчдийг хууль бүхий л хатуу ширүүнээр цээрлүүлж, энгийн номхон оршин суугчид амьдралаа тайван үргэлжлүүлж, хорон санаатнуудыг хөнөөлгүй, болгохын тул нууцаар айлган сүрдүүлэхийг хайр найргүйгээр явуулах үүрэгтэй» гэжээ.

Энэ тушаалын үндсэн дээр баривчлагдах гэдэг нь зэвсэгтэй хүмүүсээр шүүрүүлнэ гэсэн үг. *Vetus consuetudo Normanniae M. S.229* (I хэсэг, I анги, II бүлэг) Хууль цаазын зөвлөгч нар үүнээс гадна *Charta Ludovici Hutini pro normannis230*-ын *servientis spathae231* бүлгийг эш татдаг. *Servientes spathae* нь бүдүүлэг латинаас, орчин үеийн ярианы хэлэнд аажмаар ойртуулан одоо *sergentes spadae* болон хувирчээ.

Үг дуугүй баривчлах нь, шүүхэд татахад өндөр дуугаар хэлдэг «Аро» гэдгийн эсрэг бөгөөд зарим нөхцөл байдлын учрыг олон хужрыг тунгаатал, амаа хамхиж явахыг зааж өгдөг.

Өчиггүй баривчлах нь ямар ч асуулт байхгүй гэж урьдчилан сануулсан үг.

Цагдаагийн газар ийм баривчилгаа явуулж байна гэдэг, улсын ямар нэг бодлого үүнд байна гэдгийг бэлхнээ хэлээд өгч байгаа хэрэг.

Ийм төрлийн баривчилгаанд, хаалттай хаалганы өмнө буюу *private* гэдэг шүүх цаазын нэр томъёо багтана.

Зарим нэгэн шинжээчдийн үзэж байгаагаар бол, гуравдугаар Эдуард, чухам ийм маягаар л, Мортимерийг²³² өөрийн эх Францын Изабелийн орноос баривчилсан юм гэгцгээдэг. Гэхдээ энэ баримт будилаантай гэдгийг, Мортимер баригдахынхаа өмнө төрсөн хотдоо бүслэгдэж байсан явдал гэрчилнэ.

«Хаадыг хийгээч» Варвик²³³ «хүмүүсийг шүүхэд татах» энэ аргыг дуртайяа хэрэглэдэг байжээ.

Кромвель ч бас түүнийг ялангуяа Коннаутэд хэрэглэж байв. Кильмекод, Ормонд гүнгийн хамаатан Тренли-Арклоог ийнхүү дуугай байхыг сэрэмжлүүлэн барьсан билээ. Үнэн мөний шүүхийн бие хүний дохиогоор, биеэр баригдах нь шүүхэд дуудагдаж байгаа болохоос хоригдож байгаа хэрэг огт биш байлаа.

Тэр нь заримдаа зүгээр л нэг байцаах арга болдог агаад бүхнийг дуугай болгодогт нь баривчлагдаж буй хүний эрх ашгийг зарим нэг талаар хаацайлах гэсэн санаа байгаа юм.

Гэтэл иймэрхүү нарийн ширийнийг муухан ойлгодог ард олонд, сайх өчиггүй баривчлах нь гойд аймшигтай санагддаг байсныг яана.

1705 онд, тэр байтугай, түүнээс хамаагүй хойно ч Англи маань одоогийнх шиг байгаагүй гэдгийг мартаж болохгүй шүү. Бүхий л дотоод хэвшил байдал нь туйлын замбараагүй, заримдаа хүн амын хувьд тэсэж суухын аргагүй болж ирнэ. Шившгийн баганад өөрийн биеэр хүлүүлж үзсэн Даниэль Дефо нэгэн бүтээлдээ английн нийгмийн байгууллыг: «Хуулийн төмөр гар» гэж тодорхойлжээ.

Зөвхөн хуулиар ч тогтохгүй, дураараа дургих явдал газар авч байлаа. Улсын хурлаас хөөгдсөн Стилль, тэнхимээсээ туугдсан Локке, зугтахаас өөр аргагүй болсон Гоббс, Тиббон нарыг, мөрдлөгт өртсөн Чарлз Черчил, Юма, Прители нарыг, Тоуэрийн шоронд хаягдсан Жон Уилксыг санахад л гүйцээ.

Хэрэв seditious libel²³⁴ горимын золиос бологчдыг цөмийг нь тоочвол зэгсэн урт жагсаалт гарах биз ээ.

Эрүүдэн шүүх газар, Европын өнцөг булан бүрд нэвтрэн орж, тэдний эрэн мөрдөх арга нь олон хүнд сургууль болж байлаа. Англид, хүний бүх эрхэнд аймшигтайгаар халдаж болдог байлаа. Наад зах нь «хуяг дуулгатай сонины ажилтныг» л саная л даа. Арван наймдугаар зууны дунд үеэр, XV Людовикийн зарлигаар Пикадиллид өөрт нь тааламжгүй бүх зохиолчдыг баривчилсан билээ. Харин Францад гуравдугаар Георг²³⁵ Опера театрын танхимд хаан ширээ горилогчийг²³⁶ баривчлуулсан нь үнэн хэрэг. Энэ бол туйлгүй урт хоёр гар байсан юм. Францын хааны гар Лондон хүртэл сунаж, английн хааных Парист хүрчээ. Эрх чөлөө гэдэг ийм л байлаа.

Цаазлах ялыг шорон дотор гүйцэтгэдэг байсныг, түүндээ худал хуурмагийг хольж хутгадаг байсныг нэмж хэлье. Энэ жигшүүртэй аргад одоо үед Англи буцан орж, ингэснээрээ орчлон ертөнцөд туйлын хачирхалтай үзэгдлийг гаргаад байна. Нэгэн их гүрэн туйлын сайнаар хөгжих гэхдээ хамгийн өөдгүй юмыг шилэн авчээ. Нэг талаас өнгөрсөн үе, нөгөө талаас хөгжил дэвшил хэмээх хоёр хэцүү юмтай, шөнийг өдөр хэмээн муухай алдаа хийж байна.

IV. Үүрс цагдаагийн газрыг мөрдсөн нь

Бид дээр дурдсанчлан английн ширүүн хатуу хуулиар бэрээ баригчийг дагаад яв хэмээн ганц хүнд хандсан зангаа нь, тэнд байсан бусад бүх хүнийг байраасаа хөдөлж болохгүй гэсэн зарлиг байлаа. Гэлээ гэхдээ хэдэн сониуч хүн сайх шаардлагад захирагдсангүй. Гуинпленийг авч яваа цувааг холхноос бараадасхийн явж байсны дотор Үүрс оржээ.

Эхний хоромд Үүрс хүн яаж хөшиж чаддагийн хэрээр алмайран хөшжээ. Гэвч тэнэмэл хэрмэл амьдралын элдэв учрал, янз бүрийн гэнэтийн гай зовлонг наснаасаа олон үзсэн Үүрс маань, байлдааны хөлөг түгшүүртэй хоромд бүх хүнийг байлдааны бэлэн байдалд оруулдаг лугаа адилаар, өөртөө түгшүүр зарлан, өөрөөр хэлбэл бүх арга мэхээ, ухаан юугаа шавхжээ.

Бушуухан шиг л мэгдэн бэгтэрсэн байдлаас гарах гэж яаран, тунгаан бодож эхлэв. Гай тохиолдоход сандарч тэвдэх ямар ч хэрэггүй, шууд л нүүр тулан уулзах хэрэгтэй. Маанаг л биш юм бол, энэ нь хүн бүрийн үүрэг юм.

Болсон явдлын учрыг олж, хужрыг тунгаах гэж цаг гарздах бус шуудхан л хөдөлж ажиллах нь чухал.

Түргэн хөдлөх нь чухал. Үүрс өөрөөсөө,
— Юу хийх вэ? гэж асуув.

Гуинпленийг аваад гарангуут Үүрс зовлонтой ацан шалаанд оржээ. Гуинплений төлөө айх нь араас нь дагаач гэж байхад, хар амиа бодох айдас нь байраасаа бүү хөдөл хэмээн шивнэж байлаа.

Үүрс маань ялааны чин зоригийг, гамба цэцгийн тэсвэрийг эзэмшсэн хүн байв. Бөнжгөнөтлөө салганан чичирч байв. Гэлээ гэхдээ, бүхий л тээнэгэлзээг баатарлагаар даван туулж, хуулийг сөрөн бэрээ баригчийн араас явахаар шийдэв. Гуинплэнд учирч болох юманд ингэтлээ санаа нь зовсныг хэлэх юун.

Ийм их эр зориг гаргахыг бодоход мань хүн үнхэлцгээ хагартлаа айсан нь илэрхий.

Үхэхийн наагуурх айдас, өчүүхэн чандагыг ямар зоригтой хэрэгт түлхдэг гээч! Айсан гөрөөс ангал дээгүүр харайдаг бус уу! Айснаасаа болоод заримдаа болгоомжилж, цэрвэхээ ч мартаж болно.

Гуинплен баригдахаасаа илүүгээр хулгайлагдсан байв. Цагдаагийн газарт ийм өглөө эрт хүн цөөнтэй байдаг яармагийн талбайд Гуинплений баривчлагдсан нь хэнд ч анзаарагдахгүйгээр шуурхай түргэн хөдөлжээ. Таразофилдын урцнуудад, бэрээ баригч

«Инээмтгий хүн» дээр ирснийг бараг хэн ч харсангүй. Ийм учраас цувааг бараадан цөөхөн хүн явж байгаа нь тэр.

Бараг бүх нүүрийг нь тагласан нөмрөг эсгий, бүрхийн ачаар Гуинпленийг замаар яваа улс таньсангүй.

Гуинплений араас гарахын өмнө Үүрс нэг болгоомжилсон арга хэмжээ авав. Никльс, Говекем, Фиби, Винос нарыг «Ногоон хайрцгаас» холхон шиг дуудан уулзаад, юу ч сэжиглээгүй байгаа Деягийн хажууд таг чиг байхыг, болсон явдлын тухай ганц ч үг амнаас унагаж болохгүйг хатуу чангаар тушаав. Түүнд ямар ч сэжиг авхуулахгүйн тул Гуинплен, Үүрс хоёрын байхгүй байгааг «Ногоон хайрцгийн» аж ахуйн юм хөөцөлдөхөөр явсан гэж тайлбарла гээд, одоохон үдийн хоолны өмнө дугхийдэг цаг нь болох учир сэрэхээс нь өмнө Гуинплентэй хамт буцаад ирнэ, учир нь энэ бүхэн бол тэр чигээрээ эндүүрэл, тийм болохоор Гуинплен тэр хоёр шүүх цагдаагийн газар бүгдийг учирлан тайлбарлаад, тэдэнд эндүүрлийг нь ягштал нь нотлон өгчхөөд хоёулаа удалгүй гэртээ буцаад ирнэ, ялангуяа Деяд ганц ч үг цухуйлгаж болохгүй гэлээ. Ийнхүү захиагаа захичхаад замдаа оров.

Үүрс огт мэдэгдэлгүйгээр Гуинпленийг дагаж дөнгөв. Хэдийгээр аль болох хол явахыг хичээсэн ч гэлээ, ямар ч байсан барааг нь алдахгүйгээр мөрдөж дөнгөөд байлаа. Зоригтойгоор мяраах нь, зүрхгүй хүний баатарлаг явдал.

Явж явж, хэдийгээр сүртэй нь аргагүй баривчилсан ч гэлээ, түүнийг цагдаагийн газар ялих шалихгүй юмнаас үүдэн дуудсан байхыг хэн байг гэхэв. Асуудлыг нуршуулалгүй шийдчих биз хэмээн Үүрс өөрийгөө тайвшруулж явлаа.

Гуинпленийг авч яваа цагдаагийн баг, Таринзофилдийг өнгөрөөд Литлл-стрендын чухам аль гудамжаар орж, хаашаа эргэх вэ гэдгээс бас зарим нэг зүйлийн учрыг олж болохоор байлаа.

Хэрэв зүүн тийшээ эргэвэл Гуинпленийг Саутворкын хотын захиргааны байшинд аваачих гэж байгаа хэрэг. Ингэвэл тэгтлээ айж сүйд болох юм байхгүй, ялих шалихгүй зөрчил гаргасан хэмээн шүүгчээс хоёр гурван шиллингээр торгож таарна. Гуинпленийг суллан «Гэсгээгдсэн нажид» оройдоо эхэлдэг цагтаа эхэлнэ. Хэн ч, юу ч анзаарахгүй өнгөрөх болно.

Хэрэв цуваа баруун тийшээ эргэвэл хэрэг буруугаараа эргэх нь тэр. Тэр талд хоёр аймаар газар байлаа.

Гуинпленийг харгалзан хүргэж яваа хоёр эгнээ цагдаагийн толгойд яваа бэрээ баригч, Литлл-стрендэд тулж очих үед Үүрс амьсгаа даран, нүд салгалгүй ширтсээр байв. Хүний бүх юм нь

харцандаа хуримтлагдах хором байдаг билээ. Хаашаа эргэх нь вэ? Баруун тийшээ эргэлээ. Үүрс айсандаа гуйвалзан, ойччихгүйн тул хана түшив.

Хүн өөрөө өөртөө «Юу болж байгааг мэдэх минь» гэж хэлдгээс илүү бялангач үг гэж байхгүй биз ээ. Сэтгэлийнхээ угт бол үүнийг огт хүсэхгүйгээр барахгүй, ганцхан айдас гэдэг юм л байна. Айдас түгшүүр дээр нь, ямар нэг дүгнэлт хийхээс болгоомжлон цэрвэх нэмэгдэнэ. Хүн өөрийгөө мэддэггүй боловч, дуртайяа хойшоо ухарч байдаг амьтан, урагшаа нэг алхчихвал, юунд ч ингэв дээ хэмээн өөрийгөө зэмлэж байх жишээтэй.

Үүрс ч бас иймэрхүү л байлаа. «Юм буруугаараа эргэлээ шүү. Ийм юм боллоо гэдгийг хэзээ ч мэдэж амжих л байсан. Юугаа хийж Гуинплений араас гарав даа?» хэмээн айснаасаа дагжин байж бодлоо.

Ийм дүгнэлт хийж авчхаад, хүн гэдэг амьтнаас зөрүүд зан салдаггүй болохоор, алхаагаа түргэтгэн шуурхайлж, айж эмээхээ ч мартан, Саутворкын нааш цааш сүлжилдсэн гудамжнуудад Гуинпленийхээ барааг алдчихгүйн тул цагдаа нарт ойртож очихоор яаравчлав. Цувааны сүр жавхлантай байдал нь хурдан явахад нь саад болно. Тэргүүнд нь бэрээ баригч залран, сүүлд нь шүүхийн гүйцэтгэгч явна. Ийм дараалалтай цуваа удаан хөдлөхөөс ч өөр аргагүй.

Шүүхийнхний зүс царайдаа гаргаж болох бүхий л сүр жавхлан, цувааны сүүлд яваа түшмэлд харагдана. Түүний хувцсыг Оксфордын хөгжмийн багш докторын тансаг дээл, Кембрижийн дацангийн номын багш эрдэмтний энгийн хар тэрлэг хоёрын дундаас гаргаа юу гэлтэй. Норвегийн туулайн арьсаар доторлосон годберт хэмээх урт хормойтой жанчийн цаанаас язгууртны хантааз цухуйна. Энэ хүний гадна байдлын тэн хагас нь дундад зууных баймаар, Ламуаньоных шиг хиймэл үстэй Тристан Даяанчийнх²³⁷ шиг өргөн ханцуйтай ажээ. Шар шувууных шиг алаг нүдээрээ Гуинпленийг тас ширтэн, жигд алхлах ажээ. Үүнээс илүү ширүүн догшин хүн байдаг болов уу гэж бодмоор.

Үүрс муруй тахир гудамжинд жаахан будилснаа, Гэгээн Мари Овер-Рейн сүмийн дэргэд, аз ирэхэд хүүхэд нохойн зодооноос болж саатсан цувааг гүйцэж авав. Тэр үеийн Лондоны гудамд иймэрхүү явдал ерийн үзэгдэл байв.

Тэр үеийн цагдаагийн газрын баримт бичигт нохойг хүүхдийн өмнө оруулж days and boys буюу «нохой ба хүүхэд» гэж бичсэн нь үзэгддэг.

Тэр цагт, цагдаагийн харуултай, шүүхэд хүргэгдэж байгаа хүн гэдэг жирийн байдаг л зүйлийн нэгээс гадна хүн бүрд өөрийн хэрэг ажил байдаг болохоор үгэнд дурласан сониуч улс ганц нэгээрээ тарсаар байгаад, цувааны араас ганцхан Үүрс л дагахад хүрчээ.

Өөд өөдөөсөө харсан өнөөг хүртэл байсаар байгаа «Шашны тайтгарал», «Алилуйн холбоо» гэдэг хоёр өөр шатны бүлэглэлд хамаарагддаг дуганыг өнгөрөв.

Дараа нь жижиг нарийн гудмаар орон нааш цааш сүлжиж, ихэнхдээ барьж гүйцээгүй, өвс ногоо ургасан хүн амьтангүй байшингуудын хоорондох замаар орж хэд хэдэн удаа эргэв. Эцэст нь нэг газар ирж зогслоо. Энэ нь мухар гудамж байлаа. Гудамжны эхний ганц хоёрхон урцыг тооцохгүй юм бол ямар ч орон сууцын байшин барилга байсангүй. Гудмын зүүн тал нь намхан, баруун тал нь өндөр чулуун ханатай ажээ. Цагийн эрхэнд харласан шовх шовх шүдтэй саксон маягаар өрсөн энэхүү хананд, төмөр хилэнцэт хорхой бэхлэн, бүдүүн сараалжаар тагласан агаар татах дөрвөлжин нүхнүүдийг гаргажээ. Ганц ч цонх байсангүй. Харин чулуу шидэгч болон хуучны үхэр буунд зориулж байсан бололтой хэдэн шагайвар харагдах ажээ. Хананы бүр ёроолд хулганын занганы хаалгатай адилхан жижиг явган хаалга нүдэнд тусна. Сараалжилсан шагайвартай, хагас дугуй зузаан гэгчийн чулуун хүнхэрт гаргасан сайх суга хаалга нь, зангираатай бөх бат нугастай бөгөөд том цоож, хүнд ширмэн цохиур дүүжлээстэй, нэлд нь төмөр тавтай хадаасаар хадан, төмөр ялтас, товруу товхоор хуягласан юм шиг харагдана. Модноосоо илүү төмөр голлосон хаалга байлаа.

Гудамжинд ганц ч амьтай юм алга. Ганц ч мухлаг, гудмаар явж байгаа ганц ч хүн үл харагдана. Гэвч тун ойрхноос үргэлжилсэн нүргээн чих дэлсэх нь гудамжтай зэрэгцээ ширүүн урсгал өнгөрч байна уу гэлтэй. Энэ нь амьтан хүний дуу шуугиан, олон сүйх тэрэгний дугуйн түрчигнээн ажээ. Тортог суун харласан байшингийн нөгөө талд нэг үзүүр нь Кентерберийн замтай, нөгөө үзүүр нь Лондоны гүүртэй нийлсэн Саутворкын гол гудамж өнгөрдөг бололтой.

Хэн нэгэн хүн сэм сонирхдог юм гэхэд, бүхий л гудамжны туушид Гуинпленийг тойрсон хуягаас гадна, ганцхан хүнийг, хананы сүүдрээс хагас гарч зүрхэлсэн Үүрсийн үхтлээ айн хувхай цайсан царайг харж болох ажээ. Тэр нь гудамжны нэгэн тохойрсон зайнд шигдэн харж байгаа боловч ойртон ажиглахаасаа айж зогсоно. Цагдаагийн баг явган хаалганы өмнө жагслаа.

Гуинплен голд нь байгаа ч одоо нөгөө бэрээ баригч түүний ард гарчээ. Шүүхийн гүйцэтгэгч хаалганы ширмэн цохиурыг өргөөд гурван удаа түншив. Шагайвар нүх онгойв. Шүүхийн гүйцэтгэгч,
— Эзэн дээдсийн зарлигаар гэж хэллээ.

Төмөрлөн бөгжилсөн хүнд царсан хаалга нугасан дээрээ эргэхэд агуйн амыг санагдуулам харанхуй хүйтэн нүд онгойн харагдав. Харанхуйн дунд аймшигтай хүнхэр үргэлжилнэ. Үүрс, Гуинпленийг түүн доогуур орон бараа алдагдахыг харлаа.

V. Аймшигтай газар

Гуинплений араас бэрээ баригч орлоо. Түүний араас шүүхийн гүйцэтгэгч, тэгээд цагдаагийн баг ороход явган хаалга хаагдав. Хүнд хаалга чулуун тотгондоо завсаргүй нийлэхэд, хэн түүнийг онгойлгож хаасан нь харагдсангүй.

Онсь түгжээ нь цүү цуургадаа өөрсдөө л яваад орчих шиг санагдана. Эрт дээр цагт гэмт хэрэгтнийг айн ширвээтүүлэхийн тулд ашигладаг байсан иймэрхүү оньсон хөдөлгүүрийг одоо ч гэсэн дээр үед барьсан зарим нэг хүчээр номхотгох байшингуудад хэрэглэх нь бий. Хаалгач нь харагддаггүй хаалга. Энэ нь гяндангийн хаалгыг, тамын үүдтэй адилхан болгодог. Энэ явган хаалга бол Саутворкын шоронгийн арын хаалга байжээ. Хөгц буриар бүрхэгдсэн сайх дүнсгэр барилгад, гяндан бүрийн шинж болсон хүйтэн зэвүүн байдлаас ялгагдах юм юу ч байсангүй.

Саутворкын шоронгийн үүх түүх гэвэл, Английн эрт галавын бурхан шүтээн байсан могойд зориулан, катьюоклануудаас хэзээ ч юм бүтээсэн буруу номтны сүм байснаа, дараа нь Этелульфын өргөө, гэгээн Эдуардын цайз болсноо 1199 онд Газаргүй Ионаас гяндан болгожээ.

Шененсог²³⁸ гол хөндлөн гарсан байдаг шиг, дундуур нь гудамж огтлон гарсан байсан сайх барилга нь эхэн үедээ, нэг хоёр зууны турш англиар gate буюу хотын захын бэхэлсэн боомт байлаа. Дараа нь замыг хааж хана босгожээ.

Англид иймэрхүү маягийн хэд хэдэн шорон хадгалагдан үлдсэнийг тоочвол: Лондонд Ньюгейт, Кентер-Берид Вейстгейт, Эдинбургд Кенонгейт эдгээр болно. Францын Бастил ч цагтаа бас л боомт байсан юм.

Английн бараг бүх гяндан гаднаасаа адилхан харагдана. Гадна талаараа өндөр ханатай, дотор нь шоронгийн өрөөнүүд сархинцаглана. Дотор нь аалз, үнэн мөний шүүх хоёр тороо хэрж хэрчихсэн, нарны гэрэл мэт, Жон Ховард²³⁹ тэр үед хараахан нэвтрэн ороогүй энэхүү готын үеийн шоронгоос баргар уйтгартай юм гэж үгүй биз ээ. Бүгдээрээ л эртний Брюсселийн «тамын газар» шиг «нулимсны байшин» гэж нэрлэгдэхэд болохгүй гэх газаргүй.

Энэхүү баргар барилгыг харчхаад хүмүүс Плавтын хэлсэнчлэн эртний далайд аялагчид, боолчуудын там болох, хангир жингэр гэсэн төмрийн арлууд Ferricrepiditoe insuloe-гийн хажуугаар

өнгөрөхдөө, гинжний харжигнахыг сонсоод яаж зүрх нь шимширдэг байсан шиг, уйтгарт дарагдан үс нь босох шиг болно.

Албин зэтгэрийг эрүүдэн шүүж, үлдэн хөөж асан эртний газар Саутворкын гянданд эхэндээ ихэвчлэн илбэч, увдисч нарыг суулгаж байсан агаад үүнийг нь явган хаалганы чулуун тотгон дээр сийлсэн, одоо бараг балархайтсан шахуу хоёр мөр шүлэг гэрчилнэ.

Sunt arreptitii vexati daemone multo
Est energumenus quem daemon possidet unus²⁴⁰

Энэ шүлэг нь галзуурсан, албинтсан хоёрын ялгааг мөн ч нарийн гаргасан байгаа биз.

Эл бичээсний дээд талд хананд нь үнэн мөний шүүхийн дээд бэлгэ тэмдэг, дүүжлүүрийн шат хаджээ. Тэр нь цагтаа модоор хийсэн байсан боловч, хөрс нь бүх юмыг чулуу болгочихдог ид шидтэй Вобурны сүмийн нутгийн ойролцоох Асплей Говисийн газарт булчихсан юм шиг чулуужжээ.

Одоо нурж хэмхрэн хэрэг нь өнгөрсөн Саутворкын гяндан, бэхэлсэн боомт байх үедээ хоорондоо холбоо барьдаг асан хоёр гудамж руу харсан байлаа. Хоёр ч хаалга байсны нэг нь дээдчүүлд зориулсан гол гудамжнаас ордог ёслолын хаалга, нөгөө нь нарийхан гудамжнаас ордог бусад үхэх үйлтэнд болон амьсгаа хураагчдад зориулсан гаслангийн хаалга байв. Учир нь гянданд хоригдогч нас нөгчвөл, үхдэлийг нь энэ явган хаалгаар гаргадаг байжээ. Энэ чинь бас л чөлөөлөгдөж байгаа хэрэг. Үхэл бол үүрдийн хязгааргүйг соёрхож байгаа эрх чөлөө бус уу. Гуинплен чухам энэ «гаслангийн хаалгаар» гянданд оржээ.

Нарийн гудамж нь хоёр талаараа хананд шахагдсан чулуу дэвссэн зам гэдгийг бид дээр өгүүлсэн билээ, Брюсселд «Ганц явган хүний гудамж» нэртэй ийм нарийхан гудам байдаг. Хананы өндөр нь харилцан адилгүй. Өндөр хана нь бол гяндангийн хана, намхан нь оршуулгын газрынх. Амьсгаа хураасан хүнийг бүрмөсөн залгидаг энэхүү хашааны өндөр нь босоо хүнээс өндөргүй ажээ. Түүний хаалгыг, яг гяндангийн явган хаалганы эсрэг гаргажээ. Нас барсан хүнд гудамжийг хөндлөн гарахаас өөр ажил гарахгүй. Хана даган хориод алхахад л оршуулгын газар орчихно. Өндөр хананд нь дүүжлүүрийн шатыг хадсан бөгөөд, түүний эсрэг оршуулгын газрын хашаа дээр хохимой толгойн баримлыг хаджээ. Хоёр хананы аль нь ч баргар хүйтнээрээ нөгөөгөөсөө ялгарах юм байсангүй.

VI. Тэр үеийн хиймэл үсний дор шүүхийн ямар зэрэг дэв нуугдаж байсан тухай

Яг энэ үед, хэн нэгэн хүн гяндангийн нөгөө талаас, нүүрэн талаас нь харсан бол Саутворкын гол гудамжийг харах байлаа. Байшингийн ёслолын сүрлэг орцын өмнө, өнөөгийн хоёр дугуйт жууз тэргийг санагдуулам гоёмсог суудлаараа хэнд ч танигдам аяны сүйх зогсож байгааг ажиглаж болох байв. Түүнийг тойрон баахан сониуч улс шавжээ. Сүлдээр чимсэн сайх сүйхнээс нэг хүн буугаад гяндангийн хаалгаар орохыг харсан хүмүүс шүүгч байж таарлаа хэмээн боджээ. Учир нь Англид шүүгчид ихэвчлэн, тайж язгууртан байдаг агаад, «сүлд тэмдгийн эрхтэй» байлгүй яах вэ. Францад бол сүлд, шүүгчийн жанч хоёр бараг хэзээд ч гэсэн нэг дор байна гэж байсангүй. Сен-Семон ван ямар сайндаа л шүүгч нарын тухай ярьж байгаад «энэ давхаргын хүмүүс» гэж хэлж байх вэ дээ. Англид бол шүүгчийн цол тайж язгууртны нэрийг огтхон ч гутаадаггүй байлаа.

Англид «тойргийн шүүгч» гэж нэрлэдэг явуулын шүүгчийн алба байдаг агаад сайх сүйхийг хөдөө гадаа яваад ирж байгаа шүүгчийн унаа болгохоос амархан юм байсангүй. Гэхдээ нэг жаахан ер бусын санагдсан юм нь шүүгч болгоод байгаа хүн маань сүйхнээс гарч ирсэнгүй, харин эзэн хүн сууна гэж байдаггүй дэлбэгчийн суудлаас бууж иржээ. Өөр нэг хачирхалтай юм нь: тэр үед Англид, нэг бол таван бээр тутамд шиллинг төлдөг суудлын сүйхээр, эсвэл бээр тутамд гурван су, өртөө бүрийн дараа улаачид дөрвөн су төлж мориор жуулчлан явдаг хоёр арга байлаа. Аминыхаа сүйхээр, улаагаар явахыг хүсэгч нь улаачид төлөх су-гийнхээ тоогоор морь болгонд, бээр тутамд шиллинг төлдөг байжээ. Саутворкын гяндангийн хаалганд тулан зогссон сүйх нь хоёр хос морь хөллөгөөтэй, хоёр улаач хөтөчтэй байгаа нь, ноён хүний элбэг дэлбэгийг харуулна. Эцэст нь сониуч занг юунаас ч илүүгээр татаж, хорхойг нь гозгонуулсан юм нь, сүйхийг бүх талаас нь битүүлсэнд байв. Оройг нь сөхжээ. Цонхонд нь хөшиг татаж, шагайгаад харчхаж болохоор нүх сүвнүүдийг таглажээ. Гадна талаас доторхыг нь харах даанч нөхцөлгүй. Дотроос ч гэсэн гадна нь юу болж байгааг харах аргагүй бололтой. Хаанаас нь ч харсан сүйхэнд хэн ч байхгүй бололтой.

Саутворк нь, Серрейн гүнлэгт хамаарагддаг болохоор, Саутворкын гяндан Серрейн захирагчид харьяалагдана. Ийм заагласан шүүх эрх хэмжээ англид ердийн үзэгдэж болох зүйл.

Жишээ болгоход Лондоны Тоуэр²⁴¹ ямар ч гүнлэгийн нутагт багтдаггүй гэж үздэг учир өөрөөр хэлбэл хууль зүйн үүднээс агаарт тогтож байгаагаас ялгаагүй ажээ.

Тоуэр нь Custos Turris²⁴² гэж нэрлэгддэг даамлаас өөр ямар ч шүүхийн эрхтнийг үл тоомсорлоно. Тоуэр нь өөрийн шүүх эрх, өөрийн сүм, өөрийн шүүгч, өөрийн удирдлагатай байв. Custos-ын эрх мэдэл Лондоноос халин хорин нэгэн hamlets сууринд хүрнэ.

Их Британид хууль зүйн зохисгүй юм олон бий. Тухайлбал, Английн ерөнхий их буучийн тушаал, Лондоны Тоуэрт харьяалагддаг байв.

Хууль зүйн бусад ёс горим ч үүнээс илүү гайхалтай санагдахыг яана. Жишээлэхэд л, английн далайн цэргийн шүүх, англид дээр цагт харьяалагдаж байсан Родос, Олерона арлын хуулийг ажилдаа удирдлага болгоно.

Гүнлэгийн захирагч бол зэгсэн том хүн. Тэр нь ямагт тайж язгуурт баатрын зэвсэг үүрэгч ч юм уу эсвэл баатар тайж өөрөө байдаг байлаа.

Эрт дээр цагийн чухал баримт бичигт, түүнийг spectabiles «харц булаасан хүн» хэмээн цоллосон байх агаад, энэ гуншин нь illustris ба clarissimus²⁴³-ын хооронд эхнийхээс нь арай доогуур сүүлчийнхээс нь арай дээгүүр болой.

Гүнлэгийн захирагчийг дээр үед ард олон сонгодог байжээ. Гэвч хоёрдугаар Эдуард, дараагаар нь IV Генрих энэ тушаалд титэмтэй холбоотой хүнийг тохоон томилдог болсноос эхлээд, захирагчид нь хааны засгийн төлөөлөгч байх болжээ.

Үе уламжлан ирсэн Ветморленд болон, оршин суугчид нь common hall-аараа сонгодог Лондон, Мидлсексийн захирагчаас бусдыг цөмийг нь их эзэн тохоон томилно.

Уэльс болон Честерийн захирагчид нь улсын чанартай онцгой эрх эдэлдэг байлаа. Энэ бүх албан тушаал Англид одоо ч гэсэн байсаар байгаа авч, аажим аажмаар шинэ ёс горим, шинэ үзэл санааны нөлөөнд автагдсаар хуучныхаа онцлог шинжээ хэдийнээ алдаж гүйцжээ. Гүнлэгийн захирагч нь «явуулын шүүгчийг» дагалдан явж, хэрэг гарсан үед хамгаалах үүрэгтэй ажээ. Хүнд хоёр гар байдаг лугаа адилаар, захирагчид хоёр туслах байх агаад, баруун гар нь өөрийнх нь туслагч, зүүн гар нь шүүхийн гүйцэтгэгч ажээ. Шүүхийн гүйцэтгэгч нь бэрээ баригч хэмээн нэрлэгддэг тойргийн түшмэлийн тусламжтайгаар, тойргийн шүүхээр шийтгэгдэх хулгайч, алуурч, үймээн самуун дэгдээгч, тэнэмэл болон элдвийн өөдгүй амьтдыг баривчлан байцааж, захирагчийн үзэмжээр гянданд

хорихоор ялладаг байлаа. Хоёул захирагчийн гарын дор байдаг, захирагчийн туслагч шүүхийн гүйцэтгэгч хоёрын ялгаа нь туслагч нь түүнийг дагаж бараа болох явдал агаад шүүхийн гүйцэтгэгч нь ажил албанд нь оролцон тусалдаг байжээ.

Захирагч хоёр шүүхийг толгойлох бөгөөд нэг нь байнгын тойргийн country court нөгөө нь явуулын шүүх sheriff turn байв. Ийнхүү тэр хүн шүүхийн эрх мэдлийн нэгдэл, байнгын ажиллагааг хэрэгжүүлдэг ажээ. Тэр нь шүүгчтэй адилхан, будилаантай тохиолдолд, хар малгайнхаа дотуур камбын даавуун цагаан малгай өмсдөг тангараг өргөсөн хууль судлагч sergens coifae-гаас тусламж аваад тодруулах эрхтэй ажээ. Захирагч хар гэрүүдийн ажлыг хөнгөвчилж өгдөг, өөрийн гүнлэгийн нэг хотод ирэнгээ, олон таван ч юм ярихгүй бүх хоригдогчийн хувь заяаг шийдэх эрхтэй, гянданг цэвэрлэх, «goal de livery» хийж нэг бол нэгмөсөн суллан тавьж, нэг бол дүүжлүүр лүү явуулна. Захирагч өөрийн гаргасан ялын төлөвлөгөөгөө хорин дөрвөн иргэний төлөөлөгчид танилцуулна. Хэрэв тэд нь зөвшөөрвөл дээр нь billa verra²⁴⁴ гэж бичнэ, эс зөвшөөрвөл ignoramus²⁴⁵ гэж бичнэ. Ингэсэн үед ял хүчингүй болж, захирагч түүнийг ураад хаясан ч дур болно.

Шүүхийн мөрдөн байцаалтын үед, иргэний төлөөлөгчдийн нэг нь амьсгал хураавал, хуулиар хэрэгтэн маань буруутан гэж тооцогдоход хүрэх агаад, хэрэгтнийг баривчлах эрхтэй захирагч түүнийг суллан тавих эрхтэй болно. Захирагчийг байдгаараа хүндлэн, үнхэлцгээ хагартлаа айдгийн учир нь, аймшигтай дураараа загнах боломж болсон эзэн хааны бүх л зарлигийг биелүүлэх үүрэгт байлаа. Энэхүү товч бөгөөд тодорхой эрхийн цаана, ёстой л дураараа дургиж дунд чөмгөөрөө жиргэх гэгч нуугдаж байлаа.

Захирагчид verdeors²⁴⁶ caroners²⁴⁷ гэдэг цолтой түшмэд бараа болон худалдааны түшмэд нэмэр хандиваа оруулж байх үүрэгтэй бөгөөд түүнээс гадна морь унан, нүд эрээлжлэм гоё хувцасласан зарц нар нь дагалдан явдаг ажээ.

Чемберлен «Захирагч бол үнэн мөний шүүхийн амьдрал, хууль зүй, гүнлэг мөн» гэж хэлсэн байдаг.

Англид, бүхий л хууль, ёс заншил нь зугуухан мэдэгдэхгүй сүйтгэх хүчинд идэгдсээр яваандаа доройтон сөнөж ч мэдэхээр болжээ. Манай үед захирагч нь ч, бэрээ баригч нь ч, шүүхийн гүйцэтгэгч нь ч, аль нь ч байлаа гэсэн үүрэгт албаа хуучин үеийнх шигээ явуулж чадахаасаа өнгөрчээ. Хуучны Англид зарим нэг эрхийг хольж хутган, бүрэн эрх мэдлийг дутуу дулимаг тодорхойлсноос бусдын хийх ёстойг шүүрэн хийчихдэг үзэгдэл

байсан бол, манай үед энэ нь ямар ч боломжгүйг хэлэх юун.
Цагдаагийн газар, хууль зүй хоёрын нягт холбоо үеэ өнгөрөөжээ.
Албан тушаалын нэр нь хэвээр үлдсэн авч ажил үүрэг нь хэдийнээ
өөр болжээ.

Тэр бүү хэл нөгөө warpentake гэдэг үгийн утга ч өөрчлөгдчихсөн
юм шиг санагдах юм. Хуучин шүүхийн албан тушаалын нэр байлаа,
одоо газар нутгийн хуваасан хэсгийг хэлэх болжээ. Урьд нь
warpentake гэж мужийн түшмэлийг хэлдэг байсан бол, өнөөдөр
чухамхүү мужийг нь warpentake гэдэг болжээ.

Бидний өгүүлэн буй үед, гүнлэгийн захирагч нь үнэндээ нэг
жаахан илүү, нэг жаахан дутуу эрх мэдэлтэй боловч өөртөө хотын
захиргааны болон хааны түшмэлийн үүргийг нэгтгэн, хуучин
Францад Парис хотын иргэний ерөнхий шүүгч, цагдаагийн газрын
шүүгч гэж тус тусдаа байсан хоёр түшмэлийн үүргийг хамтатган
гүйцэтгэдэг байжээ. Парисын иргэний ерөнхий шүүгчийг тэр үеийн
цагдаагийн газрын тэмдэглэлд яг таг тодорхойлсон байдгийг
дурдвал: «Ноён иргэний шүүгч нь гэр бүлийн эвдрэлийг үзэн яддаг
хүн биш, учир нь энэ бол түүнд дээрэм хийхээс ялгаагүй ашиг
хонжоо өгдөг юм» (1704 оны долоодугаар сарын 22) гэжээ. Аюултай
хувирамтгай, учир нь сайн ойлгогддоггүй цагдаагийн газрын
шүүгчдийн хувьд гэвэл, түүний бүхий л төрх байдал, ааль араншин
нь, Сен-Симоны хэлснээр Тамын гурван шүүгчийн бүх шинжийг
агуулсан, Рене д'Арженсонд²⁴⁸ биеллээ олсон байдаг.

Эдгээр шүүгчид нь, уншигчдын хэдийнээ танил болсон нөгөө
Лондоны Бишопсгейтийн гурав шүү дээ.

VII. Сүрдэн дагжсан нь

Оронгуут хаалганы цоож цуурга нь харжигнан хав хийтэл хаагдаад, түгжээ цүүгээ шургуулахад нь Гуинплен сочин агдасхийлээ. Дөнгөж сая ар талд нь хаагдаад байгаа энэ хаалга гэрэл сүүдэр хоёрын, нэг талдаа орчлонгийн баяр баясгалан, нөгөө талдаа үхлийн ертөнцийн зааг юм шиг түүнд санагдаад явчхав. Одоо наранд бүлээсэн гийгүүлэгдэж байдаг бүх юм ард хоцрон, амьдралын хил заагийг нэгэнт алхан, түүний гадна гарах нь энэ. Зүрх нь шимшрэн базлах шиг. Түүнийг яах гэж байна. Энэ бүх явдал угтаа юу гэсэн үг болж байна?

Тэр өөрөө хаана ирээд байна вэ?

Орчин тойронд нь харагдах юм байсангүй. Тал бүрээс нь харанхуй бүрхэн авчээ. Хаалга хаагдангуут нэг хэсэгтээ сохрох шиг болжээ. Шагайвар нүхийг ч хаачихжээ. Хий татах нүх, дэнлүүний аль ч байсангүй нь хуучин цагийн болгоомжилсон аргын нэг мөнөөс мөн. Шинэ ирж байгаа хүнд ажиглуулахгүй гэсэндээ шоронгийн дотор гэрэл гаргахыг хориглодог.

Гуинплен гараа сунгаад үзвэл, хоёр талд нь хана дайралдав. Энэ нь ямар нэг гудам байлаа. Аажим аажмаар, чухам хаанаас гарсныг бүү мэд, сайх уйтан агуй доторх бүдэг гэрэлд нүдний хүүхэн хараа өргөсөн дасаад, өмнө нь цэлийн хөврөх гудмын тод бус дүрсийг ялгахтайгаа болов.

Тамлан эрүүддэг тухай, Үүрсийн хэтрүүлэн давуулсан ярианаас л мэддэг байсан Гуинплен, одоо хэн нэгний нүдэнд үл үзэгдэх мангар том гар түүнийг базаад авах шиг санагдав. Бидэнд мэдэгддэггүй хууль, биднийг анан байдаг гэдэг үнэхээр аймшигтай. Ямар ч юм болж байсан сандарч тэвдэхгүй байж болдог мөртөө, шүүхийн өмнө очихоор л, ухаан алдчихдаг шүү дээ. Яагаад тэр вэ? Яагаад гэвэл үнэн мөний шүүх бол пад харанхуй лугаа адил бөгөөд, шүүгч нар түүн дотор сохроор тэмтчиж явдаг. Гуинплен ам ангайхгүй байхын зайлшгүйн тухай Үүрсийн хэлснийг саналаа. Деядаа л амьд мэнд буцаж очихыг хүсэж байлаа. Хэн нэгний дураар аашлах эрхэнд байгаагаа ойлгож, хувь заяа нь тэр чигээрээ хамаарч буй хүний зэвүүг хүргэчихээс айж байв. Заримдаа юмны учрыг олъё гэсэн хүсэл, байдлыг улам дордуулчих нь байдаг. Гэлээ ч нөгөө талаас, түүнд тохиолдсон бүх юм даанч тэсвэрлэмгүй санагдах учир сүүлдээ тэсэлгүй,

— Ноёд оо, намайг хааш нь авч явна аа? гээд асуучхав.

Хэн ч хариу дуугарсангүй.

Өчиггүй баривчилгааны үед нэг ч үг амнаас ховхлохгүй байх нь гол хуулийн нэг байдаг ажээ.

Нормандын хуульд энэ тухай:

*A silentiaris osto praepositis introducti sunt*²⁴⁹ гэж байдаг нь санамсаргүй хэрэг биш юм.

Ийнхүү чив чимээгүй байдлаас Гуинплений зүрх зогсчих шиг болов. Өдийг хүртэл тэр өөрийгөө хүчтэй хэмээн тооцож, хэний ч гарыг харж явсангүй. Өөрөө өөрийгөө болгоно гэдэг хүч чадалтай байхыг хэлнэ. Ганцаараа байх нь дайрч давшуулахгүй байхын баталгаа гэж бодчихоод зожиг амьдарч байлаа. Гэтэл ийнхүү, гэнэт бөөн хүчний аймшигт дарамт нөмрөн авах нь энэ. Хууль гэгч нүдэнд харагдаж, гарт баригддаггүй энэхүү хүчинтэй ямар аргаар тэмцдэг болж байна? Сайх тааврыг тайлж ядан үйлээ үзэж байлаа. Урьд нь огтын мэдэрч яваагүй айдас гэгч, түүний хуягийн эмзэг газрыг нь олж зүрхэнд нь нэвтэрчээ. Түүнээс гадна шөнийг нүд анилгүй өнгөрөөж, аяга цайнд ам хүрснээс өөр юу ч идэж уугаагүй байлаа. Бүх л шөнөжингөө дэмийрч солиорсноос ялгаагүй өнгөрөөж, одоо ч гэсэн чичрэг туссан юм шиг халуурч байлаа. Ам нь цангаж, бас өлсөж ч байгаа юм шиг. Гэдэс хонхолзсон үед ааш аяг ер нь ямар олигтой байдаг билээ дээ. Өчигдрөөс эхлээд Гуинплэнд санаанд оромгүй юм дараа дараалан тохиолджээ. Түүнийг түгшээж буй сэтгэл догдлол нь л авч явлаа. Хар салхигүй үед далбаа, даавууны өөдөс шиг байдаг биз дээ. Гуинплен салхи, уран урагдталаа хөвсийлгөн байдаг тийм даавууны өөдөс лүгээ адил гэдгээ мэдэрч байлаа. Энэ чулуун хавтан дээр арай ухаан алдаад ойччих юм биш байгаа даа? Муужрах гэдэг эмэгтэй хүнд хамгаалалт, эрэгтэй хүнд шившиг байдаг. Биеэ барин тэвчихийг хичээлээ ч болж өгөхгүй чичрэн дагжсаар байлаа. Усанд хөл алдан, яахаа ч мэдэхээ байсан хүн шиг болжээ.

VIII. Ёолоон

Цуваа хөдлөв.

Гудмаар орж явлаа.

Ямар ч урьдчилсан байцаалт байсангүй. Ямар ч бүртгэл тэмдэглэл хөтөлсөнгүй. Тэр үеийн шорон гэдэг үнэндээ бичиг цаасаар оролддоггүй байж л дээ. Юунаас болж хорьж байгааг нь ч бараг мэдэхгүй байж хүнийг оруулаад л хаалгаа хааснаар хамаг хэрэг шувтардаг байж. Шорон гэж байгаад л, дотор нь хоригдох ялтангууд байхад л хангалттай гэж үздэг байж.

Гудам нарийхан учир цуварч явахаас өөр арга байсангүй. Бараг л ар араасаа шахам, толгойд нь бэрээ баригч, араас нь Гуинплен, түүний хойноос шүүхийн гүйцэтгэгч, дараа нь цагдаа нар цувран явна. Гудам одоо улам нарийссаар тохой өргөхөд хоёр хажууг шүргэхээр болж ирэв. Цахиурыг жижиг чулуутай хольж барьсан сайх хүнхэрт хоорондоо адилхан зайтайгаар боржин хэрдгүүд гаргасан учир урагшлах тутам тааз нь намсан бөхийж явахаас аргагүйд хүрч, гүйхэд хүрэх юм гэхэд ямар ч боломжгүй болж ирэв. Зугтаагаад үзлээ гэж бодоход, алхахаас өөр замгүй ажээ, нарийхан гудамлаг байсхийгээд л тохойрон мурийна. Шоронгийн доторх, хүний гэдэс дотор шиг л мурийж, мушгирсан байдаг ажээ. Байсхийгээд л хоёр талд нь бүдүүн төмөр сараалжаар хаасан онгорхой нүхнүүд дайралдах агаад цаана нь дээшээ ч юм уу доошоо орсон шат харагдах ажээ. Хаалттай хаалганд тулж очиход, тэр нь онгойж цувааг оруулснаа дахин хаагдана. Дараа нь хоёр дахь, тэгээд гурав дахь хаалга мөн л анхныхтайгаа адилаар нугасан дээрээ онгойсноо орсны дараа хамхигдана. Өөрөө л онгойж хаагдаад байна уу даа гэлтэй. Ганц ч хүн харагдсангүй. Гудамлаг уйтан болох тусам тааз нь улам улам намсаж бөхийж явахаас өөр аргагүй болов. Хананд чийг дааж хүнхрээс ус дуслан, гудамд дэвссэн чулуун дээгүүр нойтон гэдэс шиг залхаг хөлд шалчганана. Гэрэл гэгээ орлон буй зэвхий бүрэнхийд амьсгаа авахад ч хэцүү болж ирэв. Гэхдээ хамгийн аймаар юм нь гудамлаг уруудаж байгаад байлаа.

Гайгүй сайн ажиглаж байж гэмээж нь л, уруудаж байгааг ажиглаж болох ажээ. Харанхуйд, тэгээд уруудаж явна гэж бодохоос аймаар. Зэвүүн байлгүй яах вэ. Бараг мэдэгдэхгүй шахам налуугаар, өөдөөс нь очиж яваа үл мэдэгдэх юмнаас аймшигтай юм гэж үгүй биз ээ.

Уруудна гэдэг, үл мэдэгдэхийн ертөнц рүү орно гэсэн үг.

Ийм маягаар аль хэр удаан явснаа Гуинплен хэлж чадахгүй байлаа.

Цувах суурь шиг үргэлжлэх энэхүү түгшүүртэй хүлээлт нь хувь бүрийг төгсгөлгүй юм шиг уртасгана.

Гэнэт цуваа зогсов.

Эргэн тойрон харанхуй.

Гудам энэ хавьдаа арай өргөн болж иржээ.

Гуинплен хажуухандаа, ёроолгүй хавцлын өрц сөхүүр лүү цохиод авч байгаа юм шиг, дорно зүгийн харангын дуу мэт цуурайлсан дууг сонслоо.

Энэ нь warentake бэрээгээрээ төмөр хавтан цохисон хэрэг байжээ.

Тэр хавтан нь хаалга байв.

Хаалга нь нугасгүй, харин өргөдөг сараалж шиг өргөгдөж, буудаг ажээ.

Ховил нь эвгүй чахран, Гуинплений өмнө дөрвөлжин гэрэл харагдлаа.

Хулганын занганы хаалга сөхөгддөг шиг, сайх хаалга хүнхэрт гаргасан ангархай руу аажимхан гулсан оров.

Зам нээгдлээ.

Тэндээс гарч байсан гэрэл нь нарны гэрэл бус, бүдэгхэн сүүмэлзсэн гэрэл байлаа. Гэвч Гуинплений байдгаараа томорсон хүүхэн хараанд сайх бүдэг туяа нь гэнэт цахилгаан цахих мэт санагджээ.

Нэг хэсэгтээ тэр юу ч харж чадсангүй. Нүд гялбам гэрэлд, харанхуйтай адилхан, юм ялгахад бэрх байдгийг хэлэх юун.

Дараа нь хүүхэн хараа нь харанхуйд дассан шигээ зугуухан гэрэлд дасаж эхлэв. Эргэн тойрноо ялгахтайгаа болж ирэхэд, анх айхавтар хурц санагдсан гэрэл нь аажмаар сулран бүдгэрсээр бүрэнхий болж ирлээ. Гуинплен өөрийн өмнө бүүдийн онгойх нүх рүү сайн гэгч нь харснаа, харсан юмнаасаа айх шиг болов.

Хөл доор нь шахуу, чулуун хананд ухаж гаргасан бариул хашлага ч үгүй шат гэмээр хорь орчим мөлийсөн нарийхан гишгүүр эгц доошоо ороод хүнхрийн ёроолд хүрсэн байв.

Нүхэн зоорь нь дэндүү том барилга байшингийн дор байдаг ёсоор тэгш бус суурин дээр тулгуурласан сум хэлбэрийн майтгар хүнхэртэй дугариг нүх байлаа. Төмөр хавтанг дээш өргөхөд гарч ирсэн орох хаалганы үүрэг гүйцэтгэгч сайх нүхийг, чулуун хүнхрийн шат доош буусан хэсэгт гаргасан учир, дээрээс нь харахад яг худаг руу өнгийж байгаа юм шиг санагдана.

Зоорь их уужмыг харваас, хэрэв хэзээ нэг цагт худгийн ёроол байсан юм аа гэхэд аварга том худаг байж таармаар. Хэрэв үүнийг, арслан ч юм уу, барсын нүх гэж өөртөө бодож чадвал «алам» гэдэг хуучны үг хэллэг сайх чулуун уутанд таармаар ажээ.

Зооринд хавтан ч, чулуу ч дэвсээгүй, аль ч гүнзгий нүхэн савны адилаар чийгтэй, хүйтэн газар шал болжээ.

Нүхний голд дөрвөн намхан эв хавгүй багана, суман хэлбэртэй чулуун асрыг тулах агаад, дөрвөн хажуу нь нэг цэгт нийлсэн нь ширээт ламын овоодойг санагдуулна. Дээр үед доор нь чулуун авс тавьдаг асан нэг ёсны лавир гэмээр сайх хүнхэрт тулсан саравч нь, хэрэв тал бүрээсээ онгорхой, дөрвөн хаяаны оронд дөрөвхөн баганатай, саравчийг, тасалгаа гэж нэрлэж болдог л юм бол, тусгай өрөө шиг харагдана. Саравчны голд, гандангийн цонх лугаа адил сараалж төмөртэй дэнлүүг чулуунаас өлгөжээ. Дэнлүү баганыг, бүдэгхэн цайвартах хүнхрийн дугариг ханыг судалтай сүүдэртсэн сүүмгэр гэрлээр гэрэлтүүлнэ.

Энэ нь Гуинплений нүдийг гялбуулсан нөгөө гэрэл байжээ. Одоо бол гэрэл цацруулсан оч шиг л харагдана.

Өөр гэрэл гэгээ гаргах юм байсангүй. Цонх салхивч аль нь ч байсангүй.

Дөрвөн баганын хооронд, бусдаас илүү гэрэлтүүлэгдсэн газар, яг дэнлүүний доор нэг аймаар цайвар дүрс газарт хэвтэж байв.

Тэр нь нуруугаараа дээш харан хэвтжээ. Нүдээ тас аньсан царайг нь харж болохоор, харин чээж нь хэлбэр галбиргүй бөөн юманд даруулсан байв. Дөрвөн мөчийг нь хэрээс маягаар тэлэн дөрвөн баганад бэхэлсэн дөрвөн гинжнээс холбосон байв. Багана бүрийн доорх төмөр гархинаас гинжээ бэхэлжээ. Мөчөө байдгаар нь тэмүүлэн хөшсөн энэ хүний дүрс, бүрзийн хөхрөх арьс нь үхдэлээс ялгаагүй санагдана. Энэ нь нүцгэн, эрэгтэй хүн байлаа.

Шатны гишгүүрийн дээр зогссон Гуинплен үүнийг хараад өөрийн эрхгүй хөшжээ.

Гэнэт гинших дуун чих дэлсэв.

Тэгэхээр, хүүр биш, амьд хүн хэвтэж байх нь.

Энэ сүүдрэвчийн хажууханд, асрын нэгэн нумласан хажуугийн доор, өргөн чулуун суурин дээр тавьсан гар түшлэгтэй сандлын хоёр талд урт хормойтой тас хар дээлтэй хоёр хүн хөдлөлгүй зогсож, сандал дээр нь урт хормойт улаан нөмрөгтэй гөлийсөн хүйтэн царайтай хөгшин хүн улаан сарнайн баглаа барьчихсан сууж харагдав. Гуинпленээс арай илүүхэн юм мэддэг хүнд бол цэцгийн баглааг хараад дорхноо учрыг нь ойлгох байлаа. Цэцэг барин хэрэг

шүүх эрх бол хааны болон хотын эрх мэдлийг нэгэн зэрэг илэрхийлдэг түшмэлд л байдаг ажээ. Лондон хотын дарга лорд одоо ч гэсэн гартаа цэцэг барин шүүхийн хэрэг явдлыг явуулдаг. Хаврын анхны сарнай бол шүүгчдээс гэсгээн шийтгэхэд нь туслах үүрэгтэй.

Сандалд заларч буй хөгшин нь Серрейн гүнлэгийн захирагч биеэрээ байв.

Эзэн дээдсийн хувцсыг өмссөн ромын эрийн сүр жавхлантай байдлыг үзүүлэн сууна.

Түшлэгтэй сандлаас өөр суудал зооринд байсангүй.

Дээр нь элдэв ном, цаас овоолсон ширээ сандлын хажууд байна. Түүн дээр захирагчийн урт цагаан бэрээ байна.

Сандлын хоёр талд нь хөдөлгөөнгүй зогсож байгаа хоёр хүн нь нэг нь анагаах ухааны, нөгөө нь хиймэл үсэн дээр угласан малгайгаараа танигдах хууль зүйн ухааны докторууд ажээ. Хоёулаа урт хормойт хар дээл өмсжээ. Нөгөө ертөнцөд явуулж байгаа хүмүүстээ зориулж энэ мэргэжлийн хүмүүс гашуудлын хар өнгөтэй хувцас хэрэглэж байдгийг хэлэх юун.

Захирагчийн ард, суурь болгосон чулуун хавтангийн ирмэг дээр, гартаа өдөн үзэгтэй, харваас юм бичихээр бэлдсэн нь илт дугариг хиймэл үс тавьсан бичээч цомцойн сууж, өвдөг дээрээ бичиг хэрэгтэй хавтас, дээр нь илгэн цаас тавьжээ. Хажууханд нь хавтан дээр нагван харагдана.

Энэ түшмэл «уут хамгаалагч» гэж нэрлэгддэгийн нэг гэдгийг хөлийнх нь дэргэд буй цүнх гэрчилнэ. Дээр үеийн шүүх ажиллагааны сольшгүй зүйлийнх нэг ийм цүнхийг «үнэн мөний шүүхийн уут» гэдэг байлаа.

Баганын нэгийг налаад гараа урдаа зөрүүлсэн савхин хувцастай хүн зогсож байх нь, зандалчны туслагч ажгуу.

Гинжлүүлэн тэлэгдсэн хүнийг тойрч, дүнсийн хөшсөн мэт энэ бүх хүмүүсийн сэтгэл ямар нэг юманд татагджээ. Ганц нь ч хөдөлж, ядахдаа дуугарахгүй нь гайхалтай.

Нүхэн зооринд бие зарсхийлгэм нам гүм.

Гуинплений хараад байгаа энэ зоорь нь эрүүгийн газар байсан юм санж. Урьд Англид ийм эрүү шүүлтийн газар газар сайгүй байсан гэдэг. Бьючелиний Тоуэрын нүхэн зоорь, Лолардын гяндангийн хонгилын адилаар удаан хугацаанд иймэрхүү зорилгоор хэрэглэгдэж байсан гэдэг. Лондоны «Меди Плейсийн газар бунхан» гэдэг нэрээр алдаршсан нүхэл зоорь өнөөдрийг хүртэл хадгалагдаж үлдсэн байдаг. Тэнд төмөр хавчуур улайсгадаг байсан задгай зуух байдаг.

Иоан хааны үед барьсан бүх шоронд эрүүдлэгийн газар байсан агаад, Саутворкийн шорон жинхэнэ тэр үеийн гяндан байлаа.

Одоо бидний ярих гэж байгаа явдал тэр цагийн Англид, гэм биш зан болсон зүйл байсан бөгөөд нарийндаа хүрвэл тэр үеийн бүх хууль өдийг хүртэл хүчин төгөлдөр байгаа болохоор, одоо ч англид болж байхыг үгүй гэх газаргүй юм. Зэрлэг догшин хууль зүй нь, эрх чөлөөтэй хачин сайхнаар тааран зохицдогоороо Англи нь ихэд сонирхолтой үзэгдэл гаргаж байгаа юм даа. Үлгэр жишээ болгом эвтэй найртай хос гэхээс өөр яах вэ.

Тухайн нөхцөлд зарим нэг зүйлийг хардахад буруудах юм байхгүй. Хэрэв Англид олон нийтийг хамарсан хямрал гараад ирэх юм гэхэд, хуучин шийтгэл мөн л дахин эхэлж болохыг үгүйсгэхийн аргагүй. Английн хууль цааз бол гэрийн болж гаршсан бар л гэсэн үг. Зөөлөн савартай ч гэсэн, ямагт нуугдсан хумс нь байж л байна.

Энэ хумсыг л тайраад хаячихвал ёстой ухаалаг явдал болох сон.

Английн хууль цааз, эрх гэдгийг бараг мэддэггүй. Нэг талаас гэсгээн шийтгэх, нөгөө талаас хүнлэг байх. Гүн ухаантнууд ийм журмыг эсэргүүцэн буруушаадаг ч, хүн төрөлхтний шүүх, үнэн мөнтэй нийлтлээ нэлээн удах байлгүй дээ.

Англид хуулийг хүндэлнэ гэдэг дээд цэгтээ хүрсэн газар. Англид хуулийг хэзээ ч хүчингүй болгож үзээгүй нь түүнийг хэр зэрэг хүндэлдгийг бэлхнээ хэлээд өгнө. Ийм хачин байдлаас, хуулийг хүндэлдэг ч гэлээ, түүнээ биелүүлдэггүй байж таарна гэдэг дүгнэлт хар аяндаа гарч ирнэ ээ дээ. Дээр цагийн хууль, хөгшрөөд, хүн тоохоо байчихна, тэгээд л гүйцээ. Тэд өөрсдийгөө залуу зандан үеийнх шигээ гялалзаж явна гэж бодвол бодог, тэдний л дурын хэрэг. Үеэ өнгөрөөсөн юм гэж аль нь ч хэлүүлэхгүй. Энэ эелдэг зан чинь л нөгөө хүндэтгэл маань шүү дээ.

Нормандын хууль эрх хэдийнээ үрчлээтэй болжээ. Гэлээ ч энэ нь, английн шүүгчдээс нүд ирмэх, сээтэн хаяхад өчүүхэн ч саад болсонгүй. Хэрэв норманд л гаралтай бол ямар ч ширүүн догшин хуучирсан хууль зүйг англичууд элэгтэйгээр хадгалан авч үлддэг байлаа. 1867 онд мөчилсөн үхдэлийг нь нэгэн эмэгтэйд — хатан хаанд өргөн барихын тул нэг хүнийг [250](#) мөчилж цаазлахаар ял оноосон юм.

Ер нь Англид хэзээ ч тамлаж байгаагүй. Түүх л ингэж хэлж байгаа юм даа. Дэндүү мэдэмхийрсэн нь ч мэдэмхийрсэн байх аа.

Вестминстерийн Матъе, хүнийг цаазаар аваачдаггүйгээрээ «саксоны хууль нь зэгсэн энэрэнгүй, зөөлөн» гэдгийг тэмдэглээд «зөвхөн хамрыг нь огтлон, нүдийг нь ухаж ч юм уу, хүйсийг нь

тодорхойлдог тэр хэсгийг нь салгаж авдаг» гэж нэмж хэлсэн байдаг. Ердөө л тэгээд гүйцээ!

Шатны дээд гишгүүр дээр цочирдсондоо хөшчихсөн Гуинплений хамаг бие дагжталаа салганаж ирэв. Айгаагүйгээ айж, үнхэлцэг нь хагарчих дөхжээ. Ямар ялт хэрэг үйлдчихсэн байж болохоо бодож олох гэж ядна. Бэрээ баригчийн дуугаа хураахыг залгуулаад, эрүүгийн газар гарч иржээ. Энэ нь нэг алхам ахилаа гэсэн үг боловч энэ алхам нь эмгэнэлтэй ёрын алхаа байлаа. Түүнийг нөмрөн буй хуулийн баргар дүрс улам ч тааварлахын эцэсгүй дүнсийн харлаж ирлээ.

Газарт гулдайн хэвтсэн хүн дахин гиншив.

Хэн нэгэн хүн мөрөн дээр нь хүрэх шиг болохыг Гуинпен мэдрэв.

Энэ нь бэрээ баригч байлаа.

Тэр нь дохиог нь дагав.

Гишгүүрийг хөлөөрөө тэмтчин шатаар уруудав.

Гишгүүр нь найм есөн ямх өндөр, нарийхан ажээ. Дээрээс нь нэмээд хашлага байсангүй. Их л болгоомжлон доошлохоос аргагүй. Гуинплений араас хоёр гишгүүрийн зайтай төмөр бэрээгээ урагш нь сунган барьсан бэрээ баригч, мөн тийм зайд араас нь шүүхийн гүйцэтгэгч бууж явав.

Шатаар доошилж явахдаа Гуинпен сүүлчийн аврагдах найдлага нь алга болж буйг мэдэрч байлаа. Үхэл рүүгээ алхам алхмаар ойртож яваа санагдана. Гишгүүр болгон нь сэтгэлд нь ямар нэг гэрлийг бөхөөж байв. Улам улмаар хувхай цайсан амьтан, сүүлчийн гишгүүрийг алхав.

Газарт тэлэгдэн, дөрвөн баганад хүлүүлсэн сүүтгэнэл хэрчигнэсэн хэвээр байлаа.

Бүрэнхийн дундаас,

— Ойртоорой! гэсэн дуу гарсан нь захирагч Гуинпенд хэлсэн хэрэг ажээ.

Гуинпен урагшаа алхав.

— Улам ойрт гэж захирагч шаардав.

Шүүхийн гүйцэтгэгч их л баяр ёслолын байдалтай үг хэлж байгаа юм шиг Гуинплений чихэнд шивгэнэн,

— Та Серрейн гүнлэгийн захирагчийн өмнө ирээд байна гэлээ.

Гуинпен нүхэн зоорины голд гулдайж байгаа нөгөө тамлагдсан хүнд бараг тулж очлоо. Бэрээ баригч, шүүхийн гүйцэтгэгч хоёр түрүүчийн байрандаа үлдэж Гуинпен л ганцаараа урагшилжээ.

Саяхан болтол холоос л барааг нь харж байсан хөөрхий амьтныг, асар доогуур орох шахуу болон ойроос харчхаад Гуинплен айсандаа эгээтэй л ухаан тавьчихсангүй.

Газарт наалдчихсан мэт харагдах тэр хүн, ромчууд *succingulum*, готтууд *christipannus*, тэр үгнээс аван манай өвөг дээдэс галлчууд *сiрагне* гэж нэрлэдэг асан шүүлтийн, инжрийн модны навч²⁵¹ гэж хэлж болмоор өчүүхэн газрыг халхалсан илжирсэн даавууны өөдсийг тооцохгүй л юм бол шалдан байлаа.

Загалмайд цовдлуулсан Исүсийн бие ч бас даавууны өөдсөөр л халхлагдсан байдаг биз дээ.

Гуинплений харж буй үхэхээр шийтгэгдсэн хэрэгтэн тавь юм уу жаран настай гэмээр. Өл халзан хүн байлаа. Оочид нь шингэн буурал сахал сөрвийнө. Нүдээ тас анин, амаа байдгаар нь ангайсан учир бүх шүд нь харагдана. Ясархаг эцэнхий царай нь үхсэн хүний гавлыг санагдуулна. Дөрвөн чулуун хананд бэхэлсэн гинжээр тэлсэн хөл гар нь Х үсэг лугаа адил болгожээ. Цээж гэдэс дээр нь ширмэн хавтан тавьж дээрээс нь тав зургаан бул чулуу овоолжээ. Түүний гинших нь заримдаа дуулдах төдий, амьсгаа авах шиг байснаа, заримдаа араатан архирах мэт чангарна.

Захирагч шинэхэн сарнайн баглаагаа барьсан хэвээр, нөгөө сул гараараа ширээн дээрх цагаан бэрээг аваад дээш нь өргөн,

— Эзэн хааныг сүсэлье гэснээ бэрээгээ буцаан тавилаа.

Дараа нь захирагч оршуулгын хонхны цохилт шиг удаанаар, нөгөө гулдайн хэвтэж буй хүн шиг хөдөлсөн ч үгүй өгүүлрүүн:

— Гинжинд хүлүүлсэн хүн чи, үнэн мөний шүүхийн дуу хоолойг эцсийн удаа сонслоо. Таныг гяндангаас чинь гаргаж энд шууд авчирсан билээ.

Хууль ёсны бүх л ёс журам, *formalis verbus*-ыг баримтлан танаас асуусан асуултад, танд дахин танилцуулах гэж байгаа, тэрхүү уншиж өгсөн бичиг баримтыг ч хайхралгүй, хүний ёсонд харш муу ёрын зөрүүдлэлд автан та амаа хамхин, шүүгчид хариулахаас татгалзсан билээ.

Энэ бол жигшүүртэйгээр дураараа дургиж байгаа хэрэг, шүүхэд өчгөө өгөхөөсөө татгалзан, мэлзэж хуулиар шийтгүүлбэл зохих явдал мөн.

Захирагчийн баруунтаа зогсож байсан тангараг өргөсөн хуульч

— Overnessa Альфред, Годруны хууль. Зургаадугаар бүлэг гэв.

Захирагч үргэлжлүүлэн,

— Марал янзагаа төрүүлдэг ойг бүрэлгэн сүйтгэдэг дээрэмчдээс бусдыг хууль ивээн үздэг юм гэхэд, дуу дуугаа авалцах

хонх мэт хууль судлагч үгийг нь залган,

Qui faciunt vastum in fovesta ubi damae solent founirare гэлээ.

— Шүүгчийн асуултад хариулахгүй байгаа этгээд бол бүх л чивэлт муу явдалд сэжиглэгдэж болно. Тэр нь ямар ч муухай хэргийг үйлдэхээс буцахгүй гэхэд хуульч дахин өлгөж аван,

— Prodigus, devorator, profusus, salax, ruffianur ebriosus, luxuroisus, simulator, consumptor partrimonil, elluo, ambro, gluto²⁵² гэлээ.

— Бүхий л чивэлт муу явдал ямар ч гэмт хэрэг рүү түлхэж болно. Бүгдийг үгүйсгэж буй тэр хүн, бүхнийг хүлээж таарна. Шүүгчийн асуултад хариулахгүй байгаа хүн бол худалч, эцгийгээ алагч байж таарна гэхэд нь хуульч,

— Mondax et parricida гэлээ.

Захирагч үргэлжлүүлэн,

— Хүн дуугаа хураан өнгөрөхийг хориглоно. Шүүхээс санаатайгаар булзаарна гэдэг хуулийг доромжилж шархтуулж байгаа хэрэг. Тэр бол дар эхийг шархтуулсан Диомед л гэсэн үг. Шүүх дээр амаа хамхина гэдэг төрийг эсэргүүцэж байгаатай утга нэг. Шүүх цаазыг доромжилно гэдэг утгаа эх эзэнтнийг доромжилж байна гэсэн үг. Энэ бол хамгийн жигшүүртэй, хамгийн булай гэмт хэрэг. Байцаалтаас зайлсхийх нь үнэн мөнийг хулууж байгаагаас ялгаа юун. Хууль үүнийг урьдчилан харсан байдаг юм. Ийм тохиолдолд англичууд хэзээнээсээ гэмт хэрэгтэнд хар нүх, дөнгө гав гинжийг хэрэглэх эрхээ эдэлсээр ирсэн билээ гэхэд хууль судлагч,

— Anglica charto²⁵³, мянга найман зуун найман он гэж тайлбарлаад тэрхүү хямсгар байдлаа хадгалсан хэвээр Ferrum, et fossam, et fargas, cum aliis libertatibus²⁵⁴ гэлээ.

Захирагч үгээ үргэлжлүүлсэн хэвээр хүнгэнэн,

— Ийм байдлаар хэрэгтэн та хэдийгээр ухаан санаа саруулхан, шүүх танаас юуг шаардаж буйг сайтар ойлгож байгаа боловч ам ангайхыг хүсэхгүй, чөтгөр шиг зөрүүдэлсний чинь хариуд амьдаар чинь шатааж таарах боловч эрүүгийн хэргийн горимын заалтаар «хүндрүүлсэн дарамттай байцаалт» гэж нэрлэдэг шүүлт эдлэхээр болсон билээ. Тэгээд таныг яасныг хэлье. Үүнийг би биеэрээ танд мэдэгдэхийг хууль шаардаж байгаа юм. Таныг энэ нүхэн зооринд авчраад, бүх хувцсыг тайлж нүцгэлээд, нуруугаар чинь хэвтүүлээд, хөл гарыг чинь тэлж, хуулийн багана болох дөрвөн баганад хүлсэн билээ. Цээж дээр чинь ширмэн хавтан тавиад дээр нь даахын чинь хэрээр чулуу тавьсан «Түүнээс ч илүүг» гэж хуульд хэлсэн байдаг гэхэд нь хуульч,

— Plusgue²⁵⁵ гэж батлан үг хавчуулав.

Захирагч яриагаа таслалгүй,

— Ингээд таныг эрүүдэхээс өмнө, Серрейн гүнлэгийн захирагч миний бие танд хандан, асуултад хариулж ам ангайхыг дахин нэг удаа хүссэн билээ. Гэтэл та, танд зүүсэн гинж, дөнгө, гавыг хайхралгүй үхэр шиг зөрүүдлэн амиа хамхисаар байлаа.

— At tachiamenta legalia²⁵⁶ гэж хуульч дуугарав.

— Таны эсэргүүцэл, мэлзээний улмаас үнэн шударга ёс, хуулийн шаргуу цөхрөлтгүй зан, гэмт хэрэгтний зөрүүдлэхээс хоцрохгүй байхыг шаардаж байгаагийн улмаас, сорил ч хуулийн эрх зүйн баримт бичгийн заалтын дагуу үргэлжилсэн билээ. Эхний өдөр танд ууж, идэх юм өгөөгүй.

— Hoc est superjejunare²⁵⁷ гэж хууль судлагч тайлбарлав.

Хэсэг чив чимээгүй болоход, овоолсон чулуунд даруулсан хүний сөөнгөтсөн аймаар амьсгаадах л сонсогдоно.

Хууль судлагч тайлбараа үргэлжлүүлэн,

— Adde augmentum abstinence ciborum diminutione Consuetudo Britannica²⁵⁸ таван зуун дөрөвдүгээр зүйл гэж нэмэв.

Захирагч, эрдэмтэн хуульч хоёр ээлжлэн ярина. Ийм нэгэн хэвийн залхуу хүрмээр юмнаас илүү баргар юм байна гэж баймааргүй санагдана. Уйтгартай доожоогүй дуу, зэвүүн хүнгэнэсэн дууг давтах нь эрүү шүүлтийн ямар нэгэн шүтлэгийн санваартан, даамал хоёр хуулийн цусанд шүнтсэн ёслол хийж байна уу гэж бодмоор.

Захирагч дахин үгээ эхлэн,

— Эхний өдөр танд уух ч, идэх ч юм хавьтуулаагүй. Хоёр дахь өдөр нь идэх юм өгсөн ч уух юм өгөөгүй. Аманд чинь арвайн гурилан гурван хэсэг талх хийсэн билээ. Гурав дахь өдөр нь уух юм өгсөн боловч идэх юм өгөөгүй. Шоронгийн урсгах шуудуунаас утгаж авсан гурван аяга усыг гурав дахиа ам руу чинь цутгасан. Тэгээд дөрөв дэх өдөр нь өнөөдөр болж байна. Хэрэв та одоо асуултад хариулахгүй бол таныг амьсгал тасартал чинь энд байлгах болно.

Үнэн мөний шүүх ингэхийг шаардаж байна гэхэд нь хажуугаас үг хавчуулах боломжийг орхихгүй гэсэн мэт хуульч,

— Mors rei homagium est bonae legi²⁵⁹ гэж нэгэн хэмээр дуугарав.

— Тэгэхэд хүрвэл та үхлийн муугаар үхэж, ам хамраас чинь, сахал самбайнаас чинь, суга цавинаас чинь, ер нь хөлөөс чинь

авхуулаад толгой хүртэлх нүх сүв болгоноос чинь цус гоожиж ч байсан туслаад ирэх хүнгүй болох вий.

— A throlefolla et palus et subhircis et a grugno usque ad scurponum гэж хуульч нэмэв.

Захирагч өгүүлрүүн:

— Миний хэлэхийг анхааралтай сонс, энэ танд л хамаарах зүйл.

Хэрэв та жигшүүртэйгээр ам хамхихаа болиод, бүх юмыг хүлээх юм бол таныг зөвхөн дүүжлэх агаад мөн meldefeoh буюу нэлээд хэмжээний мөнгө авах эрхтэй болно.

— Damnum confitens, habeat le meldefeoh Leges inde²⁶⁰ хорьдугаар зүйл гэж хуульч дуугарлаа.

— Тэр мөнгийг танд, Тавдугаар Генрихийн хаанчлалын гуравдугаар онд гарсан горимоор хүчингүй болгон, зөвхөн ийм тохиолдолд хэрэглэж байхаар заасан дойткин, сускин, галихальпенсээр төлнө.

Түүнээс гадна та scorium ante mortum²⁶¹ хийх эрхтэй болох бөгөөд, дараа нь таныг дүүжлүүрт боомилж хорооно. Хэргээ хүлээх ийм л ашигтай. Та шүүхэд хариулмаар байна уу?

Захирагч хариу хүлээн дуугаа хураав. Хэрэгтэн хөдөлсөн ч үгүй.

Захирагч үргэлжлүүлэн өгүүлрүүн:

— Хүн гуай, дуугай байна гэдэг бол авралаас илүү аюул нь олон хорогдох газар юм. Мэлзэж зөрүүдэлнэ гэдэг хөнөөлтэй ч, ялтай ч эд. Шүүхэд дуугарахгүй байгаа хүн бол эзэн хааны титмээс урвагч. Бүү ингэтлээ шазруунаар зөрүүдлэн зүтгээд бай. Эзэн хаанаа бодооч. Эрхэмсэг их эзэгтэйг бүү сөргө. Намайг ярьж байхад, түүнд хариу хэл. Үнэнч харьяат нь байгаач.

Тамлуулагч, хэрчгэнэн хяхтнав.

— Ингээд сорилын эхний далан хоёр цаг дуусаад, бид дөрөвдөх өдөртөө ороод байна. Хүн та сонс, энэ бол шийдвэрлэх өдөр шүү. Дөрөв дэх өдөр хууль нүүрэлдэхээр тогтоод байна.

— Quarta die, frontem ad frontem adduce²⁶² гэж хууль судлагч бувтнав.

— Хуулийн цэцэн ухаан, бидний өвөг дээдэс «үхлийн хүйт даасан шийд» гэж нэрлэсэн тэр зүйлийг хэлүүлэхийн тул энэ сүүлчийн мөчийг шилж авсан юм. Учир нь ийм хоромд л хүмүүс нэг бол тийм гэж, нэг бол үгүй гэдэг юм.

Хуульч үүнийг нь тайлбарлан,

— Zudicium pro frodmortell, guod homines credenci sint per suum ya et per suum na Адемтан хааны хууль. Нэгдүгээр дэвтэр, далан

гуравдугаар хуудас гэв.

Захирагч хувь хяраатай хүлээснээ, тамлуулагч руу сүртэй догшин царайгаа ойртуулан тонгойж,

— Газарт хэвтэж байгаа хүн та... гэснээ нэг жаахан чагнаад, — Хүн та намайг сонсож байна уу?! гэж орилох шахам дуугарлаа.

Хэрэгтэн хөдөлсөнгүй.

— Хуулийн нэрийн өмнөөс, нүдээ нээгээрэй гэж захирагч тушаалаа.

Нөгөө хүний аньсага хаагдсан хэвээр л байлаа.

Зүүн талдаа зогсож байсан эмч рүү захирагч эргээд,

— Доктор, та оношоо тавиарай гэлээ.

— Probe, da diagnosticum гэж хуульч давтав.

Эмч ихэмсэг байдлаа хадгалсан хэвээр хавтангаас буугаад, газарт хэвтэж буй хүнд ойртон тонгойж, чихээ аман дээр нь тавьж, гар, суга, хонгоных нь судсыг барьж үзээд, дахин эгцрэв.

— За яав? гэж захирагчийг асуухад,

— Сонсож байгаа юм байна гэлээ.

— Харах болов уу? гэхэд нь

— Харж чадна аа гэж оточ хариу өчив.

Захирагчийн дохиогоор шүүхийн гүйцэтгэгч, бэрээ баригч хоёр дөхөж ирлээ. Бэрээ баригч хэрэгтний толгойн тус очиж зогсоход, шүүхийн гүйцэтгэгч Гуинплений ард зогсов.

Эмч хойш ухран баганын хооронд орж зогслоо.

Захирагч, санваартан рашаан цацдаг багсаа өргөж байгаа юм шиг, сарнайгаа өргөөд өндөр дуугаар хэрэгтэнд хандан сүртэйгээр өгүүлрүүн:

— Булай амьтан, яриач! Чамайг устгахынхаа өмнө, хууль чамаас гуйж байна. Чи хэлгүй хүн болохыг оролдоно гэнэ ээ, булш хэлгүй байдгийг бодоорой хө. Дүлий болж маяглана гэнэ ээ, нүгэлтний гуйлтад дүлий байдаг аймшигт шүүхийг бод. Чамаас ч өөдгүй үхлийн тухай бод. Энэ нүхэнд хаягдах гэж буйгаа сайн бод. Надтай адилхан минь ээ, намайг сонс, учир юу гэвэл би ч гэсэн хүн! Би христос шүтлэгтэн учир намайг сонс, дүү минь! Би хөгшин хүн, намайг сонс хүү минь! Би чиний наждын эзэн нь, одоохон хилэгнэх учир надаас болгоомжил. Хуульд биеллээ олсон аймшиг шүүгчийг сүр хүчтэй болгодог юм. Сайн бод! Би хүртэл өөрийгөө хараад дагжиж байгааг бод. Миний өөрийн эрх мэдэл намайг айлгадаг юм шүү. Миний уурыг хүргээд яах вэ. Залхаан цээрлүүлэлтийн ариун тамлалт надаар дүүрэн байна шүү. Өөдгүй амьтан минь, үнэн мөний шүүхийн өмнө, сүнсийг чинь аврах шударга айдастай байгаач,

миний үгийг дага. Нүүрэлдэх цаг ирээд байна, чи хариулах ёстой. Бүү зөрүүдэл. Засах боломжгүй, алдаа бүү гарга. Чиний амь, миний гарт гэдгийг бод. Дутуу үхдэл намайг сонс! Хэрэв чи энд олон цаг, өдөр хоног сараар тарчлан зовж, наад чулуундаа дарагдан, өлсөн гуринхалж, бүхэнд мартагдан хаягдаж, цор ганцаархнаа энэ нүхэн дотор үхэр хулгана, харханд зулгаалган, харанхуйгаас гарах ёрын амьтдад тасчуулан үхэж байхад чинь, чиний толгой дээгүүр худалдаа наймаагаа хөөцөлдсөн хүмүүс нааш цааш цуван, сүйх тэрэг зөрөлдөж байхыг хүсэхгүй бол, хэрэв чи энд цөхрөнгөө баран, шүдээ хавиран, уйлж унжиж, бурхан шүтээнээ хараан байхад чинь хажууд чинь өвчнийг чинь намдаачихаар эмч оточ ч байхгүй, чиний сэтгэлийн цангааг ариун тайвшрууллаараа гаргачих санваартан ч үгүй байхыг хүсээгүй л юм бол, хэрэв аман дээр чинь үхдэлийн хөөс цахрахыг мэдрэх цаг ирэхийг хүсээгүй л юм бол би чамаас гуйж байна, намайг сонсооч гэж мөргөн гуйж байна! Би чамайг өөрийнхөө сүнсийг авран, өөртөө туслаач гэж байна. Өөрийгөө өрөвдөөч, чамаас шаардаад байгааг л хий, үнэн мөний шүүхэд гартсанаа хүлээж, үгэнд ор. Толгойгоо өндийлгөөд, нүдээ нээ, тэгээд энэ хүнийг таньж байна уу, үгүй юу гэдгээ хэлээдэх!

Хэрэгтэн толгойгоо ч өндийлгөсөнгүй, нүдээ ч нээсэнгүй.

Захирагч эхлээд шүүхийн гүйцэтгэгч рүү дараа нь бэрээ баригч руу хараад авлаа.

Шүүхийн гүйцэтгэгч Гуинплений бүрхийг, нөмрөгийг тайлан түүний мөрнөөс бариад, нүүрийг нь гинжлэгдсэн хүнд харагдуулахуйцаар гэрэлд тааруулан ойртууллаа. Гуинплений хүн хараад дотор арзганам нүүр нь гэнэтхэн харанхуйн дундаас тодрон гарах нь тэр.

Ингэх чацуу бэрээ баригч бөхийн, тамлуулагчийн хоёр чамархайнаас хойш гараараа базан толгойг нь өргөөд Гуинплений зүг харуулаад эрхий долоовор хуруугаараа аниастай зовхийг нь хүчээр нээв. Уурлаж догшрон эргэлдсэн нүд харагдлаа.

Хэрэгтэн Гуинпленийг харлаа.

Тэгснээ өөрөө толгойгоо хөдөлгөн ойртуулж, нүдээ байдгаар нь нээж, түүнийг сайтар ажиглан харлаа.

Цээжээ бүхэл бүтэн уулаар даруулсан хүн л тэгж хөдлөх болов уу гэлтэй, бүх биеэрээ татвалзсанаа,

— Энэ мөн байна. Тийм ээ, биеэрээ байна! гэж орилов.

Тэгснээ бие арзасхийлгэм хүйтнээр инээснээ,

— Энэ мөн байна! гэж хэлснээ давтаад, дахин газарт толгойгоо түсхийтэл цохисноо нүдээ аньчихав.

— Бичээч, бичиж авна шүү гэж захирагч хэллээ.

Энэ мөчийг хүртэл Гуинплен үнхэлцэг хагартлаа айсан ч гэлээ биеэ бариад байжээ. Гэтэл «Энэ мөн байна» хэмээн тамлуулагчийн орилсон нь түүнийг тэвдүүлж орхив. Захирагчийн «Бичээч, бичиж авна шүү» гэсэн үгийг дуулаад оройных нь үс босон хөшчихлөө. Өмнө нь хэвтэж байгаа хэрэгтэн, санаанд ч ороогүй учир шалтгаанаар түүнийг ёроолгүй ангал руугаа татан чангааж, ойлгогдохын аргагүйгээр улайсан нь хүзүүнд нь төмөр дөнгө зүүчих шиг санагдлаа. Тэр хүнтэй хамт хоёулаа шившгийн баганаас гинжлэгдчихсэн байгаагаар бодож ч үзлээ. Айж мэгдсэндээ, хаана байгаагаа ч мартан өөрийгөө хамгаалах гээд үзлээ. Ямар ч байдаг байлаа гэсэн гэмт хэрэгт огтын хамаагүй гэдгээ ухамсран улам ч сандран догдолж, биеэ барих ч байхгүй болон, байдгаараа чичрэн салгалж, ямар ч утгагүй юмс бувтнан, зүг чиггүй тавьсан үхэр бууны сум гэлтэй, үхтлээ айсан тархинд нь орж ирсэн үгсийг хашхичин,

— Шал худлаа! Би л лав биш! Би энэ хүнийг танихгүй. Би үүнийг танихгүй байгаа юм чинь, энэ хүн намайг яаж таньдаг юм. Өнөөдөр орой тоглолттой. Намайг хүлээж байгаа. Надаас юугаа хүсээд байгаа юм бэ? Намайг тавиад орхиоч! Энэ чинь яаж байгаа нь энэ вэ? Яагаад намайг энэ нүхэнд авчир аа вэ? Хууль зүй гэж байна уу даа, үгүй юу? Ямар ч хууль байхгүй гэдгийг шуудхан хэлээдэх. Ноён шүүгч, би биш гэдгээ дахиад хэлчихье! Би ямар ч юманд буруугүй. Үүнийгээ би сайн мэдэж байна. Би эндээс явах минь. Энэ бол шударга бус явдал! Энэ хүн бид хоёрын хооронд юу ч байхгүй. Лавлаж магадлаач дээ. Миний амьдралд нуух юм байдаггүй, цөм ил. Намайг муу хулгай мэт баривчилсан. Яагаад намайг ингэж барьдаг байна? Энэ хүнийг чинь хэн гэдгийг би хаанаасаа мэдэх юм? Би бол яармаг, зах зээлээр тоглож явдаг тэнэмэл жүжигчин. Би бол «Инээмтгий хүн». Намайг харах гэж чамлалтгүй олон хүн цугладаг. Бид Транзофилд буугаад байгаа. Би талхныхаа төлөө үнэнчээр ажиллаад арван таван жил болж байна. Би хорин таван настай. Би «Тедкастерийн буурчийн газар» амьдардаг. Намайг Гуинплен гэдэг. Ноён шүүгч нар минь, намайг эндээс суллан тавьж, өршөөн нигүүлсээч. Заяа нь орхисон, хувьгүй амьтдыг гомдоох хэрэггүй. Ямар ч муу юм хийгээгүй, өмгөөлж хамгаалах ч хүнгүй хөөрхий амьтныг өрөвдөөч дээ, та минь. Та нарын өмнө нэг муу ядуу инээдмийн жүжигчин зогсож байна гэлээ.

— Миний өмнө хэмээн захирагч үгээ эхэлснээ, — Фермен Кленчарли лорд, Кленчарли-Генкервил түшээ гүн, Сицилийн

Корлеон бэйс, Английн тайж биеэрээ байна гээд босож зогсоод
сандлаа зааж,

— Милорд, сууж ажаамуу, өндөр дээдэс минь гэх нь тэр.

Тавдугаар дэвтэр. ДАЛАЙ, ХУВЬ ТАВИЛАН ХОЁР НЭГ Л СЭВЭЛЗСЭН САЛХИНД ДОЛГИЛНО

I. Хэврэг юмсын бат бөх байх нь

Заримдаа хувь тавилан бидэнд солиорлын аяганаас уу хэмээн сарвайх нь бий. Үүлэн дундаас гэнэтхэн гар гарч ирээд, үл мэдэгдэм мансууруулах ундаа дүүргэсэн, бараан цомыг барьдаг билээ.

Гуинплен юу ч ойлгосонгүй.

Захирагч хэнийг хэлээд байна хэмээн эргэж харлаа.

Чих сонсголд баригдамгүй дэндүү хурц авиа, ухаан санаанд тогтомгүй дэндүү хүчтэй сэтгэл догдлол. Сонсохтой адилхан, ойлгоход ч гэсэн хэмжээ хязгаар гэж бий.

Бэрээ баригч, шүүхийн гүйцэтгэгч хоёр Гуинпленд аажуухан ойртож ирээд, захирагчийн боссон суудал дээр хүндэтгэлтэйеэ суулгахыг тэр мэдрэв.

Тэр энэ бүхэн чухам юу гэсэн үг болохыг ойлгох ч сэхээ байсангүй, үг дуугүй аяыг нь дагав.

Гуинпленийг суулгаад, бэрээ баригч, шүүхийн гүйцэтгэгч хоёр ар тийшээ ухран хэд алхсанаа сандлын ард гараад ихэмсгээр гэдийн зогслоо.

Захирагч сарнайн баглаагаа чулуун тавцангийн ирмэг дээр тавиад, бичээчийн өгсөн нүдний шилийг зүүж аваад, овоолготой бичиг цаасан дороос шарлаж үнгэгдэн, тос болсон хөгц бурьд идүүлэн, энд тэндээсээ салмайсан, нэг талдаа бичигтэй, ойр ойрхон олон нугалаасны ортой илгэн цаас сугалж авав. Тэгснээ дэнлүүнд дөхөн, илгэн цаасыг нүдэндээ наачих шахам ойртуулаад дуу хоолойгоо байдгаар нь баяр ёслолын байдалтай өнгө гарган уншсан нь:

«Эцэг, хүү болон богд сүлдний нэрийн өмнөөс:

Христосын мэндэлсний мянга зургаан зуун есөн оны нэгдүгээр сарын хорин есний өдрөө».

«Портландын эзгүй эрэгт, өлсгөлөн, хүйтэн, ганцаардлаасаа болж үхэх тавилантай, арван настай жаал хүүг хорон санаагаар орхилоо».

«Энэхүү жаал хүү хоёр настай байхдаа өндөр төрөлт хоёрдугаар Иаков хааны зарлигаар худалдагдсан юм».

«Энэ жаал хүү бол — Фермен Кленчарли лорд бөгөөд түшээ гүн Кленчарли Тенкервили, Италийн Корлеоны бэйс, Английн эзэнт

улсын тайж, талийгаач лорд Кленчарли болон одоо мөн талийгаач болсон түүний эхнэр Анна Брадшоу хоёрын цорын ганц хууль ёсны хүү мөн».

«Энэ жаал хүү бол эцгийнхээ бүх цол хэргэм, хөрөнгө эзэмшлийн угсаа залгамжлагч мөн. Тийм ч учраас өндөр төрөлт эзэнтний тааллаар түүнийг худалдан зэрэмдэглэж, үзэшгүй муухай болгон ор сураггүй алга боллоо гэсэн билээ».

«Энэ жаал хүүг яармаг, зах зээл дээр тоглодог марзганагч болгохоор сурган хүмүүжүүлсэн юм»

«Эцэг лордыг нас барсны дараа хоёр настай байхад нь худалдсан бөгөөд худалдсаны харамж болон бас бус найр тавьж, өөгшүүлж, хөнгөлөлт үзүүлсний учир хаанд арван фунт стерлинг төлсөн билээ»

«Лорд Фермен Кленчарлийг хоёр настай байхад доор гарын үсгээ зурсан энэ мөрүүдийг бичиж байгаа миний бие худалдаж авсан бөгөөд, доктор Конквестийн нууцыг мэддэг ганц хүн болох Хардкванон нэртэй Фландрийн фламанд хүн түүнийг зэрэмдэглэн нүүрийг нь хувиргасан юм»

«Жаалхүүг бид инээдмийн баг— *masea ridens* болгохыг зорьсон билээ».

«Энэ зорилгоор Хардкванон түүнд нүүрэн дээрээ мөнхийн инээд тогтоосон *Bucca fissa usque ad aures*²⁶³ мэс засал хийсэн билээ.»

«Жаал хүүг, ганц Хардкваноны мэддэг аргаар унтуулсан бөгөөд түүнийг зэрэмдэглэж байхад юу ч мэдэхгүй өнгөрөөж, дараа нь мэс засал хийлгэснээ хар аваагүй өнгөрсөн юм.»

«Тэр өөрийнхөө Кленчарли лорд гэдгийг мэдэхгүй.»

«Гуинплен» гэж дуудвал л хариу хэлнэ.»

«Энэ нь түүнийг хоёрхон настай байхад нь нэг нь худалдан, нөгөө нь худалдаж авснаар, нялх байсан болон ой той нь нялхаараа байснаар тайлбарлагдана.»

«Хардкванон бол *Bucca fissa* мэс заслыг хийж чаддаг цор ганц хүн бөгөөд, энэ хүү бол сайх засал хийлгэсэн хүүхдээс энэхэндээ амьд яваа цор ганц хүн юм.»

«Мэс засал хэзээ ч давтагдашгүй, өөрийн онцлогтой учир жаал хүү хөгшин болж, үс нь бууралтдаг юм аа ч гэсэн Хардкванон түүнийг танихдаа л танина.»

«Би үүнийг бичиж байх энэхэн үес, сайх хэрэг явдалд голлон оролцогчийнхоо хувьд юутай хүүтэй нь мэдэж байгаа Хардкванон, одоо гуравдугаар Вильгельм хаан гэж нэрлэгдэх болсон, эрхэм

дээдэс Ораны хун тайжийн шоронд хоригдож байна. Хардкваноныг компрачикос буюу чейласын бүлэгт хамаатай хэмээн баривчлан хорьж байгаа билээ. Тэр одоо Четэмийн гяндангийн цамхагт хоригдож байна.»

«Хааны зарлигаар жаал хүүг бидэнд Ленней лордын Швейцарт үлдсэн ганц зарц нь Лозань, Вевс хоёрын дунд Женев нуурын орчим жаал хүүгийн эцэг, эх хоёр амьсгаа хураасан яг тэр байшинд худалдан дамжуулсан билээ. Зарц нь эздийнхээ дараахан нас барсан агаад, учир иймээс энэхүү нууц хорон явдлыг, энэ үес хүртэл Четэмийн гянданд хоригдож буй Хардкванон болон мөдхөн үхэх тавиланд дайрагдсан биднээс өөр хэн ч мэдээгүй өнгөрсөн болно.»

«Доор үсгээ тавьсан бид бүхэн, эзэн хаанаас бидэнд наймаалсан нялх ноёныг найман жилийн турш хүмүүжүүлэн, өөрсдөөсөө салгалгүй авч явсны учир нь өөрсдийн ажил үйлд ашиг хонжоо болгохыг зорьж байсанд оршино.»

«Хардкванонд ногдсон тавиланг хуваалцахгүйн тул, өнөөдөр Английг орхин одохдоо, иймэрхүү үйлийг хийсний төлөөнөө хатуу чангаар шийтгэхийг заасан улсын хурлын ялаас ширвээтэн айхдаа, бүрий болохын үес дор, Ферлен Кленчарли лорд буюу Гуинплен хэмээгдэх жаал хүүг Портландийн эрэгт цор ганцаарыг нь орхилоо.»

«Нууцыг хадгалж явахаа бид хаан эзэнд тангарагласан болохоос бурхан тэнгэрт тангараглаагүй билээ» «Өнөө шөнө, эзэн тэнгэрийн бошгоор, элчилгүй далайн дунд хар шуурганд дайруулан, цөхрөнгөө барж гүйцээд, бидний амьдралыг, яаж мэдэх вэ өрөвч сэтгэлээрээ бидний сүнснийг ч аварч чадах түүний өмнө сөхрөн суугаад, хүмүүсээс ямар ч тусламж горьдохоо хэдийнээ больж, дээд тэнгэрийн хилэгнэхээс айн дагжингаа, чин сэтгэлээс нүглээ гэмшин наманчлах нь эцсийн ганц горьдлого, сүүлчийн өмөг түшиг гэдгийг мэдрэн, үхлийн эрхийг даган, хэрэв л тэнгэрийн үнэн мөний шүүхэд таалагдах аваас баяртайгаар түүнийг угтахад бэлэн, номхон хүлцэнгүйгээр гэмээ наманчлан, чээжээ шаан байж бид энэ бүхнийг хүлээн улайж; дээд тэнгэрийн тааллаар буянт үйлд хэрэг болох болтугай хэмээн догшрон долгилох далайд чулуудаж байна. Ариун дар эх минь бидэнд нигүүлсэн туслах болтугай. Ингээд нэрээ тавилаа.»

Захирагч уншихаа болиод,

— За гарын үсгүүд нь энэ байна. Цөм хоорондоо адилгүй гэж хэлэв.

Тэгээд дахин уншсан нь:

«Доктор Геркардус Геестемунд — Агунсион - Хэрээс, хажууд нь Эбудад байдаг Тиррифийн арлын Барбара Фермойн — Гасьпал²⁶⁴ Гамсдор Карбон хочтой Жан Катури, — Маганы цөллөгийн шоронгийн Люк-Пьер Капгаруп».

Захирагч цааш уншихаа болиод,

— Энэ бичгийг бичиж эхэнд нь нэрээ тавьсан хүний гараар бичсэн нь илэрхий тэмдэглэл байна гэснээ уншсан нь:

— «Суман онгоцны бүрэлдэхүүн болох гурван хүнээс, эзний нь давлагаа залгичихсан учир үлдсэн хоёр нь нэрээ тавилаа: Гальдеазун, Ави Марк, хулгайч.»

Захирагч уншихын хажуугаар, тайлбарласан хэвээр,

— Хуудасны доор: «Далайд, Пасахесийн булангийн бискайн суман онгоц «Матутина» онгоц дээр бичлээ» гэж тэмдэглэсэн байна гэв.

— Энэ бичиг бол, хоёрдугаар Иаковын нэрийн эвхмэл толгойн үсэгтэй илгэн хуудас байгаа юм. Захын зайд нь мөн тэр гараар бичсэн: «Энэхүү өчгийг, хүүхэд худалдахдаа бидэнд цагаатгасан баримт болгож өгсөн эзэн хааны зарлигийн ар тал дээр бичлээ» гэсэн байна.

Захирагч илгэн цаасыг эргүүлэн, баруун гартаа бариад гэрэлд улам ойртуулав. Хэрэв тал нь хөгцөрсөн өөдөсхөн илгийг «цэвэр Хуудас» гэж хэлж болдог л юм бол цөмөөрөө л «цэвэрхэн хуудсыг» харсан ажээ.

Голд нь «jussu regis»²⁶⁵ гэсэн хоёр латин үг, Жефрис гэсэн нэрээс өөр юм байсангүй.

— Jussu regis Жефрис, гэж захирагч уншсан боловч түрүүчийнх шиг нөгөө баяр ёслолын ихэмсэг өнгөгүйгээр хэллээ.

Үлгэрийн ид шидийн шилтгээний дээврийн ваар толгой дээр нь унасан хүн байдаг бол Гуинплен л байлаа.

Тэр нь элий балайдаа дэмийрч байгаа хүн шиг өгүүлрүүн:

— Гернандус гэдэг чинь, тийм ээ доктор гэгцгээдэг байсан юм. Дандаа баргар царайлан явдаг хөгшин. Би айдаг байсан юм. Гаисдор «каптал» гэдэг чинь толгойлогч байгаа юм. Эмэгтэй улс байсан. Асуксион бас өөр нэг хүүхэн. Дараа нь Капгарун гэдэг прованс эр байлаа. Дээр нь улаанаар нэр бичсэн хавтгай дашмагаас уудаг байсан юм гэхэд нь захирагч,

— Тэр чинь энэ байна гээд «үнэн мөний шүүхийн уутнаас» бичээчийн гаргаж ирсэн нэгэн зүйлийг ширээн дээр тавив.

Энэ нь бургасан гөрмөл гэртэй, сэнж бүхий дашмаг байлаа. Цагтаа элдвийг үзэж өнгөрөөсөн нь эргэлзээгүй, усанд ч гомдолгүй

хөвсөн байж таарна. Дун хорхой, замаг хиг наалдан шавжээ. Далайн урлал болох өрөмтсөн битүү хээ угалзаар бүрхэгджээ. Амсар дээгүүр нь наалдсан давирхай нь түүнийг хэзээ нэг цагт битүүмжилснийг гэрчилнэ. Түүнийг задлан онгойлгоод, дараа нь бөглөөний оронд хэрэглэсэн давирхайдсан олсны нь тасархайгаар буцаан бөглөжээ.

— Энэ, дашмагт үхлээ хүлээсэн хүмүүс саяны уншдаг өчиг мэдүүлгийг хийсэн байсан юм. Үнэн мөний шүүхэд зориулсан сайх илгээлтийг зорьсон газарт нь далай шударгаар авчирч өгчээ гэж захирагч хэлэв.

Захирагч дууны өнгө дэх баяр ёслолын байдлаа улам тодруулан үргэлжлүүлэн:

— Хааны ширээнд тавьдаг талхыг хийдэг, нарийн гурилыг гаргаж авдаг дээд зэргийн улаан буудай өгдөг Харроу уул лугаа адилаар, далай Англид чадлынхаа хэрээр ач тусыг үзүүлэн үйлчилж, лорд алга болсон үед, түүнийг олоод зогсоогүй, авчирч өгч байгааг нь хараач гэснээ, — Үнэндээ энэ дорвого дээр чинь улаанаар бичсэн нэр байна, хөөе гэлээ.

Тэгээд дуугаа чангаруулан, хөдөлгөөнгүй хэвээр гулдайн хэвтээ хэрэгтэн рүү эргэн хэлрүүн:

— Өөдгүй новш, нэр чинь энд байна! Нүгэл нь нүдээрээ гэгчээр хүмүүсийн хорон үйлийн далайн ёроолд залгиулсан үнэн, мандалд хөвөн гарч ирдэг жамтай гэв.

Захирагч дашмагийг гартаа аван, эд мөрийн баримт болгон цэвэрлэсэн бололтой талаар нь гэрэлд ойртуулав. Сүлжмэл гэр дээр нь улаан зэгсний тасмаар сүлжин гөрсөн хэсэг харагдах агаад цагийн эрх усны нөлөөнд энэ тэндээ харлажээ. Энэ тэндээ тасархайтсан боловч, Хардкванон гэсэн нэрийн арван үсэг дурайтлаа харагдана.

Захирагч хэрэгтэн рүү дахин эргээд, чухам шүүгч хүнд байхгүй өөр хэнд байх вэ гэмээр хоолойгоор,

— Хардкванон! Таны нэртэй энэ дашмагийг бид, захирагчаас танд анх удаа үзүүлэхэд та сайн дураараа өөрийнх гэдгээ хүлээсэн билээ. Дараа нь дотор нь хуйлж хийсэн илэг дээрх бичгийг уншиж өгөхөд та ямар ч зүйлийг нэмж хэлэхээс, ямар ч асуултад хариулахаас татгалзсан нь, мэдээжээр алга болсон жаал хүүг олохгүй бөгөөд ингэснээрээ та ялаас мултарчихна гэж бодсоных биз ээ. Ингэж зөрүүдэлснээс болоод бид танд «хүндрүүлсэн дарамттай байцаалт» хэрэглэн хань хамсаатныг чинь хэргээ улайн өчгөө гаргасан сайх бичгийг хоёр дахиа уншиж өгсөн. Ингэлээ гээд ямар ч

хэрэг болоогүй. Өнөөдөр, шүүлтийн дөрөв дэх өдөр, нүүрэлдэх өдөр хэмээн хуулиар тогтсон энэ өдөр мянга зургаан зуун ерэн оны нэгдүгээр сарын хорин есөнд Портлендэд хаягдсан тэр хүнтэй нүүр тулам уулзаад таны бүх нүгэлт найдвар чинь оргүй алга болж, дуугай байхаа огоорон ам нээж, түүнийг золиос болгосноо хүлээгээд байна...

Хэрэгтэн нүдээ нээж, толгойгоо өндийлгөөд, амьсгаа хурааж буй хүний хэржигнээний хажуугаар, хаанаас гарсныг бүү мэд хачин тайван өнгөтэй, амьсгаа хурааж буй хүнд баймааргүй чанга дуугаар хэдэн үг хэллээ. Үг хэлэх болгондоо булшны хавтан шиг түүнийг газартай шахсан, дээрээ овоолсон чулууг өргөх гэж зовж байлаа.

— Би нууцыг хадгална гэж ам өгсөн юм. Үнэндээ ч би байдаг чадлаараа, эцсээ хүртэл хадгаллаа. Өөдгүй хүмүүс бол үнэнч хүмүүс байдаг юм. Үнэнч шударга явдал тамд л байдаг. Өнөөдөр дуугай байх нь ямар ч утгагүй болж байна. Тийм байх болтугай. Ийм учраас ч би ярьж байна. Тэгээд, яагаа вэ, тийм ээ. Энэ бол тэр мөн. Хаан бид хоёр, хаан тааллаараа, би урлагаараа үүнийг ийм болгосон юм.

Тэгээд Гуинплен руу харснаа,

— Үүрд ингэж инээж яв даа гэж нэмэн хэлээд, ёрын муухайгаар инээв.

Анхныхаасаа аймаар сайх инээд нь уйлж байна уу даа гэж бодмоор ажээ.

Инээд тасалдан, хэрэгтний толгой дахин гэдрэг ойчсоноо, зовхи нь хамхигдлаа.

Хэрэгтнийг яриулж дөнгөсөн захирагч хажуугаас үг нэмэн,

— Энэ бүгдийг дэлгэрэнгүй бичиж авбал зохино гэснээ Хардкваноны хэлснийг бичээч тэмдэглэж автал хүлээж байгаад өгүүлрүүн,

— Хардкванон оо, нааштай, үр дүнтэй болсон нүүрэлдүүлэгийн дараагаар одоо өөрөө хэргээ ний нуугүй хүлээн улайгаад байгаа, хань хамсаатнуудын чинь өчгийг гурав дахиа уншсаны дараагаар, таны хоёр дахь мэдүүлгийн дараа, хуульд зааснаар, та одоо өндөр дээдсийн тааллаар плажьер²⁶⁶ лугаа адил дүүжлүүлэхийн тул гав гинжнээсээ салах боллоо.

— Плажьер шиг гэж хууль судлагч дуугарснаа, — Өөрөөр хэлбэл хүүхэд худалдаж авдаг, зардаг хүн гэсэн үг.

Визготын хууль, долоодугаар дэвтэр, гуравдугаар бүлэг зүйл Usurpaverit²⁶⁷ Селечийн хууль дөчин нэгдүгээр дэвтэр, хоёрдугаар зүйл, фризүүдийн хууль, хорин нэгдүгээр зүйл «De plagio²⁶⁸»

Александр Меква бас «Que pueros vendis, plagiarius est tibi nomen²⁶⁹» гэж хэлсэн нь бий гэв.

Захирагч дашмагийг ширээн дээр тавиад, нүдний шилээ авч, цэцгийн баглаагаа дахин шүүрч аваад,

— Хүндрүүлсэн дарамттай хатуу шүүлт зогссон Хардкванон, эзэн дээдэст баярла даа гэв.

Шүүхийн гүйцэтгэгч, савхин хувцастай хүнд дохио өгөв.

Зандалчны дагалдан «дүүжлүүрийн хиа» гэж хуучин баримт бичигт нэрлэгдсэн сайх хүн, тамлуулагч руу хүрч очоод гэдэс дээр нь тавьсан чулуунуудыг нэг нэгээр нь авч, хөөрхий амьтны хавиргыг хавтайтал нь дарсан ширмэн хавтанг хажуу тийш нь авч тавиад, бугуй шилбэнээс нь дөрвөн баганад алдлан тэлсэн гав, гинжийг салгав.

Элдэв дарамт, гав гинжнээс салсан хэрэгтэн, гар хөлөө алдалсан хэвээр, дөнгөж загалмайнаас буулгаад байгаа цовдлуулсан хүн шиг, нүд нь аниастай газарт наалдан хэвтэнэ.

— Босоорой, Хардкванон! гэж захирагч тушаав.

Гэмт хэрэгтэн хөдөлсөнгүй.

«Дүүжлүүрийн хиа» гарыг нь барин өргөөд тавихад, амьгүй юм шиг сульхийв. Нөгөө гарыг нь мөн өргөөд тавихад бас л сульхийлээ. Зандалчны дагалдан хөлийг нь нэг нэгээр нь өргөөд тавихад мөн л өсгийгөөрөө түс хийтэл шал цохин уналаа. Гар хөлийн хуруунууд нь хөшчихсөн юм шиг хөдлөхгүй чилдийнэ. Гэдрэг харан гулдайх тэр хүний нүцгэн тавхай нь нэг л эвгүй дээш хөшин ёрдойжээ.

Оточ хүрч ирээд халааснаасаа жижигхэн ган толь гаргаж Хардкваноны ангайсан аманд барьж үзсэнээ, хуруугаараа аньсагыг нь сөхлөө. Сөхөгдсөн зовхи нь аньсангүй. Гөлийсөн хүүхэн хараа нь ч хөдөлсөнгүй.

Эмч өндийн боссоноо,

— Энэ амьсгаа хураажээ гэснээ, — Инээсэн нь энэ хүнийг цааш нь харуулчхаж гэж нэмж хэлэв.

— Хамаатай юу. Нэгэнт л хэргээ хүлээж улайснаас хойш, үхнэ үү байна уу гэдэг нь ёс төдий хэрэг гэж захирагч хэллээ.

Тэгээд цэцэгтэй гараараа Хардкваноныг заан, бэрээ баригчид зарлиг буулган,

— Хүүрийг өнөө шөнө эндээс зайлуул гэхэд бэрээ баригч хүндэтгэлтэйгээр толгой дохив.

— Өөдөөс харсан гяндангийн оршуулгын газарт гэж захирагч нэмж хэллээ.

Бэрээ баригч ч дахин толгой дохив.

Бичээч үг бүрийг алдалгүй тэмдэглэж байв.

Захирагч цэцгийн баглаагаа зүүн гартаа бариад, баруунаараа цагаан бэрээгээ авч, түшлэгтэй сандалд суусан хэвээр байгаа Гуинплений өмнө очин, байдгаараа бөхийн ёсолсноо түүнээс ч дутуугүй намбатайгаар толгойгоо гэдийлгэн Гуинплений яг өмнөөс ширтэн өгүүлрүүн:

— «Энд биеэрээ залран буй танд, бид Серрейн гүнлэгийн захирагч тайж Филипп Дензид Паронс, түшмэл Обри Доминик, манай албан хаагч бичээч болон бидний жирийн туслагч нар, их эзэнтнээс авсан шууд тусгай тушаалаар бидэнд ногдуулсан эрх үүргийн дагуу мөн Английн тэргүүн түшмэл лордын зөвшөөрлөөр далайн хэрэг эрхлэх газраас мэдэгдсэн мөрдөн байцаалт, тэмдэглэл, тодорхойлолтын үндсэн дээр, бичиг баримтыг шалган, гарын үсгийг дүйлгэсний дараа, мэдүүлгийг уншиж сонсгон, хуулийн ёс журмын шаардлагын дагуу мөрдөн байцаалт, нүүрэлдүүлсний хүчинд хэргийг үнэн зөвөөр, сайн сайхнаар нэг мөр болговой. Бид таныг эрхийнхээ дагуу эзэмшвэл зохих юмандаа эзэн суух ёстой, та бол Кленчарли-Генкервиль түшээ гүн, Сицилийн Корлеоны бэйс, Английн тайж Фермен Кленчарли гэдгийг гэрчлэн мэдэгдэж байна. Эрхэм дээдэстэн таныг бурхан тэнгэр хайрлан хамгаалах болтугай.

Үгээ дуусгаад дахин мэхийн ёслов.

Хууль судлагч, оточ, шүүхийн гүйцэтгэгч, бэрээ баригч, бичээч, бусад туслагч нар зандалчнаас бусад нь цөм захирагчийн жишээгээр Гуинпенд мэхийн ёслохдоо улам ч хүндэтгэлтэйгээр бараг л газар шүргэн алдаж бөхийж байлаа.

— Энэ чинь юу вэ хөөш. Аль вэ намайг сэрээгээд өгөөч! гэж Гуинпенд хашхирах шахам дуу тавиад, хувхай цайсан амьтан сандлаас босон харайлаа.

— Би таныг сэрээхээр ирээд байна гэж урьд нь дуулдаагүй дуу гарлаа.

Чулуун баганын нэгнийх нь цаанаас нэг хүн гарч ирэв. Төмөр хавтан дээш өргөгдөж цагдаагийн цуваар оруулснаас хойш, нүхэн зооринд нэг ч хүн орж ирээгүйг бодоход энэ хүн Гуинплений орж ирэхээс өмнө энд нэвтрэн ороод, харанхуйд нуугдан бүх болж байгаа явдлыг ажиглах үүрэг хүлээсэн хүн болох нь илэрхий. Ордныхны хэрэглэдэг хиймэл үстэй, аяны цув өмссөн залуу гэхээсээ хөгшин гэмээр лухгар тарган сайх эр зэгсэн буурьтай нэгэн ажгуу. Тэр нь Гуинпенд, шүүхийнхний болхи хөдөлж ядсан байдлаар бус шадар хүмүүсийн нүүрэмгий гоёмсог байдлаар мэхийн ёслов.

— Тийм ээ, би таныг сэрээхээр ирлээ. Хорин таван жилийн турш та унтаагаараа байна. Одоо л нэг зүүд нойрноосоо сэрэх цаг болжээ. Та Кланчарли байснаа, өөрийгөө Гуинплен гэж бодож байна. Та ихэс дээдсийн хүрээлэнгийн хүн байтлаа, харц борчуулын нэг гэж бодож байна. Та эхний эгнээний хүн байтлаа, сүүлчийн эгнээнийх хэмээн бодож байх юм. Чухамдаа хаанаас дутахгүй баян байж, хоосон гуйлгачинд өөрийгөө тооцож байна. Та хууль тогтоох дээд танхимын гишүүн байж, марзганагч жүжигчин гэж итгэж явах юм даа. Та өөрийгөө шалихгүй амьтан гэж бодож байдаг, гэтэл та хүчтэй томчуулын нэг шүү дээ. Милорд минь, нойрноосоо сэрж үз!

Цаанаа л нэг айсан өнгөтэй доожоогүй дуугаар Гуинплен,

— Энэ бүгд юү гэсэн үг болж байна даа? гэж асуув.

— Энэ бол милорд минь, гэж тарган эр хариу дуугараад, — Намайг Баркильфедро гэдэг бөгөөд далайн хэрэг эрхлэх газрын түшмэл биеэрээ буйг, далайн долгионоор шидэгдсэн Хардкваноны дашмаг далайн эргээс олдож, түүнийг надад авчирч өглөө гэсэн үг. Учир нь иймэрхүү сав суулгыг онгойлгон задлах нь миний үүрэгт хамаарагддаг юм л даа. Жетсон тасгийн хоёр тангарагтан болох улсын хурлын төлөөлөгч, Баст хотын төлөөлөгч Вильям Бленуайт, Саутгелптон хотын төлөөлөгч Томас Жервансыг байлцуулан бөглөөг нь авсан юм. Тэр хоёр, дашмагт байгааг данслан, гэрчилж, надтай хамтран дэлгэрэнгүй тогтоол гарган нэрээ тавьцгаасан юм. Би эрхэмсэг дээдэст энэ тухай уламжлав. Их эзэгтэйн тааллаар, хуулийн шаардлагатай бүхий л ёс журмыг, иймэрхүү эгзэгтэй хэрэгт зайлшгүй байдаг ёсоор нууцыг сахин гүйцэтгэсээр, энэхүү журмын төгсгөл болох, нүүрэлдүүлэх ажиллагаа дөнгөж саяхан боллоо. Энэ бол танд жилдээ саяын орлого ирэх агаад, та бол Их Британийн нэгдсэн Хаант улсын лорд, хууль журам тогтоогч, шүүгч, үен дотортой гүн улаан хувцас өмсөх дээд журамлагч, ерөнхий шүүгч, хунтайж, жононтой мөр зэрэгцэн, эзэн хаантай үе шахуу боллоо гэсэн үг. Тэргүүнд тань тайжийн титэм гялалзан, хааны охин гүнжинтэй гэрлэх болж байна гэсэн үг гэв.

Аянгад ниргүүлэх лугаа адилаар сайх хувиралтад цохиулсан Гуинплений ухаан балартлаа.

II. Хөвж яваа юм эрэгт тулдаг

Энэ бүх адал явдал, нэгэн цэрэг далайн эргээс дорвого олсноос л үүдэн гарчээ.

Юу болсныг өгүүлье.

Явдал учрал болгон бусад үйл явдлын гинжинд цагариг болдог билээ.

Кашорын цайзын хамгаалах цэрэг хэмээгдэгч дөрвөн үхэр буучийн нэг, далайн татралын үеэр давлагаа эрэг дээр гаргаж хаясан, бургасан гэртэй дашмагийг элсэн дээрээс олжээ. Хөгц буриар бүрхэгдсэн сайх савыг давирхайдсан олсоор бөглөсөн байжээ. Цэрэг цайзад байгаа хурандаадаа олдвороо авчирч өгвөл Английн адмирал хэмээгч далайн цэргийн жанжинд явуулжээ. Адмирал гэдэг нь далайн цэргийн хэрэг эрхлэх газар гэсэн үг. Тэнд нь далайн эрэг дээр гаргаж хаясан зүйлийг Баркильфедро эрхэлнэ. Баркильфедро түүнийг онгойлгон задалж үзээд, хатан хаанд айлтгажээ. Хатан хаан ч тэр дороо хэрэг явдалд оролцов. Энэ тухай хатан хаан дотнын хоёр зөвлөгч хуулиар «английн хааны сэтгэлийн дэмч» хэмээгдэгч тэргүүн түшмэл лорд болон «үе удмын болон сүлд тэмдгийн шүүлэнгэ» лорд-маршалд мэдэгдэж зөвлөгөө авчээ. Норфолкын ван, католик тайж, Английн үе залгамжилсан, тэргүүн маршал Тамас Ховард, өөрийн туслах Биндоны гүн, Английн маршал Генри-Ховардаар дамжуулан, тэргүүн түшмэл лордтой адил саналтай байх болно гэдгээ хэлүүлжээ. Тэр үед Вильям Коупр тэргүүн түшмэл-лорд байсан юм. Түүнийг нэгэн үед амьдарч асан, амьдайтай нь хольж хутгаж огтхон ч болохгүй. Бие бүтцийн зүйлч, Бидлоо²⁷⁰-гийн тайлбарлагч, Францад Этын Абейл «Ясны түүхээ» хэвлүүлж гаргасантай зэрэг шахуу, Англид «Булчингийн тухай шинжилгээний зохиолоо» гаргасан Вильям Коупер оточ хүн байсан юм. Мэс засалч, лорд хоёрын хооронд ялгаа байлгүй яах вэ. Вильям Коупер авгай, Лонгвилийн бэйл Тальбот Иельвертоны хэргийн тухай «Английн үндсэн хуулийн хувьд тайжийн эрхийг дахин сэргээх нь, хааныг дахин ширээнд нь суулгахаас илүү ач холбогдолтой юм» гэж хэлснээрээ алдрыг олсон хүн, Кастороос олсон дашмаг тэргүүн түшмэл лордын анхаарлыг ихээр татсан байна. Ямар нэг зарчмын эргэцүүлсэн бодлыг хэлсэн хэнбугай ч байлаа, түүнийгээ ажил хэрэг болгох тохиолдол гарахад баярладаг нь жам. Тэгтэл ч тайжийн эрхийг сэргээх тохиолдол гараад ирэх нь энэ. Гуинплен гэдэг нэрээр амьдарч байгаа хүнийг эрж эхэллээ.

Түүний нэр гудамж дахь хаягаас ялгаагүй учир амархан бүтжээ. Хардкванон ч бас зовлонгүй олдов. Тэр амь тасраагүй л байжээ. Гяндан хүнийг үжрүүлж чадна, гэхдээ үүний хажуугаар хадгалж байдаг. Харуул хамгаалалттай байлгана гэдэг чинь хадгалж байна гэсэн үг биз дээ. Цайзад хоригдогсдыг үймүүлж, зовооно гэж байхгүй. Үхсэн хүний авсыг сольдоггүй лугаа адил хар гэрийг сольж байсангүй. Хардкванон Четэмийн цамхагтаа суусан хэвээр л байв. Түүнийг тэндээс нь гаргах л үлджээ. Түүнийг Четэмээс Лондонд авчрав. Мөн энэ үеэр Швейцараас лавлаж сураглажээ. Бүх баримт мэдээ яг таг батлагдав. Лозаны болон Вевейн тамгын газруудад, Линней лордын цөллөгт байх үедээ гэрлэсэн тухай гэрчилгээ, хүүхэд төрсөн тухай болон эцэг, эхийн нас барсан тухай бүртгэл олдсон агаад «юмыг яаж мэдэх вэ» хэмээн баримт бүрээс хоёр хувийг хувилан авчээ. Энэ бүхнийг нууцыг чандлан сахиж, тэр үеийн хэлдгээр «хааны өдтэй бичиг» шиг л хоромхон зуур, Баконы гарган хэрэглэж байгаад дараа нь Блекстоноос хууль болгон оруулж, улсын болон дээд зургааны түүнчлэн «хууль тогтоох хурлын» гэгддэг байсан зарим асуудлыг авч хэлэлцэхэд мөрдөж байсан «дуугай дүнбийх» гэдгийг хатуу сахин байж гүйцэтгэжээ.

«Jussa regis» болон «Жефрис» гэдэг нэр жинхэнэ болох нь ч батлагдав. «Их эзэнтний тааллаар» хэмээх, хаадын адайр цамаан эмгэг занг судалсан хүнд бол «Jussa regis» гайхалтай санагдахгүй. Яагаад ийм үйлдлийг нуух ёстой баймаар хоёрдугаар Иаков, ажил явдлын амжилтыг баллаад хаячхаж ч магадгүйгээр аз туршин, баримтад бичин үлдээв ээ? Ичгүүрээ алдсан увайгүй явдал. Юуг ч тоохгүй ихэрхсэн хэрэг. Өө, та чинь өөдгүй эмс л ичгүүрээ алдсан байдаг гэж боддог байх нь ээ? Улсын бодлого гэдэг маань ч бас ялгаагүй. Et se cupit ante videri²⁷¹ Бузар хэрэг хийчхээд түүгээрээ сайрхан бардамнана гэдэгт хамаг түүх маань байгаа юм шүү дээ. Цөллөгийн ялтан лугаа адил хаан ч биеэ шивж хээлдэг. Харгис цагдаа ч юм уу, түүхийн шүүхээс зугтаах ёстой байлгүй яах вэ, тэгээд бас хажуугаар нь үүндээ дургүйцэх нь ч бий. Чамайг мэддэг, дурсдаг байхыг хүсэх нь зөв шүү дээ. Миний гар луу хараач, тэгээд энэ амраглалын сүм, суманд нэвт цохиулан асаж байгаа зүрхийг анхаар л даа.

Энэ бол би Ласнер²⁷² байгаа нь энэ. Jussa regis гэдэг бол хоёрдугаар Иаков, намайг хэлнэ. Хорт үйл үйлдчихээд дээр нь тамгаа дарчихна.

Увайгүйгээр загнан, өөрийгөө илчлэн, гэмт явдлаа хүнд үзүүлэхээр гаргаж тавина гэдэгт л өөдгүй амьтны ичгүүрээ алдсан

сайрхуу хөөрүү зан нь байгаа юм даа. Христина²⁷³, Мональдеонийг бариулаад өчгийг нь албадан гаргуулсныхаа дараа цаазалчхаад «Би бол францын их эзэнтний зочлолыг хүлээж байгаа Шведийн хатан хаан» гэсэн байдаг. Эзэрхэг эзэд болгон адилгүй. Нэг нь Тибери²⁷⁴ шиг нуугдаж байхад, нөгөө нь хоёрдугаар Филипп²⁷⁵ шиг бардамнан сайрхаж явна. Нэг нь дигваранзтай адилхан байхад, нөгөө нь ирвэст дөхөж очно. Хоёрдугаар Иаков сүүлчийн хэсэгт багтах хүн. Тэр нь хоёрдугаар Филиппээс шал ондоо, илэн далангүй, хөгжилтэй хүн байсныг хэн хүнгүй мэднэ. Хоёрдугаар Филипп бол баргар царайлсан, хоёрдугаар Иаков нь хөхүүн цовоо хаан байв. Гэхдээ энэ нь түүний харгис догшин байхад нь саад болоогүй юм. Хоёрдугаар Иаков сайхан зантай барс байсан ч гэлээ, Филипптэй адилхнаар гэмт булай үйлийг тайвай амжуулчихдаг нэгэн байлаа. Бурхны энэрлээр мангас болсон хүн байв. Тиймээс ч түүнд нууж хаан, булж далдлах юм юу ч байсангүй. Тэнгэрийн хүсэл зориг гэдгээр амь бусниулснаа зөвтгөдөг байлаа. Тэр өөрийнхөө дараа, Симанкасын хуучин данс бичгийн газар²⁷⁶ лугаа адил, бүх булай хэргээ тоочин, дугаарласан, өдөр сарыг нь тавьж ангилсан, эмийн санчийн ажлын өрөөнд байдаг хор шиг тус тусын дашингатай өөр өөрийн шошготой илгэн цааснуудыг эмхтэйгээр хадгалсан газрыг үлдээхээс ч сийхгүй хүн байв. Хийсэн булай хэргийнхээ дор мутраа тавина гэдэг бол ёстой л хаан хүнд баймаар зүйл.

Хийсэн хэрэг болгон, үл мэдэгдэх агуу их мэдүүлэгчид олгож буй өр төлөх баталгаа юм. *Jussa regis* гэсэн зэвүүн дамжуулах бичээстэй өр төлөх баталгаагаар тооцоогоо дуусгах цаг нь ирнэ.

Нууцыг сайтар хадгалж чаддагаараа бусад ихэнх эмсээс ялгаатай хатан хаан Анна, сайх чухал нууцлаг хэргийн талаар «хааны чихэнд шивнэх» гэж нэрлэдэг илтгэл гаргахыг тэргүүн түшмэл лордод даалгажээ. Иймэрхүү маягийн илтгэл хаант засагт улс бүрд заншил болсон эд байлаа. Венад бүр ордны зөвлөх цолтой тусгай «шивгэнэдэг зөвлөгч» гэж байлаа шүү дээ.

Каролингийн үеэс бий болсон энэ хүндтэй тушаал нь эртний палатиний албан баримтын *auricularus*²⁷⁷ эзэн хаанд шадарлах, чихэнд нь шивнэх эрхтэй хүнтэй дүйнэ.

Английн тэргүүн сайд Вильям Коупер их эзэгтэйтэй адилхан харалган түүнээс ч илүү байж мэдэх хараа муутайдаа итгэлийг нь авсан хүн гэдгээ далимдуулан илтгэлээ дараах зүйлээр эхэлсэн нь: «Соломоны тушаал биелүүлдэг хоёр шувуу байсны нэг нь бүх хэлээр ярьдаг өвөөлж «хубдуд» нөгөө нь жигүүрээрээ хорин мянган хүнтэй жинг сүүдэрлэдэг бүргэд «силүганка» байжээ. Арай өөр

байдалтай ч гэлээ энэ лугаа адилаар...» гэх мэтээр бичжээ. Тэргүүн түшмэл-лорд үе залгамжилсан тайж хулгайлагдан, зэрэмдэглэгдээд дараа нь олдсон баримт гэрчийг зөвшөөрчээ. Муу ч сайн ч, их эзэгтэйд эцэг болох хоёрдугаар Иаковыг буруушаасангүй. Тэр бүү хэл зөвтгөх тийшээ ханджээ. Нэгдүгээрт хэзээ язаанаасаа хэнд ч илэрхий эзэн хаадын зарчим ч гэж байдаг.

*E seniorutu eripimus. In roturagio cadat*²⁷⁸

Хоёрдугаарт, өөрийн харьяатыг зэрэмдэглэх зэргийн эрх эзэн хаанд байлгүй яах вэ. Чембрлен үүнийг хүлээсэн юм. «*Corpora et bona nostrum subsectorum nostra sunt*»²⁷⁹ гэж алдарт сургамжтай дуртгалдаа нэгдүгээр Иаков хэлсэн нь байдаг. «Төрийн тусын тул» хааны цусан төрөл ван гүнгүүдийн нүдийг сох хатгаж л байсан. Хаан суудалд дэндүү ойрхон хунтайж жононг титэмд ашигтай цагтаа, хоёр гудасны хооронд битүүлж алчхаад, болоо ч үгүй саа дайрсан гэдэг л байлаа. Тэгэхэд зэрэмдэглэх гэдэг бол боомилохын дэргэд юу ч биш. Тунисын хаан, эцэг Муллей Асселийнхээ нүдийг ухаад хаячихсан байхад тэглээ гээд элчийг нь эзэн хүлээж авахгүй гээгүй л юм даг. Ингэхээр, хаан харьяатынхаа өмч өвлөх болон бас бус эрхийг хасдаг шиг, аль нэг эрхтнийг нь тайрч, мулталж хая гэж зарлигдаж болно. Гэвч нэгэн бошгийг үзүүлсэн үйлдэл нь нөгөөгөө устгадаггүй юм. «Хааны зарлигаар усанд живүүлсэн хүн, живэлгүй мандал дээр нь амьд гараад ирлээ гэхэд энэ нь бурхан тэнгэр хааны шийтгэлийг хөнгөвчилж байгаа хэрэг. Үе залгамжлах тайж олджээ гэхэд түүнд тайж титмийг нь эгүүлэн өгөх хэрэгтэй. Бас л марзганагч жүжигчин асан Нортумбрын хаан, Алда лордыг ингэсэн шүү дээ. Тэгэхээр, мөн л хаан агч, өөрөөр хэлбэл лорд Гуинпленийг ингэх л хэрэгтэй. Аргагүй нөхцөл байдлын эрхээр хийж явсан доогуур ажил үйл нь сүлдийг огтхон ч гутаахгүй. Гэрч гэвэл, хаан болсон Абдолоним цагтаа цэцэрлэгч байсан, эсвэл мужаан байсан хутагт Иосиф байна, эцэст нь малчин байсан Апполлон бурхан байна шүү дээ. Товчоор хэлэхэд эрдэмтэн тэргүүн түшмэл хуурамчаар нэрлэгдэж явсан Кленчарли лорд Фермений эрхийг сэргээн бүхий л өв хөрөнгө, цол хэргэмийг нь олгох нь зайлшгүй бөгөөд гэхдээ «хулгай этгээд Хардкванонтой нүүрэлдүүлэн, тэрхүү Хардквон гэгч түүнийг таньсан байх ганц болзолтойгоор» гэдэг дүгнэлтэд хүрчээ. Ийм дүгнэлтээр, хааны сэтгэлийн дэмч, тэргүүн түшмэл авгай сайх сэтгэлийг тайвшруулчих нь тэр.

Тэргүүн түшмэл-лорд илтгэлдээ, хэрэв зээ Хардкванон зөрүүдлэн өчгөө өгөхгүй аваас, түүнийг «хүндрүүлсэн дарамттай байцаалтад» оруулж. Адельстан хааны хуульд заасан «үхлийн хүйт»

ирэх цагт буюу дөрөв дэх өдөр л нүүрэлдүүлбэл зохино гэдгийг жичид нь дурджээ. Энд бас зохимжгүй нэг юм байсан нь мэдээж. Чухамдаа гэвэл тамлуулагч хоёр дахь эсвэл гурав дахь өдрөө амьсгаа хурааж болох ажээ. Гэлээ ч хуульд захирагдахаас өөр аргагүй. Ямар ч хуулийг хэрэглэх ахуйд элдэв бэрхшээл гардаг талтай.

Гэлээ ч Хардкванон Гуинпленийг таньж л таарна гэдэгт тэргүүн түшмэл огт эргэлзсэнгүй.

Гуинплений зэрэмдэглэгдсэнийг гомдолгүй дуулж мэдсэн хатан хаан Анна, Кленчарлийн бүхий л эзэмшлийг эзэгнэн буй дүүгээ гомдоохгүй гэсэндээ, Жозиана гүнжинг шинэ лорд буюу Гуинплентэй суулгахыг уухайн тас зөвшөөрөн шийджээ.

Ферман Кленчарлийн лорд эрхийг сэргээх нь, нэгэнт хууль ёсны, яах ч аргагүй үе залгамжлагч гарч ирсэн учир гарын алга урвуулахын адил амархан хэрэг байлаа. Удам судрыг нь яг таг тогтооход бэрхтэй ч юм уу эсвэл in abeyance-аар тайж болгох үед, хамаатан садны зүгээс маргаан гаргах сэжигтэй тохиолдолд асуудлыг лордын танхимаар хэлэлцүүлэхийг хууль шаардана. Бүр холынхыг байя гэхэд л 1782 онд Елизавета Перрид, Сиднейн гүнлэгийг эзэмших эрх, 1798 онд Бюмонтын гүнлэгийг эзэмших эрхийг Томал Степльтойд, 1803 онд хүндэт Таймвел Брайж гуайд Чандос гүнлэгийг эзэмшүүлэх эрхийг, 1813 онд дэслэгч генерал Ноллисад тайж хэргэм олгон, Бембери гүнлэгийг найр тавих зэрэгт хуралдаж байлаа. Энэ удаа адилтгах юм даан ч байсангүй. Хаанаас нь ч харсан хууль ёсны, хэнд ч ойлгомжтой эрх. Танхимыг чуулах ч хэрэг гарсангүй, тэргүүн түшмэлийг байхад их эзэгтэй болгоон, шинэ лордыг таалалдаа авлаа гэж айлтгахад л бүх юм шувтрах нь тэр.

Баркильфедро л хамаг юмыг амжуулж байв.

Түүний ачаар, бүх зүйлийг хянуур болгоомжтой хөтлөн, нууцыг хий оруулалгүйгээр хадгалж чадна. Жозиана, Дэвид лорд хоёрын хэн хэн нь доогуур нь мэдэгдэлгүй малтан хөндийлж буйг зүүдэлсэн ч үгүй. Бүхнээс хямсгалан цэрвэдэг их зантай Жозианаас тойрсхийгээд байх шиг амархан юм алга байв. Дэвид лордын хувьд түүнийг фландрын эрэг рүү далайн аянд явуулжээ. Лорд хэргэмээ алдах гэж байгаагаа өчүүхэн ч сэжиглэсэнгүй. Энд бас нэг нарийн учир байгааг хэлсүгэй. Лорд Дэвидын командалж байсан онгоцнуудын зогсож байсан газраас арван бээрийн газар ахмад Хембертон францын хөлөг онгоцнуудыг бут ниргэжээ. Зөвлөлийн ерөнхийлөгч Темброн гүн, Хембертон ахмадад хошууч адмирал цол

олгохыг их эзэгтэйгээс хүсжээ. Анна хатан, Дэвид лордыг тайжийнхаа хэргэмээс саллаа гэдгээ дуулах үедээ, ядахдаа далайн цэргийн жанжин болох найдвараар сэтгэлээ хуураг гэсэндээ жагсаалтаас Хембертоны нэрийг дараад, оронд нь Дэвид-Дерри-Моир лордын нэрийг тавьжээ.

Анна халиу булга шиг сайхан ааштай байв. Дүүдээ үзэшгүй муухай нөхөр Дэвид лордод сайхан цол. Хорон санааны хажуугаар, өглөгч соёрхол.

Их эзэгтэй өөрийн бодож олсон хошин жүжигтээ баясан цэнгэхээр болжээ. Түүнээс гадна өндөр төрөлт эцгийнхээ гаргасан хуудуутай явдлыг засаж залруулан, тайж нарын хүрээлэнд нэг гишүүнийг нь олон нийлүүлж, их эзэгтэйд л байдаг ёсоор хөдлөн, бурхан тэнгэрийн тааллаар гэм зэмгүй амьтныг өмгөөлж, буянтай өглөгч зам үйлд нь бурхны бошгийг үзүүлж байна... гэхчлэн өөрийгөө итгүүлж байлаа. Үнэнч шударгуугаар хөдөлж байгаа мөртөө, өөрийн дургүй хүний сэтгэлийг өвтгөхөөс илүү аятайхан юм гэж хаана байх билээ.

Гоо үзэсгэлэнтэй дүү нь зэрэмдэг нөхөртэй болохыг мэдэж байна гэдэг ганц зүйл хатан хаанд хангалттай. Гуинплений зэрэмдэг нь юундаа байгаа юм, ямаршуухан муухай амьтан бэ гэдгийг Баркильфедро их эзэгтэйд дамжуулах нь илүүц юм гэж үзжээ. Хатан хаан ч энэ тухай шалгааж илүү зан гаргасангүй. Ёстой л эзэн дээдэст баймаар хайхрамжгүй зан энэ буюу. Үнэндээ ч хамаагүй юм биш үү дээ? Лордуудын танхим баярлаж гялайхаас өөр үггүй. Тэргүүн түшмэл лорд, бошгийг үзүүлэгч өөрөө тэгж хэлснээс хойш гүйцээ. Тайжийг тодруулна гэдэг энэ тохиолдолд хаан төр бол, тайжийн эрх ямбыг үнэнч найдвартайгаар өмгөөлөгч нь болж байгаа юм. Шинэ тайжийн нүүр ам ямар ч байдаг байлаа гэсэн, үе залгамжлах дархан эрхээ эдлэхэд нь өчүүхэн ч саад болж чадахгүй. Өөрийн сэтгэлэгт гүйцэд сэтгэл ханасан Анна хатан, өөрийн санаагаар бүхнийг хийнэ гэдэгт хэргийн учир нь байдаг агуу их, хатан хаан хүнд л байдаг зорилго юугаан гүйцэтгэхээр шуудран орвой.

Хатан хаан тэр үед Виндзорт залран байсан учир ордны нууцгай явууллага олны дунд хараахан тархаж чадсангүй.

Болж өнгөрсөн хэрэг явдлын нууцыг хэлэлгүй өнгөрч болохгүй хэдхэн тооны хүн мэдэж байлаа.

Баркильфедрогийн нар нь гарч, нүүр царай нь улам ч муут ёрлосон зэвүүн болжээ. Заримдаа баярлана гэдэг хамгийн он гутам, өөдгүй юм болж хувирах нь ч бий.

Хардкваноны дашмагийг нээх хувь хамгийн түрүүн түүнд ногджээ. Ингэлээ гээд тэгтлээ гайхсанаа гаргаж үзүүлсэнгүй, учир нь гайхна гэдэг юм үзээгүй, хомс ухаантан хүнд л байдаг зан. Гэхдээ үнэндээ энэ нь түүнд таарсан шан байсныг хэлэх юун. Азтай тохиол ирэхийг хэчнээн ч удаан хүлээв дээ. Даанч дээ, юманд чинь бас хариу гэж байдаг биз дээ.

Сайх nil miragi²⁸⁰ түүний зан авирын онцлог байлаа. Угтаа бол цочирдон хачирхалгүй яах вэ. Бурхны өмнө хүртэл сэтгэл доторхоо нуун далдалдаг тэрхүү хуурамч багийг нь хуу татчих хүн гардаг юм аа гэхэд цаанаас нь ийм юм харагдахаар байлаа: яг энэхэн үес Баркильфедро, хэдий дэргэд нь өчүүхэн боловч бас ч гэж сүр жавхлант Жозиана гүнжингийн ойр байдаг мөртөө түүнд ямар нэг муу юм хийж чадахгүй нь гэдэгтээ итгэж эхлээд байжээ. Үүнээсээ болоод байж суух газраа олохгүйгээр далдуур үзэн ядах нь туйлдаа хүрчээ. Тэгээд бүр цөхрөнгөө барж, зориг нь мохох тийшээ хандаж ирэв. Итгэл найдвар нь алдагдах тусам улам ч ганиран байлаа. «Амгайвчаа мэрэх» гэсэн энэ үг, юу ч хийж чадахгүйдээ шээс алдчих гээд байгаа хорон санаат хүнийг яасан онож хэлсэн үг вэ. Баркильфедро Жозианад муу юм хийх хүслээсээ биш юм аа гэхэд өшөө авах төлөвлөгөөнөөсөө, түүнд учир тоймгүй дайсагнадгаас биш юм аа гэхэд хазаад авах юмсан гэдгээсээ няцахад бэлэн болчихоод байх шиг байлаа. Гэвч аманд орсныг хэлээрээ түлхэнэ гэдэг түүнд ямаршуухан гутамшиг байх билээ! Үзмэрийн чинжаал хутга шиг хамаг хор шараа хуйндаа нуух болно оо гэдэг, ёстой шалдаа бууж, басуулж байгаа хэрэг.

Тэгтэл чинь, сайн хүн санаагаараа гэгчээр, яг энэ үед Хардкваноны дашмаг, далайн давалгаан дундуур үсчин хөвсөөр Баркильфедрогийн гарт ороод ирдэг байгаа даа. Орчлонгийн эх захгүй үзэгдэл юмс учир байдал давхцан тохиоход дуртай байдаг нь л энэ. Нууц битүүлэгт, муу хорлолын хүсэл зарлигийг биелүүлж байдаг нүдэнд үзэгдэж, гарт баригдахгүй хүч байдаг. Баркильфедро, хайхрамжгүй гэрч далайн цэргийн хэрэг эрхлэх газрын хоёр түшмэлийн нүүрэн дээр дашмагийг нээн, илгэн цаасыг дотроос нь гаргаж, дэлгээд уншиж гарах нь тэр... Хорон муухайгаар баярлан хөөрч гуяа алгадсаныг нь хэлэх юун.

Далай ус салхи шуурга, тэнгисийн түлхлэг татлага, нам гүм цөм л нэгэн хорон санаатай хүнийг аз жаргалтай болгохын тул байдаг хүчээ гарган бэрхийг давжээ гэж бодохоос ч аймшигтай. Гэхдээ л ийм хуйвалдаан арван таван жилийн турш болсоор байсныг үгүйсгэхийн аргагүй. Мэдэхийн эцэсгүй нууц битүүлэг явдал!

Далай, арван таван жил ганц ч хором амгайталгүй үүнийг хийж байж. Мандал дээрээ хөвөн агч дашмагийг давлагаа нэг нэгэндээ шилжүүлж усан доорх хад, түүнийг мөргөн хагалчихгүй байлгахын тулд болох бүхнийг хийж, шил нь ганц ч ан цав гараагүй лонх бүтэн хэвээрээ үлдэж, далайн замаг хиг бургасан гэрийг нь идэлгүй, дун лавай «Хардкванон» гэсэн нэрийг арилгалгүй үлдээж, ус ч дотор нь орсонгүй, илгэн цаас нь хөгцөд идэгдэж, чийг бичээсийг нь алга болгосон юм байхгүй, далай түүнийг бүтэн байлгах гэж ямар их хүч тавьсныг хар л даа! Ингээд эцсийн дүнд Гернандусын харанхуй руу шидсэн юмыг харанхуй Баркильфедрод эгүүлэн барьжээ. Бурханд зориулсан илгээмж чөтгөрийн гарт орох нь энэ. Зах хязгааргүй гэгч хүний итгэлийг ёсон бусаар эдэлжээ. Үнэн мөний ялалт болох хаягдмал хүү Гуинпленийг, лорд Кленчарли болгосон хачин тохиол, хар хорын ялалттай давхцан нарийн төвөгтэй болж, хувь заяа буянт үйлийг хийхдээ өөдгүй аргыг хэрэглэн, үнэн мөний шүүхийг өөдгүй амьтдад ашиглуулахаар болгочихжээ. Хоёрдугаар Иаковоос золиосыг нь угз татан авсан мөртөө, Баркильфедрогийн гарт олз болгон бариулжээ. Гуинпленийг өргөх гэхдээ Жозианыг доош даржээ. Баркильфедро амжилт олж байлаа. Ингүүлэх гэж л, ийм олон жил долгион, давлагаа, догширсон усан далай, хуй салхи дотор нь олон олон хүний хувь тавилан ээдрээтэйгээр хутгалдсан шилэн дашмагийг сэгсчин бөндчүүлж, хямгадан хамгаалж байсан хэрэг! Үүний тулд л салхи, ус, догшин шуурга, найрсаг ая дуугаар эвсэж байсан хэрэг! Ямагт давлагаалагч хязгааргүй уудам далай энэхүү гайхамшгийг, өөдгүй амьтанд зориулан бүтээжээ! Эцэс төгсгөлгүй хэмээгч маань, өчүүхэн чийгийн өтний туслагч нь болжээ! Хувь тавилан заримдаа иймэрхүү адайр зан гаргах нь байдаг.

Баркильфедрод учиргүй их бардам омог амтагдан авай. Бүх юм л өөрийнх нь тулд хийгджээ хэмээн итгэжээ. Өөрийн бие бүх үйл явдлын төв нь, зорилго нь байгаа мэт санагдана.

Тэр андуурчээ. Чухмыг хэлбэл тохиол гэгч энэ буюу. Баркильфедрогийн үзэн ядах муу санаандаа нэмэр болгосон гайхалтай үйл явдлын үнэн учир нь үүнд байгаа юм биш ээ. Өнчин хүүгийн эцэг эхийг орлосон далай, түүнийг ад үзэгчдийг хар салхиар туулган хүүг гадуурхсан суман онгоцыг хэмхчин, дээр нь байгсдыг залгихдаа өршөөл гуйхыг нь ч тоосонгүй, зөвхөн нүглээ наманчлан гэмшихийг нь л зөвшөөрчээ. Хар салхи үхлийн савраас дэнчин авч, гэмт хэргийг үйлдсэн бат бөх хөлгийг дотроо баримт сэлттэй хэврэгхэн шилэн дашмагаар сольжээ. Далай ширвэс лугаа адилаар өрлөг эх болон үүргээ өөрчилж, жаал хүүг бус харин түүний

тавиланг бүүвэйлэн байх хооронд, жаал хүү далай түүнд юу хийж буйг мэдэх ч үгүй эрийн цээнд хүрч байлаа. Лонхыг чулуудсан давлагаа, дотроо ирээдүйг агуулсан сайх өнгөрсний хэлтэрхийг амсхийлгүй нандигнан хамгаалж, хар салхи хэврэгхэн савыг учиртайхан үлээж, урсгал түүний ёроолгүй усны дундуур намалзуулан урсгаж, замаг хиг, хөөс сахруулсан усан доорх хад чулуу ч сайх гэм зэмгүй савыг ивээлдээ багтаан хамгаалж байжээ. Далайн давлагаа, санаа сэтгэл мэт нэг шийдсэнээрээ гуйвалтгүй байдаг. Эмх замбараагүй явдал учир зүйг бий болгон, харанхуй гэрэл гэгээ рүү тэмүүлэн, хав харанхуй үнэн хэмээгдэгч нарыг гаргахын тул байдгаараа зүтгэн, булшинд буй талийгаач тайвшралыг үзэж, үе залгамжлагч нь хууль ёсныхоо эрхийг эдэлжээ. Хааны ялт таалал үнээ алдаж, бурхан тэнгэрийн урьдаас зөгнөсөн нь биеллээ олж, хэнд ч хэрэггүй хаягдсан шоовдор хүү эцэс төгсгөлгүйг асрамжлагчаа болгоод авчээ. Баркильфедрогийн баярласандаа бархирах дөхөөд байгаа үйл явдалд чухамдаа иймэрхүү зүйлийг л харж болохоор ажээ. Гэвч тэр нь юуг ч олж харсангүй. Энэ бүх юм Гуинплений төлөө үйлдэгджээ гэдгийг зүүдэлсэн ч үгүй, бүх юм л өөрийнх нь, Баркильфедрогийн төлөө хийгдсэнээр бодож, ингэх ч ёстой юм шиг санаж байлаа. Чөтгөр шулам биелнэ гэдэг энэ буюу.

Ийм хэврэгхэн сав арван таван жилийн турш хөвсөн атлаа бүрэн бүтнээрээ байгаад гайхахад хүрвэл далай гэдэг маань чухамдаа хэчнээн номхон дөлгөөн болохыг бага мэдэж байна гэсэн үг. Арван таван жил бол юу ч биш. 1807 оны аравдугаар сарын дөрвөнд, Груа аралд болон Гаврын хойгийн үзүүр, хэрмэл байцын дунд оршдог Марбаганаас Порт-Луин загасчид далайн чулуулаг болон дун лавайгаар угалз мэт бүрхэгдсэн дөрөвдүгээр зууны ромын домбо олсон ажээ. Энэ домбо мянга таван зуун жил далайд хөвжээ.

Баркильфедро хээвнэг царай гаргая гэж хэчнээн хичээв ч түүний гайхаж цочирдсон нь баярласных нь дайтай байлаа.

Бүх юм өөрөө л урьдаас бэлдчихсэн юм шиг бүтэхийг яана. Түүний үзэн ядахыг нь хангаж өгсөн үйл явдлын бүхий л ээдрээ түүний гарт бэлэн ороод иржээ. Зөвхөн тэр бүхнийг улам ойртуулан, хооронд нь холбон уялдуулах л үлджээ. Эвийг нь тааруулж донжийг нь олно гэдэг зугаатай ажил. Нэг ёсны сийлбэр гэсэн үг.

Гуинплен! Энэ нэрийг мэддэг байв. Masca ridens! Бусдын адилаар инээмтгий хүнийг үзэхээр гүйж л явж. Хүн зоны анхаарлыг татдаг ший жүжгийн зарлалыг уншдагийн адилаар «Тедкастерийн буурчийн газрын» өлгөөтэй бичгийг уншсан байж. Түүнийг ажиглаад өнгөрсөн ч гэлээ, одоо нэгд нэгэнгүй санажээ. Мэдээж

дараа нь шалгалгүй яах вэ. Сайх зарлал түүний нүдэнд цахилгаан гялсхийх мэт тодрон, тархинд нь лонхноос олдсон илгэн цаасны хажууд асуултын хариу мэт, оньсогын таавар мэт бат тогтжээ. Өлгөөсний «1690 оны нэгдүгээр сарын хорин есөнд арван настайдаа Портлендэд далайн эрэг дээр хаягдсан Гуинпленийг энд харж болно» гэсэн үгс бошгийг үзүүлсэн гэрэл болон нүдний нь өмнө тодрох нь тэр. Яармагийн марзан зарлал дээр Mane, Thesel, Phares²⁸¹ гэсэн үгс улалзан гарч ирэх шиг болсныг хэлэх юун.

Жозианагийн амьдрал гэгч нөгөө нарийн бөх барилга дорхноо нурах нь энэ. Гэгээн цагаан өдөр гэнэт нуржээ. Дэвид Дерри-Моир ч хамаг байдгаа алдаж таарав. Тайж хэргэм, эд хөрөнгө, сүр хүч, дээд зиндаа цөм Дэвид лордоос Гуинплэнд шилжив. Цамхаг шилтгээн, ан агнуур, ой мод, ордон харш, эдэлбэр газар, цөмөөрөө, Жозиана хүртэл үүнээс хойш Гуинпленийх болжээ. Тэгээд бас Жозиана, мөн ч айхавтар төгсгөл өө дөө! Гэтэл одоо нөхөр болох хүн нь хэн гээч! Алдартай, их зантай түүнд, зах зээлийн алиалагч ногджээ. Цамаан зантай, гоо үзэсгэлэнтэй, түүлд мангас заяажээ. Хэн ингэнэ чинээ санах юм билээ? Үнэнийг өчихөд Баркильфедро баярласандаа хөл нь газар хүрэхгүй байв. Хувь тавилангийн санаанд оромгүй адайр зан, заримдаа хамгийн хорлонтой хүний санаанаас л даваад гарах нь байдаг. Бодит байдал хааяа нэг цэл гайхаж, мэл хөхөрмөөр гайхамшгийг бүтээдэг. Урьд нь хүсэж мөрөөдөж явсан юм нь даан ч өрөвдөм, тэнэг юм шиг Баркильфедрод санагдах болжээ. Түүнээс нь хавьгүй илүү юм гараад ирэх нь энэ.

Хэрэв, энэ болж байгаа өөрчлөлт нь түүнд муугаар эргэх байлаа ч гэсэн, мань хүн санаснаараа л зүтгэх байлаа.

Хатгалаа гээд өөрт нь ямар ч нэмэргүй, тэр бүү хэл хатгаснаасаа болоод өөрөө амь эрсдэхээ мэдсээр байж хатгаад авдаг хорлолтой өт хорхой байдаг. Баркильфедро тийм шавж байлаа. Гэвч энэ удаа хайр гамгүйгээр дайрч байлаа. Дэвид Дерри-Моир лорд түүнд ямар ч өр ширгүй байсан бол, Фермен Кленчарли лорд түүнд насаараа өртэй болох ёстой. Баркильфедро ивээлгэдэг хүн байснаа ивээн тэтгэгч болж хувирах нь тэр. Хэнийг ивээгч гээч? Английн тайжийг. Түүнд өөрийн гэсэн лорд байх болно. Өөрөө бүтээсэн лорд шүү! Түүний толгойг хэн мэдэх вэ, би л хамгийн түрүүн мэднэ гэж бат нут боджээ. Тэгээд энэ лорд маань их эзэгтэйн морганат²⁸² хүргэн болно! Эрэмдгээрээ их эзэгтэйд нүүр тал олохынхоо хэрээр Жозианы дургүйг хүргэж байх болно. Түүний ачаар Баркильфедро, даруу атлаа жинтэйхэн хувцас нөмрөн байж, мяндаг тушаалтай хүн болохыг хэн байг гэхэв. Тэр ямагт сүм хийд рүү санаа нь татагддаг

хүн байлаа. Ёнзон хамба болчих юм сан гэхээс нойр нь хүрдэггүй байжээ.

Одоохондоо бол байж байгаадаа сэтгэл ханан жаргалтай байлаа.

Ямар гайхалтай амжилт вэ! Ерийн нэгэн тохиолдлоос бүх юм ямар ч сайхнаар эргэв дээ! Далайн давлагаа түүнд өшөө хонзонгоо авах боломжийг зугуухан хэр нь итгэлтэйгээр авчирчээ. Үүнийгээ өшөө авах гэж нэрлэснийг нь хараач! Азаа анаж байсан нь талаар болсонгүй.

Баркильфедрог усан доорх хад гэвэл, Жозиана хатагтай сүйрэлд орсон хөлөг ажгуу. Жозиана Баркильфедрог мөргөн сүйрэх нь энэ. Үгээр хэлэхийн эцэсгүй хорлонтойгоор баяр хөөр болж байгааг нь яана.

Тэр нь өөр хүний ухаан санаанд хэрчлээс гаргаад, түүнд өөрийн бодлыг тавьчихаж байгаа юм шиг итгүүлэх авьяас гэгчийг эзэмшсэн хүн байлаа. Холхон шиг байж байгаад, юунд ч хошуу дүрэлгүй гэмгүй царайлж байснаа, Жозианыг, «Ногоон хайрцаг» руу явуулж, Гуинпленийг харуулахыг, эвийг нь олон өдөөд өгчээ. Энэ нь түүний бодсоноо биелүүлэхэд огтхон ч муу юм болсонгүй. Харин ч бүр, марзан амьтныг, доромж баазхан орчинтой нь харуулах нь цаанаа бодолтой хийсэн хэрэг агаад, яваандаа Жозианыг хүлээж байгаа тэр зүйлд хурцхан шиг хачир болж өгөх ёстой байлаа.

Баркильфедро бүхнийг урьдаас зугуухан бэлдээд авчээ. Бүх муу юм гэв гэнэт л тэнгэрээс унасан юм шиг нижигнээд эхлээсэй билээ гэж залбирна. Түүний хийж үйлдэж байгаа ажил нь «тэнгэрийн сум буулгахыг хүсээ юү» гэмээр л санагдана.

Дутуу гуцуугаа урьдчилан базааж авчхаад, хууль зүйн дагуух ёс журмыг гүйцэлдүүлэхийг мэрийж эхлэв. Иймэрхүү хэргийг чандлан нууцлахыг хуульд заасан болохоор нууц задарна гэж айх юм байсангүй.

Хардкванон, Гуинплен хоёрыг нүүрэлдүүлэхэд Баркильфедро тэнд байлцаж байлаа. Тэгээд юу болсныг уншигч авгай бэлхнээ мэдэх бөлгөө.

Тэр өдөртөө л, Лондонд байсан Жозиана авхайтанд их эзэгтэй сүйхээ явуулсан нь, тэр үес Анна хатны саатан агч Виндзорт гүнжинг аваачих гэсэн хэрэг байв. Өөрийн үзэмжээр өдрийг өнгөрөөх гэж байсан Жозиана, их эзэгтэйн тааллыг дагахгүй байх ч юм уу эсвэл ядахдаа ганц хоногоор ч болсон дуртайяа хойшлуулчихаар байсан ч гэлээ, ордны жаягт иймэрхүү дураар загнах юм даанч байдаггүй нь гачлантай. Түргэхэн шиг л замд гарч,

Лондон дахь Генкервил хаус өргөөгөө орхин Виндзорын Корлеон-лоождоо очихоос өөр мөр байсангүй.

Бэрээ баригч «Тедкастерийн буурчийн газар» Гуинпленийг баривчлан, Саутворкын нүхэн эрүү шүүлтийн газар аваачихаар очих яг тэр үест Жозиана гүнжин Лондоныг орхин одлоо.

Түүнийг Виндзорт иртэл, их эзэгтэйн хүлээн авах өрөөний хаалгыг харуулдаж байгаа хар бэрээ баригч, Жозианад хатан хаан тэргүүн түшмэлийг бараалхуулж байгаа учир өөрийг нь зөвхөн маргааш хүлээж авах агаад учир иймд, Корлеон-лоождоо, маргааш их эзэгтэй босмогцоо түүнд шууд хүргүүлэх зарлигийг хүлээх хэрэгтэй болсныг дуулгав. Байдгаараа эгдүүцэн, шар нь гозойсон Жозиана гэртээ хариад, уур унтуутай амьтан хам хум цайлсан болж аваад толгой нь өвдөн, хиагаасаа бусад бүх зарц шивэгчнээ явуулснаа, дараа нь хиагаа ч нүднээс далд ор гэж зарлиг буулгаад, гэгээ тасраагүй байхад орондоо орлоо.

Гэртээ ирэнгүүтээ л, их эзэгтэйгээс ордонд үтэр түргэн ир гэсэн тушаалыг далай дээр авсан Дэвид Дерри-Моир лордыг, маргааш мөн л Виндзорт хүлээн буйг дуулжээ.

III. Сибириэс Сенегалд гэнэтхэн шидэгдсэн хэнбугай ч гэсэн ухаан алдахгүй байх үндэсгүй (Хумбольдт283)

Бяр чадалтай, өлчир даамгай хүн байлаа ч хувь заяаны гэнэтийн их өөрчлөлтөд ухаан мэдрэлээ алдахад ямар ч гайхах юм байхгүй. Яргачин, шарыг сүхний онгиор муужиртал нь цохидог лугаа адилаар гэнэтийн санамсаргүй юм хүнийг дүйнгэтүүлдгийг хэлэх юун. Нүцгэн гараараа түрэгийн боомтын гинжийг тасар татаж байсан нөгөөх алдартай Франсуа д'Албеком, түүнийг хутагт хамба болгоход, бүхэл өдөржингөө ухаангүй байсан юм гэдэг. Гэхдээ ханчингаас тэргүүн хамба хүртэлх зай, марзганагчаас Английн тайжид хүрэх зайнаас даанч дөт байгаа биз дээ.

Ямар ч юм амгалан тайвныг алдагдуулах шиг хүнд нөлөөлж чадахгүй.

Гуинпленийг ухаан орон нүдээ нээхэд хэдийнээ шөнө болчихсон байлаа. Хана, адар, шалыг нь улаан хамба хилэнгээр битүү бүрсэн уужим тасалгааны голд түшлэгтэй зөөлөн сандал дээр сууж байх юм. Хажууд нь, Саутворкын зоорины баганын араас гарч ирдэг аяны цув нөмөрсөн цүдгэр гэдэстэй хүн малгайгүй зогсож харагдав. Тэр хүн Гуинплен хоёроос өөр хүн тасалгаанд байсангүй. Түшлэгтэй сэнтийний хоёр талд гар хүрмээр зайнд дээрээ зургаа, зургаан лавын лаа асаасан цэцгэн тавиуртай хоёр ширээг шахаж тавьсан байв. Нэг ширээн дээр нь баахан бичиг цаас, бяцхан хайрцаг, нөгөө дээр нь алтадмал тавагт тавилсан хүйтэн зууш, шувууны мах, архи дарс харагдлаа.

Шалнаас авхуулаад тааз хүрсэн өндөр шилэн цонхоор хаврын шөнийн тэнгэрийн, туяарсан өнгөн дээр, нэг нь өргөн хоёр нь жижгэвтэр гурван дааман хаалгатай ёслолын хашааг тал сар шиг хүрээлсэн баганууд нүдэнд тусна. Сүйхэнд зориулсан голын хаалга нь өндөр агаад, баруун талын морьтны хаалга нь арай намхавтар, зүүн талын явган хүнийх нь түүнээсээ намхан ажээ. Бүх хаалгыг үзүүр нь гялалзсан сараалжин төмрөөр хаажээ. Голын дааманы дээр баримлаар чимжээ. Багануудыг хашаанд нэлд нь дэвссэн хавтангийн адилаар цасан цагаан гантигаар хийсэн бололтой. Хашааны голд ямар нэг шигтгэмэл хээ угалз байгаа нь бүдэг бадагт сайн танигдахгүй байв. Өдрийн гэрэлд бол энэ нь флорент маягаар өнгийн чулуун хавтанг зүйж шигтгэсэн асар том сүлд байгаа бололтой. Дээш доош муриганасан чимэглэлт хашлагууд нь тагттай саравчийг холбосон шатны хашлага байхаас зайлсангүй. Хашаа

дээгүүр шөнийн униар дунд бараа нь дүнхийсэн том өндөр цайз дүнхийнэ. Дээр нь од түгсэн тэнгэрт дээврийн хар дүрс бараантана. Мушгимал хавчууртай асар том дээвэр дуулганы унжлага шиг дээврийн хөндийн тасалгаанууд, цамхаг гэмээр том том утааны яндан, бурхан, дар эхийн барималтай мөг нүдэнд тусна. Бүдэг бадгийн дунд багануудын хоорондуур үлгэрийн усан оргилуурын ус дээш цацран, нэг усан сангаас нөгөөд нь шоржигнон, шиврээ бороо ч юм шиг, ширүүн хүрхрээ ч юм шиг доош буун, тойрон байгаа баримлуудаа уйтгарлуулахгүйн тулд очир алмас, шүр сувдаа «хандсан зүгт нь цацлан буй үнэт эрдэнэсийг асгаруулан буй гоёмсог хайрцаг лугаа адил харагдана. Эгнэсэн том, том цонхнуудын завсрын ханан дээр, хуяг дуулгатай бамбайн товойлгосон дүрс, тавиуртай цээж баримлууд тавьжээ. Шилтгээний нүүрэн талын дээд хэсэгт дайн байлдааны олз, чулуун соновтор, бурхны дүрстэй сэлгүүлэн товойлгон гаргажээ.

Гуинплений байгаа өрөөний буланд, нэг талд нь таазанд тулсан өндөр задгай зуух, нөгөө талд нь лавир дор дундад зууны үеийн, дээр нь гарахдаа шатаар өгсдөг, хөндлөөш нь ч гэсэн хэвтэж болохоор сүр бараатай өндөр ор тавьжээ. Сайх орны шатанд нь бандан түшүүлэн тавьжээ. Бусад тавилга гэвэл хана дагуулан тавилсан түшлэгтэй сандлууд, өмнө нь исрүүд байлаа. Тааз нь бөмбөгөр хэлбэртэй задгай зууханд франц маягаар их гал өрджээ. Дөлнийх нь хурц өнгө, түүний ногоовтор ягаан улалзах хэлээр нь юм мэддэг хүн бол, тэр үедээ л тансагт орж асан яшил мод шатаж буйг шуудхан гадарлах байлаа. Хоёр цэцгэн тавиуртай лаа арай чүү гэрэлтүүлэхийг харваас аль зэрэг том ерөө болох нь илэрхий. Заримынх нь хөшгийг буулгаж заримынхыг нь сөхсөн хаалганууд зэргэлдээ өрөөнүүдэд ордог үүд ажээ. Бөх бат, сүр бараа ихтэй сайх тавилга хэрэгсэл баахан хуучирсан ч чанар чансаатай, нэгдүгээр Иаковын үеийн маягийг бэлхнээ хэлээд өгнө. Лавир, орны бүтээлэг, хөшиг, ширээ, сандал, исрийн бүтээлэг цөм, дэвссэн зөөлөн хивс, хананы бүрээстэй ав адилхнаар улаан хамба хилэнгээр хийжээ. Таазыг л оруулахгүй юм бол алтадсан юм байсангүй. Яг голд нь сүлд тэмдгээр битүү чимсэн дугариг том хөөмөл бамбай байлаа. Дунд нь хоёр эгнээ сүлдний хооронд түшээ гүнгийн титэм, болон бэйсийн титмийг товойлгон гаргасан байв. Энэ бүх бэлгэ тэмдгийг юугаар хийгээ вэ? Шармал гууль уу? Алтадсан мөнгө үү? Ялгахад бэрхтэй. Алт шиг л харагдана. Хээнцэр таазны харанхуй хүнхрээс сайх бүдэг гялалзах бамбай, шөнийн тэнгэрт байгаа нар уу гэлтэй.

Эр хүний жаргал эзгүй хээр гэгчээр чөлөөтэй байж сурчихсан хүн бол ордон өргөөнд ч гэлээ, шоронд байгаа юм шиг сэтгэл нь зовох бөлгөө. Сайх баян тансаг эд юмс сэтгэлийг нь түгшүүлнэ. Гайхамшигтай сайхан юм бүхэн цаанаа л нэг айдас төрүүлдэг шүү дээ. Энэ хааны ордонд хэн суудаг байна вэ? Ямар аварга амьтан энэ бүх баян тансгийг эзэмшдэг юм бол? Энэ шилтгээн ямар арслангийн үүр вэ? Сайн сэхээ орж амжаагүй Гуинплений зүрх базлах шиг болов.

— Би чинь хаана байна аа? гэж дуугарав.

Түүний өмнө зогсож байсан хүн,

— Милорд, та гэртээ заларч байна шүү дээ гэж хариу өчив.

IV. Ид шид

Усанд живсэн хүн мандал дээр гарч иртэл нэлээд хугацаа орно.
Энэ лугаа адил, Гуинплен цочирдсон гайхсанаасаа гарч чадахгүй байлаа.

Таньж мэдэхгүй рүү, юу юуны тухад хүрэлгүй хөл тавихын аргагүй биз дээ.

Бодол, саналга заримдаа, тулалдаанд орсон цэрэг шиг замбараагаа алдах ч байдаг. Сандран зугтааж яваа цэргүүд шиг тэр бүгдийг цуглуулах бас амаргүй. Хүн заримдаа хэдэн хэсэг мөчлүүлчихсэн юм шиг болж ирдэг. Өөрийнхөө биеийг задарч байна уу гэж жигтэйгээр мэдрэх нь ч байдаг.

Бурхан бол гар, тохиол бод дүүгүүр, хүн бол чулуу юм. Таныг гэнэт дүүгүүрдчихсэн хойно, зогсох гээд үз л дээ.

Гуинплен ингэж зүйрлүүлснийг маань уучлаг, нэг хэрэг явдлаас нөгөө рүү ойж буусаар явлаа. Гүнжингийн хайр сэтгэлийн захианы дараа, Саутворкын нүхэн зооринд үзсэн юм нь гээд л.

Хувь тавилангийн эрхээр та санаж бодоогүй юманд орчихвол, нэг нь нөгөөгийнхөө араас цувран дайрах цохилтуудад нь л бэлдэх хэрэгтэй шүү. Таны өмнө энэ аймшигт үүд нээгдэнгүүт, санамсаргүй тохиолууд цутган орж ирнэ гээч. Хэрэв хананд чинь цөмөрхий гарвал элдэв жорын үйл явдал тэр цоорхойгоор чихчих нь тэр дээ. Ер бусын гайхалтай юм ганц удаа ирээд зогсдоггүй.

Ер бусын юм бол харанхуй гэсэн үг. Тэр харанхуй л Гуинпленыг нөмөрчээ. Түүнд тохиолдсон зүйл ухаарахын аргагүй юм шиг санагдана. Уулыг нурсны дараа тоосон үүл үлддэг шиг, сэтгэлийн их догдлолын дараа ухаан санааг бүрхэн агч манан дундуур л харахчаа аядаж байлаа. Үнэндээ ч айхавтар ихээр догдолжээ. Эргэн тойрныхоо юмыг ялган салгаж чадахгүй байв. Гэвч аажим аажмаар агаар тунгалаг болж ирлээ. Шороон манан доош буужээ. Хором бүрд цочирдон гайхах нь гайгүй болж ирэв. Гуинплен, нүдээ хараатай, зүүд нойрон дундаа болж байгаа юмыг тогтоон хараад авахыг хичээн буй унтаж байгаа хүнийг санагдуулна. Энэхүү манант үүлийг нэг сийрэгжүүлэн зайлуулснаа, дахин яаж ч чадахгүй, өтгөрүүлж, ухаанаа нэг алдан, нэг сэргээн байлаа. Санаанд оромгүй тохиолоос болж биднийг овоо ойлгомжтой нэгэн талаас юуг ч ойлгохын эцэсгүй нөгөө тал руу шиддэг оюун ухааны хөөрөлтөд ороод байв. Уураг тархиныхаа доторх дүүжмэгийн найгалзахыг амсаагүй хүн хаана байх билээ.

Бага багаар Гуинплений бодол саналга нь битүүлэг явдлын харанхуйд, урьд нь нөгөө Саутворкын нүхэн зоорины харанхуйд хараа нь дассан шиг дасаж ирлээ. Энэ самуурч будилсан олон юмыг, нэг юманд бөөгнөрүүлэн ээдрээг нь гаргахад л хамаг зовлон нь байлаа. Дээр дээрээсээ овоорсон үйл явдлыг ойлгохын тул, амсхийх зав чөлөө хэрэгтэй. Гэтэл энд тийм боломж байсангүй. Үйл явдал ёстой л шээх зав ч олгохгүй гэгчээр ар араасаа дарсныг нь яана. Саутворкын нүхэн гэрт орохдоо Гуинплен, цөллөгийн ялтан шиг л гав гинж зүүлгэх юм байх гэж бодоод хүлээж байтал, харин гүнгийн титэм өргөдөг байгаа даа. Ийм юм байж болно гэж үү дээ? Гуинплений айн цэрвэж байсан юм, хэрэг дээрээ болж өнгөрсөн юм хоёрын хооронд хугацаа гэхээр юм байсангүй, ар араасаа л дэндүү түргэн болоод өнгөрсөн болохоор түүний айдас нь, учрыг нь олж амжихын аргагүй өөр сэтгэлгээр солигдох учир, ухаан нь сайн сийрэгжиж амжихгүй л байлаа. Гайхмаар зөрүүтэй эрс тэс ялгаа нь ухаан бодлыг нь зуудаг бахь шиг л хавчин, түүнээс мултрах гэж байдгаараа л хүчилж байлаа.

Тэр дуугай л байв. Учиргүй айж балмагдсан үедээ биднийг дуу гаргахгүй болгочихдог энэ төрөлх зөн гэж хэчнээн хүчтэй байдгийг бид дутуу мэддэг билээ. Амнаасаа үг унагахгүй байгаа хүн л бүгдийг сөрөн зогсож чаддаг. Санаандгүй алдчихсан ганц үг л таныг тэр чигээр чинь ямар ч юмны дугуйн дор хаячхаж мэдэх л юм. Ядуу доройчууд, бяц дарагдчих вий гэхээс насаараа яс нь хавталзаж явдаг. Харц олон ямагт, эзэн дээдсийн өсгийд няц гишгүүлчихээс айж байдаг. Тэгвэл Гуинплен маань хар нялхаасаа сайх харц олны хэсэг нь байлаа. «Ямар нэг юм ойртоод байна» гэж хэлмээр жигтэй хачин түгшүүр хүнд төрдөг. Гуинплен яг л ийм байдалд байлаа. Энэ үед хүн ямар нэг юм болох нь ээ гэж хүлээн, юу болоод байгаа нь нэг л сайн мэдэгдэхгүй байдаг. Хий дэмий л сэрэмжлэхээс цаашгүй. «Ямар нэг юм ойртон ирнэ». Чухам юу вэ гэхээр хэлэх юм байхгүй. Хэн бэ гэхэд, хий дэмий л харуулдана.

Цүдгэр гэдэстэй хүн,

— Милорд та гэртээ заларч байна шүү дээ гэж дахин хэлэв.

Гуинплен эргэн тойрноо харав. Хүн гайхаж цочирдох үедээ бүх юм байрандаа байна уу гэдгийг лавлан ойр орчноо хардаг бөгөөд дараа нь өөрийнхөө байгаа үгүйд итгэхийн тулд биеэ тэмтэрдэг. Энэ маань түүнд хандаж хэлсэн байжээ. Гэвч тэр өөрөө хэдийнээ байхаа больчихсон ажээ. Ажлын хувцас, ширэн энгэрэвч нь хэдийдээ ч юм алга болчихжээ. Халаасанд нь түнтийсэн түрийвчтэй мөнгөн хоргойгоор оёсон хантааз, илээд үзэхэд алтан саагаар хатгамалласан

бололтой пүүсүү тэрлэг, алиалагчийн бариу оймсон өмднийх нь дээрээс хилэн өргөн шалбуур өмсгөж, хөлд нь өндөр улаан өсгийтэй гутал жийлгэжээ. Түүнийг ордонд авчраад зогсоогүй, хөлөөс нь толгой хүртэл өвч хувцасласан байлаа.

Нөгөө хүн үргэлжлүүлэн өгүүлрүүн:

— Милорд, танд энэ ордноос гадна, үүнээс улам ч тансаг том Генкервил-хаус харш бий. Хөгшин Эдуардын үеэс цайз болж ирсэн, танд тайж хэргэмийг хайрласан Кленчарли-кас бас таных. Бүх тосгон суурин, тариагчдыг нь оролцуулан арван есөн хушуу таны мэдэлд байна. Энэ нь, таны лорд язгууртны тугийн доор наян мянга орчим харьяат албадыг цуглуулж чадна гэсэн үг, Кленчарлид та бүрэн эрхт шүүгч нь, эд хөрөнгө хүн зоны эзэн нь юм. Тэнд та түшээ гүнгийнхээ шүүхийг явуулж болно. Эзэн хаан зөвхөн зоос цутгуулдгаараа л танаас илүү эрхтэй. Нормандын хуульд *heief signor* гэж тодорхойлсон хаан бол шүүх болон зоостой байна гэсэн байдаг. Энэ маань зоос цутгуулна гэсэн үг. Ингэхээр та зоосноос бусдаар өөрийн эзэмшилдээ, их эзэнтэн улсдаа байдаг шиг хаан л гэсэн үг. Түшээ гүнийхээ хувьд та Англид дөрвөн тулгууртай дүүжлүүр, Сицилид бэйсийнхээ хувьд, долоон баганатай дүүжлүүртэй байх эрхтэй бөгөөд жирийн язгууртан хоёр шонтой, газар түрээслэгч гурван баганатай, ван бол найман баганатай байдаг юм. Нортумбрийн дээр үеийн баримт бичигт таныг агь гэж өргөмжилсөн байгаа. Та бол Ирландын Поерууд болох Валентиний бэйсүүдтэй, Шотландын ангусууд болох Эмфревилийн гүнгүүдтэй хамаатан садан хүн. Та бол Кембл, Ардманач, Мак-Гамумор нартай адилхан отог омгийн толгойлогч хүн. Танд Рекелвер, Букстон, Хелл-Кертерс, Хомбл, Марикамб, Гемдрайт, Треноурдрайт зэрэг найман овгийн эзэмшлээс гадна бас бус эдлэн газар бий. Та Пиминморт хүлрийн үйлдвэрлэл, Тректэд гөлтгөнийн уурхай гаргах эрхтэй агаад таны эдлэн газарт Пинетчейзийн муж, уул, түүн дээр байдаг хуучны хот багтаж байна. Хотыг нь Ваинкуант, уулыг нь Мойн-Эл гэдэг юм. Энэ бүхэн, францын аль нэг бэйлийн сэтгэл ханаад явдаг хорин таван мянган франкийг бодвол дөч дахин их буюу дөчин мянган фунт стерлингийн орлогыг жилд оруулна.

Баркильфедроог ийнхүү ярьж байх хооронд Гуинплений гайхах нь улам ихсэн, олон юмыг дурсан санаж эхэллээ. Дуртгал бодол гэдэг бол ганцхан үгэнд л долгион цалгиж мэдэх гүнзгий цөөрөм юм. Баркильфедрогийн тоочин бүртгэж байгаа бүх л шилтгээн, эзэмшил газрын нэрийг Гуинплен мэддэг байжээ. Эдгээр нь түүний бага насаа өнгөрөөсөн мухлаг тэрэгний ханыг чимэн агч нөгөө хоёр

өлгөөсний доор хэд хэдэн мөрийг эзлэн дуурайж байсан ажээ. Олон жилийн турш санаандгүй нүдэнд нь туссаар өөрийн эрхгүй бүгдийг цээжилчихсэн юм санжээ. Хэнд ч хэрэггүй хаягдсан амьтан Үүрсийн нүүдлийн урцанд ирээд л, өөрийг нь хүлээн агч өв хөрөнгийнхөө дансыг олж авсан нь тэр. Өглөө нүд нээгүүтээ л хөөрхий жаал хүү хамгийн түрүүнд л хааш хэрэг алмай харцаа, өөрийн эдлэн болох цол хэргэмийн жагсаалт руу бэлчээдэг байсан аж. Арван таван жилийн турш, хоногийн хоолоо арай ядан олдог, зоос бүрийг нарийлан, өлөн зэлмүүр амь унжиж явсан, нэг гудамжны уулзвараас нөгөөд нүүж явдаг хэрмэл жүжигчдийн алиа салбадай, өөрийн баялгийн жагсаалтыг үргэлж хажуудаа байлган, хэрэн тэнэж явжээ гэдэг ёстой л санамсаргүй бүхнийг нийлүүлсэн гайхалтай тохиол бус гэж үү.

Баркильфедро долоовор хуруугаа ширээн дээр байсан гоёмсог хайрцагт хүргээд,

— Милорд, энэ хайрцагт эрхэм дээдэс, өндөр төрөлт их эзэгтэйгээс таны анхны ойр зуурын хэрэгцээнд зориулан илгээсэн хоёр мянган алтан зоос байгаа гэв.

Гуинплен биеэ займчсанаа,

— Үүнийг миний эцэг Үүрст зориулах болно гэв.

— Тэгье милорд гэж Баркильфедро хариулснаа, —
«Тедкастерийн буурчийн газар» байгаа Үүрст. Биднийг энд дагаж ирсэн тангарагтан хуульч одоо буцах гэж байгаа юм. Тэр энэ мөнгийг аваачаад өгөг. Би ч өөрөө Лондон явах магадгүй. Тэгвэл энэ үүргийг тань даая хэмээн өчив.

— Би өөрөө түүнд аваачиж өгнө өө гэж Гуинплен дуугарлаа.

Баркильфедро инээмсэглэхээ болиод,

— Болохгүй гэж хариулав.

Хэлж буй үгээ тодотгодог аялга гэж байдаг. Баркильфедро яг энэ аялгаар хэлжээ. Тэгснээ, эзэндээ зарц нь хандахдаа яаж харьцдаг шиг тийм гүнээ хүндэтгэсэн өнгөөр үгээ үргэлжлүүлэн хэлрүүн:

— Милорд, та одоо Лондоноос хорин гурван бээр алс, Виндзорын хааны шилтгээнтэй залгаа, Корлеон-лоож хэмээх хааны харшдаа байна. Таны энд заларч байгааг хэн ч мэдэхгүй. Саутворкын гяндангийн гадаа хүлээж байсан, битүү сүйхээр таныг энд авчирсан юм. Таныг энэ ордонд хүргэж ирсэн улс таны хэн болохыг мэдэхгүй, харин намайг танина, энэ л хангалттай. Надад нууц түлхүүр байсны хүчээр л та энд орж ирсэн юм шүү дээ. Одоо ордныхон цөм дуг нойртоо байна, зарц нарыг ийм үед сэрээгээд юугаа хийх вэ. Иймээс ч бидэнд зарим нэг зүйлийг тайлбарлаж

амжих цаг байна, ер нь ч тэгээд яриад байх олон юм алга. Одоо танд тайлбарлая. Эрхэм дээд их эзэгтэйн даалгавар байгаа юм.

Баркильфедро яриагаа үргэлжлүүлэнгээ, жижиг хайрцгийн дэргэд байсан бөөн цаасыг эргүүлж байв.

— Милорд, таны тайж хэргэмийн жуух энэ байна. Сицилийн бэйлийн жуух нь энэ. Кентийн хаан Бальдретээс эхлээд, Англи, Шотландын хаан зургаадугаар болон нэгдүгээр Иаков хүртэл арван нэгэн хааны тамга дарсан найман гүнлэгийн тань баримт бичгүүд энэ байна. Элдэв янзын газруудыг толгойлох эрхийн бичиг. Энэ бол орлого авч байх гэрээнүүд болон эзэмших эрхийн хийгээд таны түрээсээр өгөх эдлэн, эзэмшил, харьяат газрыг тодорхойлсон хууль ёсны баримт.

Таны толгой дээр жаазанд байгаа бамбайн дээрх хоёр титмийн нэг нь сувдан цагаригтай түшээ гүний, нөгөө нь бэйлийн шүдтэй титэм байгаа юм даа. Энэ тасалгааны зэргэлдээ, хувцасны өрөөнд үенгээр доторлон хажсан тайжийн улаан хамба хилэн, урт хормойт нөмрөг тань өлгөөстэй байгаа. Өнөөдөр, чухамдаа бол хэдхэн цагийн өмнө тэргүүн түшмэл-лорд, Английн гүн маршал хоёр таны компрачикос Хардкванонтой нүүрэлдсэний үр дүнг дуулаад, их эзэгтэйн зарлигийг хүлээж авчээ. Анна хатан хаан, хуулийн адил хүчинтэй зохих зарлиг дээр мутраа тавин соёрхсон байна. Бүх зүйл ёсоороо гүйцэтгэгдсэн. Ерөөсөө маргааш гэхэд л та лордуудын танхимд бүрэн эрхт гишүүний хувиар орох болно. Тэнд хэдэн хоногийн турш хатан хааны нөхөр Кемберлендийн вангийн жилийн тэтгэмжийг хоёр сая таван зуун мянган франкаар буюу зуун мянган фунт стерлингээр нэмэх тухай, титмээс оруулсан хуулийн төслийг хэлэлцэж байгаа юм. Та ч шүүмжлэн хэлэлцэхэд оролцож болно шүү дээ.

Баркильфедро түр зогсосхийн, гүнзгий амьсгаа авснаа үргэлжлүүлэн өгүүлрүүн:

— Гэлээ ч бүх хэрэг шувтраагүй байна. Өөрийн хүслээс гадуур Английн тайж болж болохгүй. Танаас юу хүсэж байгааг ойлгохгүй л юм бол бүх юм буруугаар эргэн, хүчингүй болж, горьдох юмгүй баларч ч болно. Дөнгөж үүсвэрээ олсон үйл явдал, амьдралд хэрэгжилгүй алга болчихдог тохиол улс төрийн бодлогод алийг тэр гэхэв. Милорд, таны байр байдлын өөрчлөлтийн тухай хараахан хэн ч мэдээгүй байгаа. Лордуудын танхим, энэ тухай зөвхөн маргааш л дуулна. Улсын эрх ашгийн бодлогын үүднээс таны хэргийг нууцлан хадгалж байгаа, тэгээд энэ бодлого маань хэчнээн ноцтой чухал болох нь таны амьд мэнд байгаа хийгээд таны эрхийн тухай

одоохондоо мэдэж байгаа цөөн тооны дээд тушаалын хүмүүс хэрэв улсын эрх ашиг огоорохыг шаардах л юм бол дорхноо л бүгдийг нь мартчихна. Тэгээд одоо нууц байгаа юм, тэр чигээрээ задрахгүй, харанхуй хэвээрээ дарагдчихыг хэн байг гэхэв. Таныг арчаад хаях, гарын алга урвуулахтай адилхан. Тэгээд бас, таны эцэг болон, түүний цөлөгдсөний дараа хоёрдугаар Иаковын нууц амраг болсон хүүхний дундаас гарсан ах тань байхад бүр ч амархан бүтэх хэрэг. Түүнийхээ ачаар ах тань ордонд нөлөөтэй хүн болжээ. Хэдийгээр тэр хууль ёсны хүү биш ч гэлээ, таны тайж хэргэм түүнд шилжих болно. Та үүнийг хүсэж байна гэж үү? Би л тэгж бодохгүй байна. За тэгэхээр, бүх юм танаас л шалтгаалах нь байна шүү дээ. Их эзэгтэйг сүслэн дагах хэрэгтэй. Та энэ ордныг зөвхөн маргааш л орхиж, их эзэгтэйн найр тавьсан сүйхээр лордуудын танхимд очихоор залрах болно. Милорд, та Английн тайж болохыг хүсэж байна уу, үгүй юу? Хатан хаан таныг л гэж байна шүү. Их эзэгтэй таныг бараг хааны цусан төрөлтэй суулгах санаатай байгаа. Фермен Кленчарли лорд амьдралын тань шийдвэрлэх хором ирээд байна. Хувь тавилан, нэг хаалгыг нь хаалгүйгээр нөгөөг нь нээнэ гэж хэзээ ч байдаггүй юм. Нэгэнт л урагш хэд алхсанаас хойш, хойшоо ухарна гэдэг санахын гарз. Шинэ дүрийг тодруулснаас хойш, урьдын би гэдгээ огоорон мартахаас өөр замгүй. Милорд, Гуинплен үхсэн. Миний хэлснийг ойлгов уу?

Гуинплений хамаг бие дагжин чичирснээ, дараа нь биеэ барьж чадаад,

— Ойлголоо хэмээн өчив.

Баркильфедро малийтлаа инээмсэглэснээ, мэхийн ёслоод, хайрцгийг авч цувныхаа цаагуур хийж аваад гарч одлоо.

V. Хүн дурсан санаж байна гэж бодох боловч бас мартах нь бий

Заримдаа хүний санаа сэтгэл ямар хачин жигтэй өөрчлөгддөг нь юу вэ?

Гуинплен нэгэн зэрэг л, оргилын оройд өргөгдөн, харанхуй ангальн ирмэг дээр очоод байлаа.

Түүний толгой нь эргэлээ. Эргэх эргэхдээ давхар эргэснийг нь яана.

Дэгдэн хөөрч байгаагаасаа, гулсан уруудаж байгаагаасаа болоод толгой нь эргэжээ. Үйлийн үргүй зохицол.

Тэр дээш хөөрч байгаага мэдэрч байвч, доош унаж байгаага мэдэхгүй байлаа. Ирээдүйн шинэ төлөв хүнийг ямагт айлгадаг.

Хэтийн төлөв, зам мөрөө олоход дэм болдог ч тэр бүр зөв байдаггүйг хэлэх юун.

Гуинплений өмнө үүлэн дунд, занга ч байж мэдэх үлгэрийн юм шиг гэрэл гэгээ нээгджээ. Гэтэл завсар заалхайгаар нь өтгөн хар хөх зурвас тодорно.

Бүр харанхуй гэж бодмоор өтгөн ажээ.

Тэр нь орчлонгийн бүхий л амьдралыг тольдон агч уул дээр гарчээ. Чухамдаа байхгүй энэ уул бүр ч аймшигтай. Энэ уул дээр байгаа хүмүүс зүүдэлж байгаа хэрэг.

Энд ёроолгүй хавцал дур татам дуудах нь, там диваажинг уруу татна хэмээн найдаж, чөтгөр ийш нь бурхныг авчрахаар тийм хүчтэй ажээ.

Мөнхийн юмыг хуурч толгойг нь эргүүлнэ гэдэг ёстой хачин горьдлого биш үү!

Чөтгөр Иисусыг уруу татаж байгаа тийм газар чинь хүн яажшуухан тэмцдэг болж байна аа?

Ордон шилтгээн, хэрэм цайз, сүр хүч, орчлонгийн бүхий л буян эцэс төгсгөлгүй жаргал цэнгэл гээд л хоёр хагас бөмбөрцгийн туяаран гэрэлтсэн зураг шиг бүхний дунд, төв нь чи өөрөө байна гэдэг, ямар аймаар зүүд зэрэглээ байх билээ.

Гэв гэнэт л өмнө чинь, ямар ч урьдчилсан зааг шатгүйгээр, ямар ч анхааруулга сануулгагүйгээр, ямар ч өөрчлөлт шилжилтгүйгээр ийм үзэгдэл гараад ирэхэд яаж бажгадан сандрах вэ гэдгийг бодоод үз л дээ.

Сохор номины нүхэнд унтчихаад Страсбургийн сүмийн ганжрын оройд²⁸⁴ сэрсэн хүн байдаг бол Гуинплен л байлаа.

Толгой эргэнэ гэдэг нэг ёсны зөн билэг гэлтэй. Таныг нэг зэрэг л гэрэл рүү ч, харанхуй руу ч, өөрөөр хэлбэл хоёр эсрэг зүг рүү л хандуулах вий.

Дэндүү ихийг тэгсэн мөртөө дэндүү багыг харна.

Цөмийг харж байгаа юм шиг мөртөө юу ч харахгүй.

Энэ номыг зохиогч хаана ч билээ, «нүд гялбуулам сохор гэрэл шиг байдал» гэж дурдсан шиг байдалд л орно доо.

Гуинплен ганцаархнаа үлдээд өрөөн дотуур том том алхлан явав. Борооны түрүүн шороо гэгчээр дэлбэрэхийн түрүүн дүрсхийдэг жамтай.

Нөмрөн орж ирэх элдэв бодолд донслон, сууж байхын ч аргагүй байлаа. Энэхүү дүрсхийсэн нь түүний өнгөрсөн үеийг үгүй болгожээ. Болж өнгөрснийг ой тойндоо сэргээгээд үзэв. Сонссон үгүйн хооронд санагдах зүйлийг сайтар тогтоосон байдаг нь хачин шүү. Саутворкын нүхэн зооринд, захирагчийн уншиж сонсгосон, далайд живсэн хүмүүсийн өчил одоо түүний тархинд тов тод буулаа. Үг болгоныг нь санаж байв. Сайх мэдүүлэг түүнд бага насных нь нууцыг нээж өгчээ.

Тэр бээр гэнэт зогсоод, нуруугаа үүрэн, таазыг, тэнгэрийг ч юм уу, нэг үгээр хэлэхэд дээшээ ширтэж байснаа,

— Хариугаа авч байна! гэж дуу алдав.

Усанд шумбаад гарч ирсэн хүнтэй адил болжээ. Тэр өнгөрснөө, ирээдүйг, цөмийг нь гэнэтийн туяарах гэрэлд харах шиг болов.

«Яана гэнэ ээ!» гэж дотроо орилов. Учир нь сэтгэлийн гүнд орилон дуу алдах гэж байдаг.

— Өө, ийм юм болсон юм бий! Би төрөхөөс лорд байж. Одоо бүгд тодорхой. Намайг хулуулан, нүүр буруулан наймаалж, өв хөрөнгөгүй болгоод, ганцаарыг минь хаяж, үхэлд учруулжээ! Миний хувь заяаны үхдэл арван таван жил далайд хөвж, гэнэт хуурай газар хүрэн хөл дээрээ босоод, амилсан байх нь! Би дахин төрж байна! Амь орж байна! Би навсархай хувцсан дороо жир нэг алиа жүжигчний бус зүрх цохилж байгааг ямагт мэдрэн, хүмүүс рүү ойртохдоо, тэд нар бол сүрэг малтай утга нэг гэдгийг гадарлан, харин би бол нохой биш харин малчин гэдгээ мэдэрч байсан билээ! Миний өвөг дээдэс хар борчуулыг адгуулагч, тэргүүлэгч, захирагч, эрх мэдэлтнүүд байсан байна, би ч гэсэн тэдэн лугаа адил болж чадна! Би язгууртан, надад илд байна, би түшээ гүн, надад отготой малгай бий, би тайж хүн, надад титэм байна. Ээ чааваас! Энэ бүгдийг минь надаас булаагаад авчхаж! Би гэрэл гэгээний хүн байтал намайг харанхуйн хүн болгочихжээ. Эцгийг нь хөөж, тууж,

үйлийг нь үзсэн хүмүүс үрийг нь наймаалчихсан байж. Эцгийг минь амьсгаа хураахад, дэр болгож асан цөллөгийн чулууг нь аваад, миний хүзүүнд дүүжлэн угаадасны нүх рүү шиджээ. Намайг нялх байхад минь зэрэмдэглэн зовоосон тэр өөдгүй шаар, муу хулгайчууд одоо ч миний дотор ив илхэн, би тэднийг, амьд байгаа юм шиг л харж байна. Би булшин дээр бөөн хар хэрээнүүдэд тоншигдсон өөдөсхөн мах байжээ. Би цусаа гоожуулан, энэхүү зүүдэнд ормоор сүүдгэнэлийн өмнө амь тэмцэн орилж байжээ. Өө! Намайг хаана чулуудсаныг нь ээ, нааш цааш миегнэх олны гишгэчих хөл дор шүү, намайг хамгийн адгийн амьтнаас ч дор, албат, зарц шивэгчнээс ч, цөллөгийн ялтангаас ч, боолоос ч дор болгож, нажид нь өмхий самхай үнэртсэн нүх болсон, бүх юм эргэлтгүй алга болдог газар луу шидсэн байна шүү. Би тэндээс гараад ирэх нь энэ! Би дахин амиллаа! Би энд ингээд зогсож байна! Энэ бол хариугаа авсан хонзон.

Тэр сууснаа босон харайж, толгойгоо базлан дахиад л нааш цааш алхлан, аймшигт догшин ганцаар яриагаа үргэлжлүүлээ.

— Би хаана байна? Өндөр дээр байна. Хаа хүрээд ирчхэв? Оргил дээр. Энэ оргил, энэхүү орчлонгийн бөмбөгөр орой, энэ агуу их сүр хүч бол миний орон гэр юм. Энэ, хүн хүрэхийн аргагүй агаар дундах сүмд амьдран агч бурхдын нэг нь би юм! Миний дороос нь харж байгаа энэ оргил, нүд анимаар гэрэл гэгээ цацруулсан энэ хүрэхийн аргагүй шилтгээн, аз жаргалтуудын энэ эвдэршгүй бат цайзад би хөл тавьж байна. Би тийшээ авирч гарлаа. Би тэнд орж чадлаа. Хувь тавилангийн хүрдний шийдвэрлэх эргэлт! Би тээр доор байж байснаа, тээр дээр өндөрт гараад иржээ. Өндөрт үүрд гарч! Би лорд хүн, улаан нөмрөг, шүдтэй титэмтэй болж, хаадыг ширээнд залрахад нь байлцаж, андгай тангаргийг нь авч, дээд түшмэд, хунтайж нарын хэргийг шүүж, дураараа амьдрах болно. Намайг чулуудсан ёроолгүй хавцлаас, тэнгэрийн оргилд би гарчээ. Надад хот хөдөөд, ордон шилтгээн, цэцэрлэгт хүрээлэн, ангийн газар, ой мод, сүйх жууз, сая саяын хөрөнгө байна. Баяр наадам хийж, хууль захирамж гаргаж, аз жаргал, баяр цэнгэлийг дураараа сонгон, талын цэцгийг тастах эрхгүй байсан тэнүүлч Гуинплен, тэнгэрийн одыг түүх болно.

Хүний сэтгэлд харанхуй, харамсмаар цөмрөн орох гэдэг энэ! Урьд нь баатар байсан, одоо ч гэсэн хэвээрээ байж магадгүй, Гуинплений маань ёс суртахууны эгээрлийн сүр жавхлан нь эд юмсын эгээрлийн сүр хүчинд шахагдаж эхлэх нь энэ. Хор хөнөөлтэй өөрчлөлт. Буянт үйлийн үрийг, сүрэг шуламс устгачхаж байгаа нь

энэ. Гайхуулан цочирдуулна гэдэг хүний хамгийн эмзэг газар байдаг. Ядуу зүдүүгийн ачтай нөлөөгөөр Гуинплений сэтгэлээс хөөгдсөн нэр хүндэд дур татагдах, булхай луйвартай зан, хуял тачаал, шунахайрал зэрэг энгүүндээ эрхэм дээд юм гэж нэрлэдэг өөдгүй юмс одоо түүнийг бөөн бөөнөөрөө дайрч, энэхүү ариун уудам сэтгэлийг эзлэн авчээ. Энэ бүхний буруу нь тэгээд юунд байв аа? Английн эрэг дээр хаягдсан илгэн цаастай дашмагт байжээ. Санаанд оромгүй азаас болж санаа сэтгэл буруугаар эргэж болдог.

Гуинплен бардам омгоос балга балгаар нь зангилаад, сэтгэл нь улам харанхуйлан бүүдийж байлаа. Сайх ундаа ийм л хортой.

Тархи толгой нь эргэн, цочирдон гайхуулсан өөрчлөлт түүнийг бүрэн эзэмдэж, түүнийг хүлээн аваад зогсоогүй амтархан ахисаар байгаа нь энэ. Цангаагаа гаргаж чадахгүй л байлаа. Солио галзуугийн цомд ам хүрээд, ухаан мэдрэлээ алдахыг алийг тэр гэхэв. Түүнийг цаг үргэлж л битүүхэндээ эгээрэн хүсэж явсан юм чинь аргагүй. Түүний харц нь ямагт дээдсийн хүрээ рүү чиглэдэг байжээ. Харна гэдэг маань хүсэхээс ялгаа юу байх вэ. Бүргэдийн дэгдээхэй бүргэдийнхээ үүрэнд төрдөг нь учиртай.

Тэр одоо лорд болжээ. Энэ бүхэн хоромхон зуурт л ёстой юм ёсоороо болж байх шиг санагджээ. Хэдхэн цаг өнгөрч байгаа ч, өчигдрийн бүх юм ул болон холджээ.

Гуинплен сайн юмны садаа болсон эрхэм гоцын зангатай учирчээ.

«Азтай хүн» гэж хэлүүлж байгаа хүн хөөрхийлөлтэйеэ!

Аз жаргалыг даахаас, гай тотгорыг давах нь арай хөнгөн. Элбэг дэлбэгийг бодвол, дутуу гуцуугаас хүн мултрахаа хүрвэл мултарчихдаг. Ядуу зүдүү нь Харибда, баян тансаг нь Сцилла²⁸⁵ юм. Тэнгэрийн сумыг даан зогсож чадсан мөртөө, гэнэтийн цахилгааны нүд сохлом гэрэлд хөсөр ойчих байдаг. Ёроолгүй хавцлыг чи юман чинээ бодохгүй атлаа, хүсэл мөрөөдлийн түмэн жигүүрээр үүлэн дээр гарахаасаа айна шүү дээ. Өндөрт гарлаа гээд доромжлогдон басуулахыг хэн байг гэхэв. Өргөмжлөгдөн өндөрт гарахад няц унахын аюул байдаг.

Аз хийморь ахдаад ирэхээр, өөрийгөө ойлгон, мэдэхэд зовлонтой. Тохиол гэдэг, хуурамч царайнаас юуны ялгаатай байх вэ. Түүнээс илүү хуудуутай юм гэж үгүй. Зөн билэг үү, эсвэл хорон санаат үйл үү?

Гал болгонд гэрэл байх албагүй. Учир нь гэрэл гэдэг маань үнэн бөгөөд харин гал нь хуурамч байж болно. Та түүнийг асаж байна л гэж бодно, гэтэл хэрэг дээрээ үнс болчихсон байна.

Шөнө. Харанхуйн дунд дэлгэгдсэн цонхон дээр нэгэн гар асаасан лаа тавина. Лавын лааны сүүмгэр гэрэл пад харанхуйд од шиг харагдан, удган эрвээхэй түүн рүү зүтгэнэ.

Үүнд эрвээхийн буруу гэж юу байна аа?

Могойн харц шувууг өөрийн эрхгүй татчихдаг шиг, галын гэрэл удган эрвээхийг татаж байгаа нь тэр.

Шувуу эрвээхэй хоёр үүнийг давж чадна гэж үү? Өнчин навч салхинд унахгүй тогтож чаддаг юм уу? Таталцах хуульд захирагддаггүй чулуу байдаг юм гэж үү?

Энэ бүх асуудлуудад эд юмсын юм байлаа ч, бас ёс суртахууны утга учир байгаа нь мэдээж.

Гүнжингийн захианаас хойш Гуинплен өөрийгөө барьж чадаж байв. Уруу татахыг юман чинээн бодохгүй сөрөх хангалттай хүч түүнд байлаа. Гэвч тэнгэрийн хаяаны нэг үзүүрт намдсан хуй салхи нөгөө үзүүрт догширдог шүү дээ. Хувь тавилан ч ганирахаа хүрвэл байгалиас дутахгүй байж чадна. Салхи анх удаа дайрахдаа модыг ганхуулснаа, хоёр дахь дайралтаараа үндсээр нь булга татдаг.

Халаг хоохой! Өндөр бүдүүн царс, ингэж булга татагддаг бус уу?

Ийнхүү Портлендийн байц дээр аравхан настай хоцорсон хүү, үхэх сэхэхээ үзэх тулалдаанд, сууж явахаар бодож байсан онгоцыг нь аваад арилсан догшин шуурга, аврагдах ганц найдварыг нь залгисан далайн ёроол, толгой хоргодох газар өгөхөөс татгалзсан дэлхий, зүгийг нь заагаад өгчихөөр ганц ч болов од гялайлгаагүй тэнгэрийн орой, өрөвдөж хайрлаагүй ганцаардал, пад харанхуй, далай, тэнгэр, аюул бүхэн бөөгнөрсөн хязгаар төгсгөлгүй бүх л тааврыг багтаасан өөр нэг зах хязгааргүй зэрэг өрсөлдөгчдийнхөө өөдөөс нүд халтиралгүй тас ширтэж байсан тэр хүн, өрөвдөж хайрлахыг мэддэггүй, үл мэдэгдэх үйлийн үрийн өмнө чичрэн дагжаагүй, сэтгэлээр ч унаагүй тэр хүн, балар эртний Геркулес үхлээс ширвээтээгүй шиг, нялх хүүхэд байхдаа шөнөөс сүрдээгүй тэр хүн, энэхүү даанч тэнцүүргүй тулаанд дайн зарлаж байж, өөр нэг хаягдмал нялх амьтныг ивээлдээ авсан тэр хүн, сөхөрч унан алдан тамирдсан мөртөө, илүү лайг өөртөө үүрэн улам ч сульдсан боловч, тал бүрээс нь хүрээлэх харанхуй гэгч мангасын хошуувчийг өөрийн гараар мулт татсан тэр хүн; өлгийнөөсөө гарангуутаа л хувь тавилантайгаа халз тулалдан, наснаасаа өмнө араатан номхруулагч болсон тэр хүн; өрсөлдөгчийнх нь барин тавин хүчээр давуу нь тэмцэж туслахад нь саад болоогүй тэр хүн; цөмөөрөө түүнийг орхин хаяж гав ганцаараа үлдсэнээ юманд бодолгүй хувь тавилангаа даган,

эр хүн шиг эрвэлзэн эмээлтэй морь шиг дэрвэлзэн замаа хөөж асан тэр хүн; хөрж даарах, өлсөж цангахын зовлонг биеэрээ амссан тэр хүн; биеэрээ тарваган хүн шиг ч сэтгэлээрээ аварга хүн маань; шуурга, гай тотгор гэгч хоёр нүүртэй ёроолгүй ангалын догшин амьсгалыг ялан дийлсэн Гуинплен маань одоо ихэрхэг зангийн сэр сэр салхинд найган ганхаж байгаа нь энэ.

Үйлийн үр гэдэг хүнийг гай тотгор, ядуу зүдүү, догшин шуурга, амь тамлам зовлон зүдүүрээр булж булчхаад цаадах нь хөл дээрээ зогсож байгааг харчхангуутаа, налиглаж, инээмсэглэж эхлэхэд нь хүн гэдэг амьтан хөөрч мансуурахдаа хамаг бие нь сульдхийгээд явчихдаг ажээ.

Үйлийн инээмсэглэл! Үүнээс аймшигтай юм байх уу? Энэ бол хүний сэтгэлийг хайр гамгүй уруу татагчийн хамгийн эцсийн арга юм шүү дээ. Хувь тавилан заримдаа, бар лугаа адилаар барвайсан савраа сунгах нь байдаг. Хар санаатай л бэлтгэл. Мангасын ой гутам наалинхайтал. Дээшлэн томрох тусмаа хүч нь сульдаж байгааг хүн бүр ажигласан байдаг. Гэнэт суга өсөх нь тэнцвэрийг алдагдуулж, чичрэг өвчинтэй ч болгож мэднэ.

Тоо томшгүй олон шинэ санаа бодол Гуинплений тархинд гялалзан орж ирнэ. Битүүлэг гэгээ, харанхуй хоёр ээлжлэн өнгөрсөн ирээдүй хоёрын ухаарч ойлгохын аргагүй мөргөлдөөн болж байлаа. Энэ нь хоёр Гуинплений халз учраан, нэг биеэ хоёр хуваасан юм шиг л болов. Ард нь харанхуйгаас гарч ирсэн уранхай ноорхой хувцастай, харсан амьтны инээд хүргэсэн толгой хоргодох газаргүй, даарсандаа дагжиж, гэдэс нь хонхолзсон тэнүүлч, өмнө нь өөрийн сүр хүчээр Лондоныг гялбуулсан, тарган цатгалан дээгүүр харцтай гялалзсан дээдэс байна. Хуучин бүрхэвч хальсаа хуу татан хаяад, шинэд оржээ. Марзганагчаас болиод, лорд болжээ. Арьс гуужих шиг санагдана. Энэ бол их нарийн, нэг талаар сайн, нөгөөтээгүүр саар эд. Эцгийнхээ тухай бодов. Огтын мэдэхгүй эцгээ бодно гэдэг зүрх шимшрэм зовлонтой! Түүнийг ямаршуухан хүн байсныг нь төсөөлөхийг эрмэлзэв. Дөнгөж саяхан түүнд сургийг нь дуулгасан ахаа бодов. Ингэхээр садан төрөлтэй байх нь! Юу? Гуинплэнд садан төрөл байх нь ээ! Үлгэрийн мэт элдэв тааварт автагдлаа. Хачин гоё зураг нүднийх нь өмнө тодрон, ер бусын гоё сайхан үйл явдал үүлэн дунд хөвөх мэт хөврөн бүрээ бөмбөрийн дуу чихэнд нь сонсогдох шиг боллоо. «Тэгээд би чинь бас уран үгийг ус цас шиг урсгах болно» гэж бодлоо.

Ингээд лордуудын танхимд нүд гялбуулам сүртэйгээр орж очихоо төсөөлөн байв. Шинэ шинэ саналга, бодлоор дүүрэн хүн

тийшээ орох болно. Хэлж яримаар юмных нь ихийг яана! Ямар их санаа түүнд байна вэ! Тэд нараас ямар их давуу байна вэ. Түүнд үзээгүй юм гэж байхгүй, амьдралын хатуу ширүүнийг биеэр амсаж, зовж зүдрэн, даван туулсан хүн болохоор «Та нарын сургийг нь ч дуулаагүй тэр зүйлийг би биеэрээ харсан юм» гэж ам бардам хэлж чадна. Өнгө зассан, хуурамч хорвоод амьдарч яваа, тэр ихэмсэг язгууртнуудад ганцхан үнэнийг л улаан нүүрэн дээр нь хэлээд өгнө. Юуг ч нууж хаалгүй хэлээд өгөхөд тэд дагжин чичрэх болно. Түүний мундгийг мэдчихээд алга ташин угтах болно. Тэр нь бүхнийг чадагч мундагчуудаас толгой өндөр, хэнийг нь ч хөлдөө чирчихээр хүчтэй болно. Тэдэнд үнэн гэж юу байдгийг үзүүлэх учраас гэрэл эзэмшигч шиг, өмнө нь гарч ирэх болно. Ямаршуухан ялалт болно гэж бодно оо!

Хэдийгээр сэтгэл догдлон, сав саруулаараа байгаа ухаанд нь энэ бүх бодол саналга орж байвч, Гуинплен дэмийрч байгаа хүн шиг татав ятавхийн, аль дайралдсан түшлэгт сандал дээр сууснаа, хэсэгтээ бүхнийг умартан гөлийж, тэгснээ дахин босон харайна. Өрөөн дотуур нааш цааш холхиж, тааз руу харан, сүлдэн дээрх ойлгогдомгүй дүрсийн учрыг олох гэж ажиглаж, хананы хилэн бүрээсийг илж үзэн, сандлыг нааш цааш нь хөдөлгөн тавилж, хуйлаастай илгэн жуухыг дэлгэн харж, Бекстон, хамба, Гендрейт, Генкервил, Кленчарли гэсэн зэрэг хэргэмүүдийг тус тусад нь салган тавьж, хаадын тамганы лацны дардсыг харьцуулан үзэж, торгон утсыг нь оролдож үзсэнээ, цонх руу тулан очиж, усан оргилуурын ус шоржигнохыг чагнан, гантиг баримлуудыг нь ширтэн харж баганыг нь зүүдэн өвчтэй хүний яарамгүй байдлаар тоолсноо «Тийм ээ, энэ бүхэн бодит зүйл байна» гэж дуугарав.

Хилэн хувцсаа илж үзсэнээ,

— Энэ чинь би мөн үү? гэж асуугаад, өөрөө өөртөө, — Мөн байна гэж хариу өчлөө.

Дотор сэтгэлийнх нь догшин шуурга хараахан дарагдаагүй хэвээр л.

Түүнийг байдгаар нь эзэлсэн энэхүү сэтгэлийн хуй салхиндаа сульдан, ядарснаа мэдэрч байгаа болов уу? Цанган, өлсөхөө тайлан, унтаж амраа болов уу? Хэрэв тэгсэн байлаа гэхэд өөрөө ч мэдэлгүй хийсэн байж таарна. Хүн, сэтгэлийн хүчтэй догдлолд орохоороо, ямар ч бодож санасан юмгүйгээр, бие бялдрын бүхий л шаардлагыг хангадаг билээ. Тэгээд ч Гуинпленийг зовоож байсан элдэв саналга бодол, утаа лугаа адилаар замхран байлаа. Галт уулын өрхний

амсраар хар гал дөл бургилан гарах үед, галт уул бэлд нь мал сүрэг бэлчээрлэж байгаа шүү гэдгийг бодон үздэг гэж үү дээ.

Цаг хугацаа ч өнгөрсөөр байлаа.

Үүрийн гэгээ тодрон өдөр айлчилж ирэв. Нарны гэрлийн цацраг тасалгаанд нэвтрэн оронгоо Гуинплений ухаан мэдрэлд ч тусжээ.

— Дея яах болж байна? гэж Гуинплэнд санууллаа.

Зургаадугаар дэвтэр. ҮҮРСИЙН ДҮР ТӨРХ

I. Хүнийг үзэн ядагч зожгийн өгүүлэх нь

Саутворкийн гяндангийн хаалгаар Гуинпленийг ороод явчихыг харсан Үүрс мэгдэн цочирдсондоо, сайх явдлыг нуугдан харж байсан гудамжныхаа доголд хөшчих шиг болжээ. Түүний чихэнд, нэгэн заяагүй амьтныг залгисандаа баярласан шоронгийн улилт гэлтэй элдэв цоож, цуургын хангир жингэр гэх дуун сонсогдсоор авай. Тэр хүлээсээр байлаа. Хэнийг? Тэр байдгаараа харан байв? Юуг? Энэхүү хатуу нь дийлдсэн хаалга, нэг л хаагдаа бол тийм амархан онгойхгүй нь мэдээж. Харанхуйн дунд тэр чигээрээ хөдөлгөөнгүй хөшсөн мэт, сайх хаалга нугасаараа арай ядан хөдлөх агаад ялангуяа хэн нэгнийг гаргах болбол бүр ч ярвигтай. Ороход саадгүй болсноо, харин гарна гэдэг шал өөр хэрэг. Үүрс үүнийг мэдэж байлаа. Гэвч хүн гэдэг амьтан, заримдаа өөрийн дур хүслээс гадуур, хүлээж горьдохоор заяагджээ. Биднийг ямар нэг үйлдэлд түлхэж буй мэдрэхүй, зөнгөөрөө л үргэлжлэн байдаг агаад чухам онилсон эд юм нь байхгүй байлаа ч гэсэн, биднийг тодорхой нэгэн хугацаанд хэдийнээ байхгүй болсон зорилго руу хоосон тэмүүлүүлж байдаг билээ. Ямар ч ашиггүй хүлээлт, утга учиргүй отолт, хэдийнээ нүднээс далд орсон эд юмыг анхааран, цаг алдана гэдэг, энэ бүхнийг хүн нэг бус удаа тойрч гардаггүй, дайрч гардаг жамтай. Хүн ямар нэг юмыг огтын утга учиргүйгээр зөрүүдлэн хүлээсээр байдаг. Яагаад гэдгээ өөрөө мэдэхгүй мөртөө нэг газраа зогссоор л байдаг. Жигтэйхэн идэвхтэй эхэлсэн юмаа назгайруулан үргэлжлүүлдэг. Ийнхүү зөрүүдлэл нь тамирыг нь барж, хүчийг нь сулруулдаг. Үүрс бусад хүнээс олон юмаар ялгаатай ч гэлээ хадагдсан юм шиг зогссоор л байлаа. Биднийг нөмрөн ирэхийг нь юугаар ч саатуулж чаддаггүй, асар том үйл явдалтай нүүр учрах үес хамаг сэтгэлийг эзэмддэг жаахан цэнэж болгоомжилсон бодолд автагджээ. Намхан хар хана луу ч, өндөр лүү нь ч харж, дүүжлүүрийн шаттай явган хаалга, хохимойн дүрстэй дааман хаалга ширтэж, яг л гяндан, оршуулгын газар хоёрын дунд зоогдсон юм шиг байлаа. Хүн бүр холуурхан өнгөрөхийг хичээдэг, эл хүн амьтангүй гудамжинд явж байгаа хүн гэж өдрийн од шиг тул Үүрсийг ажиглах хүн алга ажээ.

Эцэст нь нуугдан харуулдаж байсан чулуун цүнхлээсээ гарч, аажуухан эргэж алхав. Нар орох дөхсөнийг бодоход, нэлээд удаан тэнд зогсжээ. Байсхийгээд л Гуинплен ороод явчихсан нөгөө явган

хаалгыг эргэн эргэн харж явлаа. Нэг л гөлийсөн, маанагдуу царайтай болжээ. Тэр гудамжны мухарт хүрэн, булан ороосноо дахин нэг гудамжаар орж, хэдхэн цагийн өмнө өөрийг нь энд авчирсан замыг бүдэг бадаг санаж явлаа! Гяндан байсан гудамж нь хэдийнээ ард үлдсэн ч гэлээ, шоронгийн хаалгыг харж болох юм шиг байн байн эргэн харж явав. Аажим аажмаар Таринзофильд ойртсоор. Яармагийн талбайн хажуу талын гудамж нь цэцэрлэгүүдийн хашааны хоорондох хүн амьтангүй зөрөг байлаа. Байдгаараа бээцийн хонин хашаа, гууг даган явж байв. Тэгснээ гэнэт зогтусан, — Тэгэх тусмаа л сайн! гэж дуу алдлаа.

Тэгэнгүүтээ, хэргийн учрыг арай л гэж олж байгаа хүн гэнэт тэгдэг шигээр, дух руугаа хоёронтоо, гуя руугаа мөн хоёронтоо алгадаад авав. Явдлаа ч сааруулсангүй үглэснээ, дуугаа улам улам чангаруулан байж,

— Их зөв юм болж! Өө, өөдгүй новш! Дээрэмчин! Сагсуу! Шаар! Үймээн дэгдээгч! Төрийн тухай тэнэг юм чалчсанаас нь л болж. Мэдээжээр үймээн гаргагч. Би үймээн самуун дэгдээгчийг гэртээ орогнуулж байж. Одоо түүнээс салж амарлаа. Бидний нэрийг гутааж шившиг болголоо. Цөллөгт явуулж таарна! Өө, бүр тэгээсэй билээ! Хууль гэж юм бий. Өө муу, ачийг санадаггүй золиг чамайг! Би түүнийг хүмүүжүүлсэн гэж байгаа. Та нар тэгээд хар л даа. Түүнийг хэн дэмий юм чалч гэж албадаа вэ? Бас тэгээд шүүмжлэх санаатай. Төрийн хэрэгт хошуу дүрнэ гэнэ ээ! Надад хэлээд аль! Халаасандаа хэдхэн сохор зоостой хэвтэж, алба гувчуур, болон аль хамаагүй юмны тухай донгосож байдаг! Пеннийн тухай элдвийг хэлж зүрхэлснийг нь! Хааны зэс зоосыг доромжилно гэдэг, их эзэгтэйг доромжлохтой утга нэг! Түүний фартинг гэдэг чинь хатан хаан өөрөө л гэсэн үг. Түүн дээр их эзэгтэйн дүр байдаг, чөтгөр ав, түүний ариун дүр байгаа! Бид чинь хатан хаантай улс уу, үгүй юу! Тэгвэл түүний ногоорсон зэсийг нь хүндэлж л таарна. Төрд юм бүгд хоорондоо холбоотой. Энэ бүгдийг мэдэж байх хэрэгтэй. Би олон оймс элээсэн хүн. Би амьдралыг мэднэ. «Та чинь тэгэхээр улс төрөөс дөлж явдаг юм аа даа» гэж хүн надад хэлж болох юм. Найзууд минь, улс төрийг би илжигний өмхийрсөн арьс шиг л бодож явдаг хүн дээ. Би нэг удаа түшээ гүнээс тулуурын амт үзэж билээ. Тэгээд л би өөртөө «Хангалттай, би улс төр гэж юу байдгийг ойлголоо» гэж хэлсэн юм. Харц ард ганц сохор зоосоо улс төрд өгнө, тэрийг нь хатан хаан авчихна, харц нь түүнд барласнаа хэлдэг. Үүнээс амар юм гэж үгүй. Бусад нь лордуудад хамаатай. Эрхэм дээдэс харын болон шашны язгууртнууд, харин Гуинплен хар гэрт байна! Болж, усан

онгоцон дээр сэлүүр татах болно! Ингэх л ёстой, үнэн шударга явдал. Энэ бол хаанаас нь харсан утга учиртай, агуу их, хууль ёсны ял. Тэр өөрөө буруутай. Дэмий чалчихыг хориглодог. Гэтэл чи лорд шиг загнах нь уу, мал минь. Бэрээ баригч түүнийг баривчлан шүүхийн түшмэл түүнийг авч яван, захирагчийн атгад аваачаад хийчихсэн. Тэгээд одоо түүнийг ямар нэг хуулийн хүн, тахиа шиг л өдийг нь зулгааж байгаа вий. Тэр сайн эрчүүд чамаар хамаг байдгийг чинь хэлүүлээд өгөх вий! Чамайг болгоод өгнө өө гайгүй, хонгор минь! Чамд муу тусмаа надад сайн. Бурхны минь аврал, надад сайхан байна. Үнэнээ хэлэхэд, би азтай хүн юм. Тэр хүү, охин хоёрыг авч ямар тэнэг юм хийгээ вэ, би гэдэг хүн! Гомо бид хоёр мөн ч тааваараа байсан юм сан. Тэр өөдгүй хогууд, юугаа хийх гэж муу мухлаг тэргэнд минь орж ирэв дээ?

Нялх, бага байхад нь зууралдан үйлээ үзсэн минь багадлаа гэж үү? Тэр хоёрыг чирч явсан минь буруутлаа гэж үү? Таарсан юмаа ч аварч дээ! Хүний ой гутам зэрэмдэг, хоёр нүд нь хараагүй сохрыг шүү! Энэ бүхнээс татгалзаад үз л дээ! Тэднээс болж хэчнээн ч их өлөн зэлмүүр явав даа! Гэтэл гайнууд чинь өсөж ирээд, бас бие биедээ хайр сэтгэлтэй болсныг нь яана! Хоёр зэрэмдгийн дурлал! Юунд хүрснийг нь хар л даа. Бах, сохор номин хоёрын энх тунх амьдрал гэнэ, үхсэн баас! Тэгээд энэ бүгд нүдний минь өмнө болсныг яана. Энэ бүхэн үнэн мөний шүүхийн оролцоотойгоор л дуусвар болох ёстой байж. Бах бас улс төр гэж вааглаж байна гэнэ ээ, маш сайн! Одоо би тушаагүй болж амарлаа. Бэрээ баригчийг ирэхэд, хүн гэдэг амьтан аздаа итгэдэггүй зантай болохоор эхлээд мангартаж, хий юм л нүдэнд үзэгдэж байгаа юм шиг, ийм юм байж болохгүй, энэ бол нойрон дунд үзэгдэж буй ёрын зүүд гэж бодож байсныг нь яана. Гэтэл энэ маань хоосон санаа биш, жинхэнэ үнэн явдал байж шүү. Гуинплен гомдохгүйгээр гянданд сууж авчээ. Тэнгэрийн бошиг ийнхүү болгожээ. Энэ муу зэрэмдэг, эрх баригчдын анхаарлыг миний үйлдвэрлэл, муу чононд минь хандуултал шуугиан тарсныг нь хараач! Ингээд Гуинплен цаашид байхгүй боллоо! Хоёр өөдгүй амьтнаас хоёулаас нь салж амарлаа гэж хэлж болно. Нэг сумаар хоёр туулай буудах нь энэ. Дея ч тэсэхгүй үхнэ. Гуинпленийгээ харахгүй болохоор, тэнэг амьтан түүнийгээ хардаг байсан юм, амьдрал ямар ч хэрэггүй юм гэж шийдэн: «Энэ орчлон хорвоод юугаа хийх юм билээ» гэж өөртөө хэлж таарна. Тэгээд л тэр ч бас алга болон одно доо. Аян замдаа сайн яваарай. Хоёулыг чинь чөтгөр аваачиг! Энэ өөдгүй амьтдыг би

ямагт үзэн ядаж явсан юм! Үхэж далд ор. Дея! Халаг хоохой, би
ямар баяр хөөртэй байна аа!

II. Тэгээд хэрэг дээрээ...

Тэр «Тедкастерийн буурчийн газар» буцаж ирлээ. Англичуудын «зургаан цагийн хагас өнгөрч байна» гэж ярьдаг зургаа хагасын харанга цохилоо. Дөнгөж бүрэнхий болж байв.

Никльс орох хаалганы босгон дээр зогсож байлаа. Өглөө нь ухаан алдталаа айсандаа нүүр царай нь эвгүйрхсэн нь тавигдаагүй хэвээр л байжээ.

Тээр тэнд яваа Үүрсийг харах мөртөө,

— За яав? гэж орилов.

— Юу яав гэж?

— Гуинплен ирэх нь үү? Цаг болчхоод байна. Одоохон хүн амьтан цугларна. «Инээмтгий хүн» өнөөдөр тоглох юм уу, үгүй юу?

— «Инээмтгий хүн» чинь би байна гэж Үүрс хариу өчингөө буудлын эзэн рүү харан тачигнатал хөхрөв.

Дараа нь хоёр давхар өөд шууд гараад, буудлын хаягийн хажуу талын цонхыг онгойлгоод түүгээр цухуйн бөхийснөө гар явуулж, «Инээмтгий хүн-Гуинплен», «Гэсгээгдсэн нажид» гэсэн зарлалтай самбар модыг хуу татан аваад сугандаа хавчуулчихсан бууж ирлээ.

Никльс түүнийг нүд дагуулан харна.

— Та яагаад хуулаад авчхав аа? гэхэд нь Үүрс дахин тачигнатал инээв.

— Та юундаа инээд хөөр болоо вэ? гэж эзэн асуув.

— Би хувиа бодож, довоо шарлуулахаар шийдлээ.

Никльс учрыг ойлгож, туслагч Говикемдаа ирсэн хүн болгонд өнөөдөр орой шийгүй болсныг хэл гэсэн зарлиг буулгав. Мөнгө хураагчийн шовгор болж байсан торхыг аваад, доод танхимын булан руу өнхрүүлээ.

Дараахан нь Үүрс «Ногоон хайрцагт» орж очив.

Буланд хоёр зарлалаа тавиад «эмэгтэйчүүдийн өрөө» гэж өөрөө нэрлэсэн, бүхээгт тэрэгнийхээ хэсэг рүү оров. Дея унтаж байв. Өдрийн амралтын үеэр сурснаараа палаажаа товчийг нь тайлаад, бүхлээрээ хэвтэж байлаа. Түүний хажууд бодол болсон Винос, Фиби хоёр нэг нь исэр дээр, нөгөө нь шалан дээр сууж харагдана.

Цаг орой болсон ч тэд охин тэнгэрийн хувцсаа өмсөөгүйг бодоход аль хэр сэтгэл зовж байгаа нь илэрхий. Тэд бүдүүн ноосон цээживч, зотон банзалтай хэвээрээ байлаа.

Үүрс Деяг харснаа,

— Улам гүн нойрт бэлдэж байна даа гэж бувтнаснаа Фиби, Винос хоёр луу хандаж, — За та нар сонс! Бүх юм дууссан! Бүрээгээ хайрцагт нь хийж болно. Охин тэнгэр болж хувцаслаагүй чинь ч болж. Ингээд байхдаа муухай харагдахыг чинь яана, гэхдээ ямар ч байсан зөв юм хийж. Өөрсдийнхөө навтсаар л гангалж явахаас биш. Өнөөдөр ч, маргааш ч нөгөөдөр ч, нөгөөдрийн маргааш ч ший тоглохгүй. Гуинплен нэгэнт дууссан. Чөтгөр ч түүнийг одоо олохгүй гэснээ дахин Деяг ширтэж байснаа, — Үүнд ямаршуухан цохилт болох бол доо! Бөхөж байгаа лаа шиг л болно доо гэснээ уртаар амьсгаа аван, хацраа төмбийлгөн үлээснээ,

— Пүү, ингээд дуусдаг байжээ хэмээн өчив.

Тэгснээ шал худлаа инээн,

— Гуинплен бидэнд байхгүй гэдэг маань бүх юм байхгүйтэй адил. Гомогоо л алдаж байгаагаас ялгаагүй юм боллоо. Түүнээс ч дор. Энэ хүн л хүн бүхнээс илүү ганцаардана даа. Сохор хүн гэдэг зовлонг даахдаа биднээс дор шүү дээ гэв.

Тэгээд тэрэгнийхээ буланд байгаа сэхээвч рүү очиж,

— Өдөр яасан урт болж байна аа. Хэдийнээ долоон цаг болоод байхад зэгсэн гэрэл гэгээтэй л байх юм. За яах вэ дэнгээ асаая даа гэв.

Тэр хэт цахиураа цахиж, «Ногоон хайрцгийн» таазнаас унжиж буй дэнлүүг ноцоов. Тэгээд Дея руу бөхийн харлаа.

— Ханиад хүрэх нь байна даа. Хүүхнүүд минь, та нар дэндүү нимгэн хувцас өмсүүлжээ. Францчууд,

Дөрвөн сар хавар биш.

Дотуур хувцсаа нимгэлэх хэрэггүй гэдэг юм даа.

Шалан дээр сүлбээр зүү хэвтэж байгааг харчхаад, бөхийж аваад ханцуйндаа хатгалаа. Тэгээд гараа сарвалзуулан, бүхээгт тэргэн дотроо нааш цааш холхив.

— Миний бодож санадаг булингартаагүй байна. Хэзээ хэзээнйхээсээ илүү ухаан саруул байна. Минийхээр бол, болох ёстой юм ёс журмаараа л болж, би ч гэсэн үүнийг дэмжиж байна, Деяг сэрэнгүүт л болж өнгөрснийг юуг нь ч нуулгүй хуу хэлэх минь.

Аюул сүйрэл дорхноо л нөмрөн ирдэг юм чинь. Гуинплен ингээд өнгөрлөө. Ингээд Дея ч баяртай. Бүх юм яасан сайхан бүтэв ээ! Гуинплен шоронд, Дея булшинд, яг таг, өөд өөдөөсөө очлоо гээч. Үхлийн жинхэнэ бүжиг. Хоёр хүний хувь тавилан хорвоогоос арчигдав аа, хөөрхий. Хувцсыг нь далд хийе. Хөвхөн хайрцгаа, өөрөөр хэлбэл авсны тагийг хаая. Аз заяагүй хосууд байлаа. Дея нь нүдгүй, Гуинплен нь царай байхгүй. Энхжиний оронд, эзэн тэнгэр

Деяд хараа хайрлаж, Гуинпленд үзэмжийг эгүүлэн өгөх байлгүй.
Үхэл бүгдийг эмх цэгцтэй болгодог юм. Бүх юм сайн. Фиби, Винос
хэц, хэнгэргээ хананд өлгөчих. Хөөрхөн хүүхнүүд минь, та нарын
нэрээс цаашгүй авьяас тань одоо хатах нь дээ, яая гэхэв. Тоглохоо ч,
бүрээ үлээхээ ч больсон. «Гэсгээгдсэн нажид» маань өөрөө
гэсгээгдэх нь энэ. «Инээмтгий хүн» алга болсон. Дуутай тэнгэр
бороогүй гэгч боллоо. Энэ Дея унтсаар л байна. Муу нь юу байх вэ.
Үүний оронд би байсан бол сэрэх ч үгүй. Гэлээ ч мөдхөн дахин
нойрсоно оо гайгүй. Ийм яс арьс болсон амьтан амархаан нүд анина.
Улс төрөөр оролдох гэдэг ийм л байна даа. Ямар хичээл вэ! Төр,
яасан зөв юм хийв ээ! Гуинпленийг захирагч, Деяг яс баригч
хэргийг нь гүйцээх нь. Сургамжтай байгаа биз. Буурчийн газрын
эзэн хаалгаа сайн түгжээ л байгаа даа. Бид өнөөдөр амьхнаараа
байж байгаад үхэх болно. Гэхдээ би ч биш, Гомо ч биш. Зөвхөн Дея
л. Би хуучнаараа л мухлаг тэрэгтэйгээ тэнэх минь. Насаараа тэнэж,
хэсэж байхаар заяагдсан хүн. Хоёр хүүхнийг ч тавьж явуулах минь.
Алийг нь ч авч үлдэхгүй юм шүү. Би ч бас хөгширсөн хойноо
савсганаж мэдэх хүн шүү. Садар эрийн шивэгчин гэдэг маань,
ширээн дээр байгаа талх л гэсэн үг. Би дур татагдахыг хүсэхгүй
байна. Миний насанд тохирохгүй эд. Turpe serilis amor²⁸⁶ Одоо
дахиад л Гомотой хоёулхнаа тэнэх минь. Ганц гайхах нь, энэ муу
Гомо л байна. Гуинплен хаана байна? Дея хаана байна? гэнэ дээ.
Хөгшин анд минь, ингээд дахин хоёулхнаа үлдлээ дээ. Чөтгөр ав, би
баяртай байна. Тэдний тэр амар амгалан амьдрал, хоолой дээр юм
тээглэхихсэн шиг болгочихсон юм. Халаг минь, тэр өөдгүй
Гуинплен буцаад ирэхийг ч боддоггүй шүү. Тэр биднийг хаяжээ. Их
сайн. Одоо Деягийн ээлж болсон. Энэ их хүлээлгээд байх юм биш.
Би дуусаж байгаа юманд л дуртай. Түүнийг үхэхэд нь саад хийж
хуруугаа ч хөдөлгөхгүй юм хуна. Үхэж далд ор, дуулж байна уу?
Аяа хоохой, сэрчхэв үү дээ?

Дея нүдээ нээлээ. Ихэнх сохор хүн нүдээ анин унтдаг билээ.
Түүний цагаан цайлган зөөлөн царайд инээд тодрон гэрэлтэх мэт.

— Энэ мишээж байна гэж Үүрс бувтнаад, — Би инээж байна.
Бүх юм сайн болохын ёр гэв.

— Фиби! Винос! гэж Дея дуудаад, — Жүжиг эхлэх болчихоод
байгаа биз дээ. Би овоо унтчихжээ дээ, янз нь. Намайг
хувцаслаадхаач гэв.

Фиби, Виносын хэн нь ч хөдөлсөнгүй.

Энэ үед Деягийн ямар ч хөдөлгөөнгүй сохор харц нь Үүрсийн
харцтай тулгарлаа. Хөгшин татвасхийв.

— Аль вэ, юугаа хийгээд байсан юм бэ? гэж Үүрс орилоод, — Хүүш, та хоёр чинь эзэгтэйнхээ хэлснийг сонссонгүй юу? Чих чинь дүлийрчихсэн юм уу, хаашаа юм? Бушуу хөдлөөч! Жүжиг эхлэх болчиход байна гэв.

Хоёр хүүхэн гайхсандаа амаа ангайн Үүрсийг харав.

Үүрс улам ч орь дуу болон,

— Та нар энэ үзэгчдийн цуглаад байгааг харахгүй байна уу? Фиби, Деяг хувцасла. Винос хэцээ дэлд гэж хашхичив.

Фиби дорхноо хэлснийг нь дагахад, Винос түргэн хөдөлж чадахгүй байлаа. Тэр хоёр юу хий гэснийг үг дуугүй гүйцэд гүйцэтгэх нь сайхан. Эзэн Үүрс нь тэдэнд ямагт оньсого таавар мэт байдаг байжээ. Юмыг дандаа ойлгохгүй байдаг хүн цаг үргэлж хэлснийг сохроор гүйцэтгэдэг. Тэд эзнээ ухаан солиорч гэж зүгээр л бодсон авч, зарлигийг нь биелүүллээ. Фиби хадааснаас хувцас авч, Винос хэцээ шүүрэн авав.

Фиби Деяг хувцаслаж эхлэв. Үүрс «эмэгтэйчүүдийн өрөөний» хөшгийг буулгаад, хөшигний цаанаас,

— Гуинплен, хараач. Хашааны хагас л лав хүнээр дүүрч. Орох хаалган дээр шахцалдаж байгааг нь ээ. Ямар олон бэ? Фиби, Винос хоёрт анзаарч байгаа царай алга аа. Энэ цыганууд яасан тэнэг амьтад байдаг юм бэ дээ! Миссирт яасан мангуу юмнууд суудаг бол? Хөшгийг нь бүү өргөөч дээ! Даруу байж үз, Дея хувцаслаж байна гэв!

Тэгээд түр чимээгүй болоход, гэнэтхэн,

— Дея яасан гоё юм бэ! гэж дуу алдах сонстов.

Энэ нь Гуинплений дуу байлаа. Фиби, Винос хоёр цочин татвасхийснээ эргэн харав. Энэ нь Үүрсийн амнаас гарсан Гуинплений дуу байжээ. Тэр нь хөшиг завсраар шагайгаад, тэр хоёрыг битгий гайхаад бай гэсэн дохио өгөв. Тэгээд яг л Гуинплен дуугарч байгаа юм шиг,

— Сахиулсан тэнгэр! гэлээ.

Тэгснээ ердийнхөө хоолойгоор,

— Дея сахиулсан тэнгэр болчихоо юу? Гуинплен минь, тэнэгтэхээ больж үз. Бүх сүүн тэжээлтэн амьтнаас ганцхан сарьсан багваахай л нисдэг юм гэснээ, — Аль вэ, Гуинплен, яваад Гомог гинжнээс нь тайлаадах. Арай л ухаалаг зүйл болно байх гэв.

Тэгээд Гуинплений хөнгөн алхаагаар «Ногоон хайрцгийн» эвхдэг шатаар түргэн буулаа. Деяд сонсгохын тул Гуинплений явдлыг яг таг дуурайж байв.

Хашаа дотор, энэ болж байгаа юманд ухаанаа тавьчхаад өөр юуг ч сонирхохгүй байгаа, Говикемийг харчхаад, нааш ир гэж дохин,
— Хоёр гараа тос гэж шивгэнэн хэлснээ, атга дүүрэн жижиг зооснуудыг алган дээр нь тавьж өгөв.

Ингэж өглөгч загнасанд нь Говикемийн сэтгэл хөдөлжээ.

Үүрс чихэнд нь ийн шивгэнэв.

— Хүү минь хашаанд үлдээд, байдгаараа үсэрч харайж, бүжиглэж орилж, шүгэлдэж, хөлөө дэвсэлж, алга ташиж, инээж хөхөрч элдэв юм хэмхэлж хугач.

«Инээмтгий хүнийг» үзэхээр ирсэн үзэгчид эргэн явж, яармагийн өөр задгай театрт очихыг харан гутарч гоморхсон Никльс хаалгаа түгжиж авчээ. Элдэв зовлонтой асуудлаас зугтаахын мөн болж, орой нь ундаан зарахаа ч хүртэл больжээ. Шийгүй болохоор хийж байх юмаа олж ядан, лаа бариад, тагтан дээрээс хашаа руу харж зогсов. Үүрс хоёр гараа амандаа барьж, зөвхөн түүнд л дуулдахаар,

— Эрхэм минь, зарцаасаа жишээ аваарай, орилж хашхирч, дэвслээрэй гэв.

«Ногоон хайрцагтаа» буцаж ирээд чонондoo,

— Гомо, аль болох чанга улина шүү гэж зарлигдав.

Тэгснээ дуугаа өндөрлөн,

— Дэндүү олон хүн байна. Юм хэмхччихгүй байгаа даа л гэж айх юм гэлээ.

Винос хэцээ цохисон хэвээр л байв. Үүрс үгээ үргэлжлүүлэн,

— Дея ч хувцаслачхаж. Одоо эхэлж болох нь шив дээ. Ийм олон хүн оруулдаг нь ч юу ч вэ дээ. Ёстой пиг дүүрчээ. Гуинплен хараач, хөөе. Ёстой нэг шахцалдаж өгч байна. Өнөөдөр хамгийн их орлогоо олно гэдэгт мөрий тавья. Аль вэ хөөш, ажилгүй золигууд минь хөгжмөө авцгаа! Фиби нааш ирээд энэ урмаа аваадах. Сайн байна. Винос хэцээ сайн дэлд, чанга балбаад өгөөч! Фиби Алдарын дарь эх шиг зогсооч дээ. Авгайтан нар минь, минийхээр бол та нар арай л дутуу нүцгэлж дээ. Хантаазаа тайлчих. Торгон шаагаа нөмөрчих. Үзэгчид эмэгтэй хүний бие хас харахаасаа юунд нь дургүйцэх вэ. Ёс журам номлогчид бууж гарна биз, яадаг юм. Чөтгөр ав, жаахан даруу бус байхад юун нь муу байх вэ. Хичээнэ шүү! Ганирсан аялгуу гаргаадах. Үлээ, бүрээд, дэлд! Гуинплен минь, яасан ч олон хүн бэ дээ!

Тэгээд жаахан амсхийснээ,

— Гуинплен, аль вэ туслаарай. Ханаа буулгая гэв.

Тэгэнгээ нусны алчуур гаргаж дэлгээд,

— Юуны өмнө хамраа нэг сайн цэвэрлээд авдаг хэрэг ээ гэв.

Тэгээд нусаа сүртэй нь аргагүй нийсэн нь уруулаа хөдөлгөлгүй ярих, бусдын дуу хоолойг дуурайхад зайлшгүй хэрэгтэй бэлтгэл байлаа.

Алчуураа халаасандаа хийж аваад нөгөө түгжээ оньсоо хөдөлгөж эхлэхэд ердийнхөөрөө хангир жингэр дуугаран, бүхээгт тэрэгний хана бууж ирэв.

— Гуинплен, хөшгөө юунд хөдөлгөөд байна аа! Жүжиг эхэлтэл хаалттай байж байг! Тэгэхгүй бол амьтны өмнө ил гарчих нь байна шүү. Аль вэ та хоёр харин урагшаа гарч, хөгжмөө байдгаар нь тоглуулаад өг, авхай нар минь! Бүм! Бүм! Бүм! Үзэгчид ч гомдолгүй цуглаж дээ! Ёстой л олны хөлийн газрын шаарангууд! Бурхан минь яасан ч олон амьтан бэ дээ!

Үг дуугүй захирагдаж сурсан цыган бүсгүйчүүд, буулгасан хананы хоёр захад байрандаа очиж зогсов.

Энэ үед Үүрс ид шидээ гарган, ганц хүн биш харин бөөн хүн байгаа юм шиг дуу чимээ гаргаж эхэллээ. Хов хоосон цэлийн харагдах хашааг хүн зоноор дүүрэн мэт болгохын тул амьтан хүний дууг айхавтар дуурайж чаддаг авьяасаа гаргаж ирэх нь тэр. Зүг бүрээс хүн зоны нүргээн, адгуус амьтны орилолдоон сонсогдоно. Олны хөлийн газрын дуу шуугиан мөнөөс мөн. Хэрэв хэн нэг хүн, нүдээ аниад чагнаж гэмээж нь баярын өдөр ч юм уу эсвэл босож үймэлдсэн хүн зоноор дүүрэн талбайд байна уу даа гэж бодмоор. Үүрсийн цээжнээс тэр гэхийн тэмдэггүй дуу чимээ нүргэлэн, уйлж дуулан, харааж загнан, ханиаж найтаан, нус цэрээ хаялан, хамрын тамхи татан, хоорондоо ярьж, асуулт хариулт сонстож, нэг зэрэг дүнгэнэх нь гайхалтай. Нэг нь нөгөөгийнхөө дууг даран, улам чангаар ярилцана. Хүнгүй хоосон хашаа, эр эм хүмүүс, хүүхэд багачуудын дуугаар дүүрэх нь тэр. Бөөн дүнгэнэлдээн, тэр гэхийн тэмдэггүй шуугианы дундуур яг л утаан дундаас гарч ирж байгаа юм шиг хачин бархирах авиа, тахиа шувууны донгодох, муур хэржигнэх, нялх хүүхдийн часхийн орилох үе үе чих дэлсэнэ. Согтуу хүмүүсийн сөөнгөтсөн яриа, сарвуугаа гишгүүлчихсэн нохойн архирах ч сонсогдоно. Дуу чимээ газар сайгүй, дэргэд ч алсад ч, дээр ч, доор ч, баруунтай ч, зүүнтэй ч нүргэлнэ. Бүгд нийлээд бүхэл бүтэн нүргэлээн агаад, дуу болгон тус тусдаа орилоон байлаа. Үүрс нударгаараа, тохойгоороо, хавьтсан ойртсоноо дэлсэн, хөлөө дэвсэлж, нааш цааш харайн хашааны булангаас ч юм уу, эсвэл хөл доороос ч гараад байна уу гэлтэй дуу гаргана. Энэ нь цаанаа л нэг сүртэй, танил дуу чимээ байна. Шивгэнэж байснаа чангаран,

тэгснээ нүргэлэн, бүр сүүлдээ хар салхин лугаа адил сүртэй чимээ гаргана. Гав ганцаараа байгаа хэр нь үй олон болж байлаа. Ганцаар ярих авч, олон хүн зэрэг зэрэг дуу дуугаа авалцан дүнгэнэлдэх мэт. Андуу харах гэж байдагтай адилхан, андуу сонсох гэж байдаг ажээ. Протей²⁸⁷ харааны хувьд юу хийснийг, Үүрс сонсголын хувьд хийжээ. Олон хүнийг ингэж дуурайхаас илүү чадварлаг юм гэж үгүй биз ээ. Байсхийгээд л Деягийн өрөөний хөшгийг сөхөн харна. Дея чих тавин байлаа.

Говикем ч хашаа дотор ганц сайн шавайгаа ханатал тонгочиж өгч байв. Винос, Фиби хоёр ч байдгаараа хичээн бүрээгээ үлээж, бөмбөрөө цохино. Цор ганц үзэгч Никльс тэдэнтэй адилаар Үүрсийг галзуурчхаж хэмээн бодсон ч энэ нь түүний угийн дүнсгэр аашийг нь барайлгахаас хэтэрсэнгүй. Буурчийн газрын хөөрхий эзэн «Ямар балай юм» гэж үглэсээр байлаа. Дээр нь хууль байдгийг ямагт бодож явдаг хүний ёсоор төлөв төвшнөө хадгалсаар авай.

Энэхүү үймүүлж, зүтгүйтэхэд оролцож байгаадаа сэтгэл хөөрсөн Говикем л Үүрсээс дутахгүй тонгочиж байлаа. Энэ нь жаал хүүд хөгжилтэй сайхан байсныг хэлэх юун. Тэгээд бас атга дүүрэн зоос авсныг яана.

Гомо бодол болжээ.

Энэ бүх чимээ шуугианыг гаргангаа хажуугаар нь Үүрс юм ярьж байлаа.

— Гуинплен, нөгөө л бахь байдгаараа хуйвалдах нь дээ. Дахиад л өрсөлдөгчид маань, амжилтад саад болохыг хичээж таарна. Дургүйцэж исгэрлээ ч нэмэр болно уу гэхээс нэрмээс болохгүй. Тэгээд ч ер нь учиргүй олон хүн цуглаж дээ. Шахцалдаж чихцэлдээд ямар олиг байх вэ. Хажуугийн хүнд бөөр лүүгээ нудруулах тийм ч аятайхан биш дэг ээ. Сандал л битгий хэмхэлчихээсээ билээ. Зүтгүй олны хоол болох нь дээ. Ээ чааваас, Том-Жим-Жек анд маань байсан болоосой! Даанч дахиж үзэгдэхээсээ өнгөрчээ. Хараач, тариан түрүү шиг толгойнуудыг! Хэдийгээр их эрдэмтэн Гален зогсох нь бие махбодыг чангаруулдаг хөдөлгөөн гэж хэлсэн байдаг ч, энэ босоо байгаа хүмүүс тийм ч аятайхан царайтай харагдахгүй л байна. Жүжгээ товчлох юм байна.

Зарлалд «Гэсгээгдсэн нажид» гэж нэгэнт байгаа хойно «Ursus pursus»-ээ тоглохоо больё.

Үүнээс ашиг олдог гэлээ ч яах вэ. Ёстой замбараа алджээ! Хөл толгойгоо олохоо байчихсан юм шиг. Заавал нэг юм эвдэж хэмхэлж таарах вий! Гэлээ ч ингэж байж таарахгүй. Тоглохын арга алга. Тайзан дээрээс ийм шуугианд ганц ч үг дуулдахгүй. Би хэдэн үг

хэлж, жаахан чимээг нь аядуулахыг бодъё. Аль вэ, Гуинплен хөшгөө жаахан яраатах. Иргэд ээ...

Тэгснээ, гэнэт дууныхаа өнгийг өөрчлөн, хахир муухай хоолойгоор,

— Хөгшин төгцөг зайл! гэж орилов.

Хариу болгон жирийн ярьдгаараа,

— Үзэгчид намайг доромжилж байх шив дээ. Цицерон, «Plebs fex urbis²⁸⁸» гэж хэлсэн нь зөв шүү. Зүгээр, харц ардыг номхотгохыг үзээд алдъя. Эд нарыг, үгээ сонстол чимээг нь намдаах амаргүй л байх. Гэлээ ч оролдоод үздэг хэрэг ээ. Хүн минь, үүргээ гүйцэтгэ. Гуинплен, энэ шүдээ хавирч байгаа шумнасыг хараач! хэмээв.

Тэгээд шүдээ хавирав. Гомо ч учрыг нь ололгүй шүдээ хавирч эхлэхэд нь Говикем тэр хоёрыг дуурайлаа.

Үүрс үргэлжлүүлэн,

— Эм хүмүүс гэдэг эрчүүдээс долоон дор. Тийм ч аятайхан хором биш л байна. Гэлээ ч дүүрсэн хэрэг, үгийн увдисыг үзүүлэхийг хичээе. Сайхан ярихад муу нь юу байх вэ. Эд нарыг яаж номхотгохыг чагнаарай, Гуинплен. Эрэгтэй, эмэгтэй иргэд ээ, би бол баавгай, та нартай ярихын тул толгойгоо авч тавьчихаад байгаа нь энэ. Чимээгээ аядахыг хичээнгүйлэн гуйя гэснээ, олон дотроос дуугарч байгаа юм шиг дуугаа өөрчлөн,

— Чалчаа амьтан! гэж орилов.

Тэгээд хэвийн байдлаар үргэлжлүүлэн,

— Би үзэгчдийн сүслэн хүндэтгэдэг хүн. Чалчаа хүн гэдэг үг ямар ч үгнээс дутуугүй л үг. Шуугиант олон минь, мэнд хүргэе! Би та нарыг цөмийг чинь өөдгүй амьтад байна гэхэд огт эргэлзэхгүй байна. Гэлээ гэхдээ үүнээс болж та нарыг хүндэтгэх минь огтхон ч саарахгүй. Хүндэтгэнэ гэдэг бол ухамсартай явдал. Энд ирж гийгүүлсэн өөдгүй ноёдыг би үнэнхүү сэтгэлээсээ хүндэтгэж байдаг юм. Та нарын дунд эрэмдэг зэрэмдэг амьтад ч бий, энэ надад, огтхон ч хамаагүй. Сохор доголон, бөгтөр нуруугүй гэдэг бол жам ёсны, ерийн зүйл. Тэмээ бол бөхтэй, америкийн сарлаг сэрвээгээрээ овгор байдаг. Доргоны зүүн хоёр хөл нь баруунаасаа богинохон, энэ тухай Аристотель амьтдын явдлын тухай номдоо дурдсан байдаг. Та нарын дотроос хоёр цамцтай нь нэгийгээ өөрийн биед углаад нөгөөг нь зээ гэж мөнгө хүүлэгчид барьцаанд өгчихсөн байгаа. Энэ бол жирийн хэрэг гэдгийг бид мэднэ. Альбуберк²⁸⁹ сахлаараа мөрий тавьж, ариун Денис цацарсан гэрлээрээ дэнчин тавьж байсан гэдэг. Мөнгө хүүлэгч жүүдүүд рид хувилгааны гэрлийг хүртэл барьцаанд

авдаг байж шүү дээ. Тодорхой жишээ байгаа биз. Өртэй байна гэдэг цаанаа бас ямар нэг юмтай байна гэсэн үг. Та нарын нүүрэн дээр ядуу ядмаг чинь бичээстэй байна... гэж байснаа яриагаа таслан, бүдүүн баргил хоолойгоор,

— Усан тэнэг, илжиг! гэж бархирав.

Тэгээд түүндээ хариу болгон, ихэд эелдэг өнгөөр өгүүлрүүн:

— Зөвшөөрнө өө. Би бол эрдэмтэн. Үүндээ чадах ядахаараа хүлцэл өчье. Шинжлэхүй ухааны үүднээс миний бие шинжлэх ухааныг үзэж чаддаггүй юм. Юм мэдэхгүй байна гэдэг бол, хүн өөрийгөө хооллоод байж болохоор үнэн зүйл юм, шинжлэх ухаан бол харин өлөн зэлмүүр явуулж, мацаг барихад хүргэдэг. Ерөнхийдөө бол эрдэмтэн болж, өлөн хоосон явах уу, илжиг болж өвс зулгааж явах уу гэдгийн аль нэгийг л шилж авахаас өөр замгүй. Өө, иргэдээ өвс зулгааж явцгаа! Шинжлэх ухаанд орвол, амттайхан зүйлээс хазаад авсан нь хамаагүй дээр. Үхрийн шарсан махыг юу гэдгийг латинаар мэдэхийн оронд, идэхийг нь л илүүд үздэг хүн дээ би. Надад ганц авмаар юм байдаг нь, уйлна гэдгийг мэддэггүйд л байгаа юм. Би хэзээ ч усан нүдэлж байгаагүй. Би хэзээ ч сэтгэл ханамжтай байж үзсэнгүй гэдгээ та нарт хэлэх юм байна. Хэзээ ч үгүй шүү. Тэр бүү хэл өөрөө өөртөө ч ханамжтай байсангүй. Би өөрийгөө үзэн яддаг. Гэвч энд цугларсан эсрэг талынхны төлөөлөгч та бүхэнд, Үүрс гэдэг маань, уртаашаа ердөө л нэг эрдэмтэн төдийхөн бол, Гуинплен гэдэг ёстой жүжигчин гэдгийг анхааралдаа болгоохыг хүсье гэснээ дуугаа өөрчлөн,

— Чалчаа амьтан! гэж өөрийгөө хараав.

— Дахиад л чалчаа амьтан гэнэ! Энэ бол чамбайхан татгалзаж буйн гэрч. Гэлээ ч чихнийхээ хажуугаар өнгөрөөчихье. Эрхэмсэг ноёд, хатагтай нар минь. Гуинплений хажуугаар та бүхэн, цагтаа зэрлэг нохой явснаа, одоо соёлжсон хав болсон, өндөр төрөлт эзэгтэйн үнэнч албат, бид бүхэнтэй хамт бядан явдаг үсэрхэг зөөлөн, үгэнд оромтгой өөр нэгэн жүжигчин эрхэмсэг Гомог харах болно. Гомо бол ер бусын авьяас чадалтай, хөдөлгөөнөөр жүжиглэдэг жүжигчин юм. Анхаарлаа хөвчлөн хандуулагтун. Одоо та нар Гомо, Гуинплен хоёрын жүжиглэхийг харах болно. Ер нь урлагт хүндэтгэлтэйгээр хандах ёстой. Энэ бол их үндэстэнд жирийн болсон зүйл. Та нар ой модонд өсөж өндийсөн улс биш шүү дээ. Үгүй гэдгийг батлан даасан ч болох байна.

Тэгвэл *sybvae sunt consule dignae*²⁹⁰. Хоёр жүжигчин нэг консултай тэнцэнэ. Маш сайн. Над руу байцайны голоор нүүлгэсэн ч намайг оносонгүй. Тэглээ ч ярихад минь саад болохгүй ээ. Харин

ч зүгээр. Мултарч чадсан аюул гэдэг чалчаа болгодог юм. Ювекал *garrula pericula* гэж хэлсэн байдаг. Та нарын дунд согтуу эр, эм улс байна. Их сайн. Эр нь жигшүүртэй. Эм нь ой гутмаар байдаг. Хий сэлгүүцэх, залхуурах, хулгай хийгээд түр амсхийх, нортер, ель стаут гээд л төрөл бүрийн гашуун нясууныг хүсэх, архи дарс, жин дарс болон нэг хүйс нь нөгөөдөө татагдах гээд л та нарын энд цуглах болсон олон янзын шалтаг байгаа л даа. Гайхалтай. Саваагүй савсаг ухаанд үүнээс илүү зохих газар гэж хаана байх вэ. Гэвч би татгалзъя. Бие сэтгэлийн хуял тачаал тайлах гэдэг байж л байг! Гэвч садар наргианд бас учиртай хандах хэрэгтэй. Та нар хөгжилтэй ч, дэндүү чимээ шуугиантай байх юм. Та нар адгуус амьтны дууг хачин сайхан дуурайх юм. Гэвч би та нарыг, нэгэн ледитэй хүнгүй гудамжны буланд сэтгэлийнхээ үгийг ярьж байхад чинь яриаг чинь таслаад, гэнэтхэн нохой шиг хуцаж гарвал та нар юу гэх вэ? Саад болж л таарна даа. Тэгвэл та нар ч бидэнд яршиг түвэг удаж буйгаа мэдэж ав. Та нарыг дуугаа татахыг зөвшөөрч байна. Урлагт, ужид самуунд ханддагаас дутахгүй хүндэтгэлтэйгээр хандах хэрэгтэй. Би та бүхэнтэй шулуун шударга хүний ёсоор ярьж байна... гэснээ мөн л дуугаа өөрчлөн ууртайгаар харааж,

— Чичрэг өвчин чамайг наад хөх тариан түрүү шиг хөмсөгтэй чинь хамт багалзуурдаасай билээ! гэж орилоод дуугаа намсгав.

— Хүндэт ноёд минь, хөх тариан түрүүг мөрт нь байлгаж үзээч. Ургамлыг хүн юм уу адгуустай адилтгах чинь нүгэлтэй явдал. Түүнээс гадна чичрэг өвчин багалзуурддаггүй, сэгччихдэг юм. Ончоо олоогүй зүйрлэл байна. Дуугаа татахыг та бүхнээс гуйя! Шулуухан хэлж байгааг минь өршөөгөөрэй, та нарт жинхэнэ англи эрчүүдэд байдаг сүр хүч дутагдаж байна. Та нарын зарим чинь хэдийгээр майжгий гутлынх нь хоншоороор эрхий нь цухуйж байгаа боловч өмнөх хүнийхээ мөрөн дээр хөлөө тавьчихаад байгааг харж л байна. Энэ бол эмэгтэйчүүдэд, хөлийн ул хэзээд өлмийн дөрөөвчний чухал газарт элэгддэг гэсэн дүгнэлтийг хийхэд хүргэж байгаа юм даа. Хөлөө жаахан бага харуулж гараа ихээхэн харуулахыг хичээ. Би эндээс, маанаг хөршийнхөө халаасанд эвлэгхэн хуруунуудаа шаргуулчихаад байгаа өөдгүй амьтдыг харж л байна. Халаас суйлагч эрхэм нөхөд өө, нэг жаахан аядуу байж үз! Хэрэв хүсвэл хажуудахдаа нударганы амт үзүүл л дээ, харин халаасыг нь бүү ухчих. Цаадах чинь, ганц зоосыг нь хулуусанд орвол, нүдийг нь бүлт цохичиход багахан уурлана шүү. Тэгэхээр нармайг нь нээчих. Хөрөнгөлөг бэртэгчин, гоо сайхнаасаа илүүгээр илүү мөнгөө эрхэмлэдэг юм. Ингэхэд, чин сэтгэлээсээ сайн байдгийг минь хүлээж

авна уу. Би муу хулгай нарыг зэмлэн баалж байдаг тийм ёсорхог хүн биш. Хорвоод муу юм бий. Хүн бүр түүнээс хохирон, хүн бүр түүнийг бий болгож байдаг. Нүглийнх нь сав дүрээгүй хүн алга. Би түрүүн ярьж байсан нүглийг л хэлж байна. Бидний хэнд маань ч гэсэн энэ загатнаа байхгүй гэж үү дээ? Бурхан ч гэсэн чөтгөрт хатгуулсан газраа мааждаг шүү дээ. Би ч гэлээ алдаанд унасан хүн. Plaudite cives!²⁹¹

Үүрс олон хүн нирхийн дүнгэнэх авиа гаргаснаа, өөрийн яриаг дараах үгээр дуусгаруун:

— Милорд, ноёд оо, миний үг та нарт таалагдахгүй азтай байжээ. Та нарын исгэрэлдэх орилолдохоос хэсэг зуур холдье. Одоохон жинхэнэ толгойгоо тавиад жүжгээ эхэлье.

Уран илтгэгчийн байдлаа орхин, ердийнхөө хоолойгоор хэлрүүн,

— Хөшгөө хаачих, амсгаагаа дараадахъя. Би ч уран үгийг урсгаж өглөө. Гайгүй сайн ярилаа. Би тэднийг милорд, ноёд гэлээ шүү дээ. Зулгүй мөртөө ямар ч ашиггүй магтаал. Гуинплен, энэ ажилгүй амьтдын талаар чи юу гэж хэлмээр байна? Энэ цухалдаж, цөхрөнгөө барсан амьтдын байж байгааг харахад л Англи сүүлийн дөчин жилд хэчнээн их гамшгийг туулсан нь бэлхнээ ойлгогдож байгаа биз дээ. Хуучин англичууд чинь эр зоригтой, хавархаг байсан юм, харин одоо бодол болж дүнсийсэн, хууль ёс, хаант төрөө үзэж чаддаггүйгээрээ ид бах болгосон амьтад болжээ. Би хүн гэгч амьтны уран цэцэн үг юу хийж болдог бүхнийг хийлээ. Ид цэцэглэж буй залуу бүсгүйн улаа бутарсан хацар шиг хачин гоё төсөөллүүдийг хайр гамгүй урсгалаа даа. Тэдний омгийг дарж чадаа болов уу? Юу л бол доо. Ер нь ч тэгээд амаараа гартал чихэн, энэ орны зохиолчид нь хүртэл бүтээлээ туурвихдаа амнаасаа гаансаа салгадаггүйдээ хүрсэн, тамхийг зогсоо зайгүй угсарч байдаг харц ардаас юугаа горьдох юм билээ? За, юу ч болдог байлаа гэсэн жүжгээ эхэлье.

Хөшигний цагариг, татсан утсан дээгүүр чахран гулслаа. Цыган бүсгүйчүүл хөгжмөө зогсоов. Үүрс хананаас чавхдаст хөгжмөө аваад угтвар аяс тоглосноо, дуугаа намсган, — Гуинплен, хачин юм шүү! Ямар битүүлэг юм бэ! гэснээ чонотой ноцолдож гарав.

Чавхдаст хөгжмөө авахдаа, хадааснаас нэгэн ширүүн хиймэл үс хамт авч, өөрийнхөө дэргэдхэн шалан дээр хаясан байлаа.

«Гэсгээгдсэн нажид» бараг хуучин маягаараа, зөвхөн хөх гэрэл «ид шидийн хэрэглүүргүй» л өнгөрчээ. Чоно үнэхээр сэтгэл гарган тоглов. Дея ч зохих үед гарч ирээд, чичгэнэсэн хачин хоолойгоор Гуинпленийг дуудав. Гараа сунган түүний толгойг тэмтчин хайлаа...

Үүрс хиймэл үсээ ухасхийн авч сэгсэрснээ, толгойдоо углаад, амьсгаагаа барин байж, Дея руу чимээгүйхэн ойртоод, толгойгоо гарт нь тавьж өглөө.

Дараа нь хамаг л оюун чадлаа шавхан, Гуинплений хоолойг дуурайн байж, сэтгэл зүрхний дуудлагад хариу болсон мангасын үглэл дууг үгээр хэлэхийн аргагүй хайр сэтгэлээ илчлэн дууллаа.

Үүрсийн хэчнээн гайхамшигтайгаар дуурайж чадсаныг хэлбэл, энэ удаа хоёр цыган бүсгүй, дууг нь сонсоод байгаа хэр нь биеийг нь хараагүйдээ ширвээтэж, Гуинпленийг нүдээрээ хайн ийш тийшээ бүлтгэнэв .

Сэтгэл хөөрсөн Говикем байж ядан харайж, алгаа ташин, элдэв дуу шуу үүсгэн гав ганцаар инээх мөртөө олон бурхад цугласан лугаа адил чимээ гаргана.

Ер нь энэ жаал хүү ёстой л үзэгч хүнд баймаар ховорхон авьяастайг дахин тэмдэглэвэл зохистой.

Фиби, Винос хоёр, Үүрс түлхүүрээр хөдөлгөж буй оньсон хүн шиг л зэс болон илжигний ширээр хийсэн бүрээ бөмбөрөө байдгаар нь дуугаргав. Энэхүү чих дөжрөм чимээнд энгүүндээ жүжиг дуусаж, үзэгчид тарцгаадаг ажээ.

Хөлс нь цутгасан Үүрс босож ирээд Гомодоо шивгэнэн,

— Цаг хожих хэрэгтэй байсныг ойлгож байна уу? Бид ч муугүй амжуулав бололтой. Баларч болохоор байсан ч гэлээ, байдлаас муугүй мултарлаа. Юмыг яаж мэдэх вэ. Гуинплен маргааш ирчих ч юм бил үү. Деяг урьдчилж алаад яах вэ. Би чамд л гэж учрыг тайлбарлаж байна гэв.

Тэгээд хиймэл үсээ авч, хөлсөө арчингаа,

— Би ч ер бусын, бусдыг дуурайн дуугарч чаддаг хүн юм. Гайхалтай авьяас гаргалаа даа. Нэгдүгээр Франциска хааны уруулаа хөдөлгөлгүй ярьдаг Брабантаас нэг их дутахгүй бололтой. Дея, Гуинплений байгаад итгэлээ гэж үглэн байлаа.

— Үүрс гэж нэг хүн дуудаад, — Гуинплен хаана байна аа? гэж асуусан нь Дея байв.

Үүрс татваганан эргэж харав.

Дея, тайзны буланд, таазнаас унжсан дэнлүүний дор зогссон хэвээр байсан ажээ. Үхдэл лүгээ адил зэвхий цайжээ.

Тэр нь цөхрөнгөө барсан маягтай инээмсэглээд,

— Биднийг орхиод явчихсан гэдгийг нь би мэдэж байна. Тэр яваад өгчээ. Түүнийг жигүүртэйг нь би мэддэг байсан юм аа гэснээ хараагүй нүдээ өөд өргөн — Миний ээлж хэзээ вэ? гэж нэмэн хэллээ.

III. Ээдрээтсэн нь

Үүрс яаж ч чадахгүй хөшчихөв.

Тэр санаснаараа Деяг хуурч дөнгөсөнгүй. Түүний уруулаа хөдөлгөлгүй ярьдаг урлагийнх нь буруу гэж үү? Мэдээжээр үгүй. Тэр нь Фиби, Винос гэсэн хоёрын хоёр нүдтэй хүнийг хуурч амжсан мөртөө, сохор Деяг мэхэлж дөнгөсөнгүй. Хэргийн учиг, Фиби, Винос хоёр зөвхөн нүдээрээ хардаг бол, харин Дея зүрхээрээ хардагт оршмуй.

Үүрс хариу ганц ч үг дуугарч чадсангүй. Зөвхөн өөрийнхөө тухай *bos in lingua*²⁹² гэгч боллоо гэж бодож зогсов. Үнэндээ ч балмагдсан хүний хэлнээс бух дүүжилчих шиг болдог билээ.

Ээдрээ зовлонтой бодолд ороод ирэхээр, хүн юуны өмнө өөрийгөө басан, дорд үздэг. Үүрс ч ялгаагүй.

— Үйлээ үзэж авиа дуурайсан маань талаар болов оо хө! хэмээн бодож зогслоо.

Санасан нь бүтэлгүй нурсан, зөгнөгчийн ёсоор,

— Хамраараа газар хатгалаа даа! Тэр бүх авиа дууг гаргаж дуурайсан нь юунд ч хэрэг болсонгүй. Одоо юу гээч болдог бол? хэмээн гашуудан халаглав. Тэгээд Дея руу харлаа. Цаадах нь хөдлөх ч үгүй, дуугүй зогсох авч улам улам хувхай цайсаар байлаа. Түүний гөлийсөн хоосон харц нь хаашаа ч юм алсыг ширтэнэ.

Нэгэн тохиолдол Үүрсийг аварлаа. Хашаа дотор лаа барьсан Никльс, өөрт нь дохио өгөөд байгааг харав. Үүрсийн ганцаархнаа тоглосон ид шидийн жүжгийн төгсгөлийг Никльс, хэн нэг хүн гуанзных нь хаалгыг цохисон учир үзэж чадаагүй ажээ. Буурчийн газрын хаалгыг хоёр ч удаа түншүүрдсэн учир Никльс хоёртоо хаалга онгойлгохоор явжээ. Их юм ярьсандаа улайрсан Үүрс юу ч ажиглаагүй юм байна.

Никльс өөрийг нь даллаад буйг харсан Үүрс хашаа руу буув. Буурчийн газрын эзэн рүү хүрч очингоо, хуруугаа уруул дээрээ тавилаа. Никльс ч мөн хуруугаараа уруулаа дарсан байв. Хоёул бие биен рүүгээ харав. Аль аль нь нөгөөдөө «Ярих хэрэг байна. Тэгэхдээ энд биш» гэж хэлэх мэт.

Никльс гуанзны том танхимын үүдийг чимээгүйхэн онгойлгов. Тэд орцгооход, өөрсдөөс нь өөр ганц ч амьтан байсангүй. Гудамж талаас ордог хаалга, цонхнуудыг дангинатал нь хаажээ.

Эзэн сониуч Говикемийн хамрыг золтой л авчихсангүй хашаанаас ордог хаалгыг тасхийтэл хааж авав. Тэгээд лаагаа ширээн

дээрээ тавилаа.

Бараг шивгэнэх шахам дуугаар ярьж эхэллээ.

— Мистер Үүрс...

— Мистер Никльс ээ?

— Би сая л нэг юм ойлголоо.

— Өө тийм үү?

— Та, энэ хөөрхий сохор амьтанд юу ч болоогүй гэж
итгүүлэхийг хүссэн юм байж.

— Уруулаа хөдөлгөлгүй ярихыг ямар ч хуулиар хориглоогүй.

— Та ёстой авьяастай хүн юм.

— Үгүй шүү.

— Та хүссэн бүгдээ гайхалтай сайхан хийх юм.

— Би үгүй гэдгийг танд хэлээд байна.

— Тэгэхээр одоо тантай ярих хэрэг байна.

— Улс төрийн тухай юу?

— Юу ч гэх ч юм бэ дээ.

— Улс төрийн тухай би сонсохыг ч хүсэхгүй байна.

— Тэгэхээр ийм байна. Таныг ганцаархнаа жүжигчин ч болж
үзэгч ч болж тоглож байх хооронд хаалга цохилоо.

— Хаалга цохилоо гэнэ ээ?

— Тийм ээ.

— Үүнд би дургүй.

— Надад ч гэсэн дурлаад байх юм алга.

— Тэгээд юу болоо вэ?

— Тэгээд би онгойлголоо.

— Хэн цохисон байна?

— Надтай ярьсан тэр хүн цохижээ.

— Тэр танд юу яриа вэ?

— Би юу ярьсныг нь сонсож л байлаа.

— Та түүнд юу гэж хариулав?

— Юу ч хэлээгүй. Таны тоглохыг харахаар буцаж очсон.

— За тэгээд?

— За тэгээд хаалгыг хоёр дахиа балбадаг юм байна.

— Хэн? Нөгөө л хүн үү?

— Үгүй ээ, өөр хүн.

— Тэр тантай бас ярилцаа юу?

— Үгүй энэ удаа надад юу ч хэлээгүй.

— Ингэсэн нь ч дээр дээ.

— Надад бол үгүй шүү.

— Мистер Никльс тайлбарлаач.

— Эхний надтай ярьсан хүн хэн байсныг таа л даа?
— Эдипийн дүрд тоглож байх зав алга.
— Энэ бол циркийн эзэн байлаа.
— Хажуу талын уу?
— Тийм, хөршийнх.
— Тэр нэг галзуу солиотой юм шиг хөгжим бархируулдаг уу?
— Тийм. Тэгэхээр байна шүү, мистер Үүрс, тэр хүн танд найр тавьсан даа?

— Найр тавьсан гэнэ үү?
— Тийм ээ, найр тавьсан.
— Яагаад?
— Яагаад гэвэл.
— Мистер Никльс танд надаас давуу нэг юм байна шүү. Та дөнгөж саяхан миний оньсогыг таачихсан, гэтэл би гэдэг хүн таныхыг дөхүүлэх ч үгүй байдаг.

— Циркийн эзэн, энд цагдаа нар ирэхийг харсан, тэгээд тэр хүн танд сайн байдгаа үзүүлэхийг хүссэндээ танаас, бүхээгт тэрэгт «Ногоон хайрцгийг» тань, хоёр морь, бүрээ, бөмбөр үлээдэг хүүхнүүдтэй нь таны жүжгийг, түүнд тоглодог сохортой нь, таны чоныг болон өөрийн чинь хамт тавин фунт стерлингээр бэлэн авъя гэж найр тавьж буйгаа дамжуулаарай гэж хүссэн юм.

Үүрс ихэмсгээр инээгээд,
— «Тедкастерийн буурчийн газрын» эзэн гуай, циркийн эзэнд Гуинплен эргэж ирнэ гэж дамжуулчхаарай гэлээ.

Буурчийн газрын эзэн сандал дээрээс нэгэн бараан юм аваад, Үүрс рүү эргэж, нэг гартаа цув, нөгөөдөө савхин энгэрэвч, эсгий бүрх барьсан гараа дээш өргөөд өгүүлрүүн,

— Хоёр дахь удаад хаалга балбасан хүн цагдаа байлаа. Тэр нэг ч үг дуугарсангүй орж ирээд, гараад явсан. Тэгээд надад дамжуулсан юм нь энэ байна.

Үүрс Гуинплений савхин энгэрэвч, ажлын хүрэм, бүрх цувьг нь танилаа.

IV. Moensus surdis, campana mu ta²⁹³

Үүрс бүрхийн эсгий, цувны цэмбэ, хүрмийн даавуу, цээживчийн арьсыг барилж үзэв. Ямар ч эргэлзээ байсангүй. Нэг ч үг дуугаралгүй тушаасан огцом хөдөлгөөнөөр буудлын үүдийг Никльст заав.

Никльс хаалгаа онгойлгов. Үүрс ухасхийн гудамд гүйж гарлаа.

Никльс араас нь дагуулан харна. Үүрс өглөө нь Гуинпленийг аваад явсан тэр зүг чөргөр нарийн шилбэнийхээ тэнхээ мэдэн харайлгав. Мөчийн дараа байдгаараа амьсгаадан Үүрс, Саутворкийн гяндангийн явган хаалга байдаг, нөгөө хэдэн цагийн турш харуулдан зогсож асан жижиг гудамжинд хүрчихсэн байлаа.

Гудамж зөвхөн шөнө дунд л хүнгүй болдог биш ажээ. Гэвч өдөр нь уйтгар төрүүлдэг тэр гудамж, шөнө нь айдас хүргэн жихүүцүүлэх ажгуу. Тодорхой цагийн дараа тийшээ зүрхлэн зүглэх хүн нэгээхэн ч үгүй. Бүгд л хана нь хөдлөн, хэрэв шорон оршуулгын газар хоёр тэврэлдэх гэдэг хачин бодол төрөх юм бол няц хавчуулагдах вий гэсэн бодол төрөн айж байгаа ч юм шиг. Энэ бүхэн бол шөнийн айдас. Парисын Вовер гудамжны тайрсан бут ч бас муугаар яригддаг билээ. Шөнийн цагаар сайх огтлогдсон модод том гарууд болон хувирч хажуугаараа өнгөрөгсдийг базан авдаг гэж ярьцгаах бөлгөө.

Саутворкийн оршин суугчид хар зөнгөөрөө л энэхүү гяндан, оршуулгын газар хоёрын хоорондох гудамжнаас дөлдгийг бид дээр өгүүлсэн билээ. Дээр үед хөндлөөш нь төмөр гинж татдаг байсан аж. Ямар ч хэрэггүй болгоомжлол. Учир нь түүнийг хаасан ямар сайн гинж байлаа гэхэд, хүн айлгахаас цаашгүй билээ.

Үүрс тийшээ зоригтойгоор алхлан орлоо. Юугаа бодож тийш зүглэв ээ? Юу ч бодсонгүй.

Ямар нэг сураг гаргаж магадгүй хэмээн горьдсондоо иржээ. Гяндангийн хаалгыг нүдэж балбах гээ юу? Мэдээжээр үгүй. Сайх аймшигтай агаад ашиггүй арга түүний зүүдэнд ч орсонгүй. Гяндан руу нэвтрэн орж, сураг ажиг гаргах гэж битүүдээ бодсон юм биш байгаа? Ямар тэнэг явдал вэ! Гяндан гэдэг, тэндээс гарахыг хүссэн хүнтэй адилаар, тийшээ орохыг хүссэн хүнд ч гэсэн хаалгаа тийм ч амархан нээчихдэггүй эд. Хуулийн нэрийн өмнөөс л түүнийг онгойлгоно. Үүрс үүнийг мэдэлгүй яах вэ. Тэр юугаа хийж энэ гудамжинд ирэв ээ? Харах гэж. Чухам юуг? Тэр өөрөө ч үл мэднэ. Байж болох л юм. Гуинплений цаагуур нь ороод алга болчихсон

хаалганы өмнө очно гэдэг бас ч гэж муугүй хэрэг. Заримдаа хамгийн баргар, дүнсгэр хана ч гэлээ хэл орж, чулууны нь завсар заалхайгаар гэрлийн цацраг тусах нь бий. Хааяа хаалга, цонхыг нь бин битүү түгжсэн харанхуй байшингаас бүдэгхэн гэгээ гарч байгаа нь харагддаг. Бин битүү нууцлаг юмыг сайтар шинжлэн ажиглана гэдэг чих тавин анир чимээ чагнаж цагийг хий үрэхгүйтэй утга нэг буюу. Бид цөмөөрөө л сонирхсон зүйлээ зөнд нь орхилгүй, аль болохоор ойртохыг хичээдэг төрөлхийн авьяастай байдаг бус уу. Ийм болоод л Үүрс шоронгийн явган хаалга гарсан гудамж руу эгж иржээ.

Хавчиг гудамж руу орж ирэх үед нь хонх нэг цохисноо, байзнасхийгээд хоёр дахиа цохилоо.

«Шөнө дунд болчихсон юм гэж үү?» хэмээн бодов. Тэгээд огтын санаандгүй «Гурав, дөрөв, тав» гэж тоолж эхлэв.

«Цохилт болгоны дунд яасан ч удах юм бэ дээ! Яасан ч удаан цохидог цаг вэ! Зургаа, долоо!» гэж бодож байлаа.

Дараа нь дотроо бодруун:

— Ямар ч удаан нүргэлсэн дуу вэ дээ! Найм, ес. Ер нь үүнээс амархан ойлгогдох юм гэж хаана байх вэ. Гянданд байна гэдэг, цагийг хүртэл уйтгартай болгочихдог юм байна. Арав. Тэгээд бас оршуулгын газар энүүхэн хаяанд байгааг хэлэх үү. Энэ хонх амьдад цаг хугацааг, үхсэнд өнө мөнхийг хэмжиж өгч байна. Арван нэг, Пээ! Эрх чөлөөгөө хасуулсан хүнд ч бас, өнө мөнхийг цохин дуулгадаг юм байна шүү. Арван хоёр!

Тэр дороо зогслоо.

— Тийм байна, шөнө дунд болжээ гэтэл хонх арван гурав дахиа цохилоо.

Үүрс цочин татвасхийв.

— Арван гурав!

Гэтэл арван дөрөв, дараа нь арван тав дахиа цохилоо.

— Энэ чинь юу болж байна, та минь.

Цохилт бүрийн хооронд их удах ажээ. Үүрс чагнасаар л,

— Энэ чинь цаг биш байх нь ээ. Энэ бол мута²⁹⁴ хонх байна.

Шөнө дундыг яасан удаан цохиж байна аа гэж бодсон маань ч оргүй зүйл биш байна шүү. Энэ бол цагийн цохилт биш, сүмийн хонхны дуу байжээ. Энэ уйтгартай дуу, юуг л ёрлоод байгаа бол доо?

Тэр үеийн бүх шорон гянданд, сүм хийдийн адилаар зөвхөн гашуудалтай үйл явдлыг тэмдэглэдэг мута хонх гэж байдаг байжээ. Сайх «хэлгий» хонхыг хүнд дуулдуулахгүй гэж хичээж байгаа юм шиг их аяархан цохидог байжээ.

Үүрс нөгөө өдрийн ихэнхийг өнгөрөөсөн, ажиглахад аятайхан буландаа очиж зогсоод, гяндангийн явган хаалгыг нүд салгалгүй ширтэв. Хонхны дуу түрүүчийнхээрээ, удаан жигд хэмээр тасалдан цохино.

Гашуудлын хонхны дуу орчин тойрондоо ёрын муухай анхааруулах тэмдгийг цацах шиг. Бидний өдөр тутмын санаа зовнил хэмээх дэлгэмэл хуудсан дээр, уйтгартай улаан мөрүүдийг тавьж байгаа нь энэ буюу. Гашуудлын хонхны дуу бол амьсгаа хурааж буй хүний хэржигнээтэй адилхан юм. Тэр нь үхлийг орлоно. Энэ хонхны дуу хүрсэн байшинд хэн нэгэн хүн мөрөөдөл болон хүлээж суулаа гэхэд, хонхны цохилт түүнийг нь хоромхон зуур сарниаж хаяна. Бүдэг бадаг мөрөөдөл бол нэг ёсны орилоо байдаг. Уйтгар гунигт дарагдсан хүнд ямар нэг итгэлийг төрүүлнэ. Гэтэл хонхны баргар ёрын дуу ямар ч итгэл найдварыг арчин хаяна. Бидний сэтгэлийн зовуурь нуугдах гэж хичээж ядан буй битүү мананг сарниачихдаг. Тэр нь бидний сэтгэл зүрхэнд уйтгартай түгшүүрийг төрүүлнэ. Гашуудлын хонхны дуу хүн болгонд зовлон гунигийг нь, аливаа нэг аймаар зүйлийг нь бодогдуулдаг. Сайх гашуудалт дуу хүн болгонд хандаж байдаг. Энэ нь урьдчилан сануулж байгаа хэрэг. Сайх нэг хэмийн ярианаас илүү гунигтай юм гэж орчлонд үгүй. Нэг нь нөгөөгөөсөө адил хэмийн зайтайгаар цохих сайх хонхны дуу цаанаа нэг санаа агуулсныг илтгэнэ. Энэ хонхны алх, бидний санаа бодлын дөшин дээр юуг дархална вэ?

Хэдийгээр энэ нь ямар ч утга учиргүй боловч Үүрс өөрийн эрхгүй хонхны дууг тоолсоор авай. Ёроолгүй хавцлын ирмэг дээр байгаагаа мэдэрсэн Үүрс, ямар ч таавар гаргахгүйг байдгаараа хичээнэ. Таавар гэдэг бол, ямар ч хэрэггүйгээр доошоо хамаагүй гулсаж мэдэх налуу гэсэн үг. Гэлээ гэхдээ энэ хонхны дуу цаанаа юу гэсэн үг вэ?

Үүрс, гяндангийн хаалга байгааг мэдэж буй тэр зүг рүү харж байлаа.

Гэнэт нөгөө хар нүхэрхүү юм харлаж байсан газарт улаавтар туяа гараад ирэв. Тэгээд улам тодрон тодорсоор цацарсан гэрэл боллоо.

Энэ нь ямар нэг сүүмэлзсэн бус, харин харанхуйд тэгш өнцөг гаргасан гэрэл байлаа. Гяндангийн хаалганы нугас чахран эргэв. Улбар гэрэл хаалганы энэх, хавтсыг нь тодхон гийгүүлнэ.

Гүйцэд нээгдээгүй жаахан завсар гаргажээ. Шорон хаалгаа цэлийтэл нээнэ гэж байдаггүй, уйтгартайгаасаа болж эвшээж байгаа мэт амаа хагас ангайдаг ажгуу.

Явган хаалгаар бамбар барьсан хүн гарч ирлээ. Хонх цохисон хэвээр л. Үүрс хонх цохихыг чагнаснаа бамбараас хараа салгасангүй.

Тэр хүний дараа хаалга томоор нээгдэн, араас нь хоёр хүн гарч тэдний хойно бас нэг хүн харагдав. Энэ дөрөв дэх хүн нь хар бэрээ баригч байлаа. Үүрс түүнийг бамбарын гэрэлд таньжээ. Барьсан бэрээ нь харагдсан хэрэг.

Бэрээ баригчийн араас хоёр хоёроороо эгнэсэн, модон шон мэт хөшчихсөн хүмүүс дуу шуу ч үгүй цувран гарч ирэв.

Ихэд хүйтэн, биеэ барьсан байдалтай, хос хосоороо цуварсан, сүмийн нүглээ наманчлагсдыг санагдуулам сайх шөнийн цувааныхан, ямар ч чимээ имээ гаргахгүйг байдгаараа хичээн, гяндангийн босгыг алхан гарч ирэх ажээ. Могой л нүхнээсээ гарахдаа ийнхүү болгоомжлон байдаг биз ээ.

Бамбарын гэрэл тэдний баргар царай, биеийг гэрэлтүүлнэ. Үүрс өглөө Гуинпленийг аваад явсан цагдаа нарыг танилаа.

Тэд яг биеэрээ байгаад эргэлзээ байсангүй. Одоо гяндангаас буцан гарч байгаа нь энэ.

Одоо Гуинплен гарч ирэх нь эргэлзээгүй боллоо.

Нэгэнт тэд өглөө энд авчирсан юм чинь буцаж хүргэх нь эргэлзээгүй боллоо.

Энэ бол ойлгомжтой зүйл.

Үүрс байдгаараа хүчлэн ширтэнэ. Гуинпленийг чөлөөтэй суллах нь энэ үү дээ?

Цагдаа нар намхан хүнхрийн дороос, хананаас нэвчих дусал мэт жигтэйхэн удаанаар хөдөлж ядан хос хосоороо гарч ирнэ. Цохисон хэвээр байгаа хонхны дуу тэдний алхааг тааруулж байгаа юм шиг санагдана. Гяндангаас гарч ирээд цуваа, Үүрс рүү нуруугаараа эргэн гудамжны нөгөө үзүүр лүү одов.

Хаалганд хоёр дахь бамбарын гэрэл сүүмэлзэн гарч ирэв.

Цуваа шувтарч байгаа нь энэ ажээ.

Үүрс одоо дагуулж явааг нь харах болно. Хоригдлыг, тэр хүнийг харна.

Үүрс одоохон Гуинпленээ харна.

Нөгөө дагаж яваа юм нь арай гэж гарч ирэв.

Тэр нь авс байлаа.

Дөрвөн хүн хар даавуугаар бүрсэн авс дамжлан гарч ирэв.

Араас нь хүрз мөрлөсөн ясчин дагаж явна.

Цуваа сүмийн санваартан байж таарах ямар нэг ном уншсан хүний барьсан гурав дахь бамбараар шувтрав.

Авсыг нөгөө баруун тийш эргэсэн цагдаа нарын араас авч явлаа.

Энэ үеэр цувааны толгойд явж байсан хүмүүс зогсов.

Үүрс цоожинд түлхүүр хийн эргүүлэхийг сонсов.

Гяндангийн эсрэг талд гудамжны нөгөө үзүүр хүртэл үргэлжилсэн намхан хананд байгаа нэгэн хаалга бамбарын гэрэлд харагдана.

Дээрээ хохимой толгойтой тэр хаалга оршуулгын газрынх байжээ.

Бэрээ баригч тийшээ ороход түүний араас үлдсэн нь орж, хоёр дахь бамбар ч алга болоод цуваа мурилзан яваа могойн сүүлийг санагдуулам богиносож, цагдаа нар ч тэр харанхуйд уусан алга болж, араас нь авс, хүрз мөрлөсөн ясчин, бамбар, судар барьсан лам далд ороход хаалга хаагдав.

Ханын дээгүүр сүүмэлзэх гэрлээс өөр юу ч үлдсэнгүй. Доожоогүйхэн дуугарч хүнгэнэх сонсогдсоноо бүдэг түг түг хийх чимээ гарав.

Мэдээжээр, лам ясчин хоёр нүхэнд тавьсан авс руу нэг нь ерөөлийн үгээ, нөгөө нь шороо хүрздэн цацалж буй нь энэ ажээ.

Гуншаа хүнгэнээн ч, түг түг хийх чимээ ч аль аль нь зогслоо.

Дахиад л жигд алхлан, бамбарын гэрэл сүүмэлзэж, оршуулгын газрын онгойлгосон явган хаалгаар, бэрээгээ дээш нь өргөсөн бэрээ баригч, араас нь судраа барьсан лам, хүрзээ мөрлөсөн ясчин, цагдаа нар, гэхдээ мэдээжээр авсгүйгээр гарч ирцгээлээ. Цуваа мөн л урьдын адил хос хосоороо шилээ харан, ирсэн замаараа баргар царайлан буцахад, оршуулгын газрын хаалга хаагдан, гяндангийн хаалга нээгдэж, бамбараар дахин гийгүүлэгдсэн хүнхгэр гудам хэсэг зууртаа улаан туяа татуулж, Үүрсийн нүдэнд шоронгийн баргар газар доорх хонгил харагдаж байснаа, дараа нь бүх юм харанхуйд умбалаа.

Хонх ч цохихоо больжээ. Харанхуй өөдгүй муухайг үйлдчихээд дээгүүр нь бие арзганам нам гүмийн хөшгийг татжээ.

Гэнэт гарч ирсэн хий үзэгдэл ор мөргүй алга болов.

Сүүтгэнэл тэр чигтээ замхран арилжээ.

Хүн гэгч амьтан санамсаргүйгээр давхацсан тохиолдлыг ямар нэг утгатай юм шигээр бодон түүнээ үндэслэн үнэн юм шиг таамгийг ургуулан гаргах бөлгөө.

Гуинпленийг битүүлгээр гэнэтхэн баривчилснаас гадна цагдаа нарын авчирсан хувцас, аваачсан гяндангийнх нь гашуудлын хонх цохисны дээр, газарт авс булсан бас нэг эмгэнэлт явдал нэмэгджээ.

— Тэр үхлээ! гэж Үүрс дуу алдан бархирснаа, ямар ч тэнхэлгүй болон бул чулуун дээр суун тусав.

— Үхжээ! Тэд түүнийг алчихжээ! Гуинплен минь! Үр минь! Хүү минь! гэж бархираад, эхэр татан цурхирлаа.

V. Төрийн эрх ашиг нь жижиг юманд ч томын адил хамаарна

Хөөрхий зайлуул, амьдралдаа нулимс унагаж үзээгүй гэж ханхалзаж байсан хүн маань энэ. Нулимс дүүрэн байлаа. Гашуун амьдралынх нь турш дусал дуслаар, эмзэглүүлэн эмзэглүүлэн хураагдсан тэрхүү амсар дүүрэн нулимсыг нэгэн амьсгаагаар хоосолчихно гэж байхгүй биз ээ. Үүрс удаан уйллаа.

Анхны нулимс дараа дараачийнхаа нулимсны замыг цэвэрлэдэг. Гуинпленийг, Деяг, өөрийгөө болон Гомог бодон уйллаа. Хүүхэд шиг л асгаруулж байв. Хөгшин хүн шиг л нус, нулимс болов. Инээж шоолж байсан бүхнээ бодон бодон уйлна. Өнгөрснийхөө өрийг нөхөн төлж буй нь энэ ажээ. Хүний уйлах эрхэд хугацаа өнгөрнө гэж байдаггүй.

Чухамдаа газарт булсан хүн нь Хардкванон байсныг Үүрс яахын мэдэх ажээ.

Хэдэн цаг өнгөрчээ.

Үүр цайж эхлэв. Шөнийн харанхуйтай ана мана үзэлцэж буй өглөөний гэрлийн бүдэгхэн зурвас яармагийн талбайг гийгүүлэв. Тедкастерийн буурчийн газрын нүүрэн тал үүрийн туяанд цайвалзана. Эзэн Никльс дугхийж чадалгүй шөнийг баржээ. Заримдаа нэгэн явдлаас болоод нэлээд хэдэн хүн нойргүй хонохыг алийг тэр гэхэв.

Нэг үхрийн эвэр доргиход мянган үхрийн эвэр доргино гэдэг. Ус руу чулуу шидээд, хэдэн цагариг үүсгэхийг нь тоолоод үз л дээ.

Никльс, Гуинплений баригдсан нь өөрт нь халтайг мэдэрч байлаа. Гэрт чинь элдэв явдал болох хэчнээн эвгүй байдгийг хэн эс мэдэх билээ л. Үүндээ сэтгэл зовсны дээр элдэв юмыг урьдаас ёрлосон Никльс бодолд дарагдан үймэрчээ. «Энэ хүмүүсийг» гэртээ оруулсандаа харамсаж байв. Хэрэв урьд нь ийм юм болохыг мэдэж байсан бол ч! Эцэс сүүлдээ түүнийг муу юманд оруулж байж л төгсөх вий! Одоо тэднийг яаж гудамжинд гаргачихдаг билээ? Үүрстэй гэрээрхүү юм тохирчихсон байдаг. Тэднээс нэг салдаг юм бол ямар сайхан байх сан билээ! Тэднийг ямар нэг аргаар хөөчхөж болдоггүй л байгаа даа?

Гэнэт буурчийн газрынх нь хаалгыг хүчтэй дэлдэх сонстов. Энэ нь Англид бол «ямар нэг эвэртэн туурайтан» ирснийг гэрчилдэг ажээ. Цохих эрэмбэ, өнгө нь дамжуулах захирах шаттай дүйж байдаг билээ.

Энэ нь язгууртан лордынх бус, шүүхийн түшмэлийн цохилт байлаа.

Айснаасаа дагжин чичирсэн буудлын эзэн салхивчаа нээж харлаа.

Үнэхээр шүүхийн түшмэл биеэрээ харагдав. Үүрийн гэгээнд, хаалган дээр хоёр хүнээр удирдуулсан бөөн цагдаа зогсох бөгөөд тэр хоёрын нэг нь шүүхийн түшмэл байлаа.

Никльс тэр хүнийг өглөө харсан болохоор дорхноо танив.

Нөгөө нь огтын танихгүй хүн байлаа.

Энэ нь бүдүүн лагс биетэй, лавайн өнгөт царайтай, ордныхны өмсдөг хиймэл үстэй, аяны цувтай хүн байв.

Никльс тэр хүмүүсийн дотроос шүүхийн түшмэлээс л үнхэлцгээ хагартал айв. Хэрэв тэр ордныхны занг мэддэг хүн байсан бол хоёр дахь хүнээс нь улам ч илүү айн дагжих байсны учир нь тэр хүн Баркильфедро биеэрээ байжээ.

Цагдаа нарын нэг нь хаалгыг дахин чанга дэлдэж гарав.

Магнайгаар нь айсандаа хүйтэн хөлс дааварласан буурчийн газрын эзэн хаалгаа бушуухан онгойлгов.

Шүүхийн түшмэл хэв журам сахиулж сурсан, тэнүүлч хэсүүлчдийг сайн мэддэг хүний өнгөөр дуугаа өндөрлөн ихэд ширүүнээр,

— Үүрс хаана байна? гэж асуув.

Буудлын эзэн малгайгаа аваад,

— Эрхэм минь, тэр энд суудаг гэж хариу өчлөө.

— Чамтай, чамгүй мэдэж байна.

— Тэгэлгүй яах вэ, эрхэм ээ.

— Түүнийг дууд.

— Одоо гэртээ алга аа, эрхэм ээ.

— Хаана байгаа юм, тэгээд?

— Мэдэхгүй.

— Мэдэхгүй гэдэг чинь юу гэсэн үг вэ?

— Эргэж ирээгүй л байна.

— Тэгэхээр их эрт явсан байх нь ээ?

— Үгүй ээ, их орой явсан.

— Энэ тэнүүлч нарыг яана аа! гэж түшмэл дуу алдав.

— Эрхэм ээ, тэр ирж явна гэж Никльс аяархан дуугарлаа.

Үнэндээ ч энэ үеэр Үүрс булан ороон гарч ирлээ. Буудал руу ирж яваа нь тэр. Тэр бараг бүхэл шөнийг, үдэд Гуинплен орж байгаа харагдсан гяндан болон шөнө дунд шинэхэн булш овоолохыг сонссон оршуулгын газар хоёрын хооронд өнгөрөөжээ. Уй

гашуугаасаа болж гундсан царай нь өглөөний гэрэлд улам ч хувхай цагаан харагдана.

Хурц гэрлийн эхлэл болох үүрийн туяа шөнийн бүдэг бадаг дүрсүүдийг, тэр байтугай хөдөлж байгааг нь ч өөрчлөхгүй ажээ. Зэвхий цагаан царай гарган бэгцийчхээд аажуухан ойртон ирж яваа. Үүрс бүдэг бадаг гэрэлд, зүүд зэрэглээ гэмээр юм харагдана.

Тэр цөхрөн балмагдахдаа буурчийн газраас толгой нүцгэн гүйчихсэн ажээ. Малгайгаа өмсөхөө мартчихсанаа ч ухаарсангүй. Шингэн хэдэн буурал үс нь салхинд сэрвэлзэнэ. Байдгаараа бүлтийсэн нүд нь юу ч харахгүй байна уу даа гэмээр. Бид ихэнхдээ, нойрон дундаа сэрүүн байж, сэрүүндээ унтаж байдаг. Үүрс галзуу солиотой амьтан шиг харагдана.

— Үүрс гуай, наашаа ирээч гэж буурчийн газрын эзэн орилоод, — Энэ эрхмүүд, тантай ярилцах гэнэ ээ гэв.

Мөргөлдөөнийг яажшуу зохицуулдаг юм билээ гэдгийг л бодон толгойгоо гашилгаж байсан Никльс, хэдийгээр даргыг нь захирагсадтай нь хамт нэг зиндаанд тавиад ихэрхэг занг нь хөдөлгөчих болов уу гэж айж байсан боловч, олон тоогоор хэлжээ.

Үүрс, нойртоо дарагдан нам унтаж байснаа, орноосоо ховх татагдсан хүн шиг цочин татваганаад,

— Юу болоо вэ? гэж асууснаа, шүүхийн түшмэл тэргүүтэй цагдаа нарыг олж харлаа.

Дахин хүнд цочирдолд орох нь тэр.

Дөнгөж саявтар бэрээ баригч, одоо болохоор шүүхийн түшмэл. Нэг нь нөгөө рүүгээ түүнийг шидэж байгаа юм шиг. Эртний домогт гардаг шиг, хоёр хадан хясааны дунд хавчуулагдсан хөлөг лүгээ адил байдалд оржээ.

Шүүхийн түшмэл түүнийг гуанз руу ор гэж дохиход нь Үүрс даган хөдөллөө.

Дөнгөж нойруоосоо сэрчхээд, яг энэ үед танхимын шал шүүрдэж байсан Говеким зогтусан, ширээний араар нуугдсанаа, шүүрээ хажуудаа тавиад амьсгаа даран чагнав. Үс рүүгээ гар явуулан шилээ маажилсан нь ихэд анхаарал тавьсны шинж ажээ.

Шүүхийн түшмэл ширээний хажуу дахь бандан дээр сандайлахад Баркильфедро өөртөө сандал татан, Үүрс, Никльс хоёр өмнө нь зогсов. Цагдаа нар хаалттай хаалганы өмнүүр нааш цааш зөрөлдөн явж эхэллээ.

Шүүхийн түшмэл Үүрс рүү хууль сахиулагчийн хилэнт харцаар ширүүн харснаа,

— Та гэртээ чоно байлгадаг уу? гэж асуухад Үүрс хариуд нь,

— Яг ч тийм биш гэж өчлөө.

— Та гэртээ чоно байлгадаг гэж шүүхийн түшмэл хэлэхдээ чоно гэдэг үгийг онцлон зааж дуугарав.

— Ийм учиртай юм л даа... гэж эхэлснээ Үүрс түгдчин дуугүй болчхов.

— Эрүүгийн хэрэг гэж түшмэл дуугарлаа.

Үүрс биеэ өмөөрөх санаатай,

— Энэ чинь гэрийн тэжээмэл амьтан гээд хэлээд үзэв.

Шүүхийн гүйцэтгэгч, ширээн дээр хуруугаа тэнийлгэн пад хийтэл тавьсан нь эрх мэдэлтэй хүнд л ганц таарах аяг байлаа.

— Марзганагч минь, маргааш өдийд та чонотойгоо хамт Английг орхисон байх болно. Эс тэгвэл чоныг чинь баривчлан, яам зургаанд аваачин алах болно.

Үүрс «Нэгнийх нь дараа нөгөөгийн нь хоолойг хэрчих нь ээ» гэж бодсон боловч, амнаасаа ганц ч үг унагасангүй, зөвхөн бүх бие нь дагжталаа чичирлээ.

— Та сонсож байна уу? гэж түшмэл асуулаа.

Үүрс сонсож байна хэмээн толгой дохив.

— Ална даа гэж түшмэл давтан хэллээ. Нэг хэсэгтээ чимээгүй харав. Тэгснээ,

— Таныг бол гянданд хорино гэлээ.

— Ноён шүүгч минь... гэж Үүрс доожоогүй бувтнав.

— Та маргааш өглөөнөөс өмнө явсан байх хэрэгтэй. Эс бөгөөс тушаалыг ёсчлон гүйцэтгэх болно.

— Ноён шүүгч ээ...

— Юу?

— Бид, хоёулаа Англиас явах хэрэгтэй юм уу?

— Тийм...

— Өнөөдөр үү?

— Өнөөдөр л.

— Яаж амжих билээ?

Никльс баярласандаа байж ядна. Үнхэлцгээ хагартлаа айж байсан түүнийг шүүхийн гүйцэтгэгч аварчээ. Цагдаагийн газар түүнд туслахаар ирсэн юм байж. Тэд өөрийг нь «энэ хүмүүсээс» салгаж өгчээ. Түүний оролцоогүйгээр, тэднээс хоёр яс салах үүргийг өөртөө авсан байх нь. Хөөчих юм сан гэж хүсэж байсан Үүрсийг нь цагдаагийн газар далд оруулаад өгөх нь тэр. Дийлдэшгүй хүч гэдэг энэ буюу. Түүнтэй арцалдах гээд үз л дээ! Эзэн хөл нь газар хүрэхгүй байв. Никльс ярианд хажуугаас нь оролцон,

— Эрхэм минь, энэ хүн... гэснээ Үүрс рүү хуруугаар заагаад, — Энэ хүн Английг өнөөдөр яаж орхих вэ гэж асууж байна. Үүнээс амархан юм гэж байхгүй. Темза мөрөн дээр, Лондоны гүүрний хоёр талаар, өдөр шөнийн аль ч цагаар Дани, Голланд, Испани гээд л одоогоор бидэнтэй дайтаж буй Францаас бусад аль ч улс гүрэн рүү хөвж байгаа хөлгийг олж болно. Тэднээс олон олон хөлөг өнөөдөр түрлэг эхлэх үе буюу шөнийн нэг цагийн орчим зангуугаа хураан хөдлөх байх. Эдний дунд Роттердамын «Вограат» хэмээх далбаат онгоц ч байгаа гэж дуржигнуулав.

Шүүхийн гүйцэтгэгч Үүрсийн зүг мөрөө хөдөлгөснөө,

— За сайн. «Вограат» ч байна уу, юу ч байна хамаа алга, эхний онгоцоор л явагтун гэж зарлиг буулгав.

— Ноён шүүгч минь... хэмээн Үүрс эхэлтэл,

— Тэгээд? гэж дуугарав.

— Урьдынхтайгаа адилхан мухлаг тэрэгтэй байсан бол энэ болох л зүйл, ноён шүүгч. Түүнийг онгоцон дээр аваад явж болох юм. Гэтэл...

— Гэтэл юу гэж?

— Гэтэл надад одоо «Ногоон хайрцаг», ямар ч том хөлөгт багтахгүй, хоёр морь хөллөдөг бүхээгт тэрэг байна.

— Тэр чинь надад ямар хамаатай юм? гэж түшмэд дургүйлхээд, — Тийм юм бол чоныг чинь ална гэв.

Хэн нэгний мөс шиг хүйтэн гар зүрхийг нь базах шиг болж, Үүрс дагжин чичирлээ. «Муу мангасууд! Алж шулна гэдэг эдний хамгийн тааламжтай ажил» гэж дотроо бодлоо.

Буурчийн газрын эзэн Үүрс рүү харан саамганаж,

— Мистер Үүрс, та «Ногоон хайрцгаа» худалдчихаж болно шүү дээ гэлээ.

Үүрсийг түүн рүү харахад,

— Танд хүн найр тавиа биз дээ? гэв.

— Юун тухай?

— Бүхээгт тэрэг, морьд, хоёр цыганы тухай, бас...

— Хэн? гэж Үүрс асуув.

— Хөрш циркийн эзэн.

— Нээрэн тийм л дээ.

Үүрс энэ тухай санажээ.

Никльс шүүхийн түшмэл рүү эргээд,

— Эрхэм ээ, наймааг өнөөдөр ч амжуулж болно. Хөрш циркийн эзэн бүхээгт тэргийг морьдтой нь хамт худалдаж авъя гээд байгаа юм даа гэв.

— Циркийн эзний зөв өө гэж шүүхийн гүйцэтгэгч хэлээд морь тэрэг түүнд хэрэгтэй байлгүй яах вэ. Тэр ч бас өнөөдөр явах болно. Саутворкийн сүмийн санваартнууд, Таринзофилдэд болж байгаа үймээн шуугиан, булай явдлын талаар гомдол гаргасан юм. Захирагч зохих арга хэмжээ авсан. Өнөөдөр орой энэ талбайд нэгээхэн ч нүүдлийн задгай ший байхгүй байх болно. Энэ булай явдал, элдэв хэрүүл маргаан төгсгөл болж байгаа нь энэ. Энд биеэрээ бараалхан гийгүүлж байгаа нь энэ эрхэм... гээд яриагаа таслан Баркильфедрод мэхийн хүндэтгэхэд цаадах нь ч мөн адилаар хариу барив.

— Энд биеэрээ бараалхан гийгүүлж байгаа энэ эрхэм өнөөдөр Виндзорын ордноос ирсэн юм. Энэ хүн зарлиг авчирчээ. Хатан хаантан, «талбайг цэвэрлэх лүндэн буулгасан байна».

Шөнийн турш олон олон зүйлийг эргэцүүлэн бодож амжсан Үүрс дотроо өөртөө нэг бус асуулт тавьж байлаа. Ер нь эцсийн эцэст ганцхан авс л харжээ. Түүн дотор Гуинплен байсан гэдэг баталгаа хаана байна? Гуинпленээс өөр хоригдол гянданд үхчихийг хэн байг гэхэв. Талийгаачийн нэрийг авсан дээр тавьдаг биш дээ. Гуинпленийг баривчилсны дараа, нэг хүн оршуулаа биз. Энэ бол юуг ч гэрчилж чадахгүй.

Post hoc, non propter hoc²⁹⁵ гэх мэт.

Үүрс дахиад л эргэлзэж эхлэв. Найдвар шатан, усан дээр газрын тос дүрэлзэх лүгээ адилаар бидний эмгэнэлийн дээр дүрэлзэх бөлгөө. Сайх дөл нь хүмүүсийн гуниг зовлонгийн гадаргуу дээр байнга хөвөн байх билээ. Тэгж тэгж эцэст нь Үүрс «Гуинпленийг үнэн хэрэгтээ оршуулсан байж болно. Гэвч энэ бол мадаггүй зүйл биш. Хэн мэдэх вэ? Гуинплен маань амьд хэвээрээ ч байгаа юм бил үү?» гэж дотроо тунгаалаа.

Үүрс түшмэлийн өмнө мэхийн ёслоод,

— Эрхэм хүндэт шүүгч минь, би явна аа. Бид явна. Цөмөөрөө явна. «Вогратаар» явах минь, Роттердам руу. Би хэлснийг дагана. Би «Ногоон хайрцаг», морьд, бүрээ, цыгануудаа зарчихъя. Гэвч орхиж явж болохгүй нэг нөхөр маань байгаа юм. Гуинплен... гэж хэлтэл,

— Гуинплен үхсээн гэж нэгэн хүн дуугарав.

Үүрс, хүйтэн могой биед нь хүрсэн мэт татвасхийв.

Энэ үгийг Баркильфедро хэлсэн ажээ.

Найдварын эцсийн оч унтрах нь тэр. Ямар ч эргэлзээ үлдсэнгүй. Гуинплен үхжээ.

Танихгүй хүн үүнийг сайн мэдэж байх ёстой. Үүнийг мэдэхээр ёрын муухай царайтай хүн ажээ.

Үүрс мэхийн ёслов.

Никльс айгаагүй үедээ, цаанаа бас санаа сайхантай хүн байлаа. Айсан нь түүнийг өөдгүй догшин болгожээ. Айсан хүнээс илүү хэрцгий юм гэж үгүй билээ.

— Хэргийг хялбар болгож байна гэж дуугарахчаа аядав.

Тэгээд Үүрсийн ар талд хар амиа бодсон амьтдын шинж болох, баярласандаа гараа үрчин, Понти Пилаттай адилхнаар дотроо «Би энд ямар хамаатай юм» гэж бодож зогслоо.

Гунигт дарагдсан Үүрс толгойгоо унжуулжээ. Гуинпленд оноосон алах ялыг гүйцэтгэжээ. Үүрсийн хувьд, дөнгөж саяхан түүнд мэдэгдсэн ёсоор цөлөх ял оноожээ. Захирагдахаас өөр мэхгүй болох нь энэ. Тэр бээр бодол болон зогсов.

Гэнэт хэн нэгэн хүн тохойноос нь барихыг мэдрэв. Тэр нь шүүхийн түшмэлтэй хамт ирсэн хүн байв. Үүрс байдгаараа цочин агдасхийв.

«Гуинплен үхсэн» хэмээн хэлсэн тэр хоолой, түүний чихэнд,

— Танд сайныг хүссэн хүний явуулсан арван фунт стерлинг энд байна гэж шивгэнэв.

Тэгээд Баркильфедро Үүрсийн өмнөх ширээн дээр жижигхэн хэтэвч тавилаа. Уншигч авхай мэдээжээр Баркильфедрогийн аваад явсан бяцхан хайрцгийг санаж байгаа биз ээ.

Хоёр мянган алтан зоосноос аравхан нь, Баркильфедрогийн гарздаж чадах нь ердөө л энэ. Чин сэтгэлээс хэлэхэд, энэ бол хангалттай. Хэрэв тэр Үүрст үүнээс ахиухныг өгсөн бол өөрөө хохирчих байлаа. Тэр лордыг олох гэж багагүй хөлсөө гаргаа биз дээ, энэ чинь. Одоо түүнээ ашиглаж эхэлжээ. Түүний нээсэн алтны уурхайн анхны дээж түүнд ногдох нь зүй ёсны хэрэг. Хэн нэг нь үүнийг өөдгүй явдал гэж нэрлэвэл нэрлэж л байг, энэ бол тэдний хэрэг. Харин гайхаад байх юм, энд юу ч байхгүй. Баркильфедро бол мөнгөнд, ялангуяа хулгайлсанд нь бүр ч их дуртай нэгэн билээ. Атаач жөтөөч хүн бүр хариг шунахай байдаг. Баркильфедрод ч өөрийн гэсэн муу тал бий. Муу шинжийн хүн ч гэлээ бага сага дутагдалтай. Бар хүртэл бөөстэй байдгийг сана!

Түүнээс гадна үүнд Баконы сургууль байгаа юм.

Баркильфедро шүүхийн гүйцэтгэгч рүү эргээд,

— Ноёнтон, бушуухан дуусгах ажаамуу. Би их яарч байна. Их эзэгтэйн өөрийнх нь хэрэглэдэг өртөөний унаа намайг хүлээж байгаа. Виндзор руу хамаг байдгаараа яаравчлан, хоёр цагийн дараа гэхэд тэнд оччихсон байх хэрэгтэй байна. Би бүхнийг айлтган, цаашдын тушаал авах ёстой гэж өчив.

Шүүхийн түшмэл бослоо. Зөвхөн оньсолсон байсан үүд рүү очиж онгойлгоод, цагдаа нар луу ганц ч үг дуугаралгүй харснаа, эрх дархтай хүний ёсоор долоовор хуруугаараа дуудав. Цагдаагийн баг тэр чигээрээ, мууг ёрлон буй нам жимийг эвдэлгүйгээр, чимээ имээгүйхэн танхимд орж ирлээ.

Элдэв будилааныг дор нь тас цохисон тайлалд сэтгэл ханасан Никльс, гайнаас ийм амархан салсандаа хөл газар хүрэхгүй баярлаж байтал, хоёр хоёроороо эгнэсэн цагдаа нарыг хараад, Үүрсийг гэрт нь баривчлах гэж байгаа юм биш байгаа даа хэмээн айчхав. Эхлээд Гуинпленийг, дараа нь Үүрсийг, ар араас нь буудалд нь баривчлах нь, үйлчлүүлэгчид угаас цагдаа хуруу дүрдэг ундааны газарт дургүй байдаг учир буурчийн газрыг баллаж болох байлаа. Сайн сэтгэлтэйгээ үзүүлэхийн хажуугаар, эелдэг хүндэтгэлтэйгээр хэрэгт оролцох цаг болжээ. Никльс зусардахын зэрэгцээгээр, өөртөө итгэлтэй байгаа нь илт мишээсэн царай гарган түшмэл рүү эргээд, өгүүлрүүн,

— Эрхэм ээ, гэмт хэрэгтэн чоныг Англиас зайлуулж, Үүрс хэмээх хүн одоо нэгэнт эсэргүүцэл үдүүлэхээ байж, эрхэм таны тушаалыг үг дуугүй биелүүлэхээр зэхэн буй нь ив илэрхий болсон энэ үед, сайх хүндэт түрүүч нар энд заавал байх хэрэггүй юм шиг санагдаж байгааг танд өчье. Эрхэм минь, эзэнт төрийн ашиг тусын тулд зайлшгүй байх ёстой цагдаагийн газрын хүндэтгэвэл зохих ямар нэг үйлдэл нь, миний мэтийн ямар ч гэм буруугүй үйлчилгээний газар хохирол учруулдгийг анхааралдаа авч, тунгаах ажаамуу. Өндөр дээд их эзэгтэйн айлдсанчлан, «Ногоон хайрцгийн» хэрмэл жүжигчдээс талбай цэвэрлэгдмэгц, энд ямар ч гэмт хэргийн хань хамсаатан үлдэхгүй. Учир нь сохор хүүхэн, хоёр цыганыг хууль завхруулагчид гэж бодохгүй байна. Учир иймд эрхэм минь, би танаас, эндэх дээд зэргийн морилолтоо товчлон, саяхан орж гийгүүлээд байгаа хүндэт ноёдыг, нэгэнт энэ байшинд хийх юм юу ч үгүй тул буцаан гаргахыг гуйя. Хэрэв эрхэм та, миний хэлсэн үгийн үнэнийг даруухан асуултаар батлахыг зөвшөөрөх сөн бол, би энэ хүндэт ноёдын энд байгаа нь ямар ч ашиггүйг эрхэм танаас «Үүрс гэдэг хүн тогтоолд нэгэнт захирагдаад байхад, чухам хэнийгээ энд баривчлах гээд байгаа юм бэ?» гэж асуугаад л нотлоод өгөх байна.

— Таныг гэж түшмэл хариу өчлөө.

Биеийг нэвт бүлж байгаа сэлэмтэй ярих юм байдаггүй билээ. Аянгад дайрагдсан мэт Никльс ширээ, сандал аль дайралдсан юман дээрээ ойчоод өгөв.

Шүүхийн түшмэл хэрэв талбай дээр хүн байсан бол тэдэнд сонстохоор дуугаа өндөрлөн,

— Гуанзны эзэн мистер Никльс Плементи, бидэнд өөр нэг хэргийг дуусгавар болгох хэрэгтэй байна. Энэ марзганагч, чоно хоёр бол тэнүүлчид. Эд Англиас хөөгдлөө. Гэвч хамгийн гол буруутан бол та. Таны өөгшүүлэн, зоргоор тавьсны улмаас л энэ байшинд танайд хууль зөрчигдсөн байна. Буурчийн газартай байхыг зөвшөөрөгдсөн хүн та, түүнд болж байгаа бүхнийг хариуцах ёстой. Хүн та байрандаа зүй бус явдал гаргуулжээ. Одоо таны буудал эрхлэх эрхийг хүчингүй болгов. Та зохих торгууль төлөөд шоронд суух болно гэлээ.

Цагдаа нар буурчийн газрын эзнийг хүрээлэв. Шүүхийн түшмэл Говикемийг заагаад,

— Энэ жаал хүүг, таны хамсаатнаар баривчиллаа гэв.

Цагдаа нарын нэгний гар, хууль сахиулагчийг сониучирхан ширтэж буй Говикемийг шилдэн авлаа. Чухам юу гэгч болоод байгааг сайн ойлгоогүй учир тэгтлээ айж сандарсангүй. Хачин янзын юмыг нэг бус удаа үзсэн тул, энэ чинь арай нөгөө жүжгээ үргэлжлүүлэн тоглоод байгаа юм биш байгаа даа хэмээн дотроо бодож зогсов.

Шүүхийн түшмэл сүр жавхлантай байхын дээд илрэл болсон бүрхээ нүд рүүгээ даран, гараа гэдсэндээ зөрүүлж бариад өгүүлрүүн,

— Ингэхээр, мистер Никльс таныг шоронд аваачин, хорих болно. Таныг энэ жаалтай хамт. «Тедкастерийн буурчийн газрыг» чинь хааж, битүүмжилж, таглан хадах болно. Бусдад сургамж болог. Тэгэхээр одоо биднийг дагаад явах болж дээ.

Заметки

[←1]

Бонивар (1493—1579) — Женевийн эх оронч. Женев нуурын дунд XIV зуунд барьсан Шильоны цайзын доорх хонгилд зургаан жил хоригдож байжээ.

[←2]

Ледло Эдмонд (1617—1692) — Английн хөрөнгөтний хувьсгалын зүтгэлтэн. Нэгдүгээр Карлын шүүгчдийн нэг. Сүүлд нь Швейцар луу зугтжээ.

[←3]

Веве — Женев нуураас холгүй орших Швейцарын хот.

[←4]

Ганновер — Германы ванлиг 1714—1837 онд Англитай
нэгдэж байв.

[←5]

Дюнкерк — Францын хойд талын стратегийн ач холбогдолтой боомт. 1658 онд Кромвель түүнийг Нидерландаас булаан авчээ. Францад талтай бодлого явуулдаг байсан хоёрдугаар Карл 1662 онд түүнийг Францад худалджээ.

[←6]

Монк Жорж (1608—1689) — английн генерал, зарчимгүй залхай этгээд. Хөрөнгөтний хувьсгалын эхэнд нэгдүгээр Карлын талд байснаа, дараа нь Кромвелийн талд оржээ. Кромвелийг үхсэний дараа хаан ширээг сэргээхэд хүчин тусалж байв.

[←7]

Тримальхион — Ромын зохиолч Петронийн, уран
элэглэлийн романы баатар. Өөдгүй садар самуун баян эр.

[←8]

Катон Марк Порций (МЭӨ 234—149) — Эртний ромын зохиолч. Элдэв баян тансаг, ёс заншлын уналтыг эсэргүүцэгч улс төрийн зүтгэлтэн.

[←9]

Кромвел Оливер (1599—1658) — Английн хөрөнгөтний хувьсгалын удирдагч.

[←10]

Гучин жилийн дайн (1618—1648) — Гамбургийн холбоо болон түүнийг эсэргүүцэгчдийн хооронд болсон дайн.

[←11]

Фронд — Хааны эрх мэдлийг бататгахыг эсэргүүцсэн
феодал язгууртны хөдөлгөөн. Энэ харгис хөдөлгөөн ялагдал
хүлээсэн юм.

[←12]

Мазарани Жулио (1602—1661) — XIV Людовикийг бага байх үед нэг ёсны Францын эзэн байсан их хамба; Кромвель тэр хоёрын хооронд урт удаан хугацааны дипломатын тэмцэл явж байв.

[←13]

Усан замын баталгаа — 1651 онд «Сунжирсан улсын хурлаас гаргасан энэхүү баримт бичгээр Англид ирж буй барааг зөвхөн английн юм уу эсвэл бараа явуулж байгаа орны хөлөг онгоцоор зөөх тухай заажээ. Энэ нь Голланд тэргүүтэй зуучлагч худалдааны эсрэг чиглэсэн байв.

[←14]

Бредийн тунхаглал — 1660 онд II Карлаас гаргасан тунхаглалаар хувьсгалд оролцсон улсыг өршөөж, хураасан газрыг нь эгүүлэн олгоно гэжээ. Гэвч үүнийгээ биелүүлсэнгүй.

[←15]

Гентингдоны шар айраг исгэгчийн хүү — Оливер
Кромвелийг хэлжээ.

[←16]

Вавилоны цамхаг — Домгоор, Вавилон хотынхон тэнгэрт тулсан цамхаг босгоно гэхэд нь бурхан хилэгнээд түүний нь бөөн будилаан болгочихжээ. Үүнээс хойш бүтэшгүй эмх замбараагүй юмыг хэлдэг болжээ.

[←17]

Драйден Жон (1631—1700) — английн зохиолч, яруу найрагч. Дээдийг байдгаараа магтаж байсан хүн. Залуудаа бүгд найрамдахчуудыг үнэлдэг байв.

[←18]

Эвелин Жон (1620—1706) — Тухайн үеийнхээ ёс заншлыг дүрслэн бичсэн сонирхолтой «Өдрийн тэмдэглэл» бичсэн зохиолч.

[←19]

Мария Алакок (1647—1690) — Францын гэлэнмаа,
хуурмаг сүсэгтэй садар эмэгтэй байжээ.

[←20]

иезуит — «Имусын нийгэмлэг» гэдэг католик гэлэн нарын
маш харгис байгууллага.

[←21]

Нэг алтан мөчрийн оронд, өөр нэг нь (лат.)

[←22]

Иоркийн ван — Хаан ширээ залгамжлах үеийнх нь
хоёрдугаар Иаков хааны зэрэг.

[←23]

ливр — мөнгөн зоос.

[←24]

Хар очирт бэрээ баригч — Тэр үеийн Англид төрийн хэрэг явуулахад, очирт бэрээ гартаа барьсан тусгай түшмэл оролцдог байжээ.

[←25]

Зовлонт пүрэв гараг — Мацаг барихын өмнө пүрэв гараг
(шашны).

[←26]

Хааны хувцас хадгалагч хиа (анг.)

[←27]

Ямар ч тодотголгүй Мадам (Мадам гэдэг нь Францын хааны их охин, хунтайж болон хааны дүүгийн эхнэрийн цол хэргэм байжээ).

[←28]

Ораны Вильгельм (1650—1702) Английн 5 хөрөнгөтнүүд
1683 оны хоёрдугаар Иаковыг түлхэн унагаад, хаан ширээнд
урьсан голландын хамба.

[←29]

Жон Локке (1632—1704) — Нийгмийн үзлийн талаар гүн ухаантан, идеалист.

[←30]

Тантал — Грег домгоор бурхнаас үүрд залхаагдахаар шийтгэгдсэн фригийн хаан. Эрүүнд тулсан усанд зогсон модны жимс аманд нь тулах дөхөвч, ууя гэхэд ус нь, идье гэхэд жимс нь зайлна.

[←31]

Диaina — ромын домгоор ангийн бурхан.

[←32]

Астартр — эртний финикийн домгоор эх үрс, хайр
сэтгэлийн бурхан.

[←33]

Пизонд хандсанд захиа — Ромын яруу найрагч Горацийн
(МЭӨ 65—8 он) зохиол.

[←34]

Елизавета Тюдор (1533—1603) 1558 оноос английн хатан хаан байжээ. Хаанчлалын нь үед ганцаар эзэрхэг ноёрхол хүчтэй болж, протестант шашин бэхэжжээ.

[←35]

Англид зонхилж байдаг протестан шашны олон урсгал,
XIX зууны үед христосын католик шашнаас салан гарч иржээ.

[←36]

Мария Стюарт (1542—87) Шотландын хатан хаан, английн хаан ширээнд санаархан цаазлуулжээ.

[←37]

кватрен, акростик — Мөрийн эхний үсгүүд нь үг болдог
шүлэг.

[←38]

Минерва болон Амфитрита — Ром домгоор гар урлал,
урлагийн бурхад.

[←39]

Фижем — Өргөн цагариг бүслүүртэй банзал. Ташаан толгойд тогтож, бүсэлхийг гоолиг нарийхан болгон харагдуулна.

[←40]

Риччо Давид — Мариягийн дотно хүн, ордны хөгжимчин.

[←41]

Хойд Америкийн омог. Одоогийн Мароккын үндсэн хүн
ам.

[←42]

Анна Болейн (1507—1536) Английн хатан хаан VIII
Генрихийн удаах хатан.

[←43]

Луиза Лавальер — XIV Людовикийн дотно эмэгтэй.

[←44]

Маргарита Валуа (1552—1615) Францын хаан IV
Генрихийн анхны хатан.

[←45]

Олимп — Грегийн уул. Домог ёсоор бол Зевс тэргүүтэй бурхад цугладаг ариун газар.

[←46]

Францын бэйс Рамбульегийн (1588—1665) байгуулсан
зочид буудал. Ихэс дээдэс цугладаг байж.

[←47]

Уолпол Роберт (1676—1749) орфордын гүн. 1721—1742 онд Английн ерөнхий сайд байсан.

[←48]

Дюбуа Гуйльем (1656—1723) Францын их хамба, Орлеаны Филиппийг түр засаг барьж байхад (1715—1723) ерөнхий сайд байжээ.

[←49]

Мальборо Жон Черчилль (1650—1722) — Английн ван,
цэргийн жанжин.

[←50]

Болинброк (1678—1751) — Английн лорд, төрийн зүтгэлтэн, зохиолч.

[←51]

Ришелье Арман Жан дю Пилсси (1585—1642) Францын их хамба, 1642 оноос үндсэндээ францыг захирч, цэрэг, улс төр, эдийн засгийн олон шинэтгэл хийжээ.

[←52]

Христосын домгоор Адам нь бурхны бүтээсэн анхны эр хүн. Анхны эм хүн Еваг түүний хавиргаар бурхан бүтээжээ. Хорт могойн турхирснаар «сайн мууг танин мэдэхүйн модноос» хориотой жимс амсахыг Адамд ятган нүгэл хийлгээд бурхныг хилэгнүүлэн диваажингаас хөөгджээ. Эдем нь тэр хоёрын нүгэлд унахаасаа өмнө амьдарч байсан газар. Нэг ёсны диваажин гэсэн үг.

[←53]

Свифт Жонатан (1667—1745) — Английн улс төрийн зүтгэлтэн, зохиолч. Түүний хошигнол нь үндсэндээ хувь хүн болон нийгмийн булай явдлыг үндсээр нь устгах хэрэгтэй гэдэгт оршино.

[←54]

Европын зүгийн орнуудад эмэгтэй хүн морь унахдаа нэг тал руу нь хоёр хөлөө унжуулж суудаг.

[←55]

Ганган хээнцрийн журам гаргагч (лат.)

[←56]

Referee гэдэг нь шүүгч гэсэн үг.

[←57]

Гиней — Английн хуучин алтан зоос, хорин нэгэн шиллингтэй тэнцэнэ.

[←58]

Терсит — Гомерийн «Илиад» туульст гардаг грек цэрэг, зохиогч түүнийг их муухай хүн байснаар гаргажээ.

[←59]

Трибуле, францын хаан XII Людовик, анхдугаар
Францискын дэргэд байсан алиа салбадай

[←60]

Дунс Скот (1265—1308) — дундад зууны английн гүн ухаантан.

[←61]

Гудибрас — английн зохиолч Бетлерийн нэгэн яруу
найргийн баатар.

[←62]

Скаррон (1610—1660) — францын зохиолч, өвчнөөсөө болоод сандлаас босож чадахаа байжээ.

[←63]

Коклес Гораций (МЭӨ VI зуун) — Ромын домогт баатар.
Тулалдаанд өрөөсөн нүдгүй болжээ.

[←64]

Камоэнс Луи (1525—1580) Португалийн үндэсний яруу
найрагч, бас тулалдаанд өрөөсөн нүдээ алджээ.

[←65]

Эзоп (МЭӨ VI зуун) эртний грекийн ёгт үлгэрч,
суллагдсан боол.

[←66]

Мирабо (1749—1791) уран илтгэгч. XVIII зууны францын хувьсгалын улс төрийн зүтгэлтэн. Үндсэн хуульт хаант засгийн талыг баригч, Цагаан бурхнаар цоохортсон муухай царайтай хүн байжээ.

[←67]

Венера тэр ойд нууц амрагийнхаа дэлгэсэн гарт тэврүүлнэ
(лат.)

[←68]

Мило — 1820 онд Венерагийн алдарт баримлыг олсон
Эгийн тэнгисийн грег арлын нэр.

[←69]

Жентльмен — нэг утга нь дээд зиндааны хүрээнд
хамаарагддаг хүнийг хэлнэ.

[←70]

Таван боомт — Английн баруун өмнөд эргийн Гестинс,
Сэндвич, Дувр, Ромней, Гайтыг хэлжээ.

[←71]

Хатан хаан Анна — Хоёрдугаар Иаковын охин. Ораны
Вильгельмийг нас эцэслэсний дараа хаан ширээг залгамжилжээ
(1702—1714 онд).

[←72]

XVII—XIX зууны Английн улс төрийн нам. Тори гэдэг нь Ирландад дээрэмчдийг хочилдог байжээ. Тори нь том газрын эзэд, язгууртны эрх ашгийг хамгаалсан өнөөгийн консерватив намын өмнөх зүтгэлтнүүд.

[←73]

XVII—XIX зууны Английн улс төрийн нам. Виги гэдэг нь Шотландад тонуулчдыг хочилдог байжээ. Виги нь орчин үеийн английн либерал намын эхийг тавигч, үйлдвэрийн эзэн, баян худалдаачин банкны эздэд гол найдлагаа тавина.

[←74]

Queen Anna — Хатан хаан Анна (анг.)

[←75]

Зоргоороо байх харти (баримт бичиг) — 1215 онд английн хаан Газаргүй Иоанн, боссон гүн, хэрмэл баатар, хотынхны хүчинд автан, эдгээр давхаргын хүмүүсийн эрх чөлөөг шүүх ажиллагаагүйгээр хаах эрхгүй гэдгийг тунхагласан баримт гаргажээ. Мөн тэдний харьяат нарт алба татвар ногдуулах эрхийг хязгаарлажээ.

[←76]

астрологи — од болон түүний хүний амьдралд
нөлөөлөхийг судалдаг шинжлэх ухаан.

[←77]

Гороскоп — Хүн төрөхөд, түүний хувь заяаг тодорхойлдог одон орны зураг.

[←78]

Төлөгдсөн ариун явдал (лат.)

[←79]

Тоуэр — XVII зуунаас 1820 он хүртэл төрийн шорон байсан хуучин шилтгээн.

[←80]

Болинбрюк Генри (1678—1751) — английн дипломат, гүн ухаантан, лорд. Хатан хаан Аннын ерөнхий сайд байжээ.

[←81]

Дайн ба энх (лат.)

[←82]

Экю — хуучны францын алт мөнгөн зоос.

[←83]

Лиар — жижиг зэс зоос.

[←84]

1649 онд Англид хөрөнгөтний хувьсгал дээд цэгтээ хүрч, өргөн олны шахалтын дор хөрөнгөтнүүд нэгдүгээр Карлыг эх орноосоо урвагч хэмээн шүүж, цаазаар авчээ. Францад 1793 онд XIV Людовикийг яacobинчууд бас цаазалжээ.

[←85]

Галион — XVI—XVII зуунд испаничууд индейчүүдээс дээрэмдсэн алтаа Америк тивээс тээдэг байсан дарвуулт онгоц.

[←86]

Хойд мөсөн далайн хэсэг арал.

[←87]

Версаль — Парисын дүүрэг. 1682—1789 онд францын хааны өргөө байжээ. Ордон, цэцэрлэгийн иж бүрэн чуулга.

[←88]

Люлли Жан Батист (1633—1687) францын хөгжмийн
зохиолч.

[←89]

Рен Христофор (1632—1723) английн уран барилгач.

[←90]

Мансар Франсуа (1598—1666) XIV Людовикийн уран
барилгач.

[←91]

Сомерс Жон лорд (1651—1716) виги намын удирдагчдын
нэг английн зохиолч.

[←92]

Ламуаньон Гильом де (1617—1677) — шүүх захиргааны
байгууллага, Парисын улсын хурлын дарга.

[←93]

Буало Никола (1636—1711) — францын яруу найрагч, шүүмжлэгч, сонгодог чиглэлийн онолч «Яруу найргийн урлагийн тухай» шүлэгчилсэн шинжилгээний зохиолыг зохиогч.

[←94]

Поп Александр (1688—1744) — английн сонгодог чиглэлийн (классицизм) том яруу найрагч.

[←95]

Кольоер Жан Батист (1619—1683) — XIV Людовикийн ерөнхий сайд, үндсэндээ Францын гадаад, дотоод бодлогыг явуулж байжээ.

[←96]

Годольфин Сидней (1645—1712) — Анна хатан хааны
мөнгөн санхүүгийн ерөнхий лорд.

[←97]

Виндзор — Темза мөрний эрэг дээрх XIV зуунд
гуравдугаар Эдуардын үед барьсан хааны ордон.

[←98]

Марли — Версалийн ойролцоо XIV Людовикийн
тушаалаар бариулсан орд.

[←99]

Далайн ван

[←100]

Сахил хүртэх өргөл (лат.)

[←101]

Дарийн хуйвалдаан — 1605 онд улсын хурлыг дэлбэлэх гэсэн английн харгис католикуудын амжилтгүй оролдлого. Дэлбэрэлтийг шууд гардан хийх ёстой хүн нь офицер Гал Фокс байжээ.

[←102]

Доминициан (81—96) — Ромын эзэн хаан.

[←103]

там (лат.)

[←104]

Гелиогабал (218—222) — Ромын эзэн хаан. Харгис хатуу садар самуун нь Ром хотод бослого гарахад хүргэж, үймээний үед алуулжээ.

[←105]

Альберони Жулио (1664—1752) — Испанийн хааны V
Филиппийн сайд, италийн их хамба.

[←106]

иезуит — «Иисусийн нийгэмлэг» гэдэг католик гэлэн нарын зорилгоо биелүүлэхийн тулд юунаас ч буцдаггүй маш харгис байгууллагын гишүүн.

[←107]

Данайдын торх — Грек домгоор, Данай хааны тавин охин нөхрүүдээ алсны учир, доод тивд ёроолгүй торхыг усаар дүүргэхээр шийтгэгджээ.

[←108]

vivus (амьд) sectio (ярах) — Амьтны организмыг судлахын тул амьдаар нь хагалахыг хэлнэ (лат.)

[←109]

Альба ван — Нидерландийг захирч байсан испанийн амбан. Харгис ширүүнээрээ нэрд гарчээ.

[←110]

Энд арслан байдаг (лат.)

[←111]

«Сизифийн хөдөлмөр» — үр ашиггүй, хүнд ажлыг хэлнэ. Грек домгоор бурхдыг залилж хоёронтоо үхлээс зайлсхийсэн Коринфийн хаан. Үүнийхээ төлөө тамд, том чулуу өнхрүүлэн уулын оройд гарахаар шийтгүүлжээ. Чулуу оройд гарахын даваан дээр буцаж өнхөрнө.

[←112]

Шашны домгоор далайн аварга том мангас.

[←113]

Бариултай нүдний шил.

[←114]

Шеридан Ричард-Бринсли (1751—1816) — английн уран
элэглэгч жүжгийн зохиолч, төрийн зүтгэлтэн.

[←115]

Голиаф — Христос шашны домгоор сайх аварга эр, хожим нь хаан болсон Давид гэдэг малчинтай халз тулалдаад алуулжээ.

[←116]

Хамаргүй болгох (лат.)

[←117]

Алхими — Дундад зуунд энгийн металлаас «гүн ухааны чулуу» гэгч байгальд огт байхгүй зүйлийн тусламжаар, алт мөнгө ээрэг үнэт металл гаргаж авах гэсэн оролдлого.

[←118]

Гансрал, шаналгаа (анг.)

[←119]

Medusa — Грег домгийн, өөр лүү нь харсан хүнийг харцаараа чулуу болгон хувиргачихдаг үснийх нь оронд могой орооцолдсон эмэгтэй.

[←120]

IV—V зуунд Дорнодод гарсан шашны бүлэглэл. Орчлонд сайн муу, гэрэл харанхуй гэсэн хоёр эхлэл тэмцэлдэж байдаг гэж үздэг байжээ.

[←121]

Нүдгүй мөртөө харна (лат.)

[←122]

Хамаргүй болсон хүмүүсийн тухай (лат.)

[←123]

Амаа цуулуулсан хүн (лат.)

[←124]

Юпитер — Ромын домгоор, грекийн Зевс бурхантай тэмцэх их бурхан.

[←125]

Иегов — МЭӨ I зуунд Палестинд үүссэн иудаизм шашны гол бурхан.

[←126]

Грег домгийн санаа зовох юмгүй аз жаргалын орон.

[←127]

Грегийн домгоор, сайхан төрсөн малчин залуу.

[←128]

Венера — Ромын домгоор дурлал, гоо сайхны охин тэнгэр.

[←129]

Мөнгөний нэгж (лат.)

[←130]

Мөнгөний нэгж (лат.)

[←131]

Мөнгөний нэгж (лат.)

[←132]

Грегорианы хөгжим — V зуунд анхдугаар Григори папаас католик сүм хийдийн хурал номд зориулан гаргасан хөгжим.

[←133]

Амбрионы жаяг — IV зуунд Миланы ширээт хамба
Амбросигээс хурал номд зориулан дуулах болсон дуу.

[←134]

Мозарабын жаяг — Арабын дарлалын дор Испанид
амьдарч асан христос шашинтан.

[←135]

Дундад зууны сүүл, сэргэн мандалтын эхэн үед английн театруудын тавьж байсан шашин ёс суртахууны сэдэвт бэсрэг жүжиг

[←136]

Арьсаа эргүүлсэн баавгай (лат.)

[←137]

Пловт. Тит Марций (МЭӨ 254—184) — Баячуудыг
элэглэсэн олон инээдмийн жүжиг бичсэн ромын зохиолч.

[←138]

Мөргө! Уйл!
Үгнээс ухаан ургаж
Дуунаас гэрэл гарна.

[←139]

Шөнө чи зайл!
Өглөө дуулж эхэллээ.

[←140]

Энэлэн уйлахаа больж
Элбэрэлт тэнгэрт гараарай.

[←141]

Гав гинжээ тасалж
Гайхал муухайг орхиод
Хар хальснаасаа салаарай.

[←142]

Өө, ирээч! Дурлаач!
Чи бол сэтгэл
Би бол зүрх.

[←143]

Демосфен (МЭӨ 384—322) — Эртний грекийн улс төрийн зүтгэлтэн, гаргууд уран илтгэгч. Амандаа чулуу хийн үг хэлэх дасгал хийдэг байсан гэдэг.

[←144]

болох зөвлөгөөнд (лат.)

[←145]

Зөвшин зохицуулахад (лат.)

[←146]

Анхдугаар Карл (1600—1649) Стюардын удмын английн хаан, Английн хөрөнгөтний хувьсгалын үеэр «улсын дайсан» хэмээгдэн цаазлуулсан.

[←147]

Оливер Кромвель (1599—1658) XVII зууны английн хөрөнгөтний хувьсгалын зүтгэлтэн. Дахин хаант засаг тогтоход хүүрийг нь ухан гаргаж доромжилсон гэдэг.

[←148]

Бид (лат.)

[←149]

Цусаараа бидэнтэй эн чацуу (лат.)

[←150]

Домгоор тамын орны нэгэн гол

[←151]

Мангас (исп.)

[←152]

Дээр цагт Атлантын далайд оршин байснаа усан доор
орсон гэж үздэг хуурай газар. Элбэг дэлбэг амьдралтай, соёл,
урлаг хөгжсөн байжээ гэж гардаг.

[←153]

Чамд хайртай (фр.) Дуудлага нь «жетээм».

[←154]

Парисын дүүрэг хот.

[←155]

Их өндөр хошуу, хитэгтэй Азид их дэлгэрсэн ачааны
дарвуулт завь.

[←156]

Бөмбөг өнхрүүлэх ногоон нуга (анг.)

[←157]

Халдвартай хуурамч шинжлэх ухаан (лат.)

[←158]

Демокрит (МЭӨ 460—370) — Эртний Грекийн гүн ухаантан. Түүнийг амьдралын өөдрөг сургаалаас нь болж «Инээдэг гүн ухаантан» гэдэг байжээ.

[←159]

Лактанций (260—330) — Латины сүмийн зохиолч.

[←160]

Сильвестр — ромын пап лам (999—1003)

[←161]

Диоскорид (I зуун) эмийн ургамлыг судалсан грек оточ.

[←162]

Хризипп (МЭӨ 281—207) — грекийн гүн ухаантан.

[←163]

Иосиф Флавий (37—100) — Ромын эзэн хаан Веспасианы дэргэд алба түшиж байсан, жүүд түүхч.

[←164]

Гомер — алдарт «Илиада», «Одессейг» зохиосон хэмээгдэгч, эртний грекийн домогт, сохор туульч.

[←165]

Ева — бурхны бүтээсэн анхны эмэгтэй хүн.

[←166]

Христос шашинтны домгоор, чөтгөр болон хувирсан
сахиулсан тэнгэр.

[←167]

Христос шашинтны домгоор, чөтгөр болон хувирсан
сахиулсан тэнгэр.

[←168]

Клавдий Пулькр (МЭӨ III зуун)—Ромын засаг ноён.
Домгоор бол ариун тахианууд хаяж өгсөн үрийг нь тоншиж
идээгүйгээс, Карфаганы эсрэг дайнд ялагдсан гэдэг.

[←169]

Вельзовул—Шинэ библийн хөлгөн сударт, шуламсын
толгойлогчийн нэр

[←170]

Веспасиан Тит Флавий (69—79) — ромын эзэн хаан.

[←171]

Юпитер-эртний ромын бурхдын хаан. Нарны системийн
гарагийн хамгийн том нь.

[←172]

Орион — улаан замын тод ордны орд.

[←173]

Меркури — эртний ромын худалдааны бурхан, наранд ойр байдаг гараг.

[←174]

Хутагт Георгий — шашны домгоор муу зүгийн мангас луус дарсан архад.

[←175]

Веста — Гал голомтыг тэтгэгч ромын эх дагина. Тахилын ширээн дээр нь ариун онгон байхаа ам алдсан тайлгач охид мөнхийн гал барьж байдаг гэсэн домогтой.

[←176]

Би оточ (лат.)

[←177]

Болинброк Генри Сент-Жон (1678—1751) — Анна хатан хааны ерөнхий сайд, гүн ухаантан лорд Локкыг залгамжлан шашинд үл итгэх байдлаар хандаж байсан боловч, сүм хийд нь ард олныг боолчлох зэвсэг гэж үзэж байжээ. Вольтерийн анд байв.

[←178]

Библи хэмээх христосын хөлгөн судрын таван дэвтэр.

[←179]

Фартинг — Английн жижиг зоос.

[←180]

Даинэль Дефо (1660—1731) — «Робинзон Крузог»
зохиогч, сэтгүүлч, улс төрийн зүтгэлтэн хуврагуудыг элэглэн
шооллоо хэмээн, гутамшгийн баганад хүлэгдэн, шоронд орж
явжээ.

[←181]

Бүх юмыг танин мэдэх боломжтой (лат.)

[←182]

Чалчаа минь, өөрийгөө анагаа (лат.)

[←183]

Домгоор эрлэгийн гурван шүүгч.

[←184]

Гурван хүн зөвлөл болдог (лат.)

[←185]

Брут (МЭӨ 85—42) — Юлий Цезарийн дарангуйлалд дургүйцсэн сенатын гишүүдийн хуйвалдааны удирдагч. Кассий мөн хуйвалдаанд оролцогч, амиа хорлож үхжээ.

[←186]

Фарсалийн тулалдаан (МЭӨ 48) Юлий Цезарь, Помпей хоёрын хоорондох засгийн эрхийн төлөө тэмцлийн нэг үе. Энэ тулалдаанд Помпей ялагджээ.

[←187]

Актеон — Английн охин тэнгэр Артемидийг нүцгэн байхад нь харж зүрхэлсэн залуу анчин. Үүнээсээ болж буга болон хувирч, нохойд бариулжээ (грег домог)

[←188]

VI митридат (МЭӨ 32—63) — Ромтой эр эмээ үзэлцэж байсан понтийн хаан.

[←189]

Сципион (МЭӨ 234—183) — Карфагений эсрэг дайнд алдаршсан ромын жанжин.

[←190]

Тахиан толгой, бахан биетэй, могой сүүлтэй, толгой дээрээ
титэмтэй үлгэрийн мангас.

[←191]

Элиан (170—235) — грек хэлээр бичдэг ромын зохиолч

[←192]

Оппиан (II зуунд) — загас, ангийн тухай шүлэг бичсэн
грекийн яруу найрагч.

[←193]

Дундад зууны үед үндсийг нь их ид шидтэй гэдэг байсан ургамал.

[←194]

Плутарх (46—125) — «Грек, Ромын гайхамшигт хүмүүсийн амьдралыг» бичсэн грек түүхч.

[←195]

Христос багшийгаа худалдсан, архдын нэг. Сүүлдээ урвагч гэсэн утгатай болжээ.

[←196]

Хөөндэй өөрийнхөө зовлонгоор баадаг (лат.)

[←197]

Домогт гардаг, хүний цус сорж, үргэлж залуугаараа явдаг
хүн.

[←198]

Испани давхар алтан зоос

[←199]

Лондоны хий судлын эмнэлгийг ёжилсон нэр. Сүүлдээ
галзуугийн эмнэлэг гэсэн утгатай хэрэглэх болжээ.

[←200]

Ёроолгүй ангал, ёроолгүй ангалаа дууддаг (лат.)

[←201]

Леди — лордын эсвэл язгууртны эхнэр (анг.)

[←202]

II зууны үеийн грекийн романд гардаг хоорондоо сэтгэлтэй болсон малчид.

[←203]

грек домгоор өтөл хөгшин болтлоо бие биеэ хайрлан
энхрийлж байсан эр эм хоёр

[←204]

Авицен (980—1037) — Арабын гүн ухаантан.

[←205]

Уран барилгад дээврийн хөндлөвчийг тулж байдаг эмэгтэй хүний дүрстэй босоо тулуур (грек).

[←206]

Пигмалион — Өөрийн хийсэн гоо сайхны баримал Галатей бүсгүйд дурлачихсан уран барималч зураач. Бурхан, баримлыг нь амьдруулж, тэр нь зураачийн эхнэр болжээ (грек домог).

[←207]

Хавар гэдэг элдэв амьтны ороо ордог үе гэсэн утгаар
зохиогч хэлсэн бололтой.

[←208]

Грек домгоор бурхад байдаг тэнгэрийн орон. Одоо бол
ёжилсон утгаар хэрэглэх болжээ.

[←209]

Адонис — залуугийн гоо үзэсгэлэнгийн биелэл болсон грег
домгийн баатар.

[←210]

Гнафрон — Францын хүүхэлдэйн театрын муухай царайтай инээдмийн хүүхэлдэй.

[←211]

Ромын эзэн хаан Адрианы (86—136) шадар, гоо сайхнаараа алдаршсан залуу. Эртний барималд түүнийг дүрсэлсэн нь олонтоо.

[←212]

Эмзэг газар гэсэн үг. Грек домгоор Ахиллийн эх түүнийг ямар ч сумыг ажирдаггүй болгохын тул шидэт голын усанд дүрэхдээ, зөвхөн өсгийгөөс нь барьж байжээ. Ингээд тэр хэсэг нь сум нэвтрэхээр үлджээ.

[←213]

Нугас-ээж — Францын аман зохиолын баатар,
дэгдээхэйнүүддээ үлгэр ярин, сургадаг эм галуу.

[←214]

Эртний испани зэрэг оронд сурвалжит айлын охид,
бүсгүйчүүдийг даган, явдал үйлдлийг харж зөвлөдөг эмэгтэй.

[←215]

Фемида — Эртний грек домгоор нүдээ боож, гартаа дэнс барьсан шүүхийн тэнгэр.

[←216]

Дохиогоор босоод гар (лат.)

[←217]

Жижиг (анг.)

[←218]

Хууль, хаан, харц (лат.)

[←219]

Habeas corpus act — 1679 онд английн улсын хурлаас гаргасан хууль. Хөрөнгөлөг хүмүүсийн хувийн эрхийг хамгаалах баталгаатай болгоход зориулагджээ.

[←220]

Битүүмжилсэн бичиг (фр.)

[←221]

Уолнол Роберт — Английн гүн 1721—1742 онд ерөнхий сайд байжээ. Хээл хахууль өгөх замаар их нөлөөтэй болж чадсан хүн байв.

[←222]

Нейгоф Теодор (1688—1756) — Флоренцад байсан австрийн төлөөний хүн. 1736 онд корсикт хаан болж үзээд, дараа нь зугтаан Европоор тэнэн явсан үл бүтэх этгээд.

[←223]

Фемгерихт — Дундад зууны германы шүүх, ялын тогтоол гарган, нууцаар цаазлан гүйцэтгэдэг байжээ.

[←224]

Византийн эзэн хаан (527—565)

[←225]

Нохой хуцдаг, хуулийн хүмүүс дуугаа хураадаг. — Хуульд
үйлчилнэ гэдэг бол дуугай байна гэсэн үг (лат.)

[←226]

Эзэн хаан таг чиг болгодог (лат.)

[←227]

Өөрийн үүргийг дуугай биелүүлэх ёстой олон бэрээ
баригчийг байлгах болно (лат.)

[←228]

Дохиогоор зангасан зарлигаар бос. Чимээ имээгүй бай.
Хааны тааллаар баривчлах үед биеэ ингэж авч байх хэрэгтэй
(лат.).

[←229]

Эртний нормандын горим (лат.)

[←230]

Юлдний үйлчлэгч (лат.)

[←231]

Сэлмийн бага дарга (лат.)

[←232]

Мортимер Рожер (1286—1330) — Гуравдугаар Эдуардыг насанд хүртэл, эх хатан хаан Изабеллийн хамт төр барьж байв. Дараа нь Эдуардад цаазлуулсан.

[←233]

Барвик Ричард Мивель (1428—1471) — Улаан цагаан сарнайн дайны үеэр нэг удаа Йорк нөгөө удаа Ланкестерийн талд орж асан «хаадыг хийдэг хүн» хочтой английн том феодал.

[←234]

Хуйвалдаан гаргагч, дайрсан зохиолын тухай (лат.)

[←235]

III Георг (1428—1471) — Английн хаан.

[←236]

Хоёрдугаар Иаковын хүү Иаков Стюартыг хэлжээ. Нэг бус удаа хаан ширээнд суухыг оролдоод бүтээгүй ажээ.

[←237]

Тристан Даяанч, Луи — Францын хаан XI Людовикийн дэргэд байсан шүүгч, алуурч хүн. Хэрцгийгээрээ нэрд гарчээ.

[←238]

Шененсо — Тур хотын дэргэдэх хааны шилтгээн. XV зуунд
Шер гол дээр барьжээ.

[←239]

Жон Ховард (1725—1790)—Өөрийн үеийн шоронгийн
байдлыг судалсан английн нигүүлсэн ивээгч.

[←240]

Албин зэтгэрүүд бол олон чөтгөрт ороогдсон амьтад.
Аминдаа ганц чөтгөртэйг нь бол, ухаан самуурсан солиот (лат.)

[←241]

Тоуэр (англиар цамхаг гэсэн үг) — Хааны бэхлэлт шилтгээн байснаа, XVII зуунаас английн гол шорон болжээ.

[←242]

Цамхгийн харгалзагч (лат.)

[←243]

Алдартай, жавхлант (лат.)

[←244]

Зөв төлөвлөгөө (лат.)

[←245]

Мэдэхгүй байна (лат.)

[←246]

Ойн даамал (анг.)

[←247]

Онцгой мөрдөн байцаагч (анг.)

[←248]

Д'Аржансон Рене (1625—1723) — Хорь гаруй жил XIV Людовикийн цагдаагийн газрын дарга байхдаа, les titres de cachet (доторх нэрийг нь цагдаагийн газрын үзэмжээр тавьдаг, хааны мутар зурсан баривчлах тушаал)-гийн тусламжаар бүх хүнийг, язгууртнуудыг хүртэл айлгадаг байжээ.

[←249]

Анир чимээгүйн гэрч үүдний манаач нар оруулах.

[←250]

Ирландын эх оронч, хувьсгалчийн нэг (1867 оны тавдугаар сар) (зохиогч).

[←251]

Эртний уран барималд бэлгэ эрхтнийг энэ навчаар
төлөөлүүлдэг байжээ.

[←252]

Хөрөнгө зөөрөө гудрагч, үрлэгч, байгаагаа барагч
татаангуй хуялч, зууч, архичин, наргин дургигч, бялангач, өвөө
үрэн таран хийгч бүрэлгэн шамшигдуулагч, идэмхий чихүүр
хүн (лат.)

[←253]

Английн баримт бичиг (лат.)

[←254]

Гинж, нүх, дөнгө болон бусад (лат.)

[←255]

Түүнээс гадна (лат.)

[←256]

Хуулийн зохих холбоо (лат.)

[←257]

Идэх уухыг тэвчих (лат.)

[←258]

Өгөх зүйлийг багасган, идэх уухыг тэвчихийг ихэсгэх.
Британийн ерийн хууль (лат.)

[←259]

Ялт хэрэгтний үхэл бол хуулийг хүндэлж буй хэрэг (лат.)

[←260]

Буруугаа хүлээсэн хүн meldefeoh авна. Инын хууль (лат.)

[←261]

Үхэхийн өмнөх дурлалын уулзалт (лат.)

[←262]

Дөрөв дэх өдөр нүүрэлдэхээр тогтох (лат.)

[←263]

Амыг нь чихэнд нь хүртэл цуулсан (лат.)

[←264]

Ахмад (исп.)

[←265]

Хааны тааллаар (лат.)

[←266]

Бусдын зохиолыг өөрийн болгодог хүн. Нэг ёсны зохиолын
хулгайч (фр.)

[←267]

Өөрийн болгох (лат.)

[←268]

Хуулиас гадуур хувьдаа эзэмших (лат.)

[←269]

Хүүхэд наймаалдаг чамд, чиний нэр плажьер (лат.)

[←270]

Бидлоо Роберт (1649—1713) — голландын нэртэй эмч

[←271]

Урьд нь харагдсан байхыг тэр хүснэ (лат.)

[←272]

Ласнер Пыр Франсуа (1800—1836) — Парист нийтийн өмнө цаазлагдсан эрүүгийн гэмт хэрэгтэн. Цаазлуулсных нь дараа дуртгал нь хэвлэгджээ.

[←273]

Христина (1626—1682) — шведийн хатан хаан. 1654 онд хаан ширээнээсээ бууж Шведээс Парист иржээ. Шадар хүн бэйл Монадельскийгээ санаа урвалаа гэж сэжиглэн 1657 онд цаазалжээ.

[←274]

Тиберий Клавди — ромын эзэн хаан (14—37) харгис догшин, бялангач зантай захирагч. Олны өс хонзонгоос айхдаа 26 оноос, бүхнээс дайжин Канри аралд нуугдаж байжээ.

[←275]

Хоёрдугаар Филипп — Испанийн хаан (1527—1598)
дураараа дургин дарангуйлагч. Испанид хэмжээгүй эрхт ёсыг
тогтоохоор эрмэлзэн, эрүүдэн шүүх газрын оролцоотойгоор
протестант шашинтныг нухчин дарж байв.

[←276]

Симанкасын архив — Испанийн хаадын Симанкос хотод байдаг архив! Хуучин шилтгээний дөчин зургаан тасалгааг эзэлдэг байжээ. Ялангуяа XV зуунаас XVII зууны үеийн баримт бичиг бүрэн байдаг аж. Гаднын хүн оруулдаггүй байсан гэдэг.

[←277]

ХОВЧ (лат.)

[←278]

Сурвалжтаны дотроос хөөгдсөн хүн доод зиндаанд
нүүрээрээ тулдаг (лат.)

[←279]

Бидний харьяатын амьдрал, эд хөрөнгө бидэнд
хамаарагдана (лат.)

[←280]

Юуг ч гайхахгүй байх (лат.)

[←281]

Тавиад, тоолоод, хуваасан (лат.). Вавилон хотыг сөнөхийг
ёрлон ордны ханан дээр галан үсгээр гарч ирсэн гэдэг
домогтой.

[←282]

Morganatique — Хааны талаас, хаан ноёны цусан төрөл
биш хүнтэй гэрлэхэд албан ёсны бус хэмээн тооцохыг хэлнэ
(фр.)

[←283]

Хумбольдт Александр (1789—1859) — германы нэрт газарзүйч, байгалийн судлаач.

[←284]

Страсбургийн сүмийн ганжир тэр үедээ л өндөрт тоологдох
142 метр байжээ.

[←285]

Сцилла ба Харибда — Далайн нарийхан хоолойн эрэгт амьдардаг асан хоёр мангас (грек домог). «Сцилла ба Харибда хоёрын дунд» гэдэг нь хоёр галын хооронд хавчуулагдах гэсэн утгатай үг.

[←286]

Хөгширсөн хойноо дурлах ичгүүртэй (лат.)

[←287]

Протей — Олон янзаар хувилдаг увдистай далайн бурхан
(грег домог).

[←288]

Харц ард бол хотын шаар (лат.)

[←289]

Альбуберк Альфансо (1452—1516) — Клонуудыг байлдан дагуулагч, португалын далайчин.

[←290]

Ой мод консулд тэнцэх болтугай (лат.)

[←291]

Иргэд ээ, алгаа ташицгаа (лат.)

[←292]

Бух хэлэн дээр (лат.)

[←293]

Хана нь дүлий, хонх нь хэлгий (лат.)

[←294]

Хэлгий (лат.)

[←295]

Үүний дараа гэдэг нь үүний үр дагавар гарлаа гэсэн хэрэг
хараахан биш (лат.)